

Namo tassa bhagavato arahato sammāsambuddhassa

## Dīghanikāye

### Pāthikavaggaṭikā

#### 1. Pāthikasuttavaṇṇanā

##### Sunakkhattavatthuvaṇṇanā

1. **Apubbapadavaṇṇanā**ti atthasaṃvaṇṇanāvasena heṭṭhā aggahitatāya apubbassa abhinavassa padassa vaṇṇanā atthavibhāvanā. “Hitvā punappunāgatamattha”nti (dī. ni. aṭṭha. 1.ganthārambhakathā) hi vuttam. **Mallesūti** ettha yaṃ vattabbaṃ, taṃ heṭṭhā vuttanayameva. **Chāyūdakasampanne vanasaṇḍe viharatīti** anupiyasāmantā katassa vihārassa abhāvato. Yadi na tāva pavīṭṭho, kasmā “pāvisī”ti vuttanti āha “**pavisissāmī**”tiādi, tena avassaṃ bhāvini bhūte viya upacārā hontīti dasseti. Idāni tamatthaṃ upamāya vibhāvento “**yathā ki**”ntiādimāha. **Etanti** etaṃ “atippago kho”tiādikam cintanam **ahosi. Ativiya pago khoti** ativiya pātova. Channakopīnatāya, paribbājakapabbajjupagamena ca **channaparibbājakam**, na naggaparibbājakam.

2. Yasmā bhagavato uccākulappasutataṃ, mahābhinnikkhamananikkhantataṃ, anaññasādhāraṇadukkaracaraṇam, vivekavāsam, lokasambhāvitataṃ, ovādānusāsanihi lokassa bahupakāratam, parappavādamaddanam, mahiddhikataṃ, mahānubhāvataṃti evamādikam taṃtaṃattapaccakkhagaṇavisesam nissāya yebhuyyena aññatitthiyāpi bhagavantam disvā ādaragāravabahuṃmānam dassentiyeva, tasmā vuttam “**bhagavantam disvā mānathaddhatam akatvā**”tiādi. **Lokasamudācāravasenāti** lokopacāravasena. **Cirassanti** cirakālena. **Ādīni vadanti** upacāravasena. **Tassāti** bhaggavagottassa paribbājakassa. **Gihisahāyoti** gihikālato paṭṭhāya sahāyo. **Paccakkhātoti** yenākārena paccakkhānā, taṃ dassetuṃ “**paccakkhāmī**”tiādi vuttam.

3. **Uddissāti** satthukārabhāvena uddissāti ayamettha adhippāyoti taṃ dassento “**bhagavā me**”tiādimāha. Yādā sunakkhattassa “bhagavantam paccakkhāmī”ti cittaṃ uppannam, vācā bhinnā, tadā evassa bhagavatā saddhiṃ koci sambandho natthi asakyaputtiyabhāvato sāsanato paribāhiratā. Ayaṃ tāvettha sāsanayutti, sā panāyam ṭhapetvā sāsanayuttikovide aññesaṃ na sammadeva visayoti bhagavā sabbasādhāraṇavasenessa attanā sambandhābhāvaṃ dassetuṃ “**api nū**”ti ādiṃ vatvā sunakkhattam “**ko santo kam paccācikkhasī**”ti āha. Yasmā mukhāgatoyam sambandho, na pūjāgatādiko, yo ca yācakayācitabbatāvasena hoti, tadubhayañcettha natthīti dassento bhagavā sunakkhattam “ko santo kam paccācikkhasī”ti avoca, tasmā tamatthaṃ dassetuṃ “**yācako vā**”tiādi vuttam. Yācitako vā yācakam paccācikkheyyāti sambandho. **Tvam pana neva yācako** “ahaṃ bhante bhagavantam uddissa viharissāmī”ti evam mama santikam anupagatatā. **Na yācitako** “ehi tvam sunakkhatta mamaṃ uddissa viharāhī”ti evam mayā apatthitattā.

**Ko samānoti** yācakayācitakesu ko nāma honto. **Kanti** yācakayācitakesu eva kam nāma hontam maṃ **paccācikkhasi. Tucchapurisāti** jhānamaggādiuttarimanussadhammesu kassacipi abhāvā rittapurisā. Nanu cāyam sunakkhatto lokiyajjhānāni, ekaccābhīññaṇca uppādesīti? Kiñcāpi uppādesi, tato pana bhagavati āghātuppādanena saheva parihīno ahosi. Aparādho nāma suppaṭipattiyā virajjanahetubhūto kilesuppādoti āha “**yattako te aparādho, tattako doso**”ti. **Yāvañcāti** avadhiparicchedabhāvadassanam “yāvañca tena bhagavatā”tiādīsu (dī. ni. 1.3) viya. **Teti** tayā. **Idanti** nipātamattam. **Aparaddhanti** aparajjhitaṃ. Idaṃ vuttam hoti – “paccācikkhāmīdānāham bhante bhagavanta”ntiādi vadantena tucchapurisa tayā yāvañcidaṃ aparaddham, na tassa aparādhassa

pamāṇaṃ atthīti.

4. **Manussadhammā**ti bhāvanānuyogena vinā manussehi anuṭṭhātabbadhammā. So hi manussānaṃ cittādhiṭṭhānamattena ijjanato tesam sambhāvitadhammo viya ṭhito tathā vutto, manussaggahaṇaṇicettha tesu bahulaṃ pavattanato. **Iddhibhūtaṃ pāṭihāriyaṃ**, na ādesanānusāsanaṃ pāṭihāriyanti adhippāyo. **Kateti** pavattite. **Niyyātīti** niggacchati, vaṭṭadukkhato niggamanavasena pavattatīti attho. Dhamme hi niggacchante taṃsamaṅgipuggalo “niggacchatī”ti vuccati, aṭṭhakathāyaṃ pana ni-saddo upasaggamattaṃ, yāti icceva atthoti dassetuṃ **gacchatīti** attho vutto. **Tatrāti** padhānabhāvena vuttassa atthassa bhummavasena paṭiniddesoti tasmīṃ dhamme sammā dukkhakkhayāya niyyanteti ayamettha atthoti dassento āha “**tasmīṃ...pe... saṃvattamāne**”ti.

5. Agganti nāyatīti **aggaññaṃ**. **Lokapaññattinti** lokassa paññāpanaṃ. **Lokassa agganti** lokuppattisamaye “**idaṃ nāma lokassa agga**”nti evaṃ **jānitabbaṃ** bujjhitabbaṃ. **Aggamariyādanti** ādimariyādaṃ.

6. **Ettakaṃ vippalapitvāti** “na dānāhaṃ bhante bhagavantaṃ uddissa viharissāmī”ti, “na hi pana me bhante bhagavā uttarimanussadhammā iddhipāṭihāriyaṃ karotī”ti, “na hi pana me bhante bhagavā aggaññaṃ paññapetī”ti ca ettakaṃ vippalapitvā. **Idaṃ kira so bhagavā satthukiccaṃ iddhipāṭihāriyaṃ, aggaññapaññāpanaṇca kātuṃ na sakkotīti pakāsento kathesi.** Tenāha “**sunakkhatto kirā**”tiādi. Uttaravacanavasena patiṭṭhābhāvato **appaṭiṭṭho**. Tato eva **niravo** nissaddo.

**Ādīnavadassanattanti** diṭṭhadhammikassa ādīnavassa dassanattaṃ. Tenāha “**sayameva garahaṃ pāpuṇissasī**”ti. Samparāyikā pana ādīnavā anekavidhā, te dassento sunakkhatto na saddaheyyāti diṭṭhadhammikasseva gahaṇaṃ. **Anekakāraṇenāti** “ītipi so bhagavā araha”ntiādinā (dī. ni. 1.157, 255) anekavidhena vaṇṇakāraṇena. Evaṃ me avaṇṇo na bhavissatīti ajjhāsayaena **attano bālatāya** vaṇṇārahānaṃ **avaṇṇaṃ kathetvā**. Evaṃ bhagavā makkhibhāve ādīnavaṃ dassetvā puna tassa kathane kāraṇaṃ vibhāvetuṃ “iti kho te”tiādimāhāti taṃ dassetuṃ “**tato**”tiādi vuttaṃ. Evañhi sunakkhattassa appakopi vacanokāso na bhavissatīti. **Apakkamīti** attanā yathāṭṭhitā vuṭṭhāya apasakki. **Apakkanto** sāsanato bhaṭṭho. Tenāha “**cuto**”ti. **Evamevāti** apakkamanto ca na yathā tathā apakkami, yathā pana kāyassa bheda apāye nibbatteyya, evameva **apakkami**.

### Korakhattiyavattuvaṇṇanā

7. **Dvīhi padehīti** dvīhi vākyehi **āraddhaṃ** byatirekavasena tadubhayatthaniddesavasena uparidesanāya pavattatā. **Anusandhidassanavasena**ti yathānusandhisankhātānusandhidassanavasena.

**Ekaṃ samayanti** ca bhummatthe upayogavacananti āha “**ekasmīṃ samaye**”ti ca. **Thūlū nāma janapadoti** janapadīnaṃ rājakumārānaṃ vasena tathāladhanāmo. Kukkuravataṃ samādānavasena etasmīṃ atthīti **kukkuravatikoti** āha “**samādinnaṃ kukkuravato**”ti. **Aññampīti** “catukkoṇḍikasaveva vicaraṇaṃ, tathā katvāva khādanaṃ, bhujjanaṃ, vāmapādaṃ uddharitvā muttassa vissajjana”nti evamādikāṃ aññampi sunakhehi kātabbakiriyaṃ. Catūhi sarīrāvayavehi kuṇḍanaṃ gamaṇaṃ **catukkoṇḍo**, so etasmīṃ atthīti **catukkoṇḍiko**. So pana yasmā catūhi sarīrāvayavehi saṅghaṭṭitagamano hoti, tasmā vuttaṃ “**catusaṅghaṭṭito**”ti. Tenevāha “**dve jaṇṇūnī**”tiādi. **Bhakkhasanti** vā bhakkhitabbaṃ, asitabbaṇca. Tenevāha “**yaṃ kiñci khādanīyaṃ bhojanīya**”nti. Kāmaṃ khādanaṇca nāma mukhena kātabbaṃ, hatthena pana tattha upanāmanaṃ nivāretuṃ avadhāraṇaṃ katanti āha “**hatthena aparāmasitvā**”ti, aggahetvāti attho. **Sundararūpoti** sundarabhāvo. **Vatāti patthanatthe nipāto** “aho vatāhaṃ lābhī assa”ntiādisu viya. “Samaṇena nāma evarūpena bhavitabbaṃ aho vatāhaṃ ediso bhaveyya”nti evaṃ tassa patthanā ahosi. Tenāha “**evaṃ kirā**”tiādi.

**Garahatthe api-kāro** “api siñce palaṇḍaka”ntiādisu viya. **Arahante ca** buddhe, buddhasāvake “arahanto khīṇāsavā na hontī”ti **evaṃ tassa diṭṭhi uppanā**. Yathāha **mahāsīhanādasutte** “natthi

samaṇassa gotamassa uttarimanussadhammā alamariyaññadassanavisesā’’ti (ma. ni. 1.146). **Sattamaṃ divasanti** bhummatthe upayogavacanam. **Alasakenāti** ajīraṇena āmarogena.

Aṭṭhitacamattatāya **purāṇapaṇṇasadiṣo. Bīraṇatthambakanti** bīraṇagacchā.

Mattā etassa atthīti **mattam**, bhojanamattavantanti attho. Tenāha “**pamāṇayutta**’’nti. **Mantā mantāti** mantāya mantāya.

**8. Ekadvīhikāya** gaṇanāya. **Nirāhārova ahoṣi** bhagavato vacanam aññathā kātukāmo, tathābhūtopi sattame divase upaṭṭhākena upanītam bhakkhasam disvā “‘dhī’’ti upaṭṭhāpetum asakkonto bhojanataṇhāya ākaḍḍhiyamānahadayo tam kucchipūram bhuñjitvā bhagavatā vuttaniyāmeneva kālamakāsi. Tena vuttam “**athassā**’’tiādi. **Sacepi...pe... cinteyyāti** yadi eso acelo “‘dhī’’ti paccupaṭṭhapetvā “‘ajjapi aham na bhuñjeyya’’nti cinteyya, tathācintane satipi devatāviggahena **tam divasam...pe... kareyya**. Kasmā? **Advejjhavacanā hi tathāgatā**, na tesam vacanam vitatham hoti.

**Gatagataṭṭhānam aṅgaṇameva hotīti** tehi tam kaḍḍhitvā gacchantehi gatagatapadeso uttarakasāmantā vivaṭaṅgaṇameva hutvā upaṭṭhāti. **Teti titthiyā. Susānamyeva gantvāti** “‘bīraṇatthambakam atikkamissāmā’’ti gacchantāpi anekavāram tam anusamāyāyitvā punapi tamyeva susānam upagantvā.

**9. Idanti idam matasarīram. “Tameva vā sarīram kathāpesīti** tam sarīram adhiṭṭhahitvā ṭhitapetena kathāpesī’’ti keci. Korakhattiyam vā asurayonito ānetvā kathāpetu aññam vā petam, ko ettha viseso. “**Acinteyyo hi buddhavisayo**’’ti pana vacanato tadeva sarīram sunakkhattena pahatamattam buddhānubhāvena utthāya tamattham ṇāpesīti daṭṭhabbam. Purimoyeva pana attho aṭṭhakathāsu vinicchito. Tathā hi vakkhati “‘nibbattaṭṭhānato’’tiādi (dī. ni. aṭṭha. 3.10).

**10. Vipākanti** phalam, atthanibbattīti attho.

**Samānetabbānīti** sammā ānetabbāni, sarūpato ānetvā dassetabbānīti attho. Pāṭihāriyānam paṭhamādītā bhagavatā vuttānupubbīyā veditabbā. Keci panettha “‘paracittavibhāvanam, āyuparicchedavibhāvanam, byādhivibhāvanam, gativibhāvanam, sarīranikkhepavibhāvanam, sunakkhattena saddhim kathāvibhāvanañcāti cha pāṭihāriyānī’’ti vadanti, tam yadi sunakkhattassa cittavibhāvanam sandhāya vuttam, evam sati “‘sattā’’ti vattabbam tassa bhāviavaṇṇavibhāvanāya saddhim. Atha acelassa maraṇacittavibhāvanam, tam “‘sattamaṃ divasam kālam karissatī’’ti iminā saṅgahitanti visum na vattabbam, tasmā aṭṭhakathāyam vuttanayeneva gahetabbam.

### **Acelakaḷāramatṭakavatthuvaṇṇanā**

**11. Nikkhandantamattakoti** nikkhandanto matṭako. So kira acelakabhāvato pubbe matṭakito hutvā vicari vivaradanto ca, tena nam “‘koramatṭako’’ti sañjānanti. Yam kiñci tassa dento “‘sādhurūpo ayam samaṇo’’ti sambhāvento aggam seṭṭhamyeva denti. Tena vuttam “‘**lābhaggaṃ patto, aggalābham patto**’’ti. Bahū acelakā tam parivāretvā vicaranti, gahaṭṭhā ca tam bahū aḍḍhā vibhavasampannā kālena kālam upasaṅkamitvā payirupāsanti. Tena vuttam “‘**yasaggaṃ aggaparivāram patto**’’ti. **Vatāniyeva** pajjitabbato padāni. Aññamaññam asaṅkarato **vatakoṭṭhāsā vā. Samattānīti** samam attani gahitāni. **Puratthimenāti ena-saddasambandhena** “‘vesāli’’nti upayogavacanam, avidūratthe ca **ena-saddo** pañcamyantoti āha “‘**vesālito avidūre**’’ti.

**12. Sāsane** paricayavasena **tilakkaṇāhatam pañham pucchi. Na sampāyāsīti** nāvabujjhi na sampādesi. Tenāha “‘**sammā ṇāṇagatiyā**’’tiādi. **Sampāyanam** vā sampādanam. Pañham puṭṭhassa ca **sampādanam** nāma sammadeva kathananti tadabhāvam dassento “‘**atha vā**’’tiādimāha. Kopavasena tassa akkhīni kampanabhāvam āpajjimsūti āha “‘**kampanakkhīni parivattetvā**’’ti. **Kopanti** kodham,

so pana cittassa pakuppanavasena pavattatī āha “**kuppanākāra**”nti. **Dosanti** āghātaṃ, so pana ārammaṇe dussanavasena pavattatī āha “**dussanākāra**”nti. **Atuṭṭhākāranti** tuṭṭhiyā pītiyā paṭipakkhabhūtapavattiākāraṃ. Kāyavacīvikārehi **pākaṭamakāsi**. **Mā vata notī** ettha **māti** paṭikkhepo, **notī** mayhanti atthoti āha “**aho vata me na bhaveyyā**”ti. **Maṃ vata notī** ettha pana **notī** saṃsayeti āha “**ahosi vata nu mamā**”ti.

**14. Paripubbo dahita**-saddo vatthanivāsanaṃ vadatī āha “**paridahito nivatthavatto**”ti. Yasanimittakatāya lābhassa yasaparihāniyāva lābhaparihāni vuttā hotīti pāliyaṃ “**yasā nihīno**”ti vuttaṃ.

### Acelapāthikaputtavattuvaṇṇanā

**15.** “Ahaṃ sabbaṃ jānāmi”ti evaṃ sabbaññutaññānaṃ vadati paṭijānātīti ñāṇavādo, tena mayā **ñāṇavādena saddhiṃ**. **Atikkamma gacchatoti** upaḍḍhabhāgena paricchinnam padesaṃ atikkamitvā iddhipāṭihāriyaṃ kātuṃ gacchato. Kiṃ paṇāyaṃ acelo pāthikaputto attano pamāṇaṃ na jānātīti? No na jānāti. Yadi evaṃ, kasmā sukkhagajjitaṃ gajjīti? “Evāhaṃ loke pāsamsa bhavissāmi”ti kohaṇṇe katvā sukkhagajjitaṃ gajji. Tena vuttaṃ “**nagaravāsino**”tiādi. **Paṭṭhapetvāti** yugaggāhaṃ ārabhitvā.

**16. Hīnajjhāsayaattā...pe... udapādi.** Vuttañhetam “hīnādhimuttikā sattā hīnādhimuttike eva satte sevanti bhajanti payirupāsanti”ti (saṃ. ni. 2.98).

Yasmā tathāvuttā vācā tathārūpacittahetukā, tañca cittaṃ tathārūpadiṭṭhicittahetukam, tasmā “taṃ vācaṃ appahāyā”ti vatvā yathā tassā appahānaṃ hoti, taṃ dassento “taṃ cittaṃ appahāyā”ti āha, tassa ca yathā appahānaṃ hoti, taṃ dassetuṃ “taṃ diṭṭhiṃ appaṭinissajjitvā”ti avoca. Yasmā vā tathārūpā vācā mahāsāvajjā, cittaṃ tato mahāsāvajjatarāṃ taṃsamuṭṭhāpakabhāvato, diṭṭhi pana tato mahāsāvajjatamā tadubhayassa mūlabhāvato, tasmā tesam mahāsāvajjatāya imaṃ vibhāgaṃ dassetvā ayaṃ anukkamo ṭhapitoti vedītabbo. Tesam pana yathā pahānaṃ hoti, taṃ dassetuṃ “**aha**”ntiādi vuttaṃ. “**Nāhaṃ buddho**”ti vadantoti sātheyyena vinā ujukameva “ahaṃ buddho na homī”ti vadanto. **Cittadiṭṭhippahānēpi** eseva nayo. **Vipateyyāti** ettha **vi**-saddo paṭhame vikappe upasaggamattaṃ, dutiye pana visaraṇatthoti āha “**sattadhā vā pana phaleyyā**”ti.

**17. Ekamsenāti** ekantena, ekantikaṃ pana vacanapariyāyavinimuttaṃ hotīti āha “**nippariyāyenā**”ti. **Odhāritāti** avadhāritā niyametvā bhāsītā. **Vigatarūpenāti** apagatasabhāvena. Tenāha “**vigacchitasabhāvenā**”ti, iddhānubhāvena apanītasakabhāvena. Tena vuttaṃ “**attano**”tiādi.

**18.** Dvayaṃ gacchatīti **dvayagāminī**. Kīdisaṃ dvayanti āha “**sarūpenā**”tiādi. Ayañhi so gaṇḍassuparihoṭṭhabbādosam.

**19.** Ajitassa licchavisenāpatissa mahāniraye nibbattivā tato āgantvā acelassa pāthikaputtassa santike parodanaṃ. **Abhāvāti** pubbe vuttappakārassa pāṭihāriyakaraṇassa abhāvā. Bhagavā pana sannipatitaparisāyaṃ pasādajananatthaṃ tadanurūpaṃ pāṭihāriyamakāsiyeva. Yathāha “**tejodhātuṃ samāpajjitvā**”tiādi.

### Iddhipāṭihāriyakathāvaṇṇanā

**20.** Nicayanaṃ dhanadhaññānaṃ sañcayanaṃ **nicayo**, tattha niyuttāti **necayikā**, gahapati eva necayikā **gahapatinecayikā**. Ettakāni jaṅghasahassānīti parimāṇābhāvato **sahassehipi aparimāṇagaṇanā**. **Tenevāti** imassa vasena sannipatitāya evaṃ mahatīyā parisāya bandhanamokkham kātuṃ labbhati, eteneva kāraṇena.

**21. Cittutrāsabhayanti** cittassa utrāsanākārena pavattabhayaṃ, na ñāṇabhayaṃ, nāpi “bhāyati etasmā”ti evaṃ vuttaṃ ārammaṇabhayaṃ. **Chambhitattanti** teneva cittutrāsabhayena sakalasarīrassa chambhitabhāvo. **Lomahaṃsoti** teneva bhayena, tena ca chambhitattena sakalasarīre lomānaṃ haṭṭhabhāvo, so pana tesam bhittiyam nāgadantānaṃ viya uddhammukhatāti āha “**lomānaṃ uddhaggabhāvo**”ti. **Antantena āvijjhivāti** attano nisīdanattham nigūḷhaṭṭhānaṃ upaparikkhanto paribbājakārāmaṃ pariyantena anusamāyāyitvā, kassacideva sunakkhattassa vā sunakkhattasadisassa vā sabbaññupaṭiññaṃ appahāya satthu sammukhībhāve sattadhā tassa muddhāphalanaṃ dhammatā. Tena vuttaṃ “**mā nassatu bālo**”tiādi.

**22. Saṃsappatīti** tattheva pāsāṇaphalake bāladārako viya uṭṭhātuṃ asakkonto avasīdanavasena ito cito ca saṃsappati. Tenāha “**osīdatī**”ti. **Tattheva sañcaratīti** tasmimyeva pāsāṇe ānisadupaṭṭhino sañcalanaṃ nisajjavaseneva sañcarati, na uṭṭhāya padasā.

**23. Vinaṭṭharūpoti** sambhāvanāya vināsena, lābhassa vināsena ca vinaṭṭhasabhāvo.

Paṭhamabhāṇavāraṇṇanā niṭṭhitā.

**25. Goyuttehīti** balavantabalībaddayo jitehi.

**26. Tassāti** jāliyassa. Ayañhi maṇḍisena paribbājakena saddhiṃ bhagavantaṃ upasaṅkamitvā dhammaṃ suṇi, tato puretaraṃ bhagavato guṇānaṃ ajānanakāle ayam pavatti. Tenevāha “**tiṭṭhatu tāva pāṭihāriyaṃ...pe... parājayo bhavissati**”ti.

**27. Tiṇasīhoti** tiṇasadisaharitavaṇṇo sīho. **Kālasīhoti** kāḷavaṇṇo sīho. **Paṇḍusīhoti** paṇḍuvaṇṇo sīho. **Kesarasīhoti** kesaravanto setavaṇṇo, lohitavaṇṇo vā sīho. **Migaraññoti** ettha **miga**-saddo kiñcāpi pasadakurungādīsu kesucideva catuppadesu niruḷho, idha pana sabbasādhāraṇavasenāti dassento “**migaraññoti sabbacattuppadānaṃ rañño**”ti vuttaṃ. Āgantvā seti etthāti **āsayo**, nivāsanaṭṭhānaṃ. **Sīhanādanti** parissayānaṃ sahanato, paṭipakkhassa ca hananato “sīho”ti laddhanāmassa migādhipassa ghosaṃ, so pana tena yasmā kutocipi abhītabhāvena pavattiyati, tasmā vuttaṃ “**abhītanāda**”nti. Tattha tattha tāsu tāsu disāsu gantvā caritabbatāya bhakkhitabbatāya **gocaro** ghāsoti āha “**gocarāyāti āhāratthāyā**”ti. **Varam varanti** migasaṅghe migasamūhe mudumaṃsatāya varam varam mahimsavanavarāhādiṃ vadhitvāti yojanā. Tenāha “**thūlam thūla**”nti. Varavarabhāvena hi tassa varabhāvo icchito. Sūrabhāvaṃ sannissitaṃ **sūrabhāvasannissitaṃ**, tena. Sūrabhāvenāpi hi “kiṃ ime pāṇake dubbale hantvā”ti appathāmesu pāṇesu kārūññaṃ upatiṭṭhati.

**28. Vighāsoti** parassa bhakkhitasesatāya virūpo ghāso vighāso, ucchiṭṭhaṃ. Tenāha “bhakkhitātirittamaṃsa”nti, tasmim **vighāse**, vighāsanimittanti attho. **Asmimānadosenāti** asmimānadosahetu, ahaṃkāranimittanti attho. So panassa asmimāno yathā uppajji, taṃ dassetuṃ “**tatrāya**”ntiādi vuttaṃ.

“Segālakamaṃyevā”tipi pāṭho, yathāvuttova attho. **Bheraṇḍakamaṃyevāti** bheraṇḍasakuṇaravasadisamaṃyeva, **bheraṇḍo** nāma eko pakkhī dvimukho, tassa kira saddo ativiya virūpo amanāpo. Tenāha “**appiyaamanāpasaddamevā**”ti. Sammāpaṭipattiyā visesato suṭṭhu gatāti **sugatā**, sammāsambuddhā. Te apadāyanti sodhenti sattasantānaṃ etehīti **sugatāpadānāni**, tisso sikkhā. Yasmā tāhi te “sugatā”ti lakkhīyanti, tā ca tesam ovādabhūtā, tasmā “**sugatalakkhaṇesū**”tiādi vuttaṃ. Yadi tā sugatassa lakkhaṇabhūtā, sāsanaabhūtā ca, kathaṃ panesa pāṭhikaputto tattha tāsu sikkhāsu jīvati, ko tassa tāhi sambandhoti āha “**etassa hī**”tiādi. **Sambuddhānaṃ demāti dentīti** buddhasaññāya dentīti adhippāyo. Tena **esa...pe... jīvati nāma** na sugatanvayaajjhupagamanato. “**Tathāgate**”tiādi ekatte puthuvacananti āha “**tathāgata**”ntiādi. **Bhuvacanaṃ eva** garusmiṃ ekasmimpi bhuvacanappayogato **ekavacanaṃ viya vuttaṃ** vacanavipallāsena.

29. **Samekkhitvā**ti samaṃ katvā micchādassanena apekkhitvā, taṃ pana apekkhanaṃ tathā maññaṇamevāti āha “**maññitvā**”ti. Pubbe vuttaṃ samekkhanaṃ pi maññaṇaṃ evāti vuttaṃ “**amaññīti puna amaññitthā**”ti, tena aparāparaṃ tassa maññaṇappavattiṃ dasseti. Bheraṇḍakaravaṃ kosati vikkosati **kotthu**.

30. Te te pāṇe byāpādentō ghasatīti byagghoti iminā nibbacanena “byaggho”ti migarājassapi siyā nāmantī āha “**byagghoti maññatīti sīhohamasmīti maññatī**”ti. Yadi pi yathāvuttanibbacanavasena sīhōpi “byaggho”ti vattabbataṃ arahati, byaggha-saddo pana migarāje eva niruḥhoti dassento “**sīhena vā**”tiādimāha.

31. Sīhena vicaritavane saṃvaḍḍhattā vuttaṃ “mahāvane suññaṇavane vivaḍḍho”ti.

34. **Kilesabandhanā**ti taṇhābandhanato. Taṇhābandhanañhi thiraṃ daḥhabandhanaṃ dummocanīyaṃ. Yathāha –

“Sārattarattā maṇikuṇḍalesu,  
Puttesu dāresu ca yā apekkhā;  
Etaṃ daḥhaṃ bandhanamāhu dhīrā,  
Ohāriṇaṃ sithilaṃ duppamuñca”nti. (dha. pa. 346; jā. 1.2.102);

**Kilesabandhanā**ti vā dasavidhasaṃyojanato. **Mahāviduggaṃ nāma cattāro oghā** mahantaṃ jalaviduggaṃ viya anupacitakusalasambhārehi duggamaṭṭhena.

### Aggaññaapaññattikathāvaṇṇanā

36. **Imassa** padassa. Idaṃ nāma lokassa agganti jānitabbaṃ, taṃ **aggaññaṃ**, so pana lokassa uppattikkamo pavatti pavenī cāti āha “**lokuppatticariyaṃsa**”nti. Sammāsambodhito uttaritaraṃ nāma kiñci natthi pajānitabbesu, taṃ pana koṭṭiṃ katvā dassento “**yāva sabbaññaṇā pajānāmī**”ti āha. “Mama pajānanā”ti assādentō taṇhāvasena, “ahaṃ pajānāmī”ti abhinivisanto diṭṭhivasena, “suṭṭhu pajānāmī sammā pajānāmī”ti paggaṇhanto mānavasena na parāmasāmīti yojanā. “Paccattaññevā”ti padaṃ “nibbuti viditā”ti padadvayenāpi yojetabbaṃ “paccattaṃyeva uppādītā nibbuti ca paccattaṃyeva viditā”ti, sayambhuññaṇena nibbattītā nibbuti sayameva viditāti attho. Aṭṭhakathāyaṃ pana “paccatta”nti padaṃ vividhaviḥhattikaṃ hutvā āvuttinayena āvattatīti dassetuṃ “**attanāyeva attanī**”ti vuttaṃ. **Aviditanibbānā**ti appaṭiladdhanibbānā micchāpaṭipannattā. Pajānanampi hi tadadhigamavaseneva veditabbaṃ. Eti iṭṭhabhāvena pavattatīti **ayo**, sukhaṃ. Tappaṭikkhepena **anayo**, dukkhaṃ. Tadeva hitasukhassa byasanato **byasaṇaṃ**.

37. **Taṃ dassentoti** bhagavāpi “aññatitthiyo tattha sārasaññī”ti taṃ dassento. **Ādhipaccabhāvenā**ti ādhipaccasabhāvena. Yassa ācariyavādassa vasena puriso “ācariyo”ti vuccati, so ācariyavādo ācariyabhāvōti āha “**ācariyabhāvaṃ ācariyavāda**”nti. **Etthā**ti ācariyavāde. **Iti katvāti** iminā kāraṇena. **Soti** ācariyavādo. “**Aggaññaṃ**” **tveva vutto** aggaññaṇavisayattā. **Kena vihitanti** kena pakārena vihitāṃ. Tenāha “**kena vihitāṃ kinti vihita**”nti. **Brahmajāleti** brahmajālasaṃvaṇṇanāyaṃ (dī. ni. aṭṭha. 1.28). Tattha hi vitthārato vuttavidhiṃ idha atidisati, pālī pana tattha ceva idha ca ekasadisā vāti.

41. **Khiḍḍā** padosikā mūlabhūtā ettha santīti **khiḍḍāpadosikaṃ**, ācariyakaṃ. Tenevāha “**khiḍḍāpadosikamūlaka**”nti. **Manopadosikanti** etthāpi ese va nayo.

47. Yena vacanena abbhācikkhanti, tassa avijjamānatā nāma atthavasenevāti āha “**asaṃvijjamānaṭṭhena**”ti. **Tucchā**, **musāti** ca karaṇatthe paccattavacananti āha “**tucchena**,

**musāvādenā**’ti. Vacanassa antosāraṃ nāma aviparīto atthoti tadabhāvenāha “**antosāravirahitenā**”ti. **Abhiācikkhantī** abhibhavivā ghaṭṭentā kathenti, akkosantīti attho. **Viparītasāññoti** ayāthāvasaṅṅo. **Subhaṃ vimokkhanti** “subha”nti vuttavimokkhaṃ. **Vaṇṇakasiṇanti** sunīlakasupītakādivaṇṇakasiṇaṃ. **Sabbanti** yaṃ subhaṃ, asubhañca vaṇṇakasiṇaṃ, tañca sabbhaṃ. **Na asubhanti** asubhampi “asubha”nti tasmim samaye na sañjānāti, atha kho “subhaṃ” tveva sañjānātīti attho. **Viparītā** ayāthāvagāhitāya, ayāthāvavāditāya ca.

48. Yasmā so paribbājako avissatṭhamicchāgāhitāya sammā appaṭipajjitukāmo sammāpaṭipannaṃ viya maṃ samaṇo gotamo, bhikkhavo ca sañjānantūti adhippāyena “**tathā dhammaṃ desetu**”ntiādimāha, tasmā vuttaṃ “**mayā etassa...pe... vaṭṭati**”ti. **Mammanti** mammappadesaṃ pīlājananaṭṭhānaṃ. **Suṭṭhūti** sakkaccaṃ. Yathā na vinassati, evaṃ **anurakkha**.

**Vāsanāyāti** kilesakkhayāvahāya paṭipattiyā vāsanāya. Sesam suviññeyyamevāti.

Pāthikasuttavaṇṇanāya līnatthappakāsanā.

## 2. Udumbarikasuttavaṇṇanā

### Nigrodhaparibbājakavatthuvaṇṇanā

49. **Udumbarikāyāti** sambandhe sāmivacananti āha “**udumbarikāya deviyā santake paribbājakārāme**”ti. “Udumbarikāya”nti vā pāṭho, tathā sati adhikaraṇe etaṃ bhumbaṃ. Ayañhettha attho udumbarikāya rañño deviyā nibbattito ārāmo udumbarikā, tassaṃ udumbarikāyaṃ. Tenāha “**udumbarikāya deviyā santake**”ti. Tāya hi nibbattito tassā santako. Varaṇādipāṭhavasena cettha nibbattatthabodhakassa saddassa adassanaṃ. **Sandhānoti** bhinnānampi tesaṃ sandhāpanena “sandhāno”ti evaṃ laddhanāmo. **Samvaṇṇitoti** pasamsito. **Iriyatīti** pavattati. **Ariyena ṇāṇenāti** kilesehi ārakattā ariyena lokuttarena ṇāṇena. **Ariyāya vimuttiyāti** suvisuddhāya lokuttaraphalavimuttiyā.

**Divā-saddo** dina-saddo viya divasapariyāyo, tassa visesanabhāvena vuccamāno divā-saddo savisesaṃ divasabhāgaṃ dīpetīti āha “**divasassa divā**”tiādi. Yasmā samāpannassa cittaṃ nānārammaṇato paṭisaṃhataṃ hoti, jhānasamaṅgī ca pavivekūpagamanena saṅgaṇikābhāvato ekākiyāya nilīno viya hoti, tasmā vuttaṃ “**tato tato...pe... gato**”ti. Mano bhavanti manaso vivaṭṭanissitaṃ vaḍḍhiṃ āvahantīti **manobhāvaniyāti** āha “**manavaḍḍhakāna**”ntiādi. **Unnamati** na saṅkucati, alīnañca hoṭīti attho.

51. **Yāvatāti** yāvantoti ayamettha atthoti āha “**yattakā**”ti. **Tesanti** niddhāraṇe sāmivacanaṃ. Niddhāraṇaṅca kenaci visesena icchitabbaṃ. Yehi ca guṇavisesehi samannāgatā bhagavato sāvakā upāsakā rājagahe paṭivasanti, ayañca tehi samannāgatoti imaṃ visesaṃ dīpetuṃ “**tesaṃ abbhantaro**”ti vuttaṃ. Tenāha “**bhagavato kirā**”tiādi.

52. **Tesanti** paribbājakānaṃ. **Kathāyāti** tiracchānakathāya. **Dassanenāti** diṭṭhidassanena. **Ākappenāti** vesena. **Kuttenāti** kiriyāya. **Ācārenāti** aññamaññasmiṃ ācaritabbaācārena. **Vihārenāti** rattindivaṃ viharitabbaviharaṇena. **Iriyāpathenāti** ṭhānādiiriyāpathena. Aññākāratāya aññatitthe niyuttāti **aññatitthiyā**. **Saṅgantvā** samāgantvā **rāsī hutvā** parehi **nisinnaṭṭhāne**. Araññāni ca tāni vanapatthāni cāti **araññavanapatthāni**. Tattha yaṃ araññakaṅganipphādakaṃ āraññakānaṃ, taṃ “arañña”nti veditabbaṃ. **Vanapatthanti** gāmantam atikkamivā manussānaṃ anupacāraṭṭhānaṃ, yattha na kasīyati na vappīyati. Vuttañhetam “vanapatthanti dūrānametaṃ senāsanānaṃ adhivacana”nti “vanapatthanti vanasaṅḍānametaṃ senāsanānaṃ, vanapatthanti bhīsanakānametaṃ, vanapatthanti salomahaṃsānametaṃ, vanapatthanti pariyantānametaṃ vanapatthanti na manussūpacārānametaṃ

senāsanānaṃ adhivacana’’nti (vibha. 531). Tena vuttaṃ “**gāmūpacārato muttānī**’’tiādi. **Pantānī** pariyaṅtāni atidūrāni. Tenāha “**dūratarānī**’’tiādi. **Vihārūpacārenā**ti viharassa upacārappadesena. **Addhikajanassā**ti maggagāmino janassa. **Mandasaddānī**ti uccāsaddamahāsaddābhāvato tanusaddāni. Manussehi samāgama ekajjhaṃ pavattitasaddo **nigghoso**, tassa yasmā attho dubbibhāvito hoti, tasmā vuttaṃ “**avibhāvitatthena nigghosenā**’’ti. **Vigatavātānī**ti vigatasaddāni. “**Rahassa karaṇassa yuttānī**’’ti imināpi tesam ṭhānānaṃ araññalakkhaṇayuttataṃ, janavivittataṃ, vanavivittameva ca vibhāveti, tathā “**ekībhāvassa anurūpānī**’’ti iminā.

**53. Kenā**ti hetumhi, sahayoge ca karaṇavacananti āha “**kena kāraṇena kena puggalena saddhi**’’nti. Ekopi hi vibhattiniddeso anekatthavibhāvano hoti, tathā taddhitatthapadasamāhāreti.

**Samsandananti** ālāpasallāpavasena kathāsamsandanam. **Ñānabyattabhāvanti** byattañānabhāvaṃ, so pana parassa vacane uttaradānavasena, parena vā vuttauttare paccuttaradānavasena siyāti āha “**uttarapaccuttaranayenā**’’ti. Yo hi parassa vacanaṃ tipukkhalena nayena rūpeti, tathā parassa rūpanavacanaṃ jātibhāvaṃ āpādeti, tassa tādisaṃ vacanasabhāvaṃ ñānaveyyattiyam vibhāveti pākaṭam karotīti. **Suññāgāresu naṭṭhāti** suññāgāresu nivāsesu naṭṭhā vinaṭṭhā abhāvaṃ gatā. **Nāssa paññā nasseyya** tehi tehi katapucchanapaṭipucchananimittaṃ nānāpaṭibhānuppattiyā visāramāpannaṃ pucchitaṃ pañhaṃ vissajjetaṃ asamattatāya. **Orodheyāmāti** nirussāhaṃ viya karontā avarodheyāma, taṃ parassa orodhanaṃ vādajālena vinandhanaṃ viya hotīti āha “**vinandheyāmā**’’ti. Tadattham tena tucchakumbhinidassanaṃ kataṃ, taṃ byatirekamukhena dassetaṃ “**pūritaghaṭo hī**’’tiādi vuttaṃ.

**Balaṃ dīpentoti** abhūtaṃ attano ñānābalaṃ pakāsento. **Asambhinnanti** jātisambhedābhāvena asambhinnaṃ. Aññajātisambhede sati assatarassa assassa jātabhāvo viya sīhassapi sīhathāmābhāvo siyāti āha “**asambhinnakesarasīha**’’nti. **Ṭhānaso vāti** taṅkhaṇe eva.

**54.** “Sumāgadhā nāma nadī’’ti keci, taṃ micchāti dassento “sumāgadhā nāma pokkharāṇī’’ti vatvā tassā pokkharāṇibhāvassa suttantare āgatataṃ dassetaṃ “**yassā tīre**’’tiādi vuttaṃ. Morānaṃ nivāpo etthāti **morānivāpo**. Byadhikaraṇānampi hi padānaṃ bāhiratthasamāso hotiyeva yathā “urasilomo’’ti. Atha vā nivuttaṃ etthāti **nivāpo**, morānaṃ nivāpo **morānivāpo**, morānaṃ nivāpadinnaṭṭhānaṃ. Tenāha “**yattha morāna**’’ntiādi. Yasmā nigrodho tapojigucchavādo, sāsane ca bhikkhū attakilamathānuyogaṃ vajjētvā bhāvanānuyogena paramassāsappatte viharante passati, tasmā “kathaṃ nu kho samaṇo gotamo kāyakilamathena vināva sāvake vinetī’’ti sañjātasandeho “ko nāma so’’tiādinā bhagavantaṃ pucchi. Assasati anusaṅkitaparisaṅkito hoti etenāti **assāso**, pītisomanassanti āha “**assāsappattāti tuṭṭhippattā somanassappattā**’’ti. Adhiko seṭṭho āsayo nissayo **ajjhāsayoti** āha “**uttamanissayabhūta**’’nti. Ādibhūtaṃ purātaṃ seṭṭhacariyaṃ **ādibrahmacariyaṃ**, lokuttaramagganti attho. Tathā hesa sabbabuddhapaccekabuddhasāvakehi teneva ākārena adhigato. Tenāha “**purāna...pe... ariyamagga**’’nti. Tathā hi taṃ bhagavā “addasa purānaṃ maggaṃ purānamañjasa’’nti avoca. **Pūretvā** bhāvanāpāripūrivāsena. “Pūretvā’’ti vā idaṃ “ajjhāsayaṃ ādibrahmacariya’’nti ettha pāṭhasesoti vadanti. “Ajjhāsayaṃ ādibrahmacariyaṃ paṭijānanti assāsappattā’’ti evaṃ vā ettha yojanā.

### Tapojigucchāvādavaṇṇanā

**55.** Pakatā hutvā vicchinnā **vippakatāti** āha “**aniṭṭhitāva hutvā ṭhitā**’’ti.

**56. Vīriyena pāpajigucchānavādoti** lūkhapaṭipattisādhanaṃ vīriyena attatanhāvinodanavasena pāpakassa jigucchānavādo. Jigucchati **jiguccho**, tabbhāvo **jegucchaṃ**, adhikaṃ jegucchaṃ adhijegucchaṃ, ativiya pāpajigucchānaṃ, tasmim **adhijegucche**. Kāyadaḥḥibahulaṃ tapatīti **tapo**, attakilamathānuyogavasena pavattaṃ vīriyaṃ, tena kāyadaḥḥibahulatānimittassa pāpassa jigucchānaṃ, virajjanaṃ **tapojigucchāti** āha “**vīriyena pāpajigucchā**’’ti.



Ghāsacchādanasenāsanatanhāvinodanamukhena attasnehavirajjananti attho. Upari vuccamānesu nānākāresu acelakādivatesu ekajjhaṃ samādinnānaṃ parisodhanamevettha **pāripūraṇaṃ**, na sabbesaṃ anavasesato samādānaṃ tassa asambhavatoti āha “**paripuṇṇāti parisuddhā**”ti. **Parisodhana**ñca nesam sakasamayāsiddhena nayena paṭipajjanameva. Vipariyāyena aparisuddhatā veditabbā.

57. “**Ekam pañhampi na katheti**”ti paṭhamam attanā pucchitapañhassa akathitattā vuttaṃ.

**Tapanissitakoti** attakilamathānuयोगasaṅkhātamaṃ tapamaṃ nissāya samādāya vattanako. **Sīhanādeti** sīhanādasuttavaṇṇanāyaṃ. Yasmā tattha vitthāritanayena veditabbāni, tasmā tassā atthappakāsanāya vuttanayenapi veditabbāni.

### Upakkilesavaṇṇanā

58. “Sammā ādiyati”ti vatvā **sammā ādiyana**ñcassa dalhaggāho evāti āha “**dalhaṃ gaṇhāti**”ti. “Sāsanāvacaṇeṇāpi dīpetabba”nti vatvā taṃ dassetuṃ “**ekacco hi**”tiādi vuttaṃ, tena dhutaṅgadharatāmattena attamanatā, paripuṇṇasaṅkappatā sammāpaṭipattiyā upakkilesoti imamattham dasseti, na yathāvuttatapasamādānadhutaṅgadharatānaṃ satipi aniyyānikatte sadisatanti daṭṭhabbaṃ.

“**Duvidhassāpīti** ‘attamano hoti paripuṇṇasaṅkappo’ti ca evaṃ upakkilesabhedena vuttassa duvidhassāpi tapassino”ti keci. Yasmā pana aṭṭhakathāyaṃ sāsanikavaseṇāpi attho dīpito, tasmā bāhirakassa, sāsanikassa cāti evaṃ duvidhassāpi tapassinoti attho veditabbo. Tathā ceva hi uparipi atthavaṇṇanaṃ vakkhatīti. **Ettāvatāti** yadidaṃ “ko añño mayā sadiso”ti evaṃ atimānassa, aniṭṭhitakiccasseva ca “alamettāvatā”ti evaṃ atimānassa ca uppādanam, ettāvatā.

**Ukkaṃsatīti** ukkaṭṭham karoti. **Ukkipatīti** aññesaṃ upari khipati, paggaṇhātīti attho. **Paraṃ saṃhāretīti** paraṃ saṃharam niḥīnaṃ karoti. **Avakkhipatīti** adho khipati, avamaññatīti attho.

**Mānamadakarāṇenāti** mānasaṅkhātassa madassa karaṇena uppādanena. **Mucchito hotīti** mucchāpanno hoti, sā pana mucchāpatti abhiṃhāsīlabbataparāmāsakāyaganthehi gadhitacittatā, tattha ca atilaggabhāvoti āha “**gadhito ajjhosanno**”ti. **Pamajjana**ñcetta pamajjanamevāti āha “**pamādamāpajjati**”ti. Kevalam dhutaṅgasuddhiko hutvā kammaṭṭhānaṃ ananuyuñjanto tāya eva dhutaṅgasuddhikatāya attukkaṃsanādivasena pavatteyyāti dassetuṃ “**sāsane**”tiādi vuttaṃ. Tenāha “**dhutaṅgameva...pe... pacceṭī**”ti.

59. **Teyeva paccayā. Suṭṭhu katvā paṭisaṅkharitvā laddhāti** ādaragāravayogena sakkaccaṃ abhisāṅkharitvā dānavasena upanayavasena laddhā. **Vaṇṇabhaṇananti** guṇakittanaṃ. **Assāti** tapassino.

60. **Vodāsanti** byāsanam, vibhajjananti attho. Taṃ panettha vibhajjanam dvidhā icchitanti āha “**dvebhāgaṃ āpajjati**”ti. **Dve bhāge karoti** rucanāruccanavasena. **Gedhajātoti** sañjātagedho. **Mucchanam** nāma sativippavāseṇeva hoti, na satiyā satīti āha “**samuṭṭhassati**”ti. **Ādīnavamattampīti** gadhitādībhāvena paribhoge ādīnavamattampi **na passati. Mattaññutāti** paribhoge mattaññutā. **Paccavekkhaṇaparibhogamattampīti** paccavekkhaṇamattena paribhogampi ekavāram paccavekkhitvāpi paribhuñjanampi **na karoti.**

61. **Vicakkasaṅṭhānāti** vipulatamacakkasaṅṭhānā. Sabbassa bhuñjanato ayokūṭasadisā dantā eva **dantakūṭam. Apasādetīti** pasādeti. **Acelakādivasenāti** acelakavatādivasena. **Lūkhajīvinti** sallekhaṇapaṭipattiyā lūkhajīvikam.

62. **Tapam karotīti** bhāvanāmanasikāralakkhaṇam tapam carati caranto viya hoti. **Caṅkamaṃ otarati** bhāvanam anuyuñjanto viya. **Vihāraṅgaṇam sammajjati** vattapaṭipattiṃ pūrento viya.

“Ādassayamāno”ti vā pāṭho.

**Kiñci vajjanti** kiñci kāyikaṃ vā vācasikaṃ vā dosaṃ. **Diṭṭhigatanti** viparītadassanaṃ. **Aruccamānanti** attano siddhante paṭikkhittabhāvena aruccamānaṃ. **Ruccati meti** “kappati me”ti **vadati**. **Anujānitabbanti** tacchāvīparītabhūtabhāvena “evameta”nti anujānitabbaṃ. Savanamanohāritāya “sādhu suṭṭhū”ti **anumoditabbaṃ**.

**63.** Kujjhanasīlatāya **kodhano**. Vuttalakkhaṇo upanāho etassa atthīti **upanāhi**. Evambhūto ca taṃsamaṅgī hotīti “**samannāgato hoti**”ti vuttaṃ. Esa nayo ito paresupī.

Ayaṃ pana viseso – issatī usūyatīti **ussukī**. Saṭhanaṃ asantaḡuṇasambhāvanaṃ **saṭho**, so etassa atthīti **saṭho**. Santadosapaṭicchādanasabhāvā **māyā**, māyā etassa atthīti **māyāvī**. Garuṭṭhāniyānampi paṇipātākaraṇalakkhaṇaṃ thambhanaṃ **thaddhaṃ**, tamettha atthīti **thaddho**. Guṇehi samānaṃ, adhikañca atikkamivā nihīnaṃ katvā maññanasīlatāya **atimānī**. Asantaḡuṇasambhāvanatthikatāsaṅkhātā pāpā lāmakā icchā etassāti **pāpiccho**. Micchā viparītā diṭṭhi etassāti **micchādiṭṭhiko**. “Idameva saccam, moghamañña”nti (ma. ni. 187, 202, 427; 3.27, 29; udā. 55; mahāni. 20; netti. 58) evaṃ attanā attābhiniṇiṭṭhatāya satā diṭṭhi **sandiṭṭhi**, tameva parāmasatīti **sandiṭṭhiparāmāsī**. Aṭṭhakathāyaṃ pana “sayam diṭṭhi sandiṭṭhi”ti vatthivasena attho vutto. Ā bālhaṃ viya dhīyatīti **ādhānanti** āha “**dalhaṃ suṭṭhu ṭhapita**”nti. Yathāgahitaṃ gāhaṃ paṭinissajjanasīlo **paṭinissaggi**, tappaṭikkhepena **duppaṭinissaggi**. Paṭisedhattho hi ayaṃ **du**-saddo yathā “duppañño, (ma. ni. 1.449) dussīlo”ti (a. ni. 5.213; 10.75; pārā. 195; dha. pa. 308) ca.

### Parisuddhapapaṭikappattakathāvaṇṇanā

**64.** **Idha nigrodha tapassīti** yathānukkantaṃ purimapāliṃ nigamanavasena ekadesena dasseti. Tenāha “**evaṃ bhagavā**”tiādi. **Gahitaladdhinti** “acelakādibhāvo seyyo, tena ca saṃsārasuddhi hoti”ti evaṃ gahitaladdhiṃ. **Rakkhitaṃ tapanti** tāya laddhiyā samādiyivā rakkhitaṃ acelakavatāditapaṃ. “**Sabbameva saṃkiliṭṭha**”nti iminā yaṃ vakkhati **parisuddhapāliṇaṇṇanāyaṃ** “lūkhatapassino ceva dhutaṅgadhārassa ca vasena yojanā veditabbā”ti (dī. ni. aṭṭha. 3.64), tassa parikkappitarūpassa lūkhassa tapassinoti ayamettha adhippāyoti dasseti. “**Parisuddhapālidassanatta**”nti ca iminā titthiyānaṃ vasena pāli yevettha labbhati, na pana tadatthoti dasseti. **Vuttavipakkhavasena**ti vuttassa atthassa paṭipakkhavasena, paṭikkhepavasena attho. **Tasmiṃ ṭhāneti** hetuatthe bhummanti tassa hetuatthena karaṇavacanena atthaṃ dassento “**evaṃ so tenā**”tiādimāha. **Uttari vāyamamānoti** yathāsamādinnehi dhutadhammehi aparituttḡho, apariyositasāṅkappo ca hutvā upari bhāvanānuyogavasena sammāvāyāmaṃ karonto.

**69.** **Ito paranti** ito yathāvuttanayato paraṃ. **Aggabhāvaṃ vā sārabhāvaṃ vāti** tapojigucchāya aggabhāvaṃ vā sārabhāvaṃ vā **ajānanto**. “Ayamevassa aggabhāvo sārabhāvo”ti maññamāno “**aggappattā, sārappattā cā**”ti āha.

### Parisuddhatacappattādikathāvaṇṇanā

**70.** Yamaṇaṃ saṃyamaṇaṃ **yāmo**, hiṃsādīnaṃ akaraṇavasena catubbidho yāmo va **cātuyāmo**, so eva saṃvaro, tena saṃvuto guttasabbadvāro **cātuyāmasaṃvarasaṃvuto**. Tenāha “**catubbidhena saṃvarena pihito**”ti. **Atipātaṇaṃ** hiṃsananti āha “**pāṇaṃ na hanatī**”ti. Lobhacittena bhāvitam sambhāvitanti katvā **bhāvitam nāma pañca kāmagaṇā**. Ayañca tesu tesameva samudācāro maggoṭṭhāpakam viyāti āha “**tesaṃ saññāyā**”ti.

**Etanti abhiharaṇaṃ**, hīnāya anāvattanañca. Tenāha “**so abhiharatīti ādilakkhaṇa**”nti. **Abhiharatīti** abhibuddhiṃ neti. Tenāha “**uparūpari vaḍḍhetī**”ti. Cakkavattināpi pabbajitassa

abhivādanādi karīyatevāti pabbajjā seṭṭhā guṇavisesayogato, dosavirahitato ca, yato sā paṇḍitapaññatā vuttā. Gihibhāvo pana nihīno tadubhayābhāvato āha “**hīnāya gihibhāvattāyā**”ti.

71. **Tacappattā**ti tacam pattā, tacasadisā hotīti attho.

74. **Titthiyānaṃ vassenā**ti titthiyānaṃ samayavasena. **Nesanti** titthiyānaṃ. **Tanti** dibbacakkhum. **Sīlasampadā**ti sabbākārasampannaṃ catupārisuddhisīlaṃ. **Tacasārasampattitoti** tacatapojjigucchāyāsārasampattito. **Visesabhāvanti** visesasabhāvaṃ.

**Acelakapāḷimattampī**ti acelakapāḷiāgatattamattampi **natthi**, tasmā mayaṃ anassāma vinaṭṭhāti attho. **A-kāro** vā nipātamattaṃ, **nassāmā**ti vinassāma. **Kuto parisuddhapāḷī**ti kuto eva amhesu parisuddhapāḷiāgatapaṭipatti. Esa nayo sesesupi. **Sutivasenāpī**ti sotapathāgamanamattenāpi **na jānāma**.

### Nigrodhassapajjhāyanavaṇṇanā

75. **Assā**ti sandhānassa gahapatissa. **Kakkhaḷanti** pharusam. **Durāsada**vacananti avattabbavacanam. Yasmā pharusavacanam yaṃ uddissa payuttaṃ, tasmim khamāpīte khamāpakassa paṭipākatikam hoti, tasmā “**ayaṃ mayī**”tiādi vuttaṃ.

76. **Bodhatthāya dhammaṃ deseti**, na attano buddhabhāvaghosanaṭṭhāya. **Vādatthāyāti** paravādabhañjanavādatthāya. **Rāgādisamaṇatthāya dhammaṃ deseti**, na antevāsikamyatāya. **Oghanittharaṇatthāyāti** caturoghanittharaṇatthāya dhammaṃ deseti sabbaso orapārātiṇṇamāvahattā desanāya. **Sabbakilesaparinnibbānatthāya dhammaṃ deseti** kilesānaṃ lesenapi desanāya aparāmaṭṭhabhāvato.

### Brahmacariyapariyosānādivaṇṇanā

77. **Idam sabbampī**ti sattavassato paṭṭhāya yāva “sattāha”nti padaṃ, idam sabbampi vacanam. **Asaṭho pana amāyāvī ujujātiko** tikkhapañño ugghaṭṭitaññūti adhippāyo. So hi taṃmuhutteneva arahattaṃ pattuṃ sakkhissatīti. **Vaṅkavaṅkoti** kāyavaṅkādihipi vaṅkehi vaṅko jimho kuṭilo. “**Saṭham panāham anusāsituṃ na sakkomī**”ti na idam bhagavā kilāsubhāveneva vadati, atha kho tassa abhājanabhāveneva.

78. **Pakatiyā ācariyoti** yo eva tumhākam ito pubbe pakatiyā ācariyo ahosi, so eva idānīpi pubbāciṇṇavasena ācariyo hotu, na mayaṃ tumhe antevāsike kātukāmāti adhippāyo. **Na mayaṃ tumhākam uddesena atthikā**, dhammatanti meva pana tumhe nāpetukāmamhāti adhippāyo. **Ājivatoti** jīvikāya vuttito. **Akusalāti koṭṭhāsam pattāti** akusalāti taṃ taṃ koṭṭhāsataṃyeva upagatā. **Kilesadarathasampayuttāti** kilesadarathasahitā taṃsambandhanato. Jātijarāmarāṇānaṃ hitāti **jātijarāmarāṇiyā**. Saṃkilesa ettha atthi, saṃkilese vā niyuttāti **saṃkilesikā**. **Vodānaṃ** vuccati visuddhi, tassa paccayabhūtatā **vodāniyā**. Tathābhūtā cete vodāpentīti āha “**satte vodāpentī**”ti. Sikhāpattā paññāya pāripūrivepullatā maggaphalavaseneva icchitabbāti āha “**maggapaññā...pe...vepullata**”nti. **Ubhopi vā etāni** pāripūrivepullāni. Yā hi tassa pāripūrī, sā eva vepullatāti. **Tatoti** saṃkilesadhammapahānavodānadhammābhībuddhihetu.

79. “**Yathā mārenā**”ti nayidaṃ nidassanavasena vuttaṃ, atha kho tathābhāvakathanamevāti dassetuṃ “**māro kirā**”tiādi vuttaṃ. **Athāti** mārena tesam pariyaṭṭhānappattito pacchā aññāsīti yojanā. Kasmā pana bhagavā pageva na aññāsīti? Anāvajjitattā. **Māram paṭibāhitvāti** mārena tesu kataṃ pariyaṭṭhānaṃ vidhametvā, na tesam satī payojane buddhānaṃ dukkaram. **Soti** maggaphaluppattihetu. **Tesam** paribbājakānaṃ.

**Phuṭṭhā**ti pariyuṭṭhānavasena phuṭṭhā. **Yatrā**ti niddhāraṇe bhummanti āha “**yesū**”ti. **Aññāṇatthanti** ājānanattham, upasaggamattañcetha ā-kāroti āha “**jānanattha**”nti, vīmaṃsanatthanti attho. **Cittaṃ nuppananti** “jānāma tāvassa dhamma”nti ājānanattham “brahmacariyaṃ carissāmā”ti ekasmiṃ divase ekavārampi tesam cittaṃ nuppanam. Sattāho pana vuccamāno etesaṃ kiṃ karissatīti yojanā. **Sattāham pūretunti** sattāham brahmacariyaṃ pūretum, brahmacariyavasena vā sattāham pūretunti attho. **Paravādabhindananti** paravādamaddanam. **Sakavādasamussāpananti** sakavādapaggaṇhanam. **Vāsanāyāti** saccasampañivedhavāsanāya. **Nesanti** ca pakaraṇavasena vuttam. Tadaññesampi hi bhagavato sammukhā, paramparāya ca devamanussānam suṇantānam vāsanāya paccayo evāti. Yaṃ panettha atthato na vibhattam, tam suviññeyyamevāti.

Udumbarikasuttavaṇṇanāya līnatthappakāsanā.

### 3. Cakkavattisuttavaṇṇanā

#### Attadīpasaraṇatāvaṇṇanā

**80. Uttānam** vuccati pākaṭam, tappaṭikkhepena **anuttānam** apākaṭam, paṭicchannam, apacuram, duviññeyyañca. Anuttānānam padānam vaṇṇanā **anuttānapadavaṇṇanā**. Uttānapadavaṇṇanāya payoanābhāvato **anuttānaggahaṇam**. “**Mātulā**”ti itthilingavasena laddhanāmo eko rukkho, tassā āsannappadese māpitattā nagarampi “mātulā” tveva paññāyittha. Tena vuttam “**mātulāyanti evam nāmake nagare**”ti. **Avidūreti** tassa nagarassa avidūre.

Kāmañcetha sutte “bhūtapubbam, bhikkhave, rājā dalhanemi nāma ahoṣi”tiādinā atītavamsadīpikā kathā ādito paṭṭhāya āgatā, “aḍḍhateyyavassasatāyukānam manussānam vassasatāyukā puttā bhavissanti”tiādinā pana savisesam anāgatattapaṭisamyuttā kathā āgatāti vuttam “**anāgatavamsadīpikāya suttantakathāyā**”ti. Anāgatattadīpanaṃhi acchariyam, tatthāpi anāgatassa sammāsambuddhassa paṭipattikittanam acchariyatamam. **Samāgamenāti** sannipātena.

“**Bhattaggaṃ amanāpa**”ntiādi kevalam tesam parivitakkamattam. **Amanāpanti** amanuññam. Buddhesu kato appakopi aparādhō appako kāro viya garutaravipākoti āha “**buddhehi saddhim...pe... sadisaṃ hoti**”ti. **Tatrā**ti tasmim mātulanagarassa samīpe, tassam vā parisāyam.

**Attadīpāti** ettha kāmam yo paro na hoti, so attāti sasantāno “attā”ti vuccati, hitasukhesibhāvena pana attanibbisesattā dhammo idha “**attā**”ti adhippeto. Tenāha “**attā nāma lokiyalokuttaro dhammo**”ti. Dvidhā āpo gato etthāti **dīpo**, oghena anajjhotthato bhūmibhāgo. Idha pana kāmoghādīhi anajjhottharaṇiyattā dīpo viyāti **dīpo**, attā dīpo paṭiṭṭhā etesanti **attadīpā**. Tenāha “**attānam dīpa**”ntiādi. Dīpabhāvo cetha paṭisaraṇatāti āha “**idam tasseva vevacana**”nti. **Aññasaraṇapaṭikkhepavacanaṃ** aññasaraṇabhāvapaṭikkhepavacanaṃ. Idañhi na aññam saraṇam katvā viharāṇasseva paṭikkhepavacanaṃ, atha kho aññassa saraṇasabhāvasseva paṭikkhepavacanaṃ tappaṭikkhepe ca tena itarassāpi paṭikkhepasiddhito. Tenāha “**na hi**”tiādi. Idāni tamevattham suttantarena sādhetum “**vuttampi ceta**”ntiādi. Yadi ettha pākatiko attā icchito, katham tassa dīpasaraṇabhāvo, tasmā adhippāyiko ettha attā bhavyeyyāti pucchati “**ko panettha attā nāmā**”ti. Itaro yathādhippetam attānam dassento “**lokiyalokuttaro dhammo**”ti. Dutiyavāropi paṭhamavārasseva pariyāyabhāvena desitoti dassetum “**tenāhā**”tiādi vuttam.

**Gocareti** bhikkhūnam gocaraṭṭhānabhūte. Tenāha “**caritum yuttaṭṭhāne**”ti. **Saketi** katham panāyam bhikkhūnam sakoti āha “**pettike visaye**”ti. Pitito sammāsambuddhato āgatattā “**ayam tumhākaṃ gocaro**”ti tena uddiṭṭhattā **pettike visayeti**. **Carantanti** sāmīatthe upayogavacanaṃti āha “**ayamevattho**”ti, carantānanti ca attho, tenāyam vibhattivipallāsenapi vacanavipallāsenapīti dasseti. Kilesamārassa otārālābheneva itaramārānampi otārālābho veditabbo. **Ayam panatthoti** gocare caraṇam

sandhāyāha, vatthu pana byatirekamukhena āgatam.

Sakuṇe hantīti **sakuṇagghi**, mahāsenasakuṇo. **Ajjhappattāti** abhibhavanavasena pattā upagatā. **Na myāyanti** me ayam sakuṇagghi nālam **abhavissa**. **Naṅgalakaṭṭhakaraṇanti** naṅgalena kasitappadeso. **Leḍḍuṭṭhānanti** leḍḍūnam uṭṭhapitaṭṭhānam. **Sake baleti** attano balahetu. **Apatthaddhāti** avagāḷhatthambhā sañjātatthambhā. **Assaramānāti** avhāyanti.

**Mahantam leḍḍunti** naṅgalena bhinnaṭṭhāne sukkhatāya tikhiṇasiṅgaayoghanasadisaṃ mahantam leḍḍum. **Abhiruhitvāti** tassa adhobhāgena attanā pavisitvā nilīnayoggappadesaṃ sallakkhetvā tassupari caṅkamanto **assaramāno aṭṭhāsi**. “**Ehi kho**”tiādi tassa assaramānākāradassanaṃ. **Sannayhāti** vātaggahaṇavasena **ubho pakkhe** samaṃ ṭhapetvā. **Paccupādīti** pāvīsi. **Tatthevāti** yattha pubbe lāpo ṭhito, tattheva leḍḍumhi. **Uranti** attano urappadesaṃ. **Paccatāḷesīti** pati atāḷesi sārambhavasena vegena gantvā paharaṇato vidhārentī patāḷesi. **Ārammaṇanti** paccayaṃ. “Avasara”nti keci.

“Kusalāna”nti evaṃ pavattāya desanāya ko anusandhi? Yathāanusandhi eva. Ādito hi “attadīpā, bhikkhave, viharathā”tiādinā (dī. ni. 3.80) yeva attadhammapariyāyena lokiyalokuttaradhammā gahitā, te yevettha kusalaggahaṇena gahitāti. **Anavajjalakkhaṇānanti** avajjapaṭipakkhasabhāvānam. “Avajjarahitasabhāvāna”nti keci. Tattha purime atthavikappe vipākadhammadhammā eva gahitā, dutiye pana vipākadhammāpi. Yadi evaṃ, katham tesam samādāya vattananti? Na kho panetaṃ evaṃ daṭṭhabbaṃ “vipākadhammā silādi viya samādāya vattitabbā”ti. **Samādānanti** pana attano santāne sammā ādānaṃ paccayavasena pavatti yevāti daṭṭhabbaṃ. Vipākadhammā hi paccayavisesehi sattasantāne sammadeva āhitā āyuādisampatti visesabhūtā uparūparikusalavisesuppattiyā upanissayā hontīti vadanti. **Puññaṃ pavaḍḍhatīti** ettha **puññaṃ** uttarapadalopenāyaṃ niddesoti āha “**puññaṃ pavaḍḍhatīti**”ti. **Puññaṃ pavaḍḍhatīti** ca ekadesasarūpekasesena vuttam “puññaṃ pavaḍḍhatīti”ti. **Puññaṃ pavaḍḍhatīti** ca ekadesasarūpekasesena vuttam “puññaṃ pavaḍḍhatīti”ti. **Puññaṃ pavaḍḍhatīti** ca ekadesasarūpekasesena vuttam “puññaṃ pavaḍḍhatīti”ti. **Puññaṃ pavaḍḍhatīti** ca ekadesasarūpekasesena vuttam “puññaṃ pavaḍḍhatīti”ti.

“**Mātāpitūna**”ntiādi nidassanamattaṃ, tasmā aññaṃ evarūpaṃ hetūpanissayaṃ kusalaṃ daṭṭhabbaṃ. **Sinehasasenāti** upanissayabhūtassa sinehasa vasena, na sampayuttassa. Na hi sinehasampayuttaṃ nāma kusalaṃ atthi. **Mudumaddavacittanti** mettāvasena ativiya maddavantaṃ cittaṃ. Yathā matthakappattaṃ vaṭṭagāmikusalaṃ dassetuṃ “mātāpitūnaṃ ...pe... mudumaddavacitta”nti vuttam, evaṃ matthakappattameva vivaṭṭagāmikusalaṃ dassetuṃ “**cattāro sati...pe... bodhipakkkhiyadhammā**”ti vuttam. Tadaññepi pana dānasīlādiddhammā vaṭṭassa upanissayabhūtā **vaṭṭagāmikusalaṃ** vivaṭṭassa upanissayabhūtā **vivaṭṭagāmikusalanti** veditabbā. **Pariyosānanti** phalavisesāvahatāya phaladāya koṭi sikhāpatti, devaloke ca pavattisirivibhavoti pariyosānaṃ “**manussaloke**”ti visesitaṃ, manussalokavaseneva cāyaṃ desanā āgatāti. Maggaphalanibbānasampatti pariyosānanti yojanā. **Vivaṭṭagāmikusalassa vipākaṃ suttapariyosāne dassissati** “atha kho, bhikkhave, saṅkho nāma rājā”tiādinā (dī. ni. 3.108).

### Dalhanemicakkavattirājakathāvaṇṇanā

**81. Idhāti** imasmim “kusalānaṃ, bhikkhave, dhammāna”ntiādinā (dī. ni. 3.110) suttadesanāya āradhāṭṭhāne vaṭṭavivaṭṭagāmibhāvena sādharmaṇe kusalaggahaṇe. Tattha **vaṭṭagāmikusalānusandhivasena** “**bhūtapubbaṃ bhikkhave**”ti **desanaṃ ārabhi**, ārabhanto ca desiyamānamattaṃ. Dhammapaṭiggāhakaṇaṃ bhikkhūnaṃ saṅkhepato evaṃ dīpetvā ārabhīti dassetuṃ “**bhikkhave**”tiādi vuttam, paṭhamam tathā adīpentopi bhagavā atthato dīpeti viyāti adhippāyo.

**82. Īsakampīti** appamattakampi. **Avasakkīti** ogatabhaṭṭhaṃ. **Nemiabhimukhanti** nemippadesassa sammukhā. **Bandhimsu** cakkaranassa osakkītānosakkītabhāvaṃ jānitum. **Tadetanti** yathāvuttaṭṭhānā cavanaṃ. **Atibalavadoseti** rañño balavati anathe upaṭṭhite **sati**.

**Appamattoti** rañño āṇāya pamādaṃ akaronto.

**Ekasamuddapariyantamevā**ti jambudīpameva sandhāya vadati. So uttarato assakaṇṇapabbatena paricchinnam hutvā attānam parikkhipitvā t̥hitaekasamuddapariyanto. **Puññiddhivasenā**ti cakkavattibhāvāvahāya puññiddhiyā vasena.

**83. Evaṃ katvā**ti kāsāyāni vatthāni acchādetvā. **Sukataṃ kammanti** dasakusalakammamapathameva vadati.

“**Dasavidhaṃ, dvādasavidha**”nti ca vuttavibhāgo parato āgamissati. **Pūrentenevā**ti pūretvā t̥hiteneva. **Niddoseti** cakkavattivattassa paṭipakkhabhūtānam dosānam apagamane niddose. **Cakkavattīnam vatteti** cakkavattirājūhi vattitabbavatte. Bhāvini bhūte viya hi upacāro yathā “agamā rājagahaṃ buddho”ti (su. ni. 410). Adhigatacakkavattibhāvāpi hi te tatha vattantevāti tathā vuttam.

### Cakkavattiarivattavaṇṇanā

**84. Aññathā** vattitum adento so dhammo adhiṭṭhānam etassāti tadadhiṭṭhānam, tena **tadadhiṭṭhānena cetasā. Sakkarontoti** ādarakiriyāvasena karonto. Tenāha “**yathā**”tiādi. **Garum karontoti** pāsānacchattam viya garukaraṇavasena garum karonto. Tenevāha “**tasmiṃ gāravuppattiyā**”ti. **Mānentoti** sambhāvanāvasena manena piyāyanto. Tenāha “**tamevā**”tiādi. Evaṃ pūjayato apacāyato evaṅca yathāvuttasakkārādisambhavoti tam dassetum “**taṃ apadisitvā**”tiādi vuttam. “**Dhammādhīpatibhūto āgatabhāvenā**”ti iminā yathāvuttadhammassa jeṭṭhakabhāvena purimapurimataraattabhāvesu sakkacca samupacitabhāvam dasseti. “**Dhammavaseneva sabbakiriyānam karaṇenā**”ti etena t̥hānanisajjādīsu yathāvuttadhammaninnoṇapabbhārahābhāvam dasseti. **Assāti** rakkhāvaraṇaguttiyā. **Paraṃ rakkhanto** aññam diṭṭhadhammikādiatthato rakkhanto teneva paratthasādhanena khantiādiḡuṇena **attānam** tato eva **rakkhati. Mettacittatā**ti mettacittatāya. **Nivāsanapārupanagehādīnam** sītuṇhādīpaṭibāhanena **āvaraṇam. Anto janasminti** abhantarabhūte puttadārādījane.

“**Sīlasamvare paṭiṭṭhāpehī**”ti iminā rakkham dasseti, “**vatthagandhamālādīni dehī**”ti iminā āvaraṇam, itarena guttīm. **Bhattavetasampadānenapīti** pi-saddena sīlasamvare paṭiṭṭhāpanādīni sampiṇḡeti. Eseva nayo ito paresupi pi-saddaggaṇesu. Nigamo nivāso etesanti **negamā**, evam **jānapadā**ti āha “**nigamavāsino**”tiādi.

**Navavidhā mānamadā**ti “seyyohamasmī”tiādi (saṃ. ni. 4.108; dha. sa. 1121; vibha. 866; mahāni. 21, 178) nayappavattiyā navavidhā mānasaṅkhātā madā. Māno eva hettha pamajjanākārena pavattiyā mānamado. Sobhane kāyikavācasikakamme ratoti **sūrato** u-kārassa dīgham katvā, tassa bhāvo **soraccam**, kāyikavācasiko avītikkamo, sabbam vā kāyavacīsucaritam. Suṭṭhu oratoti **sorato**, tassa bhāvo **soraccam**, yathāvuttameva sucaritam. **Rāgādīnanti** rāgadosamohamānādīnam. **Damanādīhī**ti damanasamanapariniḡbāpanehi. **Ekamattānanti** ekaṃ cittam, ekaccaṃ attano cittanti attho. Rāgādīnañhi pubbabhāgiyam damanādīpaccekam icchitabbam, na maggakkhaṇe viya ekajjham paṭisaṅkhānamukhena pajahanato. **Ekamattānanti** vā vivekavasena ekaṃ ekākinam attānam. **Kāle kāleti** tesam santikam upasaṅkamitabbe kāle kāle.

**Idha thatvā**ti “idaṃ kho, tāta, ta”nti evam nigamanavasena vuttaṭṭhāne thatvā. **Vattanti** ariyacakkavattivattam. **Samānetabbanti** “dasavidham, dvādasavidha”nti ca heṭṭhā vuttagaṇanāya ca samānam kātabbam anūnam anadhikam katvā dassetabbam. **Adhammarāgassā**ti ayuttaṭṭhāne rāgassa. **Visamalobhassā**ti yuttaṭṭhānepi ativiya balavabhāvena pavattalobhassa.

### Cakkaratanapātubhāvavaṇṇanā

**85. Vattamānassā**ti paripuṇṇe cakkavattivatte vattamānassa, no aparipuṇṇeti āha “**pūretvā**

**vattamānassā**”ti. Kittāvatā panassa pārīpūrī hotīti? Tattha “katādhikārassa tāva heṭṭhimaparicchena dvādasahipi saṃvaccharehi pūrati, pañcavīsatiyā, paññāsāya vā saṃvaccharehi. Ayañca bhedo dhammacchandassapi tikkhamajjhamudutāvasena, itarassa tato bhiyyopī”ti vadanti.

### Dutiyādicakkavattikathāvaṇṇanā

**90. Attano matiyāti** paramparāgataṃ purāṇaṃ tantim pavenim laṅghitvā attano icchitākārena. Tenāha “**porāṇaka**”ntiādi.

Na pabbantīti samiddhiyā na pūrenti, phītā na hontīti attho. Tenāha “**na vaḍḍhanti**”ti. Tathā cāha “**katthaci suññā honti**”ti. Tattha tattha rājakicce rañña amā saha vattantīti **amaccā**, yehi vinā rājakiccaṃ nappavattati. Paramparāgatā hutvā rañña parisāya bhavāti **pārisajjā**. Tenāha “**parisāvacarā**”ti. Tasmim ṭhānantare ṭhapitā hutvā rañña āyaṃ, vayañca yāthāvato gaṇentīti **gaṇakā**. Jātikulasutācārādivasena puthuttaṃ gatattā mahatī mattā etesanti **mahāmattā**, te pana mahānubhāvā amaccā evāti āha “**mahāamaccā**”ti. Ye rañña hatthānīkādisu avatṭhitā, te **anīkatṭhāti** āha “**hatthiācariyādayo**”ti. Mantam paññaṃ asitā hutvā jīvantīti **mantassājīvino**, matisajīvāti attho, ye tattha tattha rājakicce upadesadāyino. Tenāha “**mantā vuccati pañña**”tiādi.

### Āyuvaṇṇādiparihānikathāvaṇṇanā

**91. Balavalobhattāti** “imasmiṃ loke idāni daliddamanussā nāma bahū, tesam sabbesam dhane anuppadiyamāne mayham kosassa parikkhayo hoti”ti evaṃ uppanabalavalobhattā.

**Uparūparibhūmīsūti** chakāmasaggasaṅkhātāsu uparūparikāmbhūmīsū. Kammassa phalaṃ **aggam** nāma, tam panettha uddhagāmīti āha “**uddham aggam assā**”ti. Sagge niyuttā, saggappayojanāti vā **sovaggikā**. **Dasannaṃ visesānanti** dibbaāyuvaṇṇayasasukhāādhipateyyānañceva dibbarūpādīnañca phalavisesānaṃ. **Vaṇṇaggahaṇena** cettha sako atabhāvavaṇṇo gahito, **rūpaggahaṇena** bahiddhā rūpāramaṇaṃ.

**92. Suṭṭhu nisiddhanti** yathāyaṃ iminā atabhāvena adinnaṃ ādātuṃ na sakkoti, evaṃ sammadeva tato nisedhitaṃ katvā. **Mūlahatanti** jīvitā voropanena mūle eva hataṃ.

**96. Rāgavasena** caraṇaṃ **carittaṃ**, carittameva **cārittaṃ**, methunanti adhippāyo, tam pana “paresaṃ dāresū”ti vuttattā “**micchācāra**”nti āha.

**100. Paccanīkadiṭṭhīti** “atthi dinna”ntiādikāya (ma. ni. 1.441; 2.94; vibha. 793) sammādiṭṭhiyā paṭipakkhabhūtā diṭṭhi.

**101. Mātucchādikā** upari sayameva vakkhati. **Atibalavalobhoti** ativiya balavā bahalakilesa, yena akāle, adese ca pavattati. **Micchādhammoti** micchā viparīto avisabhāgavatthuko lobhadhammo. Tenāha “**purisāna**”ntiādi.

**Tassa bhāvoti** yena mettākaruṇāpubbaṅgamena cittena puggalo “matteyyo”ti vuccati, so tassa yathāvuttacittuppādo, taṃsamuṭṭhānā ca kiriyā **matteyyatā**. Tenāha “**mātari sammā paṭipattiyā etaṃ nāma**”nti. Yā sammā pajjitabbe sammā appaṭipatti, sopi doso agāravakiriyādibhāvato. Vippaṭipattiyam pana vattabbameva natthīti āha “**tassā abhāvo ceva tappaṭipakkhatā ca amatteyyatā**”ti. **Kule jeṭṭhānanti** attano kule vuddhānaṃ mahāpitucūlapitujēṭṭhakabhātikādīnaṃ.

### Dasavassāyukasamayavaṇṇanā

**103. “Ya”nti** iminā samayo āmaṭṭho, bhummatthe cetam paccattavacananti āha “**yasmim**

**samaye**’ti. Alam patinoti **alam pateyyā**. Tassā pariyattatā bhariyābhāvenāti āha “**dātuṃ yuttā**”ti. **Aggarasānī** madhurabhāvena, bhesajjabhāvena ca aggabhūtarasāni.

**Dippissantī** paṭipakkhabhāvena samujjalissanti. Tenāha “kusalantipi na bhavissati”ti. **Aho purisoti** mātādīsipi īdiso, aññesaṃ kesam kiṃ vissajjessati, aho tejavapurisoti.

**Gehe mātugāmaṃ viyāti** attano gehe dāsibhariyābhūtamātugāmaṃ viya. **Missībhāvanti** mātādīsū bhariyāya viya cārittasaṅkaram.

**Balavakopoti** hantukāmatāvasena uppattiyā balavakopo. **Āghātetīti** āhanati, attano kakkhaḷapharusabhāvena cittaṃ vibādhatīti attho. Nissayadahanaraso hi doso. **Byāpādetīti** vināseti, **manopadūsanato** manassa pakopanato. **Tibbanti** tikkhaṃ, sā panassa tikkhatā sarīre avahantepi sinehavatthum laṅghitvāpi pavattiyā veditabbāti āha “**piyamānassapī**”tiādi.

**104.** Kappavināso **kappo** uttarapadalopena, antarāva kappo **antarakappo**. Taṅhādibhedo kappo etassa atthīti **kappo**, sattalokoti āha “**antarāva lokavināso**”ti. Svāyaṃ antarakappo katividho, kathañcassa sambhavo, kiṃ gatikoti antogadham codanaṃ sandhāyāha “**antarakappo ca nāmā**”tiādi. **Lobhussadāyāti** lobhādihikāya **pajāya** vattamāyā.

**Evam cintayimsūti** pubbe yathānussavānussaraṇena, attano ca āyuvisesassa labhanato. **Gumbalatādīhi gahanam thānanti** gumbalatādīhi sañchannatāya gahanabhūtam thānam. **Rukkhehi gahananti** rukkhehi nirantranicithehi gahanabhūtam. **Nadīvidugganti** chinnataṭāhi nadīhi orato, pārato ca viduggam. Tenāha “**nadīna**”ntiādi. **Pabbatehi visamaṃ** pabbatantaram. **Pabbatesu vā** chinnataṭesu durāroham **visamaṭṭhānam**. **Sabhāgeti** jīvanavasena samānabhāge sadise **karissanti**.

### Āyuvanñādivaḍḍhanakathavaṇṇanā

**105.** **Āyatanti** vā dīgham cirakālikam. Maraṇavasena hi nātikkhayo āyato apunarāvattanato, na rājabhayādīnā ukkamanavasena punarāvattiyāpi tassa labbhanato. **Osakkeyyāmāti** orameyyāma. Viramaṇampi atthato pajahanameva pariccajanabhāvatoti āha “**pajaheyyāmāti attho**”ti. **Sīlagabbhe vaḍḍhitattāti** mātu, pītu ca sīlavantatāya tadavayavabhūte gabbhe vaḍḍhi “sīlagabbhe vaḍḍhitā”ti vuttā, etena utuāhārassa viya tadaññassāpi bāhirassa paccayassa vasena sattasantānassa visesādhānam hotīti dasseti. Yaṃ panettha vattabbaṃ, taṃ **brahmajālaṭikāyaṃ** (dī. ni. ṭī. 1.7) vuttameva. **Khettavisuddhiyāti** adhiṭṭhānabhūtavatthūvisuddhiyā. Nanu ca taṃ visesādhānam jāyamānam rūpasantatiyā eva bhaveyyāti? Saccametam, rūpasantatiyā pana tathā āhitavisesāya arūpasantatipi laddhūpakārā eva hoti tappaṭibaddhavuttibhāvato. Yathā kabaḷikārāhārena upatthambhite rūpakāye sabbopi attabhāvo anuggahito eva nāma hoti, yathā pana rañño cakkavattino puññavisesam upanissāya tassa itthiratanādīnam anaññasādhāraṇā te te visesā sambhavanti tabbhāve bhāvato, tadabhāve ca abhāvato, evameva tasmim kāle mātāpitūnam yathāvuttapuññavisesam upanissāya tesam puttānam jāyamānam dīghāyukatā khettavisuddhiyāva hotīti veditabbā samvegadhammachandādisamupabrūhitāya tadā tesam kusalacetanāya tathā uḷārabhāvena samuppajjanato. **Etthāti** imasmim manussaloke, **tatthāti** yathāvuttam kusaladhammam samādāya vattamāne sattanikāye. **Tatthevāti** tasmimyeva sattanikāye. “**Attanova sīlasampattiyā**”ti vuttam sasantatipariyāpanassa dhammassa tattha visesappaccayabhāvato. Khettavisuddhipi pana idhāpi paṭikkhipitum na sakkā.

**Koṭṭhāsāti** cattārīsavassāyukātīdayo asītivassasahassāyukapariyosānā ekādasa koṭṭhāsā. **Adinnādānādīhīti ādi**-saddena kule jeṭṭhāpacāyikāpariyosānānam dasannaṃ pāpakotṭhāsānam gahaṇam.

### Saṅkharājauppattivaṇṇanā



**106. Evaṃ uppajjanakataṇhāti** evaṃ vacībhedaṃ pāpanavasena pavattā bhuñjitukāmatā. **Anasananti** kāyikakiriyaśamatthāhetubhūto sarīrasaṅkoco. Tenāha “**avipphārikabhāvo**”tiādi. **Ghananivāsanti** gāmanigamarājadhānīnaṃ ghananiviṭṭhataṃ aññamaññassa nātidūravattitaṃ. **Nirantarapūritoti** nirantaraṃ viya puṇṇo tatrūpagānaṃ sattānaṃ bahubhāvato.

### Metteyyabuddhuppādavaṇṇanā

**107.** Kiñcāpi pubbe vaḍḍhamānakavasena desanā āgataṃ, idaṃ pana na vaḍḍhamānakavasena vuttaṃ. Kasmāti ce āha “**na hī**”tiādi. Sattānaṃ vaḍḍhamānāyukakāle buddhā na nibbattanti saṃsāre saṃvegassa dubbibhāvanīyattā. Tato vassasatasahassato orameva buddhuppādakālo.

**108.** Samussitaṭṭhena yūpo viyāti **yūpo**, yūpanti ettha sattā anekabhūmikūṭāgārovarakādivantatāyāti **yūpo**, pāsādo. **Raṅṅo hetubhūtenāti** hetuatthe karaṇavacanantidassetiussāhasampattiādinā. Mahatā rājānubhāvena, mahatā ca kittisaddena samannāgatattā catūhi saṅgahavattūhi mahājanassa rañjanato **mahāpanādo nāma rājā jāto. Jātaketi** mahāpanādajātake (jā. 1.3.40 mahāpanādajātake).

**Panādo nāma so rājāti** “atīte panādo nāma so rājā assosī”ti attabhāvantaratāya attānaṃ paraṃ viya niddisati. Āyasmā hi bhaddajitthero attanā ajjhāvutthapubbaṃ suvaṇṇapāsādaṃ dassetvā evamāha. **Yassa yūpo suvaṇṇayoti** yassa raṅṅo ayaṃ yūpo pāsādo suvaṇṇayo suvaṇṇamayo. **Tiriyaṃ soḷasubbedhoti** vitthārato soḷasasarapātappamāṇo, so pana aḍḍhajojanappamāṇo hoti. **Ubbhamāhu saḥassadhāti** ubbhaṃ uccabhāvaṃ assa pāsādassa saḥassadhā saḥsakaṇḍappamāṇaṃ āhu, so pana yojanato pañcavīsatiyojanappamāṇo hoti. Keci panettha gāthāsukhatthaṃ “āhū”ti dīghaṃ kataṃ, ahu ahoṣīti atthaṃ vadanti.

**Saḥsakaṇḍoti** saḥsabhūmiko, “saḥsakaḥḍo” tipi pāṭho, so eva attho. **Satageṇḍūti** anekasataniyūhako. **Dhajālūti** tattha tattha niyūhasikharādīsu patiṭṭhapitehi sattidhajavīraṅgadhajādīhi dhajehi sampanno. **Haritāmoyoti** cāmīkarasuvaṇṇamayo. Keci pana **haritāmoyoti** “haritamaṇiparikkhaṭo”ti vadanti. **Gandhabbāti** naṭā. **Chasahassāni sattadhāti** chamattāni gandhabbasahassāni sattadhā tassa pāsādassa sattasu ṭhānesu raṅṅo abhīramāpanatthaṃ naccīmsūti attho. Te evaṃ naccantāpi kira rājānaṃ hāsetuṃ nāsakkhīmsu. Atha sakko devarājā devanaṭaṃ pesetvā samajjaṃ kāresi, tadā rājā hasīti.

**Koṭigāmo nāma** māpito. **Vatthūti** bhaddajittherassa vatthu. Taṃ **theragāthāvaṇṇanāyaṃ** (theragā. aṭṭha. bhaddajittheragāthāvaṇṇanāya) vitthārato āgatameva. **Itarassāti** naḷakāradevaputtassa. **Ānubhāvāti** puññānubhāvanimittaṃ.

**Dānavasena datvāti** taṃ pāsādaṃ attano pariggahabhāvaviyojanena dānamukhe niyojetvā. **Vissajjetvāti** citteneva pariccajanavasena datvā puna dakkhiṇeyyānaṃ santakabhāvakaranena nirapekkhāpariccāgavasena vissajjetvā. **Ettakenāti** “bhūtapubbaṃ bhikkhave”ti ādiṃ katvā yāva “pabbajissatī”ti padaṃ ettakena desanāmaggena.

### Bhikkhuno āyuvaṇṇādivaḍḍhanakathāvaṇṇanā

**110. Idaṃ bhikkhuno āyusminti** āyusmiṃ sādhetabbe idaṃ bhikkhuno icchitabbaṃ cirajīvitāya hetubhāvato. Tenāha “**idaṃ āyukāraṇa**”nti.

Sampannasīlassa avippaṭṭisārapāmojjapītipassaddhisukhasamādhīyathābhūtaññādisambhavato taṃsamūṭṭhānapanāṭarūpehi kāyassa phuṭattā sarīre vaṇṇadhātu vippasannā hoti, kalyāṇo ca kittisaddo abbhuggacchatīti āha “**sīlavato hī**”tiādi.

**Vivekajaṃ pītisukhādīti ādi-**saddena samādhijaṃ pītisukhaṃ, apītiyaṃ kāyasukhaṃ, satipārisuddhijaṃ upekkhāsukhañca saṅgaṇhāti.

**Appaṭikkūlatāvahoti** appamāṇānaṃ sattānaṃ, attano ca tesu appaṭikkūlabhāvato. Hitūpasamhārādivasena pavattiyā sabbadisāsu pharaṇaappamāṇavasena sabbadisāsu vipphārikatā.

“**Arahattaphalasaṅkhātaṃ bala**”nti vuttaṃ tassa akuppadhammatāya kenaci anabhibhavanīyabhāvato.

“**Loke**”ti idaṃ yathā “**ekabalampī**”ti iminā sambandhīyati, evaṃ “duppasahaṃ durabhisambhava”nti imehipi sambandhitabbaṃ. Lokapariyāpanneheva hi dhammehi tesam balassa duppasahatā, durabhisambhavatā, na lokuttarehīti. **Etthevāti** etasmiṃ arahattaphale eva, tadatthanti attho.

**Lokuttarapuññampīti** lokuttarapuññampi puññaphalampi. **Yāva āsavakkhayā pavaḍḍhati** vivaṭṭagāmikusaladhammānaṃ samādānahetūti yojanā. **Amatapānaṃ pivimsu** hetṭhimamaggaḥalasalamaḍḍigamaḥasenāti adhippāyo.

Cakkavattisuttavaṇṇanāya līnathappakāsana.

## 4. Aggaññasuttavaṇṇanā

### Vāseṭṭhabhāradvājavaṇṇanā

**111. Etthāti** “pubbārāme, migāramātupāsāde”ti etasmiṃ padadvaye. Koyaṃ pubbārāmo, kathañca pubbārāmo, kā ca migāramātā, kathañcassā pāsādo ahoṣīti etasmiṃ antolīne anuyoge. **Ayaṃ** idāni vuccamānā **anupubbikathā** ādito paṭṭhāya saṅkhepeneva anupubbikathā. **Padumuttaraṃ bhagavantaṃ** ekaṃ upāsikaṃ aggupatṭhāyikaṭṭhāne ṭhapentiṃ disvāna tattha sañjātagāravabahuṃnā tamevatthaṃ purakkhatvā bhagavantaṃ **nimantetvā. Meṇḍakaputtassāti** meṇḍakasetṭhiputtassa. **Sotāpannā ahoṣi** tathā katādhikārattā.

**Mātuṭṭhāne ṭhapesi** attano sīlācārasampattiyā garuṭṭhāniyattā. **Upayoganti** tattha tattha appetabbaṭṭhāne appanāvasena viniyogaṃ agamaṃsu. **Aññehi ca** veḷuriyalohitaṅkamasāragallādīhi. **Bhassatīti** otarati. **Suddhapāsādova na sobhatīti** kevalo ekapāsādo eva vihāro na sobhati. Niyūhāni bahūni nīharitvā kattabasenāsanāni “duvaḍḍhagehānī”ti vadanti. Majjhe gabbho samantato anupariyāyatoti evaṃ dvikkhattuṃ vaḍḍhetvā katasenāsanāni **duvaḍḍhagehāni. Cūlapāsādāti** khuddakapāsādā.

**Uttaradevīvihāro** nāma nagarassa pācīnadvārasamīpe katavihāro.

Titthiyalīngassa aggahitattā **neva titthiyaparivāsaṃ vasanti.** Anupasampannabhāvato āpattiyā āpannāya abhāvato **na āpattiparivāsaṃ vasanti. Bhikkhubhāvanti** upasampadaṃ. **Tevijjasuttanti** imasmiṃ dīghanikāye tevijjasuttaṃ **sutvā.**

**113. Anuvattamānā caṅkamimsu** ananucaṅkamane yathādhippetassa atthassa pucchanādīnaṃ asakkuṇeyyattā. **Tesanti** tesam dvinnaṃ. Tenāha “**paṇḍitataro**”ti. **Atthāti** bhavattha. **Kulasampannāti** sampannakulā uditodite brāhmaṇakule uppannā. **Brāhmaṇakulāti** kenaci pārijuññena anupaddutā eva brāhmaṇakulā. Tenāha “**bhogādisampanna**”ntiādi. **Ime brāhmaṇā** uccā hutvā “imaṃ vasalaṃ pabbajjaṃ pabbajimsū”tiādīnā jātiādīni ghaṭṭentā **akkosanti. Paribhāsantīti** paribhavitvā bhāsanti. **Attano anurūpāyāti** attano ajjhāsayaṃsa anurūpāya. Antarantarā vicchijja pavattiyamānā paribhāsā

paripuṇṇā nāma na hoti khaṇḍabhāvato, tabbipariyāyato paripuṇṇā nāma hotīti āha “**antarā**”tiādi.

**Appatiṭṭhatāyā**ti apassayarahitattā. **Vibhinnoti** vinaṭṭho.

**Itare tayo vaṇṇā**ti khattiyādayo vaṇṇā **hīnā**. Nanu khattiyāva seṭṭhā vaṇṇā yathā buddhā etarahi khattiyakule eva uppannāti? Saccametaṃ, te pana attano micchābhimānena, micchāgāhena ca “brāhmaṇova seṭṭho vaṇṇo”ti vadanti, taṃ tesam vacanamattaṃ. “**Sujjhantī**ti suddhā hontī, na nindaṃ garahaṃ pāpuṇanti”ti vadanti. **Sujjhanti** vā saṃsārato sujjhanti, na sesā vaṇṇā asukkajātikattā, mantajjhenābhāvato cāti. Brahmuno **mukhato jātā** vedavacanato jātāti mukhato jātā. Tato eva brahmuno mahābrahmuno vedavacanato vijātāti **brahmajā**. Tena duvidhenāpi nimmitāti **brahmanimmitā**. Vedavedaṅgādibrahmadāyajjaṃ arahantīti **brahmadāyādā**. **Muṇḍake samaṇaketi** ettha **ka-kāro** garahāyanti āha “**nindantā jigucchantā vadantī**”ti. **Ibbheti** sudde, te pana gharabandhanena baddhā nihīnatarāti āha “**gahapatike**”ti. **Kaṇheti** kaṇhajātike. Bandhanaṭṭhena **bandhu**, kassa pana bandhūti āha “**mārassa bandhubhūte**”ti. **Pādāpacce**ti pādato jātāpacce. Ayam kira brāhmaṇānaṃ laddhi “brāhmaṇā brahmuno mukhato jātā, khattiyā urato, ūrūhi vessā, pādato suddā”ti.

**114.** Yasmā paṭhamakappikakāle catuvaṇṇavavatthānaṃ natthi, sabbeva sattā ekasadisā, aparabhāge pana tesam payogabhedavasena ahosi, tasmā vuttaṃ “**porāṇaṃ...pe... ajānantā**”ti. **Laddhibhīdanatthāyā**ti “brāhmaṇā brahmuno puttā orasā mukhato jātā”ti evaṃ pavattāya laddhiyā viniveṭhanatthaṃ. **Puttappaṭilābhatthāyā**ti “evaṃ mayaṃ pettikaṃ iṇaṃ sodhessāmā”ti laddhiyaṃ ṭhatvā puttappaṭilābhāya. Ayañhettha dhammikānaṃ brāhmaṇānaṃ ajjhāsayo. **Sañjātapupphā**ti rajassalā. Itthīnañhi kumāribhāvappattito paṭṭhāya pacchimavayato oraṃ asati vibandhe aṭṭhame aṭṭhame sattāhe gabbhāsayaasaññite tatiye āvatte katipayā lohitaṭṭakā saṅṭhahitvā aggahitapupphā eva bhijjanti, tato lohitaṃ paggharati, tattha utusamaññā, pupphasamaññā ca. **Nesanti** brāhmaṇānaṃ. **Saccavacanāṃ siyā**ti “brahmuno puttā”tiādivacanāṃ saccaṃ yadi siyā, **brāhmaṇānaṃ...pe... mukhaṃ bhavēya**, na cetam atthi.

### Catuvaṇṇasuddhivaṇṇanā

**115. Mukhacchedakavādanti** “brāhmaṇā mahābrahmuno mukhato jātā”ti vādassa chedakavādaṃ. **Ariyabhāve asamatthā**ti anariyabhāvāvahā. **Pakatikālakā**ti sabhāveneva na suddhā. **Kaṇhoti** kiliṭṭho upatāpako. Tenāha “**dukkhoti attho**”ti.

**Sukkabhāvo** nāma parisuddhatāti āha “**nikkilesabhāvena paṇḍarā**”ti. **Sukkoti** na kiliṭṭho anupatāpakoti vuttaṃ “**sukhoti attho**”ti.

**116. Ubhayavokiṇṇeti** vacanavipallāsena vuttanti āha “**ubhayesu vokiṇṇesū**”ti. **Missībhūtesū**ti “kadāci kaṇhā dhammā, kadāci sukkā dhammā”ti evaṃ ekasmiṃ santāne, ekasmiṃyeva ca attabhāve pavattiyā missībhūtesu, na pana ekajjhaṃ pavattiyā. **Etthā**ti anantaravuttadhammāva anvādhiṭṭhāti āha “**kaṇhasukkadhammesū**”ti. Yasmā ca te brāhmaṇā na ceva te dhamme atikkantā, yāya ca paṭipadāya atikkameyyuṃ, sāpi tesam paṭipadā natthi, tasmā vuttaṃ “**vattamānāpī**”ti. **Nānujānanti** ayathābhuccavādabhāvato. **Anujānanañca** nāma abhhanumodananti tadabhāvaṃ dassentena “**nānumodanti, na pasamsanti**”ti vuttaṃ. **Catunnaṃ vaṇṇānanti** niddhāraṇe sāmivacanāṃ. **Tesanti** pana sambandhepi vā sāmivacanāṃ. **Te ca** brāhmaṇā **na evarūpā** na edisā, yādiso arahā ekadesenāpi tena tesam sadisatābhāvato, **tasmā** tena kāraṇena **nesam** brāhmaṇānaṃ “brāhmaṇova seṭṭho vaṇṇo”ti vādaṃ **viññū** yathābhūtavādino buddhādayo ariyā **nānujānanti**.

**Ārakattādihīti** ettha kilesānaṃ ārakattā pahīnabhāvato dūrattā **arahaṃ**, kilesārīnaṃ hatattā **arahaṃ**, saṃsāraccakassa arānaṃ hatattā **arahaṃ**, paccayādīnaṃ arahattā **arahaṃ**, pāpakaraṇe rahābhāvena **arahaṃ**ti evamattho veditabbo. Ayamettha saṅkhepo, vitthāro pana visuddhimagge

(visuddhi. 1.125 ādayo), taṃ saṃvaṇṇanāsu (visuddhi. tī. 1.124) ca vuttanayena vedītabbo. **Āsavānaṃ khīṇattā**ti catunnampi āsavānaṃ anavasesato pahīnattā. **Brahmacariyavāsanti** maggabrahmacariyavāsaṃ. Tassa vāsassa pariyoṣitattā **vutthavāso**, dasannampi vā ariyavāsānaṃ vutthattā **vutthavāso**. Vuttañhettaṃ –

“Dasayime, bhikkhave, ariyāvāsā, yadariyā āvasiṃsu vā āvasanti vā āvasissanti vā. Katame dasa? Idha, bhikkhave, bhikkhu pañcaṅgavippahīno hoti chaḷaṅgasamannāgato ekārakkho caturāpasseno panuṇṇapaccekasacco samavayasathesano anāvilasaṅkappo passaddhakāyasaṅkhāro suvimuttacitto suvimuttapañño. Ime kho, bhikkhave, dasa ariyāvāsā”ti (a. ni. 10.19).

Vussaṭṭi vā **vusitaṃ**, ariyamaggo, ariyaphalañca, taṃ etassa atthīti atisayavacanīcchāvasena arahā **“vusitavā”**ti vutto. **Karaṇīyaṃ** nāma pariññāpahānasacchikiriyābhāvanā dukkhassantaṃ kātukāmehi ekantato kattabbattā, taṃ pana yasmā catūhi maggehi paccekaṃ catūsu saccesu kātabbaṃ kataṃ, tasmā vuttaṃ **“catūhi...pe... katakaraṇīyo”**ti. Osīdāpanaṭṭhena bhārā viyāti **bhārā**, kilesā, khandhā ca. Vuttañhi **“bhārā have pañcakkhandhā”**ti (saṃ. ni. 3.22) **ohāritoti** apanīto. **Sako attho sadatthoti** ettha **da-kāro** padasandhikaro. Kāmaṃ diṭṭhiādayopi saṃyojanāni eva, tathāpi taṇhāya bhavasamyojanaṭṭho sātisayo. Yathāha **“avijjānīvaraṇānaṃ sattānaṃ taṇhāsamyojanāna”**nti. (Saṃ. ni. 2.125, 126, 127, 132, 134, 136, 142; 3.5.520; kathā. 75) tato sā eva sutte (dī. ni. 2.400; ma. ni. 1.93, 133; 3.373; saṃ. ni. 3.1081; paṭi. ma. 1.34 ādayo) samudayasaccabhāvena vuttā, tasmā vuttaṃ **“bhavasamyojanaṃ vuccati taṇhā”**ti. **Sammadaññā vimuttoti** sammā aññāya jānanabhūtāya aggamaḡgapaññāya sammā yathābhūtaṃ yaṃ yathā jānitabbaṃ, taṃ tathā jānitvā vimutto. **Imasmiṃ loketi** imasmiṃ satta-loke. **Idhattabhāveti** imasmiṃ attabhāve, **parattabhāveti** parasmīṃ attabhāve, idhaloke, paraloke cāti attho.

**117. Antaravirahitā**ti vibhāgavirahitā. Tenāha **“attano kulena sadisā”**ti. Anuyantīti anuyantā, anuyantā eva **ānuyantā**, anuvattakā. Tenāha **“vasavattino”**ti.

**118. Nivīṭṭhā**ti saddheyyavattusmiṃ anupavisanavasena nivīṭṭhā. Tato eva tasmīṃ adhikaṃ nivisanato **abhinivīṭṭhā**. **Acalaṭṭhitā**ti acalabhāve ṭhitā.

Yanti yaṃ kathetabbadhammaṃ anupadhāretvā, tadatthañca appaccakkhaṃ katvā kathanāṃ, **etaṃ atṭhānaṃ** akāraṇaṃ tassa bodhimūleyeva samucchinnattā. **Vicchindajananatthanti** ratanattayasaddhāya vicchindassa uppādanatthaṃ, aññathattāyāti attho. **Soti māro. Musāvādaṃ kātum nāsakkhīti** āgataphalassa ariyasāvakaṃ purato musā vattuṃ na visahi, tasmā **āma mārosmiti paṭijāni. Silāpathaviyanti** ratanamayasilāpathaviyaṃ. Sineruṃ kira parivāretvā ṭhito bhūmippadeso sattaratanamayo, **“suvaṇṇamayo”**ti keci, sā vitthārato, ubbedhato anekayojanasahassaparimāṇā ativiya niccalā. **Kim tvam etthāti** kim kāraṇā tvam ettha. **“Ṭhito”**ti **accharaṃ pahari. Ṭhātuṃ asakkontoti** ariyasāvakaṃ purato ṭhātuṃ asakkonto. Ayañhi ariyadhammādhigamaṃ ānubhāvo, yaṃ māropi nāma mahānubhāvo ujukaṃ paṭipparituṃ na sakkoti.

Maggo eva mūlaṃ **maggamūlaṃ**, tassa. **Sañjātattā** uppannattā. **Tena maggamūlena** patiṭṭhitasantāne laddhapatiṭṭhā. Bhagavato desanādhammaṃ nissāya ariyāya jātiyā jāto **“bhagavantaṃ nissāya ariyabhūmiyaṃ jāto”**ti vutto. **“Ure vasitvā”**ti idaṃ dhammaghosassa urato samuṭṭhānatāya vuttaṃ. Ure vāyāmajanītabhijātītāya vā **oraso**. Mukhato jātena jāto **“mukhato jāto”**ti vutto. Kāraṇakāraṇepi hi kāraṇe viya vohāro hoti **“tiṇehi bhattaṃ siddha”**nti. Keci pana **“vimokkhamukhassa vasena jātattā mukhato jāto”**ti vadanti, tathāpi vuttanayeneva attho vedītabbo. Purimenatthena yonijo, sedajo, mukhajoti tīsu sambandhesu mukhajena sambandhena bhagavato puttabhāvo vibhāvito. Atthadvayenāpi dhammajabhāvoyeva dīpito. Ariyadhammappattito laddhaviseso hutvā pavatto taduttarakāliko khandhasantāno **“ariyadhammato jāto”**ti vedītabbo, ariyadhammaṃ vā maggaphalaṃ nissāya, upanissāya ca jāto sabbopi dhammappabandho **“ariyadhammato jāto”**ti gahetabbo. Tesam pana ariyadhammānaṃ ariyoṣitakīcatāya ariyabhāvena abhinibbattimattaṃ upādāya **“ariyadhammato**

**jātattā**”ti vuttaṃ. Pariyositakiccatāya tathā nibbattipāripūriṃ upādāya “**nimmitattā**”ti vuttaṃ, yato “dhammajo dhammanimmito”ti vuttaṃ. “Navalokuttaradhammadāyaṃ ādiyattī dhammadāyādo” tipī pāṭho. **Assāti** “bhagavatomhiputto”tiādīnā vuttassa vākyassa. **Atthaṃ dassentoti** bhāvattthaṃ pakāsento. Tathāgatassa anaññasādhāraṇasīlādīdhammakhandhassa samūhanivesavasena dhammakāyatāya na kiñci vattabbaṃ atthi, satthuṭṭhāniyassa pana dhammakāyatam dassetuṃ “kasmā tathāgato dhammakāyoti vutto”ti sayameva puccham samuṭṭhāpetvā “**tathāgato hī**”tiādīnā tamattthaṃ vissajjeti. **Hadayena cintetvāti** “imaṃ dhammam imassa desessāmī”ti tassa upagatassa veneyyanassa bodhanattthaṃ cittena cintetvā. **Vācāya abhinīharīti** saddhammadesanāvācāya karavīkarutamañjunā brahmassarena veneyyasantānābhimukhaṃ tadajjhāsayanurūpaṃ hitamatthaṃ nīhari upanesi. **Tenāti** tena kāraṇena evaṃsaddhammādhimuttibhāvena. **Assāti** tathāgatassa. **Dhammamayattāti** dhammabhūtātā. Idhāhippetadhammo seṭṭhatṭhena brahmabhūtoti āha “**dhammakāyattā eva brahmakāyo**”ti. Sabbaso adhammam pajahitvā anavasesato dhammo eva bhūtoti **dhammabhūto**. Tathārūpo ca yasmā sabhāvato dhammo evāti vattabbaṃ arahatīti āha “**dhammasabhāvo**”ti.

**119. Seṭṭhacchedakavādanti** “brāhmaṇova seṭṭho vaṇṇo”ti (dī. ni. 3.116) evaṃ vuttaseṭṭhabhāvachchedakavādaṃ. **Aparenapi nayanāti** yathāvuttaseṭṭhacchedakavādato aparenapi porāṇakalokuppattidassananayena. **Seṭṭhaccheda...pe... dassentoti** sopi hi “brāhmaṇova seṭṭho vaṇṇo, hīnā aññe vaṇṇā”ti, “brāhmaṇā brahmuno puttā orasā mukhato jātā brahmajā”ti (dī. ni. 3.114) ca evaṃ pavattāya micchādīṭṭhiyā viniveṭṭhano jātibrahmaṇānaṃ seṭṭhabhāvassa chedanato seṭṭhacchedanavādo nāma hotīti dassentoti attho.

**Itthabhāvanti** imaṃ pakāratam manussabhāvaṃ. Sāmaññajotanā hi visese avatiṭṭhati, pakaraṇavasena vā ayamatto avacchinno daṭṭhabbo. **Maneneva nibbattāti** bāhirapaccayena vinā kevalam upacārajhānamanasāva nibbattā. Yāya upacārajhānacetanāya te tattha nibbattā, nīvaraṇavikkhambhanādīnā uḷāro tassā pavattiviseso, tasmā jhānaphalakappo tassā phalavisesoti āha “**brahmaloke viyā**”tiādi. “**Sayampabhā**”ti padānam tattha sūriyālokādīhi vinā andhakāram vidhamantā sayameva pabhāsantīti **sayampabhā**, antalikkhe ākāse carantīti **antalikkhacarā**, tadaññakāmāvacarasattānam viya sarīrassa vicaraṇaṭṭhānassa asubhatābhāvato **subham**, subheva tiṭṭhantīti **subhaṭṭhāyinoti** attho veditabbo.

### Rasapathavipātubhāvavaṇṇanā

**120. Sabbam cakkavāḷanti** anavasesam koṭisatasahassam cakkavāḷam. **Samatanīti** sañchādentī vipphari, sā pana tasmim udake patiṭṭhitā ahoṣīti āha “**patiṭṭhahī**”ti. **Vaṇṇena sampannāti** sampannavaṇṇā. **Makkhikaṇḍakarāhitanti** makkhikāhi ca tāsam aṇḍakehi ca rahitam.

**Atītānantarepi kappe loloyeva.** Kasmā? Evaṃ ciraparicitalolatāvasena sabbapaṭhamam tathā akāsīti dasseti. **Kimevidanti** “vaṇṇato, gandhato ca tāva ñātam, rasato pana kimevidaṃ bhavissatī”ti saṃsayajāto vadati. **Tiṭṭhatīti** aṭṭhāsi.

### Candimasūriyādīpātubhāvavaṇṇanā

**121. Āluppakārakanti** ettha ālopapariyāyo **āluppa**-saddoti āha “**ālopam katvā**”ti. Paccakkhabhūtānampi candimasūriyānam pavattiyam lokiyānam sammoho hoti, tam vidhamituṃ “**ko pana tesa**”ntiādīnā aṭṭha pañhāvissajjanāni gahitāni. Tattha **tesanti** candimasūriyānam. **Kasminti** kasmim ṭhāne. “**Ko uparī**”ti eteneva ko heṭṭhāti ayamatto vuttoyeva. Tathā “**ko sīgham gacchatī**”ti iminā ko saṅkham gacchatīti ayampi attho vuttoyeva. **Vīthiyoti** gamanavīthiyo. **Ekatoti** ekasmim khaṇe **pātubhavanti**. Sūriyamaṇḍale pana atthaṅgate candamaṇḍalam paññāyittha. **Chandam ñatvā vāti** ruciṃ ñatvā viya.

**Ubhayanti** anto, bahi ca.

Ujukanti āyāmato, vitthārato, ubbedhato ca. **Parimaṇḍalatoti** parikkhepato.

**Ujukam saṅikam gacchati** amāvāsīyaṃ sūriyena saddhiṃ gacchanto divase divase thokam thokam ohīyanto puṇṇamāsīyaṃ upaḍḍhamaggameva ohīyanato. **Tiriyam sīgham** gacchati ekasmimpi māse kadāci dakkhiṇato, kadāci uttarato dassanato. “**Dvīsu passesū**”ti idaṃ yebhuyyavasena vuttam. Candassa purato, pacchato, samañca tārakā gacchantiyeva. **Attano ṭhānanti** attano gamanaṭṭhānaṃ. **Na vijahanti** attano vīthiyāva gacchanato. Sūriyassa ujukam gamanassa sīghatā candassa gamanaṃ upādāya vedītabbā. **Tiriyam gamanaṃ** dakkhiṇadisato uttaradisāya, uttaradisato ca dakkhiṇadisāya gamanaṃ **dandham** chahi chahi māsehi ijghanato. **Soti** sūriyo. **Kālapakkhauposathatoti** kālapakkhe uposathe candena saheva gantvā tato paraṃ. **Pāṭipadadivaseti** sukkapakkhapāṭipadadivase. **Ohāya gacchati** attano sīghagāmitāya, tassa ca dandhagāmitāya. **Lekhā viya paññāyati** pacchimadisāyaṃ. **Yāva uposathadivasāti** yāva sukkapakkhauposathadivasā. “**Cando anukkamena vaḍḍhitvā**”ti idaṃ uparibhāgato patitasūriyālokatāya heṭṭhato pavattāya sūriyassa dūrabhāvena divase divase anukkamena parihāyamānāya attano chāyāya vasena anukkamena candamaṇḍalappadesassa vaḍḍhamānassa viya dissamānatāya vuttam, tasmā anukkamena vaḍḍhitvā viya. **Uposathadivase** puṇṇamāyaṃ **paripuṇṇo hoti**, paripuṇṇamaṇḍalo hutvā dissatīti attho. **Dhāvītvā gaṇhāti** candassa dandhagatīyāya, attano ca sīghagatīyāya. **Anukkamena hāyītvāti** ettha “anukkamena vaḍḍhitvā”ti ettha vuttanayena attho vedītabbo. Tattha pana chāyāya hāyamānatāya maṇḍalaṃ vaḍḍhamānaṃ viya dissati, idha chāyāya vaḍḍhamānatāya maṇḍalaṃ hāyamānaṃ viya dissati.

Yāya vīthiyā sūriye gacchante vassavalāhakā devaputtā sūriyābhitāpasantattā attano vimānato na nikkhamanti, kīlāpasutā hutvā na vicaranti, tadā kira sūriyassa vimānaṃ pakatimaggato adho otarītvā vicarati, tassa oruyha caraṇeneva candavimānampi adho oruyha carati taggatīkattā, tasmā sā vīthi udakābhāvena ajānurūpatāya “**ajavīthī**”ti samaññaṃ gatā. Yāya pana vīthiyā sūriye gacchante vassavalāhakā devaputtā sūriyābhitāpābhāvato abhiṇhaṃ attano vimānato bahi nikkhamitvā kīlāpasutā ito cito ca vicaranti, tadā kira sūriyavimānaṃ pakatimaggato uddham āruhitvā vicarati, tassa uddham āruyha caraṇeneva candavimānampi uddham āruyha carati taggatīkattā, taggatīkatā ca samānagatinā vātamaṇḍalena vimānassa phellitabbattā, tasmā sā vīthi udakabahubhāvena nāgānurūpatāya “**nāgavīthī**”ti samaññaṃ gatā. Yadā sūriyo uddhamanāruhanto, adho ca anotaranto pakatimaggeneva gacchati, tadā vassavalāhakā yathākālaṃ, yathārucci ca vimānato nikkhamitvā sukhena vicaranti, tena kālena kālaṃ vassanato loke utusamatā hoti, tāya utusamatāya hetubhūtāya sā candimasūriyānaṃ gati gavānurūpatāya “**govīthī**”ti samaññaṃ gatā. Tena vuttam “**ajavīthī**”tiādi.

Evam “kati nesam vīthiyo”ti pañhaṃ vissajjetvā “katham vicarantī”ti pañhaṃ vissajjetum “**candimasūriyā**”tiādi vuttam. Tattha **sineruto bahi nikkhamantīti** sinerusamīpena taṃ padakkhiṇam katvā gacchantā tato gamanavīthito bahi attano tīriyagamanena cakkavāḷābhimukhā nikkhamanti. **Anto vicarantīti** evam cha māse khaṇe khaṇe sineruto apasakkanavasena tato nikkhamitvā cakkavāḷasamīpaṃ pattā, tatopi cha māse khaṇe khaṇe apasakkanavasena nikkhamitvā sinerusamīpaṃ pāpuṇantā anto vicaranti. Idāni tamevatthaṃ saṅkhepena vuttam vivaritum “**tehi**”tiādi vuttam. Sinerussa, cakkavāḷassa ca yaṃ ṭhānaṃ vemajjhaṃ, tassa, sinerussa ca yaṃ ṭhānaṃ vemajjhaṃ, tena gacchantā “**sinerusamīpena vicarantī**”ti vuttā, na sinerussa aggāḷindaallīnā. **Cakkavāḷasamīpena caritvāti** etthāpi eseva nayo. **Majjhenāti** sinerussa, cakkavāḷassa ca ujukam vemajjhena maggena. **Citramāse majjhenāti** etthāpi eseva nayo.

**Ekappahārenāti** ekavelāya, ekeneva vā attano ekappahārena. **Majjhanhikoti** ṭhitamajjhanhiko kālo **hoti**. Tadā hi sūriyamaṇḍalaṃ uggacchantam hutvāpi imasmim dīpe ṭhitassa upaḍḍhameva dissati, uttarakurūso ṭhitassa ogacchantam hutvā. Evañhi ekavelāyameva tīsu dīpesu ālokakaraṇam.

Yesu kattikādinakkhattasamaññā, tānipi tārakarūpāni yevāti vuttam “**sesatārakarūpāni cā**”ti, nakkhattasamaññitatārakarūpato avasiṭṭhatārakarūpānīti attho. Ubhayānipi tāni devatānaṃ vasanakavimānānīti vedītabbāni. Rā-saddo tiyati chijjati etthāti **ratti**, sattānaṃ saddassa

vūpasamanakāloti attho. Dibbanti sattā kīḷanti jotanti etthāti **divā**. Sattānaṃ āyuṃ minanto viya siyati antaṃ karotīti **māso**. Taṃ taṃ kiriyāṃ arati vattetīti **utu**. Taṃ taṃ sattaṃ, dhammappavattiñca saṅgama vadanto viya sarati vattetīti **saṃvaccharo**.

**122.** Vivajjanaṃ **vivajjo**, so eva **vevajjaṃ**, vaṇṇassa vevajjaṃ **vaṇṇavevajjaṃ**, vaṇṇasampattiyā vigamo, tassa pana atthitā “**vaṇṇavevajjata**”ti vuttā. Tenāha “**vivajjabhāvo**”ti. **Tesanti** vaṇṇavantānaṃ sattānaṃ. **Atimānappaccayāti** dubbaṇṇavambhanavasena atikkamma attano vaṇṇaṃ paṭicca mānapaccayā, mānasampaggaṇhananimittanti attho. Sātisayo raso etissā atthīti **rasāti laddhamānāya, anubhāsiṃsūti** anurodhavasena bhāsiṃsu. **Lokuppattivāmsakathanti** lokuppattivāmsajaṃ pavenīkathaṃ, ādikāle uppannaṃ pavenīgatakathanti attho. “Anupatanti”tipi pāṭho, so evattho.

### **Bhūmipappaṭakapātubhāvādivaṇṇanā**

**123.** Ediso hutvāti ahicchattakasadiso hutvā.

**124.** Padālatāti “**padā**”ti evaṃnāmā ekā latā, sā pana yasmā sampannavāṇṇagandharasā, tasmā “**bhaddalatā**”ti vuttā. **Nālikāti** nāḷivalli. **Ahāyīti** nassi.

**125.** **Akaṭṭhapākoti** akaṭṭheyeva ṭhāne uppajjitvā paccanako, nīvāro viya sañjāto hutvā nippajjanakoti attho. **Kaṇo** “kuṇḍaka”nti ca vuccati. **Thusanti** taṇḍulaṃ pariyoṇandhitvā ṭhitattaco, tadabhāvato “**akaṇo, athuso**”ti sāli vutto. “**Paṭivirūḷha**”nti idaṃ pakkabhāvassa kāraṇavacanāṃ. Paṭivirūḷhato hi taṃ pakkanti. Yasmiṃ ṭhāne sāyaṃ pakko sāli gahito, tadeva ṭhānaṃ dutiyadivase pāto pakkena sālinā paripuṇṇaṃ hutvā tiṭṭhatīti āha “**sāyaṃ gahitaṭṭhānaṃ pāto pakkam hotī**”tiādi. **Alāyitanti** lāyitaṭṭhānampi tesāṃ kammappaccayā alāyitameva **huvvā anūnaṃ** paripuṇṇameva **paññāyati**, na kevalaṃ paññāyameva, atha kho tathābhūtamēva hutvā tiṭṭhati.

### **Itthipurisaliṅgādipātubhāvavaṇṇanā**

**126.** “**Manussakāle**”ti idaṃ pubbe manussabhūtānaṃyeva tattha idāni nikantivasena uppatti hotīti katvā vuttaṃ, devatānampi purimajātiyaṃ itthibhāve ṭhitānaṃ tattha virāgādipurisattappaccaye asati tadā itthiliṅgameva pātubhavati. **Purisattappaccayeti** “attanopi anissaratā, sabbakālaṃ parāyattavuttitā, rajassalatā vañcatā, gabbhadhāraṇaṃ, paṭhamāya pakatiyā nihīnapakatitā, sūravīratābhāvo, ‘appakā janā’ti ‘hīletabbatā’ti evamādi ādīnavapaccavekkhaṇapubbakampi itthibhāve ‘alaṃ itthibhāvena, na hi itthibhāve ṭhatvā cakkavattisiriṃ, na sakkamārabrahmasiriyo paccanubhavituṃ, na paccekabodhiṃ, na sammāsambodhiṃ adhigantaṃ sakkā’ti evaṃ itthibhāvavirajjanaṃ, ‘yathāvuttaādīnavavirahato uttamapakatibhāvato sampadamidaṃ purisattaṃ nāma seṭṭhaṃ uttamaṃ, ettha ṭhatvā sakkā etā sampattiyo sampāpūṇitu’nti evaṃ purisattabhāve sambhāvanāpubbakam patthanāṭhapanāṃ, ‘tattha ninnapoṇapabbhāracittatā’ti” evamādike purisabhāvassa paccayabhūte **dhamme. Pūretvā** vadḍhetvā. Paccakkhaṃ bhūtaṃ, sadisañca diṭṭhadhammikaṃ, samparāyikañca suvipulaṃ anattaṃ acintetvā purisassa kāmesu micchācāraṇaṃ kevalaṃ itthiyaṃ āsāpatti phalenevāti āsāpatti itthibhāvāvahāpi hotiyeva. Tanninnapoṇapabbhārabhāvena tannikantiyā nimittabhāvāpattitoti vuttaṃ “**puriso itthattabhāvaṃ labhanto kāmesumicchācāraṇaṃ nissāya labhati**”ti. **Tadāti** yathāvutte paṭhamakappikakāle. **Pakatiyāti** sabhāvena. **Mātugāmassāti** purimattabhāve mātugāmabhūtassa. **Purisassāti** etthāpi “pakatiyā”ti padaṃ ānetvā sambandhitabbaṃ. **Upanijjhāyatanti** upecca nijjhāyantānaṃ. Yathā aññaṃaññasmim sārāgo uppajjati, evaṃ sāpekkhabhāvena **olokentānaṃ. Rāgapariḷāhoti** rāgajo pariḷāho.

**Nibbuyhamānāyāti** pariṇatā hutvā niyyamānāya.

### **Methunadhammasamācāraṇaṇā**

**127. Gomayapiṇḍamattampi nālatthāti** sammadeva vivāhakammaṃ nālatthāti adhippāyena **vadanti. Pātabyatanti** tasmim̄ asaddhamme kilesakāmena pivitabbataṃ kiñci pivitabbavatthum̄ pivantā viya ativiya tosetvā paribhuñjitabbataṃ **āpajjimsu, pātabyatanti** vā paribhuñjanakataṃ **āpajjimsu** upagacchimsu. Paribhogattho hi ayam̄ **pā-saddo**, kattusādhano ca **tabya-saddo**, yathārucci paribhuñjimsūti attho.

**Sannidhikārakanti** sannidhikāraṃ, **ka-kāro** padavaḍḍhanamattanti āha “**sannidhim̄ katvā**”ti. **Apadānanti** avakhaṇḍanaṃ. **Ekekasmim̄ ṭhāneti** yattha yattha vahitaṃ, tasmim̄ tasmim̄ ekekasmim̄ ṭhāne. **Gumbagumbāti** puñjapuñjā.

### Sālivibhāgavaṇṇanā

**128. Sīmaṃ ṭhapeyyāmāti** “ayam̄ bhūmibhāgo asukassa, ayam̄ bhūmibhāgo asukassā”ti evaṃ paricchedaṃ kareyyāma. **Taṃ aggaṃ katvāti** taṃ ādim̄ katvā.

### Mahāsammatarājavaṇṇanā

**130. Pakāsetabbanti** dosavasena pakāsetabbaṃ. **Khipitabbanti** khepaṃ kātabbaṃ. Tenāha “**hāretabba**”nti, sattanikāyato nīharitabbaṃ.

**Nesanti** niddhāraṇe sāmivacanaṃ.

**131. Akkharanti** niruttiṃ. Sā hi mahājanena sammatoti niddhāretvā vattabbato nirutti, tasmim̄yeva nirūḷhabhāvato, aññattha asaṅcaraṇato akkharanti ca vuccati, tathā saṅkhātābato **saṅkhā**, samaññāyatīti **samaññā**, paññāpanato **paññatti**, voharaṇato **vohāro**. **Uppannoti** pavatto. **Na kevalaṃ akkharamevāti** na kevalaṃ samaññākaraṇameva. **Khettasāminoti** taṃ taṃ bhūmibhāgaṃ pariggahetvā ṭhitasattā. **Tīhi saṅkhehīti** tividhakiriyābhisaṅkhatehi tīhi saṅkhehi khattiyādīhi tīhi vaṇṇehi pariggahitehi. “Khattiyānuyantabrāhmaṇagahapatikanegamajānapadehi tīhi gahapatīhi pariggahitehī”ti ca vadanti. **Agganti nātenāti** aggaṃ kulanti nātena. Khattiyakulañhi loke sabbasetṭhaṃ. Yathāha “khattiyō setṭho janetasim̄, ye gottapaṭisārino”ti, (dī. ni. 1.277; 3.140; ma. ni. 2.30; saṃ. ni. 1.182, 245) abhedopacārena pana akkharassa khattiyasaddassapi setṭhatāti pāḷiyaṃ “aggaññena akkharena”ti vuttaṃ. Idāni abhedopacārena vinā eva atthaṃ dassetuṃ “**agge vā**”tiādi vuttaṃ.

### Brāhmaṇamaṇḍalādivaṇṇanā

**132.** Yena anārambhābhāvena bāhitākusalā “brāhmaṇā”ti vuttā, tameva tāva dassetuṃ pāḷiyaṃ “vītaṅgārā”tiādi vuttanti tadatthaṃ dassento “**pacitvā**”tiādimāha. **Tamenanti** vacanavipallāsena niddesoti āha “**te ete**”ti. **Abhisāṅkharontāti** cittamantabhāvena aññamaññaṃ abhivisiṭṭhe karontā, brāhmaṇākappabhāvena saṅkharontā ca. **Vācentāti** paresaṃ kathentā, ye tathā ganthe kātuṃ na jānanti. **Acchantīti** āsanti, upavisantīti attho. Tenāha “**vasantī**”ti. **Acchentīti** kālaṃ khepentī. **Hīnasammatam̄** jhānabhāvanānuyogaṃ chaḍḍetvā ganthe pasutatādīpanato. **Setṭhasammatam̄ jātam̄** “vedadharā sottiya subrāhmaṇāti evaṃ setṭhasammatam̄ jātam̄.

**133. Methunadhammaṃ samādiyivāti** jāyāpatikabhāvena dvayaṃ dvayaṃ nivāsaṃ ajjhupagantvā. **Vāñjakammādiketi ādi-saddena** kasikammādim̄ saṅgaṇhāti.

**134. Luddācārakammakuddācārakammunāti** paraviheṭṭhanādiluddācārakammunā, naḷakāradārukammādikhuddācārakammunā ca. **Suddanti** ettha **su-īti** sīghatthe nipāto. **Dā-īti** garahaṇattheti āha “**suddaṃ suddaṃ lahuṃ lahuṃ kucchitaṃ gacchantī**”ti.



**135. Ahūti** kālaviṇṇāpallāsavasena vuttanti dassento “**hoti kho**”ti āha. **Imināti** “imehi kho, vāseṭṭha, catūhi maṇḍalehi samaṇamaṇḍalassa abhinibbatti hotī”ti iminā vacanena. **Imaṃ dassetī** samaṇamaṇḍalaṃ nāma...pe... suddhiṃ pāpuṇantīti imaṃ atthajātaṃ dasseti. Yadi imehi...pe... abhinibbatti hoti, evaṃ sante imāneva cattāri maṇḍalāni padhānāni, samaṇamaṇḍalaṃ appadhānaṃ tato abhinibbattatīti? Nayidamevanti dassetuṃ “**imāni**”tiādi vuttaṃ. **Samaṇamaṇḍalaṃ anuvattanti** guṇehi viṣiṭṭhabhāvato. Guṇo hi viññūnaṃ anuvattanahetu, na kolaputtīyaṃ, vaṇṇapokkharatā, vākkaraṇamattaṃ vā. Tenāha “**dhammeneva anuvattanti, no adhammenā**”ti. So dhammo ca lokuttarova adhippeto, yena saṃsārato visujjhati, tasmā **samaṇamaṇḍalanti** ca sāsanikameva samaṇaṅgaṃ vadatīti daṭṭhabbaṃ. Tenāha “**samaṇamaṇḍalañhi**”tiādi.

### Duccaritādikathāvaṇṇanā

**136. Micchādīṭṭhivasena samādinnakammaṃ** nāma “ko anubandhitabbo. Ajoṭtaggiṣoṭṭhimiso”tiādinā yaññavidhānādivasena pavattitaṃ hiṃsādīpāpakammaṃ. **Micchādīṭṭhikammasāti** “esa saddhādhigato devayāno, yena yanti puttino visokā”tiādinā pavattitassa micchādīṭṭhisahagatakammasa. **Samādānaṃ** tassa tathā pavattanaṃ, tassā vā dīṭṭhiyā upagamaṇaṃ.

**137. Dvayakārīti** kusalākusaladvayassa kattā. Tayidaṃ dvayaṃ yasmā ekajjhaṃ nappavattati, tasmā āha “**kālenā**”tiādi. **Ekakkhaṇe ubhayavipākādānaṭṭhānaṃ nāma natthi** ekasmiṃ khaṇe cittadvayūpasāñhitāya sattasantatīyā abhāvato. Yathā pana dvayakārīno sukhadukkhapaṭisaṃveditā sambhavati, taṃ dassetuṃ “**yena paṇā**”tiādi vuttaṃ. **Evaṃbhūtoti** vikalāvayavo. Dvepihi kusalākusalakammāni katūpacitāni sabhāvato balavantāneva honti, tasmā maraṇakāle upaṭṭhahanti. **Tesu akusalaṃ balavataraṃ hoti** paccayalābhato. Nikantiādayo hi paccayavisesā akusalasseva sabhāgā, na kusalassa, tasmā katūpacitabhāvena samānabalesu kusalākusalesu paccayalābhena vipaccitūṃ laddhokāsatāya kusalato akusalaṃ balavataraṃ hotīti, tathābhūtampi **taṃ** yathā vipākādāne laddhokāssa kusalassāpi avasaro hoti, tathā laddhapaccayaṃ paṭisandhidānābhimukhaṃ **kusalaṃ paṭibāhitvā** paṭisandhiṃ dentaṃ **tiracchānayaṇiyam nibbattāpetīti**. “Akusalaṃ balavataraṃ hotī”ti ettha “akusalaṃ ce balavataraṃ hoti, taṃ kusalaṃ paṭibāhitvā”ti vuttanayeneva atthaṃ vatvā tesu kusalaṃ ce balavataraṃ hoti, tañca akusalaṃ paṭibāhitvā manussayaṇiyam nibbattāpeti, akusalaṃ pavattivedanīyaṃ hoti, atha naṃ taṃ kāṇampi karoti khujjampi pīṭhasappimpi kucchirogādīhi vā upaddutaṃ. Evaṃ so pavattīyaṃ nānappakāraṃ dukkhaṃ paccanubhavatīti idaṃ sandhāya vuttaṃ “sukhadukkhapaṭisaṃvedī hotī”ti. Tatrāyaṃ vinicchayo – vuttakāle vā kārena samānabalesu kusalākusalakammesu upaṭṭhahantesu maraṇassa āsannavelāyaṃ yadi balavataṛāni kusalaṃ javanāni javanti, yathāupaṭṭhitaṃ akusalaṃ paṭibāhitvā kusalaṃ vuttanayena paṭisandhiṃ deti. Atha balavataṛāni akusalaṃ javanāni javanti, yathāupaṭṭhitaṃ kusalaṃ paṭibāhitvā akusalaṃ vuttanayeneva paṭisandhiṃ deti. Taṃ kissa hetu? Ubhinnaṃ kammānaṃ samānabalavabhāvato, paccayantarasāpekkhato cāti, sabbaṃ vīmaṃsitvā gahetabbaṃ.

### Bodhipakkhiyabhāvanāvaṇṇanā

**138. Bodhi** vuccati maggasammādiṭṭhi, cattāri ariyasaccāni bujjhatīti katvā, sabhāvato, taṃsabhāvato ca tassā pakkhe bhavāti bodhipakkhiyā, sativīriyādayo dhammā, tesam **bodhipakkhiyānaṃ. Paṭipāṭiyāti** bodhipakkhiyadesanāpaṭipāṭiyā. **Bhāvanaṃ anugantvāti** anukkamena pavattaṃ bhāvanaṃ patvā. Tenāha “**paṭipajjitvā**”ti. Saupādisesāya nibbānadhātuyā vasena khīṇāsavassa seṭṭhabhāvaṃ lokassa pākaṭaṃ katvā dassetuṃ sakkā, na itarāya sabbaso apaññattibhāvūpagamaṇe tassa adassanatoti vuttaṃ “**parinibbātīti kilesaparinibbānena parinibbāyati**”ti. **Vinivattetvāti** tato catuvaṇṇato nīharitvā.

**140. Tamevatthanti** “khīṇāsavova devamanussesu seṭṭho”ti vuttamevatthaṃ.

**Seṭṭhacchedakavādamevāti** jātibrahmaṇānaṃ seṭṭhabhāvasamucchedakameva kathaṃ. **Dassetvā**

bhāsivā. **Suttantaṃ vinivattetvā**ti pubbe lokiyadhammasandassanavasena pavattaṃ aggaññasuttaṃ “sattannaṃ bodhipakkhiyānaṃ dhammānaṃ bhāvanamanvāyā”tiādinaṃ tato vinivattetvā niharitvā tena asaṃsaṭṭhaṃ katvā. **Āvajjantā**ti samannāharantā. **Anumajjantā**ti pubbenāparaṃ atthato vicarantāti.

Aggaññasuttavaṇṇanāya līnatthappakāsanā.

## 5. Sampasādanīyasuttavaṇṇanā

### Sāriputtasīhanādavaṇṇanā

**141.** Pāvārenti sañchādenti sarīraṃ etenāti **pāvāro**, vatthaṃ. Pāvāraṇaṃ vā **pāvāro**, “vatthaṃ dussa”nti pariyāyasaddā eteti dussameva pāvāro, so etassa bahuviddho anekakoṭṭippabhedo bhaṇḍabhūto atthīti **dussapāvāriko**. So kira pubbe daharakāle dussapāvārabhaṇḍameva bahuṃ pariggahetvā vāṇijjaṃ akāsi, tena naṃ seṭṭhiṭṭhāne ṭhitampi “pāvāriko” tveva sañjānanti. **Bhagavatīti iti**-saddo ādiattho, pakārattho vā, tena bhagavantaṃ upasaṅkamitvā therena vuttavacanaṃ sabbaṃ saṅgaṇhāti. “Kasmā evaṃ avocā”ti tathāvācane kāraṇaṃ pucchitvā “**somanassapavedanattha**”nti kasmā payojanaṃ vissajjitaṃ, tayidaṃ ambaṃ puṭṭhassa labujaṃ byākaraṇasadisanti? Nayidamevaṃ cintetabbaṃ. Yā hissa therassa tadā bhagavati somanassuppatti, sā niddhāritarūpā kāraṇabhāvena coditā, tasmā evaṃ avocāti, sā eva ca yasmā niddhāritarūpā pavedanavasena bhagavato sammukhā tathāvācanaṃ payojeti, tasmā “attano uppannasomanassapavedanattha”nti payojanabhāvena vissajjitaṃ.

**Tatrā**ti tasmīṃ somanassapavedane. Vihāre nivāsaparivattanavasena **sunivatthanivāsano**. **Ābhujitvā**ti ābandhitvā.

**Samāpattito vuṭṭhāya** “aho santo vatāyaṃ ariyavihāro”ti samāpattisukhapaccavekkhaṇamukhena **attano guṇe anussarituṃ āraddho**, ārabhitvā ca nesaṃ taṃ taṃ sāmāññavisesavibhāgavasena anussari. Tathā hi “samādhi”ti sāmāññato gahitasseva “paṭhamaṃ jhāna”ntiādinaṃ visesavibhāgo, “pañña”ti sāmāññato ca gahitasseva “vipassanāñña”ntiādinaṃ visesavibhāgo uddhaṭo. “Lokiyābhiññāsu dibbacakkuṇṇāsseva gahaṇaṃ therassa itarehi sātisaṃyanti dassetu”nti vadanti, pubbenivāsaññaṃpi pana “kappasatasahassādhikassā”tiādinaṃ kiccavasena dassitameva, lakkhaṇahāravasena vā itaresaṃ pettha gahitā veditabbā.

Atthappabhedassa sallakkhaṇavibhāvanavavattānakaraṇasamatthaṃ atthe pabhedagataṃ ñāṇaṃ **atthapaṭisambhidā**. Tathā dhammapabhedassa sallakkhaṇavibhāvanavavattānakaraṇasamatthaṃ dhamme pabhedagataṃ ñāṇaṃ **dhammapaṭisambhidā**. Niruttipabhedassa sallakkhaṇavibhāvanavavattānakaraṇasamatthaṃ niruttiyaṃ pabhedagataṃ ñāṇaṃ **niruttipaṭisambhidā**. Paṭibhānapabhedassa sallakkhaṇavibhāvanavavattāna karaṇasamatthaṃ paṭibhāne pabhedagataṃ ñāṇaṃ **paṭibhānapaṭisambhidā**. Ayamettha saṅkhepo, vitthāro pana **visuddhimagge**, (visuddhi. 2.428) taṃ saṃvaṇṇanāsu (visuddhi. ṭī. 2.428) vuttanayeneva veditabbo. Sāvakaṃvisaye paramukkamsagataṃ ñāṇaṃ **sāvakaṃpāramiññaṃ** sabbaññutaññāṇaṃ viya sabbaññeyyadhammesu. Tassāpi hi visuṃ parikkammaṃ nāma natthi, sāvakaṃpāramiyā pana sammadeva paripūritatā aggamaggasamadhigamenevassa samadhigamo hoti. Sabbaññutaññāṇasseva sammāsambuddhānaṃ yāva nisinnapallankā anussaratoti yojanā.

Bhagavato sīlaṃ nissāya guṇe anussarituṃāraddhoti yojanā. Yasmā guṇānaṃ bahubhāvato nesaṃ ekajjhaṃ āpāthāgamaṇaṃ natthi, satī ca tasmīṃ anirūpitarūpeneva anussaraṇena bhavitabbaṃ, tasmā thero savisaye ṭhatvā te anupadaṃ sarūpato anussari, anussaranto ca sabbapaṭhamaṃ sīlaṃ anussari, taṃ dassento “**bhagavato sīlaṃ nissāyā**”ti āha, sīlaṃ ārabbhāti attho. Sesapadesupi eseva nayo. Yasmā cettha thero ekekavasena bhagavato guṇe anussarivā tato paraṃ catukkapañcakādivasena anussari,

tasmā “cattāro iddhipāde”ti vatvā tato param bojjaṅgabhāvanāsāmañña indriyesu vattabbesu tāni aggahetvā “**cattāro magge**”tiādi vuttam. **Catuyoniparicchedakaññaṃ** mahāsīhanādasutte (ma. ni. 1.152) āgatanayeneva veditabbaṃ. **Cattāro ariyavaṃsā** ariyavaṃsasutte (a. ni. 4.28) āgatanayeneva veditabbā.

**Padhāniyaṅgā**dayo saṅgīti (dī. ni. 3.317) dasuttarasuttesu (dī. ni. 3.355) āgamissanti. **Cha sāraṇīya dhammā** parinibbānasutte (dī. ni. 2.141) āgatā eva. Sukhaṃ supanādayo (a. ni. 11.15; paṭi. ma. 2.22) **ekādasa** mettānisamsā. “Idaṃ dukkhaṃ ariyasacca”ntiādinā saṃ. ni. 5.1081, mahāva. 15, paṭi. ma. 2.30) catūsu ariyasaccesu tiparivattavasena āgatā **dvādasa dhammacakkākārā**. Maggaphalesu pavattāni aṭṭha ñāṇāni, cha asādhāraṇañāṇāni cāti **cuddasa buddhañāṇāni**. **Pañcadasa vimuttiparipācanīyā dhammā** meghiyasuttavaṇṇanāyaṃ (udā. aṭṭha. 31) gahetabbā, **soḷasavidhā ānāpānassati** ānāpānassatisutte (ma. ni. 3.148), **aṭṭhārasa buddhadhammā** (mahāni. 69, 156; cūḷani. 85; paṭi. ma. 3.5; dī. ni. aṭṭha. 3.305) evaṃ veditabbā –

Atītamse buddhassa bhagavato appaṭihatam ñāṇam, anāgataṃse, paccuppannamse buddhassa bhagavato appaṭihatam ñāṇam. Imehi tīhi dhammehi samannāgatassa buddhassa bhagavato sabbaṃ kāyakammaṃ ñāṇapubbaṅgamaṃ ñāṇānuparivatti, sabbaṃ vacīkammaṃ, sabbaṃ manokammaṃ ñāṇapubbaṅgamaṃ ñāṇānuparivatti. Imehi chahi dhammehi samannāgatassa buddhassa bhagavato natthi chandassa hāni, natthi dhammadesanāya hāni, natthi vīriyassa hāni, natthi samādhissa hāni, natthi paññāya hāni, natthi vimuttiyā hāni. Imehi dvādasahi dhammehi samannāgatassa buddhassa bhagavato natthi davā, natthi ravā, natthi apphuṭṭhaṃ, natthi vegāyitattam, natthi abyāvaṭamano, natthi appaṭisaṅkhānupekkhāti.

Tattha “**natthi davāti** khiḍḍādhippāyena kiriyā natthi. **Natthi ravāti** sahasā kiriyā natthi”ti vadanti. Sahasā pana kiriyā **davā**, “aññaṃ karissāmi”ti aññaṃsā karaṇam **ravā**. **Natthi apphuṭṭanti** ñāṇena aphasitaṃ natthi. **Natthi vegāyitanti** turitakiriyā natthi. **Natthi abyāvaṭamanoti** niratthakacittasamudācāro natthi. **Natthi appaṭisaṅkhānupekkhāti** aññaṃnupekkhā natthi. Keci pana “natthi dhammadesanāya hāni”ti apaṭhitvā “natthi chandassa hāni, natthi vīriyassa hāni, natthi satiyā [sattiyā (vibha. mūlaṭi. suttantabhājanīyavaṇṇanā)] hāni”ti paṭhanti.

Jarāmarāṇādīsu ekādasasu paṭiccasamuppādaṅgesu paccekaṃ catusaccayojanāvasena pavattāni **catucattālīsa** ñāṇāniyeva (saṃ. ni. 2.33) sukhavisesānaṃ adhiṭṭhānabhāvato **ñāṇavatthūni**.  
Vuttañhetam –

“Yato kho bhikkhave ariyasāvako evaṃ jarāmarāṇam pajānāti, evaṃ jarāmarāṇasamudayaṃ pajānāti, evaṃ jarāmarāṇanirodham pajānāti, evaṃ jarāmarāṇanirodhagāminiṃ paṭipadam pajānāti”tiādi (saṃ. ni. 2.33).

**Jarāmarāṇasamudayoti** cettha jāti adhippetā. Sesapadesu bhavādayo veditabbā.

Kusalacittuppādesu phassādayo **paropaṇṇāsa kusaladhammā**.

“Jātipaccayā jarāmarāṇa”nti ñāṇam, “asati jātiyā natthi jarāmarāṇa”nti ñāṇam, atītampi addhānam “jātipaccayā jarāmarāṇa”nti ñāṇam, “asati jātiyā natthi jarāmarāṇa”nti ñāṇam, anāgatampi addhānam “jātipaccayā jarāmarāṇa”nti ñāṇam, “asati jātiyā natthi jarāmarāṇa”nti ñāṇam. “Yampi idaṃ dhammaṭṭhitiñāṇam, tampi khayadhammaṃ vayadhammaṃ virāgadhammaṃ nirodhadhamma”nti ñāṇanti evaṃ jarāmarāṇādīsu ekādasasu paṭiccasamuppādaṅgesu paccekaṃ satta satta katvā **sattasattati ñāṇavatthūni** (saṃ. ni. 2.34) veditabbāni. Tattha **yampīti** chabbidhampi paccavekkhaṇaññaṃ vipassanārammaṇabhāvena ekajjhaṃ gahetvā vuttam. **Dhammaṭṭhitiñāṇanti** chapi ñāṇāni saṅkhipitvā vuttam ñāṇam. “**Khayadhamma**”ntiādinā pana pakārena pavattaññaṇassa dassanam, vipassanādassanato vipassanā paṭivipassanādassanamattamevāti na tam “āṅga”nti vadanti, pāḷiyam

(sam. ni. 2.34) pana sabbattha ñāṇavasena aṅgānaṃ vuttatā “**nirodhadhammanti ñāṇa**”nti itisaddena pakāsetvā vuttaṃ vipassanāñāṇaṃ sattamaṃ ñāṇanti ayamatto dissati. Na hi yampi idaṃ dhammatthitiñāṇaṃ, tampi ñāṇanti sambandho hoti ñāṇaggahaṇena etasmiṃ ñāṇabhāvadassanassa anadhippetatā, “khayadhammaṃ...pe... nirodhadhamma”nti etesaṃ sambandhabhāvappasaṅgo cāti. **Catuvīsati...pe... vajirañāṇanti** ettha keci tāva āhu “bhagavā devasikaṃ dvādasakoṭisatasahassakkhattuṃ mahākaruṇāsamāpattiṃ samāpajjati, dvādasakoṭisatasahassakkhattumeva ca arahattaphalasaṃpattiṃ samāpajjati, tāsāṃ purecamaṃ, sahavacaraṇa ñāṇaṃ paṭipakkhehi abhejjataṃ, mahattaṇca upādāya **mahāvajirañāṇaṃ** nāma. Vuttañhetāṃ bhagavatā –

‘Tathāgataṃ, bhikkhave, arahantaṃ sammāsambuddhaṃ dve vitakkā bahulaṃ samudācaranti – khemo ca vitakko, paviveko ca vitakko’ti (itivu. 38).

Khemavitakko hi bhagavato mahākaruṇāsamāpattiṃ pūretvā tthito, pavivekavitakko arahattaphalasaṃpattiṃ. Buddhānañhi bhavaṅgaparivāso lahuco, matthakappatto samāpattisu vasibhāvo, tasmā samāpajjanavuttāñāni katipayacittakkhaṇeheva ijjhanti. Pañca rūpāvacarasamāpattiyō catasso arūpasamāpattiyō appamaññāsamāpattiyā saddhiṃ dasa, nirodhasamāpatti, arahattaphalasaṃpatti cāti dvādasetā samāpattiyō bhagavā paccekaṃ divase divase koṭisatasahassakkhattuṃ purebhataṃ samāpajjati, tathā pacchābhata”nti. “Evaṃ samāpajjitabbasamāpattisañcāritañāṇaṃ **mahāvajirañāṇaṃ** nāmā”ti keci.

Apare pana “yaṃ taṃ bhagavatā abhisambodhidivase pacchimaṃ paṭiccasamuppādamukhena paṭilomanayena jarāmaṇato paṭṭhāya ñāṇaṃ otāretvā anupadadhammavipassanaṃ ārabhanta yathā nāma puriso suviduggaṃ mahāgahaṇaṃ mahāvanaṃ chindanto antarantarā nisānasilāyaṃ pharasuṃ sunisitaṃ karoti, evameva nisānasilāsadiyō samāpattiyō antarantarā samāpajjitvā ñāṇassa tikkhavisadasūrabhāvaṃ sampādetuṃ anulomapaṭilomato paccekaṃ paṭiccasamuppādaṅgavasena sammasanto divase divase lakkhakoṭilakkhakoṭiphalaṃ samāpattiyō samāpajjati, taṃ sandhāya vuttaṃ ‘**catuvīsati...pe... mahāvajirañāṇaṃ nissāya**’ti”. Nanu bhagavato samāpattisamāpajjane parikamme payojanaṃ natthī? Nayidaṃ ekantikaṃ. Tathā hi vedanāpaṭippaṇāmanādīsu savisesaṃ parikammaṃ pubbaṅgamaṃ samāpattiyō samāpajji. Apare pana “lokiyasamāpattisamāpajjane parikammaṃ payojanaṃ natthi. Lokuttarasamāpattisamāpajjane tajaṃ parikammaṃ icchitabbamevā”ti vadanti.

“Aparamparā”ti padaṃ yesaṃ desanāya atthi, te **aparampariyāva. Kusalapaññattiyanti** kusalaḍḍhamānaṃ paññāpane. **Anuttaroti** uttamo. **Upanissaye tathvāti** ñāṇūpanissaye tathvā yādiso pubbūpanissayo pubbayogo, tattha paṭiṭṭhāya. **Mahantato saddahati** paṭipakkhavigamaṃ ñāṇassa viya saddhāyapi tikkhavisadabhāvāpattito. **Avasesarahantehīti** pakatisāvakehi. **Asīti mahātherā** paramatthadīpaniyaṃ theragāthāvaṇṇanāyaṃ nāmato uddhaṭā. **Cattāro mahātherāti** mahākassapaanuruddhamahākaccānamahākoṭṭhikattherā. **Tesupi** aggasāvakesu **sāriputtatthero** paññāya viṣiṭṭhabhāvato. **Sāriputtattheratopi eko paccekabuddho** tikkhavisadañāṇo abhinīhāramahantatāya sambhatañāṇasambhāratā. Satipi paccekabodhiyā avisesesu bahūsu ekajjhaṃ sannipattitesu pubbayogavasena lokiye visaye siyā kassaci ñāṇassa viṣiṭṭhatāti dassetuṃ “**sace panā**”tiādi vuttaṃ. “**Sabbaññubuddhova buddhagūṇe mahantato saddahati**”ti idaṃ hetthā āgatadesanāsotavasena vuttaṃ. Buddhā hi buddhagūṇe mahattaṃ paccakkhatova passanti, na saddahanavasena.

Idāni yathāvuttamatthaṃ upamāya vibhāvetuṃ “**seyyathāpi nāmā**”tiādi āradhamaṃ. **Gambhīro uttānoti** gambhīro vā uttāno vāti **jānanatthaṃ**. “**Evamevā**”tiādi yathā dassetāya upamāya upameyyena saṃsandanaṃ. Buddhagūṇesu appamattavisayampi lokiyamahājanassa ñāṇaṃ apavattitarūpeneva pavattati anavattitasabhāvattāti vuttaṃ “**ekabyāma...pe... veditabbā**”ti. Tattha **ñātaudakaṃ viyāti** pamāṇato ñātaudakaṃ viya. Ariyānaṃ pana tattha attano visaye pavattanakañāṇaṃ pavattitarūpeneva

pavattati attano paṭivedhānurūpaṃ, abhinīhārānurūpaṃca avattitasabhāvattāti dassento “**dasabyāmayottenā**”tiādimāha. Tattha paṭividdhasaccānampi paṭipakkhavidhamanapubbayogavisesavasena nīṇaṃ sātisayaṃ, mahānubhāvaṃca hotīti imamattamaṃ dassetuṃ sotāpannañāṇassa dasabyāmaudakaṃ opammabhāvena dassetvā tato paresaṃ dasuttaradiguṇadasaṅgaṇāsītiguṇavisitṭhaṃ udakaṃ opammaṃ katvā dassitaṃ. Nanu evaṃ sante buddhaguṇā parimitaparicchinnā, therena ca te paricchijja nīṇāti āpajjati? Nāpajjati dassento “**tattha yathā so puriso**”tiādimāha. Tattha **so puriso**ti so caturāsītibyāmasahassappamāṇena yottena caturāsītibyāmasahassaṭṭhāne mahāsamudde udakaṃ minitvā ṭhito puriso. So hi therassa upamābhāvena gahito. **Dhammanvayenā**ti anumāñāṇena. Tañhi siddhaṃ dhammaṃ anugantvā pavattanato “dhammanvayo”ti vuccati, tathā anvayavasena atthassa bujjanato **anvayabuddhi**, anumeyyaṃ anuminotīti **anumānaṃ**, nidassane diṭṭhanayena anumeyyaṃ gaṇhātīti “**nayaggāho**”ti ca vuccati. Tenāha “dhammanvayenā”tiādi. Svāyaṃ dhammanvayo na yassa kassaci hoti, atha kho tathārūpassa aggasāvakkassevāti āha “**sāvakaṃpāramiñāne ṭhatvā**”ti. Yadi thero buddhaguṇe ekadesato paccakkhe katvā tadanīṇe nayaggāhena gaṇhi, nanu evaṃ sante buddhaguṇā parimitaparicchinnā āpannāti? Nayidaṃ evanti dassento “**anantā aparimāṇā**”ti.

“Saddahatī”ti vatvā puna tamevatthaṃ vibhāvento “**therena hi...pe... bahutarā**”ti āha. Kathaṃ pañāyamattho evaṃ daṭṭhabboti evaṃ adhippāyabhedakaṃ upamāya saññāpetuṃ “**yathā kathaṃ viyā**”tiādi vuttaṃ “upamāyamidhekacce viññū purisa bhāsitaṃ atthaṃ ājānantī”ti (saṃ. ni. 2.67) **ito nava ito navā**ti ito majjhaṭṭhānato yāva dakkhiṇatīrā nava ito majjhaṭṭhānato yāva uttaratīrā nava. Idāni yathāvuttamatthaṃ suttana samatthetuṃ “**buddhopi**”ti gāthamāha.

**Yamakayugaḷamahānadīmahogho viyā**ti dvinnaṃ ekato samāgatattā yugaḷabhūtānaṃ mahānadānaṃ mahogho viyā.

**Anucchavikaṃ katvā**ti yoyaṃ mama pasādo buddhaguṇe ārabha ogāḷho hutvā uppanno, taṃ anucchavikaṃ anurūpaṃ katvā. **Paṭiggahetuṃ** sampaṭicchituṃ añño koci **na sakkhissati** yāthavato anavabujjanato. **Paṭiggahetuṃ sakkoti** tassa hetuto, paccayato, sabhāvato, kiccato, phalato sammadeva paṭivijjanato. **Pūrattanti** puṇṇabhāvo. **Paggharaṇakāleti** vikiraṇakāle, patanakāleti attho. “**Pasanno**”ti iminā pasādassa vattamānatā dīpitāti “**uppannasaddho**”ti imināpi saddhāya paccuppannatā pakāsītāti āha “**evaṃ saddahāmīti attho**”ti. Abhiññāyatīti **abhiñño**, adhiko abhiñño **bhiyyobhiñño**, so eva atisayavacanicchāvasena “**bhiyyobhiññataro**”ti vuttoti āha “**bhiyyataro abhiññāto**”ti. Dutiyavikappe pana abhijānātīti **abhiññā**, abhivisiṭṭhā paññā, bhiyyo abhiññā etassāti **bhiyyobhiñño**, so eva atisayavacanicchāvasena **bhiyyobhiññataro**, svāyamaṃ atisayo abhiññāya bhiyyobhāvakatoti āha “**bhiyyatarābhiñño vā**”ti. Sambujjhati etāyāti **sambodhi**, sabbaññutaññānaṃ, aggamaggañānaṃ. Sabbaññutaññānapadaṭṭhānañhi aggamaggañānaṃ, aggamaggañānapadaṭṭhānaṃca sabbaññutaññānaṃ sambodhi nāma. Tattha padhānavasena tadatthadassane paṭhamavikappo, padaṭṭhānavasena dutiyavikappo. Kasmā panettha arahattamaggañānasseva gahaṇaṃ, nanu heṭṭhimānipi bhagavato maggañānaṃ savāsanameva yathāsakaṃ paṭipakkhavidhamanavasena pavattāni. Savāsanappahānañhi ñeyyāvaraṇappahānanti? Saccametāṃ, taṃ pana aparipuṇṇaṃ paṭipakkhavidhamanassa vippakatabhāvato āha “**arahattamaggañāne vā**”ti. Aggamaggavasena cettha ariyānaṃ bodhittayaparipūrīti dassetuṃ “**arahattamaggeneva hī**”tiādi vuttaṃ. **Nippadesāti** anavasesā. **Gahitā hontīti** arahattamaggena gahitena adhigatena gahitā adhigatā honti. **Sabbanti** tehi adhigantabbaṃ. **Tenāti** sambodhinā sabbaññutaññānapadaṭṭhānena arahattamaggañānaṃ.

**142.** Khādanīyānaṃ ulāratā sātaraśānubhāvenāti āha “**madhure āgacchati**”ti. Pasamsāya ulāratā visitṭhabhāvenāti āha “**setṭhe**”ti, obhāsassa ulāratā mahantabhāvenāti vuttaṃ “**vipule**”ti. Usabhassa ayanti **āsabhī**, idha pana āsabhī viyāti **āsabhī**. Tenāha “**usabhassa vācāsadisī**”ti. Yena pana guṇenassā taṃsadisatā, taṃ dassetuṃ “**acalā asampavedhi**”ti vuttaṃ. Yato kutoci anussavanaṃ **anussavo**. Vijjāṭṭhānesu kataparicayānaṃ ācariyānaṃ taṃ tamattamaṃ viññāpentī paveṇī **ācariyaparamparā**. Kevalaṃ attano matiyā “itikirā evaṃkirā”ti parikappanā **itikirā**. Piṭakassa ganthassa sampadānato

sayam sampadānabhāvena gahaṇam **piṭakasampadānam**. Yathāsutānaṃ atthānaṃ ākārassa parivittakkaṇaṃ **ākāraparivittakko**. Tattheva “evameta”nti diṭṭhiyā nijjhānakkhamaṇaṃ **diṭṭhinijjhānakkhanti**. Āgamādhigamehi vinā takkamaggaṃ nissāya takkanaṃ **takko**. Anumānavidhiṃ nissāya **nayaggāho**. Yasmā buddhavisaye ṭhatvā bhagavato ayaṃ therassa codanā, therassa ca so avisayo, tasmā “**paccakkhato nāṇena paṭivijjhivā viyā**”ti vuttaṃ. Sīhanādo viyāti **sīhanādo**, taṃsadisaṭā cassa seṭṭhabhāvena, so cettha evaṃ veditabboti dassento “**sīhanādo**”tiādimāha. **Neva dandhāyantena**ti na mandāyanta. **Na bhaggarāyantena**ti aparisaṅkanta.

**Anuyogadāpanatthanti** anuyogaṃ sodhāpetuṃ. Vimaddakkhamañhi sīhanādaṃ nadanto atthato tattha anuyogaṃ sodheti nāma. Anuyuñjanto ca naṃ sodhāpeti nāma. **Dātunti** sodhetuṃ. Keci “dānattha”nti atthaṃ vadanti, tadayuttaṃ. Na hi yo sīhanādaṃ nadati, so eva tattha anuyogaṃ detīti yujjati. **Nighamsananti** vimaddanaṃ. **Dhamamānanti** tāpayamānaṃ, **tāpana**ñcettha gaggariyā dhamāpanasīsenā vadati. **Sabbe teti** sabbe te atīte niruddhe sammāsambuddhe, tenetaṃ dasseti – ye te ahesuṃ atītaṃ addhānaṃ tava abhinīhārato oraṃ sammāsambuddhā, tesuṃ tāva sāvakañāṇagocare dhamme paricchindanto mārādayo viya buddhānaṃ lokiyacittacāraṃ tvaṃ jāneyyāsi. Ye pana te abbatitā tato parato chinnavatūmā chinnavatūmā pariyādiṇṇavattā sabbadukkhavītivattā sammāsambuddhā, tesuṃ sabbesampi sāvakañāṇassa avisayabhūte dhamme kathaṃ jānissasīti.

**Anāgatabuddhānaṃ panāti pana**-saddo visesatthajotano, tena atītesu tāva khandhānaṃ bhūtapubbattā tattha siyā ñāṇassa savisaye gati, anāgatesu pana sabbaso asaṅgātesu kathanti imamattaṃ joteti. Tenāha “anāgatāpi”tiādi. “Cittena paricchinditvā viditā”ti kasmā vuttaṃ, nanu atītanāgate sattāhe eva pavattaṃ cittaṃ cetopariyañāṇassa visayo, na tato paranti? Nayidaṃ cetopariyañāṇakiccavasena vuttaṃ, atha kho pubbenivāsaanāgataṃsañāṇavasena vuttaṃ, tasmā nāyaṃ doso.

**Viditaṭṭhāne na karoti** sikkhāpadeneva tādisassa paṭikkhepassa paṭikkhittattā, setughātato ca. Kathaṃ pana thero dvayasambhava paṭikkhepameva akāsi, na vibhajja byākāsīti āha “**thero kirā**”tiādi. Pāraṃ pariyaṇtaṃ minotīti **pāramī**, sā eva ñāṇanti **pāramiñāṇaṃ**, sāvakaṇaṃ pāramiñāṇaṃ **sāvakaṇapāramiñāṇaṃ**, tasmim. Sāvakaṇaṃ ukkaṃsapariyaṇtagate jānane nāyaṃ anuyogo, atha kho **sabbaññutañāṇa** sabbaññutāya jānane. Keci pana “**sāvakaṇapāramiñāṇeti** sāvakaṇapāramiñāṇavisaye”ti atthaṃ vadanti. Tathā sesapadesupi. **Sīla ..pe... samatthanti** sīlasamādhipaññāvimuttisaṅkhātākāraṇānaṃ jānanaṃsamattaṃ. Buddhasīlādayo hi buddhānaṃ buddhakiccassa, parehi “buddhā”ti jānanaṃ ca kāraṇaṃ.

**143.** Anumānañāṇaṃ viya saṃsayapiṭṭhikaṃ ahutvā “idamida”nti yathāsabhāvato ñeyyaṃ dhāreti nicchinositīti **dhammo**, paccakkhañāṇanti āha “**dhammassa paccakkhato ñāṇassā**”ti. Anuetīti **anvayoti** āha “**anuyogaṃ anugantvā**”ti. Paccakkhasiddhañhi atthaṃ anugantvā anumānañāṇassa pavatti diṭṭhena adiṭṭhassa anumānanti veditabbo. Vidite vedakampi ñāṇaṃ atthato viditameva hotīti “**anumānañāṇaṃ nayaggāho vidito**”ti vuttaṃ. **Viditoti** viddho paṭiladdho, adhigatoti attho. **Appamāṇoti** aparimāṇo mahāvisayattā. Tenāha “**apariyaṇto**”ti. **Tenāti** apariyaṇtantā, tena vā apariyaṇtena ñāṇena, eteneva thero yaṃ yaṃ anumeyyamatthaṃ ñātukāmo hoti, tattha tatthassa asaṅgamappaṭiḥaṇaṇaṃ pavattatīti dasseti. Tenāha “**so iminā**”tiādi. Tattha **imināti** iminā kāraṇena. Pākārassa thirabhāvaṃ uddhamuddhaṃ āpetīti **uddhāpaṃ**, pākāramūlaṃ. **Ādi**-saddena pākāradvārabandhaparikhādīnaṃ saṅgaho veditabbo. Paccante bhavaṃ **paccantimaṃ**. Paṇḍitadovārikaṭṭhāniyaṃ katvā thero attānaṃ dassetīti dassento “**ekadvāranti kasmā āhā**”ti codanaṃ samuṭṭhāpesi. Yassā paññāya vasena puriso “paṇḍito”ti vuccati, taṃ **paṇḍiccanti** āha “**paṇḍiccena samannāgato**”ti. Taṃtaṃmitikattabbatāsu chekabhāvo byattabhāvo **vayyattiyam**. Medhati sammosaṃ hiṃsati vidhamatīti **medhā**, sā etassa atthīti **medhāvī**. Ṭhāne ṭhāne uppatti etissā atthīti **ṭhānuppattikā**, ṭhānaso uppajjanakapaññā. Anupariyāyanti etenāti **anupariyāyo**, so eva pathoti **anupariyāyapatho**, parito pākārassa anusamāyānamaggo. Pākārahāgā sandhātābbā etthāti **pākārasandhi**, pākārassa phullitappadeso. So pana heṭṭhimantena dvinnampi iṭṭhakānaṃ vigamena evaṃ vuccatīti āha “**dvinnam**”

**iṭṭhakānaṃ apagataṭṭhāna**’nti. **Chinnaṭṭhānanti** chinnabhinnappadeso, chinnaṭṭhānaṃ vā. Tañhi “vivara”nti vuccati.

**Kiliṭṭhanti** malīnaṃ. **Upatāpentīti** kilesapariḷāhena santāpenti. **Vibādhentīti** pīlenti. Uppannāya paññāya nīvaraṇehi na kiñci kātuma sakkāti āha “**anuppannāya paññāya uppajjituma na denti**”ti. **Tasmāti** paccayūpaghātena uppajjituma appadānato. **Catūsu satipaṭṭhānesu suṭṭhu ṭhapitacittāti** catubbidhāyapi satipaṭṭhānabhāvanāya sammadeva ṭhapitacittā. **Yathāsabhāvena bhāvetvāti** aviparītasabhāvena yathā paṭipakkhā samucchijjanti, evaṃ bhāvetvā.

Purimanaye satipaṭṭhānāni, bojjaṅgā ca missakā adhippetāti tato aññathā vattuma “**apicetthā**”tiādi vuttama. **Missakāti** samathavipassanāmaggasena missakā. “Catūsu satipaṭṭhānesu suppatiṭṭhitacittā”tiādito vuttattā **satipaṭṭhāne vipassanāti gahetvā** “satta bojjaṅge yathābhūtaṃ bhāvetvā”ti vuttattā, maggapariyāpannānaṃyeva ca nesaṃ nipariyāyabojjhaṅgabhāvato, tesu ca sabbaso adhigatesu lokanāthena sabbaññūtaññānampi adhigatameva hotīti “**bojjaṅge maggo, sabbaññūtaññāṇaṅcāti gahite sundaro pañho bhaveyyā**”ti mahāsivatto āha, **na panevaṃ gahitama** porāṇehīti adhippāyo. **Itīti** vuttappakāraparāmasanaṃ. **Theroti** sārīputtatthero.

**Tatthāti** tesu paccantanagarādīsū. **Nagaraṃ viya nibbānaṃ** tadatthikehi upagantabbato, upagatānaṃca parissayarahitasukhādhigamanatṭhānato. **Pākāro viya sīlaṃ** tadupagatānaṃ parito ārakkhabhāvato. **Pariyāyapatho viya hirī** sīlapākārassa adhiṭṭhānabhāvato. Vuttañhetama “pariyāyapathoti kho bhikkhu hiriyā etaṃ adhivacana”nti. **Dvāraṃ viya ariyamaggo** nibbānanagarappavesanaañjasabhāvato. **Pañḍitadovāriko viya dhammasenāpati** nibbānanagarapaviṭṭhapavisanakānaṃ sattānaṃ sallakkhaṇato. **Dinnoti** dāpito, sodhitoti attho.

**144. Niphattidassanattanti** siddhidassanattama, adhigamadassanattanti attho.

“**Pañcanavuttipāsaṅde**”ti idaṃ yasmā thero paribbājako hutvā tato pubbeva nibbānapariyesanaṃ caramāno te te pāsaṅdino upasaṅkamitvā nibbānaṃ pucchi, te nassa cittaṃ ārādhesuṃ, taṃ sandhāya vuttama. Te pana pāsaṅdā heṭṭhā vuttā eva. **Tatthevāti** tassayeva bhāgineyyassa desiyamānāya desanāya. Parassa vaḍḍhitama bhattama bhuñjanto viya **sāvakaṃpāramiññaṃ hatthagatama akāsi** adhigacchi. **Uttaruttaranti** heṭṭhimassa heṭṭhimassa uttaraṇato atikkamanato uttaruttaram, tato eva padhānabhāvaṃ pāpitātāya **pañitapañitama**. **Uttaruttaranti** vā uparūpari. **Pañitapañitanti** pañitatarama, pañitamañcāti attho. **Kaṇhanti** kāḷakama saṃkilesadhammaṃ. **Sukkanti** odātaṃ vodānadhammaṃ. **Savipakkhama katvāti** pahātabbapahāyakabhāvadassanavasena yathākkamaṃ ubhayaṃ savipakkhama katvā. “Ayaṃ kaṇhadhammo, imassa ayaṃ pahāyako”ti evaṃ **kaṇhama paṭibāhitvā** desanāvasena nīharitvā **sukkama**, “ayaṃ sukkadhammo, iminā ayaṃ pahātabbo”ti evaṃ **sukkama paṭibāhitvā kaṇhama**. **Saussāhanti** phaluppādanasamatthatāvasena sabyāpāraṃ. Tenāha “**savipāka**”nti. Vipākadhammanti attho.

**Tasmiṃ desite dhammeti** tasmiṃ vuttanayena bhagavā tumhehi desite dhamme **ekaccaṃ dhammaṃ nāma sāvakaṃpāramiññaṃ jānitvā** paṭivijjhivā. Taṃjānane hi vutte catusaccadhammajānanaṃ avuttasiddhanti. “**Catusaccadhammesū**”ti idaṃ porāṇatṭhakathāyama vuttakāradassanaṃ. Vipakkho pana parato āgamissati. **Etthāti** “dhammesu niṭṭhama agama”nti etasmiṃ pade. **Therasallāpoti** therānaṃ sallāpasadisso vinicchayavādo. **Kālavallavāsīti** kālavallavīhāravāsī. **Idānīti** etarahi “idāhama bhante”tiādivacanakāle. **Imasmiṃ pana ṭhāneti** “dhammesu niṭṭhama agama”nti imasmiṃ padese, imasmiṃ vā niṭṭhānakāraṇabhūte yoniso parivittakane. “Imasmiṃ pana ṭhāne buddhaguṇesu niṭṭhaṅgato”ti kasmā vuttama, nanu sāvakaṃpāramiññaṃsamadhigatakāle eva thero buddhaguṇesu niṭṭhaṅgoti? Saccametama, idāni pana taṃ pākataṃ jātanti evaṃ vuttama. **Sabbanti** “catusaccadhammesū”tiādi sumattherena vuttama sabbama. **Arahatte niṭṭhaṅgoti** etthāpi vuttanayeneva anuyogaparihārā vedittabbā. Yadi pi dhammasenāpati “sāvakaṃpāramiññaṃ mayā samadhigata”nti ito pubbe pi jānātiyeva, idāni pana asaṅkhyeyyāparimeyyabhede buddhaguṇe nayaggāhavasena pariggahetvā kiccassiddhiyā tasmiṃ ñāṇe niṭṭhaṅgato ahoṣīti dassento “**mahāsivatto...pe... dhammesūti sāvakaṃpāramiññaṃ niṭṭhaṅgato**”ti avoca.

Buddhaguṇā pana nayato āgatā, te nayaggāhato yāthāvato jānanto sāvakaṇāpāramiṇāṇe tathājānanavasena niṭṭhaṅgatattā sāvakaṇāpāramiṇāṇameva tassa aparāparuppattivāsena, tena tena bhāvetabbakiccabahutāvasena ca “**dhammesū**”ti puthuvacanena vuttaṃ. Anantāparimeyyānaṃ anaññavisayānaṃ buddhaguṇānaṃ nayato pariggaṇhanena therassa sātisayo bhagavati pasādo uppajjatī āha “**bhiyyosomattāyā**”tiādi. “Suṭṭhu akkhāto”ti vatvā taṃ evassa suṭṭhu akkhātataṃ dassetuṃ “**niyyāniko maggo**”ti vuttaṃ. Svākkhātā hi dhammassa yadatthaṃ desito, tadatthasādhanena veditabbā. **Phalattāyā niyyātī** anantaravipākattā, attano uppattisamanantareva phalanipphādanavasena pavattatī attho. Vaṭṭacārakato niyyātī vā **niyyāniko**, niyyānasīloti vā. **Rāgadosamohanimmadanāsamattho**ti idhāpi “pasannosmi bhagavatīti dasseti”ti ānetvā sambandho. **Vaṅkādi**ti ādi-saddena jimhakuṭile, aññe ca paṭipattidose saṅgaṇhāti. Bhagavā tumhākaṃ buddhasubuddhatā viya dhammasudhammatā, saṅghasuppaṭipatti ca dhammesu niṭṭhaṅgamanena sāvakaṇāpāramiṇāṇe niṭṭhaṅgatattā mayhaṃ suṭṭhu vibhūtā supākaṭā jātāti dassento thero “svākkhāto bhagavatā dhammo, suppaṭipanno saṅghoti pasīdi”nti avoca.

### Kusaladhammadesanāvāṇṇanā

**145. Anuttarabhāvoti** seṭṭhabhāvo. Anuttaro bhagavā yena guṇena, so anuttarabhāvo, taṃ **anuttariyaṃ**. Yasmā tassāpi guṇassa kiñci uttaritaraṃ natthi eva, tasmā vuttaṃ “sā tumhākaṃ desanā anuttarāti vadatī”ti. **Kusalesu dhammesūti** kusaladhammanimittāṃ. Nimittatthe hi etaṃ bhummaṃ, tasmā kusaladhammadesanāhetupi bhagavāva anuttaroti attho. **Bhūmiṃ dassentoti** visayaṃ dassento. Kusaladhammadesanāya hi kusalā dhammā visayo. **Vuttapadeti** “kusalesu dhammesū”ti evaṃ vuttavākye, evaṃ vā vuttadhammakotṭhāse. “Pañcadhā”ti kasmā vuttaṃ, nanu chekaṭṭhenapi kusalaṃ icchitabbāṃ “kusalo tvaṃ rathassa aṅgapaccaṅgāna”ntiādisūti (ma. ni. 2.87)? Saccametāṃ, so pana chekaṭṭho kosallasambhūtaṭṭheneva saṅgaṇhitoti visuṃ na gahito. “Kacci nu bhoto kusalaṃ, kacci bhoto anāmaya”nti (jā. 1.15.146; 2.22.2008) **jātake** āgatattā “**jātakapariyāyaṃ patvā ārogyaṭṭhena kusalaṃ vaṭṭatī**”ti vuttaṃ. “Taṃ kiṃ maññatha, gahapatayo, ime dhammā kusalā vā akusalā vā sāvajjā vā anavajjā vā”tiādisu suttapadesesu “kusalā”ti vuttadhammā eva “anavajjā”ti vuttatī āha “**suttantapariyāyaṃ patvā anavajjāṭṭhena kusalaṃ vaṭṭatī**”ti. **Abhidhamme** “kosalla”nti paññā āgatāti yonisomanasikārahetukassa kusalassa **kosallasammūtaṭṭho**, darathābhāvādiṇāto **niddarathaṭṭho**, “kusalassa katattā upacittā”ti vatvā iṭṭhavipākaniddisanato **sukhavipākaṭṭho** ca abhidhammanayasiddhoti āha “**abhidhamma...pe... vipākaṭṭhena**”ti. **Bāhitikasutte** (ma. ni. 2.358) bhagavato kāyasamācārādike vaṇṇentena dhammabhaṇḍāgārikena “yo kho mahārāja kāyasamācāro anavajjo”ti kusalo kāyasamācāro rañño pasenadissa vutto. Na hi bhagavato sukhavipākakammaṃ atthīti sabbasāvajjarahitā kāyasamācārādayo “kusalā”ti vuttā, idha pana “kusalesu dhammesū”ti bodhipakkhiyadhammā “kusalā”ti vuttā, te ca samathavipassanā maggasampayuttā ekantena sukhavipākā evāti avajjarahitatāmattaṃ upādāya anavajjattho kusala-saddoti āha “**imasmim pana... pe... daṭṭhabba**”nti. Evañca katvā “phalasaṭipattihānaṃ pana idha anadhippeta”nti idañca vacanaṃ samatthitaṃ hoti savipākasappa gahaṇanti katvā.

“**Cuddasavidhenā**”tiādi saṭipattihāne (dī. ni. 2.376; ma. ni. 1.109) vuttanayena veditabbāṃ. **Paggahaṭṭhenāti** kusalapakkhassa paggaṇhanasabhāvena. **Kiccavasenāti** anuppannākusalanuppādanādikkiccavasena. Tato eva cassa catubbidhatā. **Ijjhanaṭṭhenāti** nippajjanasabhāvena. Chandādayo eva iddhipādesu visiṭṭhasabhāvā, itare avisiṭṭhā, tesampi viseso chandādikatoti āha “**chandādivasena nānāsabhāvā**”ti.

**Adhimokkhādisabhāvavasenāti** pasādādhimokkhādisalakkhaṇavasena. **Upatthambhanaṭṭhenāti** sampayuttadhammānaṃ upatthambhanakabhāvena. **Akampiyaṭṭhenāti** paṭipakkhehi akampiyasabhāvena. **Salakkhaṇenāti** adhimokkhādisabhāvena. **Niyyānaṭṭhenāti** saṃkilesapakkhato, vaṭṭacārakato ca niggamaṇaṭṭhena. **Upaṭṭhānādināti** upaṭṭhānadhammavicayapaggahasampiyāyanapassambhanasamādhānaajjupekkhanasāṅkhātena attano sabhāvena. **Hetuṭṭhenāti** nibbānassa sampāpakahetubhāvena. **Dassanādināti**



dassanābhiniropanapariggahasamuṭṭhāpanavodāpanapaggahupaṭṭhānasamādhānasaṅkhātena attano sabhāvena.

**Sāsanassa pariyosānadassanatthanti** sāsanam nāma nippariyāyato sattatiṃsa bodhipakkhiyadhammā. Tattha ye samathavipassanāsahagatā, te sāsanassa ādi, maggapariyāpannā majjhe, phalabhūtā pariyosānam, taṃdassanattham. Tenāha “**sāsanassa hī**”tiādi.

Puna **etadānuttariyam bhanteti** yathāraddhāya desanāya nigamanam. Vuttasseva atthassa puna vacanañhi nigamanam vuttam. **Tam desananti** tam kusalesu dhammesu desanāppakāram, desanāvidhiṃ, desetabbañca, **sakalam** vā sampuñnam anavasesam **abhijānāti** abhivisiṭṭhena ñāṇena jānāti, **asesam abhijānanato** eva **uttari** upari **abhiññeyyam natthi**. Itoti bhagavatā abhiññātato. **Añño** paramatthavasena **dhammo vā** paññattivasena **puggalo vā** ayam nāma yam bhagavā na jānātīti idam natthi na upalabbhati sabbasseva sammadeva tumhehi abhiññātattā. **Kusalesu dhammesu** abhijānane, desanāyañca **bhagavato uttaritaro natthi**.

### Āyatanapaññāpanāsūti

**146. Āyatanapaññāpanāsūti** cakkhādīnam, rūpādīnañca āyatanānam sambodhanesu, tesam ajjhattikabāhiravibhāgato, sabhāgavibhāgato, samudayato, atthaṅgamato, āhārato, ādīnavato, nissaraṇato ca desanāyanti attho.

### Gabbhāvakkantidesanāvañṇanā

**147. Gabbhokkamanesūti** gabbhabhāvena mātukucchiyam avakkamanesu anuppavesesu, gabbhe vā mātukucchimiṃ avakkamanesu. **Pavisatīti** paccayavasena tattha nibbattento pavisanto viya hotīti katvā vuttam. **Ṭhātīti** santānaṭṭhitiyā pavattati, tathābhūto ca tattha vasanto viya hotīti āha “**vasatī**”ti. **Pakatilokiyamanussānam paṭhamā gabbhāvakkantīti** pacuramanussānam gabbhāvakkanti desanāvasena idha paṭhamā. “**Dutiya gabbhāvakkantī**”tiādīsipi evam yojanā veditabbā.

**Alamevāti** yuttameva.

**Khipitum na sakkontīti** tathā vātānam anuppajjanameva vadati. **Sesanti** puna “etadānuttariya”tiādi pāṭhappadesam vadati.

### Ādesanavidhādesanāvañṇanā

**148.** Parassa cittaṃ ādisati etehīti **ādesanāni**, yathāupaṭṭhitanimittādīni, tāni eva aññamaññassa asaṃkiñṇarūpena ṭhitattā **ādesanavidhā**, ādesanābhāgā, tāsu **ādesanavidhāsu**. Tenāha “**ādesanakoṭṭhāsesū**”ti. **Āgatanimittenāti** yassa ādisati, tassa, attano ca upagatanimittena, nimittappattassa lābhālābhādiādisanavidhidassanassa pavattattā “**idam nāma bhavissatī**”ti vuttam. Pāḷiyam pana “evampi te mano”tiādīnā parassa cittādīsanameva āgataṃ, tam nidassanamattam katanti daṭṭhabbam. Tathā hi “idam nāma bhavissatī”ti vuttasseva atthassa vibhāvanavasena vatthu āgataṃ. **Gatanimittam** nāma gamananimittam. **Ṭhitanimittam** nāma attano samīpe ṭhānanimittam, parassa gamanavasena, ṭhānavasena ca gahetabbanimittam. **Manussānam** paracittavidūnam, itaresampi vā savanavasena parassa cittaṃ ñatvā kathentānam **saddam sutvā**. **Yakkhapisācādīnanti** hiṅkārāyakkhānañceva kañṇapisācādīpisācānam, kumbhaṇḍanāgādīnañca.

**Vitakkavipphāravasenāti** vipphārikabhāvena pavattavitakkassa vasena. **Uppannanti** tato samuṭṭhitam. **Vippalapantānanti** kassaci atthassa abodhanato virūpaṃ, vividham vā palapantānam. **Suttapamattādīnanti ādi**-saddena vedanāṭṭakhattacittādīnam saṅgaho. **Mahāaṭṭhakathāyam** pana

“idaṃ vakkhāmi, evaṃ vakkhāmīti vitakkayato vitakkavipphārasaddo nāma uppajjati”ti (abhi. aṭṭha. 1.vacīkammadvāraṅkathāpi) āgatattā jāgarantānaṃ pakatiyaṃ t̥hitānaṃ avippalapanānaṃ vitakkavipphārasaddo kadāci uppajjati viññāyati, yo loke “mantajjappo”ti vuccati. Yassa mahāaṭṭhakathāyaṃ asotaviññeyyatā vuttā. Tādisañhi sandhāya viññattisahajameva “jivhātālucalanādikaravitakkasamuṭṭhitaṃ sukhumasaddaṃ dibbasotena sutvā ādisatīti sutte vutta”nti (dha. sa. mūlaṭī. vacīkammadvāraṅkathāvaṇṇanā) **ānandācariyo** avoca. Vuttalakkhaṇo eva pana nātisukhumo attano, accāsannappadese t̥hitassa ca maṃsasotassāpi āpāthaṃ gacchatīti sakkā viññātum. **Tassāti** tassa puggalassa. **Tassa vassenāti** tassa vitakkassa vasena. Evaṃ ayampi ādesanavidhā cetopariyaññavaseneva āgatāti veditabbā. Keci pana “**tassa vassenāti** tassa saddassa vassenā”ti atthaṃ vadanti, taṃ ayuttaṃ. Na hi saddaggahaṇena taṃsamuṭṭhāpakacittaṃ gayhati, saddaggahaṇānusārenapi tadatthasseva gahaṇaṃ hoti, na cittassa. Eteneva yadeke “**yaṃ vitakkayatoti** yamatthaṃ vitakkayato”ti vatvā “**tassa vassenāti** tassa atthassa vassenā”ti vaṇṇenti, tampi paṭikkhittaṃ.

Manasā saṅkharīyantīti **manosaṅkhārā**, vedanāsaññā. **Pañihitāti** purimaparibandhavinayena padhānabhāvena nihitā t̥hapitā. Tenāha “**cittasaṅkhārā suṭṭhapitā**”ti. Vitakkassa vitakkaṇaṃ nāma uppādanamevāti āha “**pavattessati**”ti. “Pajānāti”ti pubbe vuttapadasambandhadassanavasena āneti. **Āgamanenāti** jhānassa āgamaṇāpānāvasena. **Pubbhāgenāti** maggassa sabbapubbabhāgena vipassanārambhena. Ubhayaṃ petaṃ yo sayāṃ jhānalābhī, adhigatamaggo ca aññaṃ tadatthāya paṭipajjantaṃ disvā “ayaṃ iminā nīhārena paṭipajjanto addhā jhānaṃ labhissati, maggaṃ adhigamissati”ti abhiññāya vinā anumānavasena jānāti, taṃ dassetuṃ vuttaṃ. Tenāha “**āgamanena jānāti nāmā**”tiādi. **Anantarāti** vuṭṭhitakālaṃ sandhāyāha. Tadā hi pavattavitakkapajānaneneva jhānassa hānabhāgiyatādivisesapajānaṃ.

Kim paṇidaṃ cetopariyaññaṃ parassa cittaṃ paricchijja jānantaṃ iddhicittabhāvato avisesato sabbesampi cittaṃ jānātīti? Noti dassento “**tatthā**”tiādimāha. **Na ariyānanti** yena cittena te ariyā nāma jātā, taṃ lokuttaracittaṃ na jānāti appaṭividdhabhāvato. Yathā hi puthujjano sabbesampi ariyānaṃ lokuttaracittaṃ na jānāti appaṭividdhattā, evaṃ ariyopi heṭṭhimo uparimassa lokuttaracittaṃ na jānāti appaṭividdhattā eva. Yathā pana uparimo heṭṭhimaṃ phalasaṃpattim na samāpajjati, kiṃ evaṃ so tassa lokuttaracittaṃ na jānātīti codanaṃ sandhāyāha “**uparimo pana heṭṭhimassa jānāti**”ti, paṭividdhattāti adhippāyo. “Uparimo heṭṭhimaṃ na samāpajjati”ti vatvā tattha kāraṇamāha “**tesañhi**”tiādi. **Tesanti** ariyānaṃ. **Heṭṭhimā heṭṭhimā samāpatti** bhūmantarappattiyā paṭippassaddhikappā. Tenāha “**tatrupapattiyeva hoti**”ti, na uparibhūmipatti. Nimittādivasena ñātassa kadāci byabhicāropi siyā, na pana abhiññāññaṇena ñātassāti āha “**ceto...pe... natthi**”ti. “Taṃ bhagavā”tiādi **sesaṃ** nāma.

### Dassanasamāpattidesanāvaṇṇanā

**149. Brahmajāleti** brahmajālasuttavaṇṇanāyaṃ. Uttarapadalopena hesa niddeso. **Ātappanti vīriyaṃ** ātappati kosajjaṃ sabbampi saṃkilesapakkhanti. Kusalavīriyasseeva hettha gahaṇaṃ appamādādīpadantarassannidhānato. **Padahitabbatoti** padahanato, bhāvanaṃ uddissa vāyamanatoti attho. **Anuyūñjittabbatoti** anuyūñjanato. Īdisānaṃ padānaṃ bahulaṃkattuvīsayaṭāya icchitabbattā ātappapadassa viya itaresampi kattusādhanatā daṭṭhabbā. Paṭipattiyaṃ nappamajjati etenāti **appamādo**, satīavippavāso. Sammā manasi karoti etenāti **sammāmanasikāro**, tathāpavatto kusalacittuppādo. Bhāvanānuyogameva tathā vadati. Desanākkamena **paṭhamā, dassanasamāpatti nāma** karajakāye paṭikkūlākārassa sammadeva dassanavasena pavattasamāpattibhāvato. **Nippariyāyenevāti** vuttalakkhaṇadassanasamāpattisannissayattā, dassanamaggaṃphalabhāvato ca paṭhamasāmaññaphalaṃ pariyaṇena vinā **dassanasamāpatti**.

**Atikkamma chavimaṃsalohitaṃ aṭṭhiṃ paccavekkhatīti** tāni apaccavekkhitvā aṭṭhimeva paccavekkhati. **Aṭṭhiārammaṇā dibbacakkhupādakajjhānasamāpattīti** vuttanayena aṭṭhiārammaṇā dibbacakkhuadhīṭṭhānā paṭhamajjhānasamāpatti. Yo hi bhikkhu ālokakasīṇe catutthajjhānaṃ nibbattetvā taṃ pādakaṃ katvā adhigatadibbacakkhuññaṇo hutvā saviññāṇake kāye aṭṭhiṃ pariggahetvā tattha

paṭikkūlamanasikāravasena paṭhamam jhānam nibbatteti, tassāyaṃ paṭhamajjhānasamāpatti **dutiyā dassanasamāpatti**. Tena vuttam “atthi atthi”tiādi. Yo panettha pāliyaṃ dvattimsākāramanasikāro vutto, so maggasodhanavasena vutto. Tattha vā kataparicayassa sukheva vuttanayā atthipaccavekkhaṇā samijjhatīti. Tenevettha “imaṃ cevā”ti “**atikkamma cā**”ti **ca**-saddo samuccayattho vutto. **Tam jhānanti** yathāvuttam paṭhamajjhānam. **Ayanti** ayaṃ sakadāgāmiphalasamāpatti. Sātisayaṃ catusaccadassanāgamanato pariyāyena vinā mukhyā **dutiyā dassanasamāpatti**. **Yāva tatiyamaggā vattatīti āha** “khīṇāsavassa vasena catutthā dassanasamāpatti kathitā”ti.

Pāliyaṃ **purisassa cāti ca**-saddo byatireke, tena yathāvuttasamāpattidvayato vuccamānaṃyeva imassa visesaṃ joteti. Avicchedena pavattiyā sotasadisatāya viññāṇameva **viññāṇasotam**, tadetaṃ viññāṇam purimato anantarapaccayaṃ labhitvā pacchimassa anantarapaccayo hutvā pavattatīti ayaṃ assa sotāgatatāya sotasadisatā, tasmā pajānitabbabhāvena vuttam ekameva cettha viññāṇam, tasmā atthakathāyaṃ “**viññāṇasotanti viññāṇamevā**”ti vuttam. **Dvīhipi bhāgehi** orabhāgaparabhāgehi. Idhaloko hissa orabhāgo, paraloko parabhāgo dvinnampi vasenetaṃ sambandhanti. Tenāha “**idhaloke patiṭṭhita**”ntiādi. Viññāṇassa khāṇe khāṇe bhijjantassa kāmam natthi kassaci patiṭṭhitatā, taṇhāvasena pana tam “patiṭṭhita”nti vuccatīti āha “**chandarāgavasenā**”ti. Vuttañhetam –

“Kabaḷikāre ce bhikkhave āhāre atthi rāgo, atthi nandī, atthi taṇhā, patiṭṭhitam tattha viññāṇam viruḷham. Yattha patiṭṭhitam viññāṇam viruḷham...pe... atthi tattha āyatim punabbhavābhiniḃbattī”tiādi (saṃ. ni. 2.64; kathā. 296; mahāni. 7).

**Kammanti** kusalākusalakammaṃ, upayogavacanametam. **Kammato upagacchantanti** kammabhāvena upagacchantam, viññāṇanti adhippāyo. Abhisankhāraviññāṇaṃhi yena kammunā sahatam, aññadatthu tabbhāvameva upagatam hutvā pavattati. **Idhaloke patiṭṭhitam nāma** idha katūpacitakammabhāvūpagamanato. **Kammabhavam ākaḍḍhantanti** kammaviññāṇam attanā sampayuttakammaṃ javāpetvā paṭisandhinibbattanena tadabhimukham ākaḍḍhantam. Teneva paṭisandhinibbattanasāmatthiyena **paraloke patiṭṭhitam nāma** attano phalassa tattha patiṭṭhāpanena. Keci pana “abhisankhāraviññāṇam parato vipākam dātuṃ asamattham idhaloke patiṭṭhitam nāma, dātuṃ samattham pana paraloke patiṭṭhitam nāmā”ti vadanti, tam tesam matimattam “ubhayato abbotchinna”nti vuttatā. Yañca tehi “paraloke patiṭṭhita”nti vuttam, tam idhalokepi patiṭṭhitameva. Na hi tassa idhaloke patiṭṭhitabhāvena vinā paraloke patiṭṭhitabhāvo sambhavati. **Sekkhaputhujjanānam cetopariyaññanti** sekkhānam, puthujjanānañca cetaso paricchindanakaññam. **Kathitam** paricchinditabbassa cetaso chandarāgavasena patiṭṭhitabhāvajotanato.

Catutthāya dassanasamāpattiyā tatiyadassanasamāpattiyam vuttappaṭikkhepena attho veditabbo.

Purimānam dvinnam samāpattinaṃ pubbe samathavasena atthassa vuttatā idāni vipassanāvasena dassetaṃ “**apicā**”tiādi vuttam. **Nicalameva** pubbe vuttassa atthassa apanetabbato. Atthantarattatāya dassiyamānāya padaṃ calitam nāma hoti. **Aparo nayoti** ettha paṭhamajjhānassa paṭhamadassanasamāpattibhāve apubbam natthi. **Dutiyajjhānam dutiyāti** ettha pana “atthikavaṇṇakasiṇavasena paṭiladdhadutiyajjhānam dutiyā dassanasamāpatti”ti vadanti, tatiyajjhānampi tatheva paṭiladdham. Dassanasamāpattibhāvo pana yo bhikkhu ālokakasiṇe catutthajjhānam nibbattetvā tam pādakaṃ katvā adhigatadibbacakkhuko hutvā saviññāṇake atthim pariggahetvā tattha vaṇṇakasiṇavasena heṭṭhimāni tīṇi jhānāni nibbatteti, tassa. **Tatiyajjhānam tatiyā** dassanasamāpatti adhiṭṭhānabhūtaṃ dibbacakkhuññassa vasena. **Catutthajjhānam catutthāti** rūpāvacaracatutthajjhānam nibbattetvā tam pādakaṃ katvā adhigatadibbacakkhuññassa tam catutthajjhānam catutthā dassanasamāpatti. Idhāpi sekkhaputhujjanānam cetaso paricchindanena tatiyā dassanasamāpatti, arahato cittassa paricchindanena catutthā dassanasamāpatti veditabbā. Evañhesā atthavaṇṇanā pāliyā saṃsandeyya. “**Paṭhamamaggo**”tiādīsu atthiārammaṇapaṭhamajjhānapādako **paṭhamamaggo paṭhamā dassanasamāpatti**. Atthiārammaṇadutiyajjhānapādako **dutiyamaggo dutiyā**

dassanasamāpatti. Paracittañāṇasahagatā catutthajjhānapādakā **tatiyacatutthamaggā tatiyacatutthadassanasamāpattiyoti**. Purisassa viññānapajānanam panettha asammohavasena daṭṭhabbam.

### Puggalapaṇṇattidesanāvaṇṇanā

**150. Puggalapaṇṇattisūti** puggalānam paññāpanesu. Guṇavisesavasena aññamaññaṃ asaṅkarato ṭhapanesu. **Lokavohāravasenāti** lokasammutivasena. Lokavohāro hesa, yadidaṃ “satto puggalo”tiādi. Rūpādīsu sattavisattatāya **satto**. Tassa tassa sattanikāyassa pūraṇato galanato, maraṇavasena patanato ca **puggalo**. Santatiyā nayanato **naro**. Attabhāvassa posanato **poso**. **Evam paññāpetabbāsu** voharittabbāsu. “Sabbametam puggalo”ti imissā sādharāṇapaññattiyā vibhāvanavasena vuttam, na idhāhippetaasādharāṇapaññattiyā, tasmā **lokapaññattisūti** sattalokagatapaññattīsu. **Anuttaro hoti** anaññasādharāṇattā tassa paññāpanassa.

**Dvīhi bhāgehīti** kāraṇe, nissakke cetam puthuvacanam, āvuttiādivasena cāyamatto vedittabboti āha “**arūpasamāpattiyā**”tiādi, etena “samāpattiyā vikkhambhanavimokkhena, maggena samucchadavimokkhena vimuttattā ubhatobhāgavimutto”ti evam pavatto **tipiṭakacūlanāgatttheravādo**, “nāmakāyato, rūpakāyato ca vimuttattā ubhatobhāgavimutto”ti evam pavatto **tipiṭakamahādhammarakkhitattheravādo**, “samāpattiyā vikkhambhanavimokkhena ekavāram vimuttova maggena samucchadavimokkhena ekavāram vimuttattā ubhatobhāgavimutto”ti evam pavatto **tipiṭakacūlābhayatttheravādo** cāti imesam tiṇṇampi theravādānam ekajjham saṅgaho katoti daṭṭhabbam. **Vimuttoti** kilesehi vimutto, kilesavikkhambhanasamucchadanehi vā kāyadvayato vimuttoti attho. **Arūpasamāpattinanti** niddhāraṇe sāmivacanam. **Arahattappattaanāgāminoti** bhūtapubbagatiyā vuttam. Na hi arahattappatto anāgāmī nāma hoti. **Pāḷīti** puggalapaññattipāḷi. **Aṭṭha vimokkhe kāyena phusivāti** aṭṭha samāpattiyo saḥajātānāmakāyena paṭilabhivā. **Paññāya cassa disvā āsavā parikkhīṇā hontīti** vipassanāpaññāya saṅkhāragatam, maggapaññāya cattāri saccāni passivā cattāropi āsavā parikkhīṇā hontī. **Disvāti** dassanahetu. Na hi āsave paññāya passantī, dassanakāraṇā pana parikkhīṇā “disvā parikkhīṇā”ti vuttā dassanāyattaparikkhīṇattā. Evañhi dassanam āsavānam khayassa purimakiriyābhāvena vuttam.

**Paññāya visesato muttoti paññāvimutto** anavasesato āsavānam parikkhīṇattā. **Aṭṭhavimokkhaṇapaṭikkhepavaseneva**, na tadekadesabhūtarūpajjhānapaṭikkhepavasena. Evañhi arūpajjhānekadesābhāvepi aṭṭhavimokkhaṇapaṭikkhepo na hotīti siddham hoti. Arūpāvacarajjhānesu hi ekasmimpī sati ubhatobhāgavimuttotoyeva nāma hotī, na paññāvimuttoti.

**Phuṭṭhantam sacchikarotīti** phuṭṭhānam anto **phuṭṭhanto**, phuṭṭhānam arūpajjhānānam anantaro kāloti adhippāyo, accantasamyoge cetam upayogavacanam, phuṭṭhānantarakālemeva sacchikātabbam, sacchikato sacchikarāṇupāyenāti vuttam hoti. Tenāha “**so jhānaphassa**”ntiādi. **Ekacce āsavāti** heṭṭhimamaggattayavajjhā āsavā. Yo hi arūpajjhānena rūpakāyato, nāmakāyekadesato ca vikkhambhanavimokkhena vimutto, tena nirodhasaṅkhāto vimokkho ālocito pakāsito viya hoti, na pana kāyena sacchikato. Nirodham pana ārammaṇam katvā ekaccesu āsavesu khepitesu tena sacchikato hoti, tasmā so sacchikātabbam nirodham yathālocitam nāmakāyena sacchikarotīti **kāyasakkhīti** vuccati, na tu vimuttoti ekaccānam āsavānam aparikkhīṇattā.

**Diṭṭhantam pattoti** dassanasāṅkhātassa sotāpattimaggañāṇassa anantaram pattoti attho. “Diṭṭhattā patto”tipi pāṭho, tena catusaccadassanasāṅkhātāya diṭṭhiyā nirodhassa pattatam dīpeti. Tenāha “**dukkhā saṅkhārā**”tiādi. Paṭhamaphalato paṭṭhāya yāva aggamaggā diṭṭhippattoti āha “**esopi kāyasakkhī viya chabbidho hotīti**”ti. **Idam dukkhanti** “idam dukkham, ettakam dukkham, na ito uddham dukkha”nti **yathābhūtam pajānāti**. Yasmā idam yāthāvasarasato pajānāti, pajānanto ca ṭhapetvā taṇham pañcupādānakkhandhe “dukkhasacca”nti pajānāti. Taṇham pana idam dukkham ito samudeti, tasmā “**ayam dukkhasamudayo**”ti **yathābhūtam pajānāti**. Yasmā idam dukkhañca samudayo ca nibbānam

patvā nirujjhanti vūpasamanti appavattiṃ gacchanti, tasmā taṃ “**ayaṃ dukkhanirodho**”ti **yathābhūtaṃ pajānāti**. Ariyo pana aṭṭhaṅgiko maggo taṃ dukkhanirodhaṃ gacchati, tena taṃ “**ayaṃ dukkhanirodhagāminī paṭipadā**”ti **yathābhūtaṃ pajānāti**. Ettāvata nānakkhaṇe saccavavatthānaṃ dassitaṃ. Idāni taṃ ekakkhaṇe dassetaṃ “**tathāgatappaveditā**”tiādi vuttaṃ. **Tathāgatappaveditā** tathāgatena bodhimaṇḍe paṭividdhā viditā pākaṭā katā. **Dhammā**ti catusaccadhammā. **Vodiṭṭhā honti**ti sudiṭṭhā honti. **Vocaritā**ti sucaritā, tesu tena paññā suṭṭhu carāpitāti attho. **Ayanti** ayaṃ evarūpo **puggalo** “**diṭṭhippatto**”ti **vuccati**.

**Saddhāya vimuttoti** saddahanavasena vimutto, etena sabbathā avimuttassapi saddhāmatena vimuttabhāvaṃ dasseti. **Saddhāvimuttoti** vā saddhāya adhimuttoti attho. **Vuttanayenevāti** kāyasakkhimhi vuttanayeneva. **No ca kho yathā diṭṭhippattassāti** yathā diṭṭhippattassa āsavā parikkhīṇā, na evaṃ saddhāya vimuttassāti attho. Kiṃ pana nesaṃ kilesappahāne nānattaṃ atthīti? Natthi. Atha kasmā saddhāvimutto diṭṭhippattaṃ na pāpuṇātīti? Āgamanīyanānattena. Diṭṭhippatto hi āgamanamhi kilese vikkhambhento appadukkhena, akilamanto ca sakkoti vikkhambhetuṃ, saddhāvimutto dukkhena kilamanto vikkhambhenti, tasmā diṭṭhippattaṃ na pāpuṇāti. Tenāha “**etesu hi**”tiādi.

Ārammaṇaṃ yāthāvato dhāreti avadhāretīti **dhammo**, paññā. **Paññāpubbaṅgamanti** paññāpadhānaṃ. Paññaṃ vāhetīti **paññāvāhi**, paññaṃ sātisayaṃ pavattetīti attho. Pañña vā imaṃ puggalaṃ vāheti, nibbānābhimukhaṃ gametīti attho. **Saddhānusāriniddese**pi eseva nayo.

**Tasmāti visuddhimagge** (visuddhi. 2.770, 776) vuttattā, tato eva visuddhimagge, taṃ saṃvaṇṇanāsu (visuddhi. ṭi. 2.776) vuttanayenettha attho veditabbo.

### **Padhānadesanāvaṇṇanā**

**151. Padahanavasenāti** bhāvanānuyogavasena. **Satta bojjaṅgā padhānāti vuttā** vivekanissitādibhāvena padahitabbato bhāvetabbato.

### **Paṭipadādesanāvaṇṇanā**

**152. Dukkheṇa kasireṇa samādhim uppādentassāti** pubbabhāge āgamanakāle kicchena dukkhena sasaṅkhāreṇa sappayogena kilamantassa kilese vikkhambhetvā lokuttarasamādhim uppādentassa. **Dandhaṃ taṃ ṭhānaṃ abhijānantassāti** vikkhambhitesu kilesesu vipassanāparivāse ciraṃ vasitvā taṃ lokuttarasamādhisaṅkhātaṃ ṭhānaṃ dandhaṃ saṅikaṃ abhijānantassa paṭivijjhantassa, sacchikarontassa pāpuṇantassāti attho. **Ayaṃ vuccatīti** yā eṣā evaṃ uppajjati, ayaṃ kilesavikkhambhanapaṭipadāya dukkhattā, vipassanāparivāsapaññāya ca dandhattā maggakāle ekacittakkhaṇe uppannāpi **paññā** āgamanavasena “**dukkhapaṭipadā dandhābhiññā nāmā**”ti vuccati. Upari tīsu padesupi imināva nayena attho veditabbo.

### **Bhassasamācārādidesanāvaṇṇanā**

**153. Bhassasamācāreti** vacīsamācāre. **Ṭhitoti** yathāraddhaṃ taṃ avicchedavasena kathento. Tenāha “**kathāmaggaṃ anupacchinditvā kathento**”ti. **Musāvādūpasañhitanti** antarantarā pavattena musāvādena upasaṃhitāṃ. **Vibhūti** vuccati visumbhāvo, tattha niyuttanti vebhūtikaṃ, tadeva **vebhūtiyaṃ**, pesuññaṃ. Tenāha “**bhedakaravāca**”nti. Karaṇuttariyalakkhaṇato sārāmbhato jātāti **sārāmbhajā**. Tassā pavattiākāradassanattaṃ “**tvam dussīlo**”tiādi vuttaṃ. Bahiddhākathā amanāpā, manāpāpi parassa cittavighātāvahattā karaṇuttariyapakkhiyamevāti dassento “**tuyha**”ntiādimāha. **Vikkhepakathāpavattanti** vikkhepakathāvasena pavattaṃ. **Jayapurekkhāro hutvāti** attano jayaṃ purakkhatvā. Yaṃ kiñci na bhāsatīti yojanā. “**Mantā**”ti **vuccati paññā**, mantanaṃ jānananti katvā. “**Mantā**”ti idaṃ “**mantevā**”ti iminā samānattaṃ nipātapadanti āha “**upaparikkhitvā**”ti.

**Yuttakathamevā**ti attano, suṇantassa ca yuttarūpameva kathaṃ. **Hadaye nidahitabbayuttanti** atthasampattiyā, byañjanasampattiyā atthavedādīpaṭilābhanimittattā citte ṭhapetabbam, vimuttāyatanabhāvena manasi kātabbanti attho. Sabbaṅgasampannāpi vācā akāle bhāsītā abhājane bhāsītā viya na atthāvahāti āha **“yuttapattakālenā”**ti. Ayañca caturaṅgasamannāgatā subhāsītavācā saccasambodhāvahādītāya sattānaṃ mahiddhikā mahānisamsāti dassetuṃ **“evaṃ bhāsītā hī”**tiādi vuttaṃ.

**Sīlācāreti** sīle ca ācāre ca parisuddhasīle ceva parisuddhamanosamācāre ca. **Ṭhitoti** patiṭṭhahanto. Saccam etassa atthīti **saccoti** āha **“saccakatho”**ti. Esa nayo **saddhoti** etthāpi. Tenāha **“saddhāsampanno”**ti. “Nanu ca heṭṭhā saccam kathitamevā”ti kasmā vuttaṃ? Heṭṭhā hi vacīsamācāraṃ kathentena saccam kathitaṃ, paṭipakkhapaṭikkhepavasena idha sīlam kathentena tam paripuṇṇam katvā dassetuṃ saccam sarūpeneva kathitaṃ. “Puggalādhiṭṭhānāya kathāya ārabbhantarañcetam, tathāpi saccam vatvā anantameva saccassa kathanam punaruttam hotīti parassa codanāvasaro mā hotī”ti tatha parihāraṃ dātukāmo **“idha kasmā puna vutta”**nti āha. **Heṭṭhā vācāsaccam kathitaṃ** caturaṅgasamannāgataṃ subhāsītavācam dassentena. **Antamaso...pe... dassetuṃ idha vuttaṃ** “evaṃ sīlam suparisuddham hotī”ti. Imasmim panatthe “evaṃ parittakam kho, rāhula, tesam sāmaññaṃ, yesam natthi sampajānamusāvāde lajjā”tiādi nayappavattaṃ **rāhulovādasuttaṃ** dassetabbam.

Guttā satikavāṭena pidahitā dvārā etenāti **guttadvāroti** āha **“chasu indriyesū”**tiādi. Pariyesanapaṭiggaṇhanaparibhogavissajjanavasena bhojane mattam jānātīti **bhojane mattaññū**. **Samanti** avisamaṃ. Samacāritā hi kāyavisamādīni pahāya kāyasamādīpūraṇam. **Nisajjāyāti** ettha **iti-**saddo ādiattho, tena “āvāraṇīyehi dhammehi cittaṃ parisodhetī”ti evamādiṃ saṅgaṇhāti. Bhāvanāya cittaparisodhanañhi jāgariyānuyogo, na niddāvinodanamattaṃ. **Nittandīti** vigatathinamidhho. Sā pana nittanditā kāyālasīyavigamane pākāṭā hotīti vuttaṃ **“kāyālasīyavirahito”**ti. **“Āraddhavīriyo”**ti iminā duvidhopi vīriyārambho gahitoti tam vibhajitvā dassetuṃ **“kāyikavīriyenāpi”**tiādi vuttaṃ. Saṅgama gaṇavihāro saḥavāso **saṅgaṇikā**, sā pana kilesehipi evam hotīti tato visesetuṃ **“gaṇasaṅgaṇika”**nti vuttaṃ. Gaṇena saṅgaṇikam gaṇasaṅgaṇikanti. **Ārambhavatthuvasenāti** anadhigatavisesādhigamakāraṇavasena **ekavīhārī**, na kevalam ekībhāvavasena. **Kilesasaṅgaṇikanti** kilesasahitacittataṃ. **Yathā tathāti** vipassanāvasena, paṭisaṅkhānavasena vā. Samathavasena **ārammaṇūpanijjhānam**. Vipassanāvasena **lakkhaṇūpanijjhānam**.

**Kalyāṇapaṭibhānoti** sundarpaṭibhāno, sā panassa paṭibhānasampadā vacanacāturiyasahitāva icchitāti āha **“vākkaṇa...pe... sampanno cā”**ti. “Paṭibhāna”nti hi ñaṇampi vuccati ñaṇassa upaṭṭhitavacanampi. Tatha atthayuttaṃ kāraṇayuttaṃ paṭibhānamassāti **yuttapaṭibhāno**. Pucchitānantameva sīgham byākātuṃ asamatthāyā no muttapaṭibhānam assāti **no muttapaṭibhāno**. Idha pana vikiṇṇavāco muttapaṭibhāno adhippetoti adhippāyena **“sīlasamācārasmiñhi ṭhitabhikkhu muttapaṭibhāno na hotī”**ti vuttaṃ. **Gamanasamatthāyāti** assutaṃ dhammam gametuṃ samatthāyā. **Dhāraṇasamatthāyāti** sātīsayam sativīriyasahitāyā yathāsutaṃ yathāpariyattaṃ dhammam dhāretuṃ samatthāyā. Munanato anumīnato **mutīti** anumāna **paññāya nāmaṃ**. **Tīhi padehīti** “gatimā dhitimā mutimā”ti tīhi padehi. **Heṭṭhāti** heṭṭhā “āraddhavīriyo”ti vuttaṭṭhāne. **Idhāti** “dhitimā”ti vuttaṭṭhāne. Vīriyampi heṭṭhā guṇabhūtam gahitanti vuttovāyamattho. **Heṭṭhāti** “jāgariyānuyogamanuyutto, jhāyī”ti ettha **vipassanāpaññā kathitā**. **Idhāti** “dhitimā mutimā”ti ettha **buddhavacanagaṇhanapaññā** kathitā karaṇapubbāparakosallapaññādīpanato. Kilesakāmopi vatthukāmo viya yathāpavatto assādīyatīti vuttaṃ **“vatthukāmakilesakāmesu agiddho”**ti.

### Anusāsanavidhādesanādivaṇṇanā

**154. Attano upāyamanasikārenāti** attani sambhūtena pathamanasikārena bhāvanāmanasikārena. **Paṭipajjamānoti** visuddhim paṭipajjamāno.

155. **Kilesavimuttiñāṇeti** kilesappahāṇajānane.

156. **Pariyādiyamānoti** paricchijja gaṇhantoti attho. **Suddhakkhandheyeva anussarati** nāmagottaṃ pariyādiyitum asakkonto. Vuttamevattham vivaritum “**eko hī**”tiādi vuttam. **Sakkoti** pariyādiyitum. **Asakkontassa vasena gahitam**, “amutrāsim evaṃnāmo”tiādi vuttanti attho. **Asakkontassāti** ca ārohane asakkontassa, orohane pana ñāṇassa thirabhūtattā. Tenāha “**suddhakkhandheyeva anussaranto**”tiādi. **Etanti** pubbāparavirodham. **Na sallakkhesi** diṭṭhābhini vesena kuṇṭhañāṇattā. Tenāha “**diṭṭhigatikattā**”ti. **Ṭhānanti** ekasmiṃ pakkhe avatṭhānam. **Niyamoti** vādaniyamo paṭiniyatavādātā. Tenāha “**imaṃ gahetvā**”tiādi.

157. **Piṇḍagaṇanāyāti** “ekam dve”tiādinā agaṇetvā saṅkalanapaduppādanādinā piṇḍanavasena gaṇanāya. **Acchiddakavasenāti** avicchindakagaṇanāvasena gaṇanā kamagaṇanam muñcivā “imasmiṃ rukkhe ettakāni paṇṇāni”ti vā “imasmiṃ jalāsaye ettakāni udakāḷhakāni”ti vā evaṃ gaṇetabbassa ekajjhampi piṇḍetvā gaṇanā. Kamagaṇanā hi antarantarā vicchijja pavattiyā pacchindikā. Sā panesā gaṇanā savanantaram anapekkhitvā manasāva gaṇetabbato “**manogaṇanā**”tipi vuccatīti āha “**manogaṇanāyā**”ti. **Piṇḍagaṇanameva dasseti**, na vibhāgaṇanam. **Saṅkhātum na sakkā** aññehi asaṅkhyeyyābhāvato. Paññāpāramiyā pūritabhāvaṃ dassento itarāsam pūraṇena vinā tassā pūraṇam natthīti “**dasanam pāramīnam pūritattā**”ti āha. Tenāha “**sabbaññutaññāṇassa suppaṭividdhattā**”ti. **Ettakanti dassethāti dīpeti** thero. Yam pana pāḷiyam “sākāram sauddesam anussarati”ti vuttam, tam tassa anussaraṇamattam sandhāya vuttam, na āyuno vassādigagaṇanāya paricchindanam tassa avisayabhāvato.

158. **Tumhākam sammāsambuddhānam yeva anuttarā** anaññasādhāraṇattā. Idāni tassā desanāya majjhe bhinnasuvaṇṇassa viya vibhāgābhāvaṃ dassetum “**atītabuddhāpi**”tiādi vuttam. **Imināpi kāraṇenāti** anuttarabhāvena, aññehi buddhehi ekasadisabhāvena ca.

159. Āsavānam ārammaṇabhāvūpagamanena **sāsavā**. Upecca ādhīyantīti **upādhi**, dosāropanāni, saha upādhihīti **saupādhikā**. Anariyiddhiyañhi attano cittadosena ekacce upārambham dadanti, svāyamatto **kevaṭṭasuttena** dīpetabbo. **No “ariyā”ti vuccati** sāsavabhāvato. Niddosehi khīṇāsavehi pavattetabbato **niddosā** dosehi saha appavattanato. Tato eva **anupārambhā**. Ariyānam iddhīti **ariyiddhīti vuccati**.

**Appaṭikkūlasaññīti** iṭṭhasaññī iṭṭhākārena pavattacitto. **Paṭikkūleti** amanuññe aniṭṭhe. **Dhātusaññanti** “dhātuyo”ti saññam. **Upasaṃharatīti** upaneti pavatteti. **Aniṭṭhasmiṃ vatthusminti** aniṭṭhe sattasaññite ārammaṇe. **Mettāya vā pharatīti** mettam hitesitam upasaṃharanto sabbatthakameva tam tattha pharati. **Dhātuto vā upasaṃharatīti** dhammasabhāvacintanena dhātuso, paccavekkhaṇāya dhātumanasikāram vā tattha pavatteti. **Appaṭikkūle satte** ñātimittādi ke yāthāvato dhammasabhāvacintanena aniccasaññāya visabhāgabhūte “kesādi asucikoṭṭhāsamevā”ti **asubhasaññam pharati** asubhamanasikāram pavatteti. **Chalaṅgupekkhāyāti** iṭṭhāniṭṭhachalārammaṇāpāthe parisuddhapakatibhāvāvijahanalakkhaṇāya chasu dvāresu pavattanato “chalaṅgupekkhāyā”ti laddhanāmāya tatramajjhātupekkhāya.

**Tam desananti** tam dvīsu iddhividhāsu desanappakāram desanāvidhiṃ. **Asesam sakalanti** asesam niravasesam sampuṇṇam abhivisiṭṭhena ñāṇena jānāti. **Asesam abhijānato** tato **uttari abhiññeyyam natthi**. Itoti bhagavato abhiññātato. **Añño** paramatthavasena **dhammo vā** paññāttivasena **puggalo vā ayam nāma yam bhagavā na jānātīti idam natthi** na upalabbhati sabbasseva sammadeva tumhehi abhiññātattā. Dvīsu **iddhividhāsu** abhijānane, desanāyañca **bhagavato uttaritaro natthi**. **Imināpīti pi-**saddo na kevalam vuttatthasamuccayattho, atha kho avuttatthasamuccayatthopi daṭṭhabbo. Yam tam bhantetiādināpi hi bhagavato guṇadassanam tasseva pasādassa kāraṇavibhāvanam.

**Aññathāsathugūṇadassanādivaṇṇanā**

160. Pubbe “etadānuttariyaṃ bhante” tiādīnā yathāvuttabuddhaguṇā dassitā, tato añño evāyaṃ pakāro “yaṃ taṃ bhante” tiādīnā āradhoti āha “**aparenāpi ākārenā**” ti. Buddhānaṃ sammāsambodhiyā saddahanato visesato **saddhā kulaputtā nāma bodhisattā**, mahābodhisattāti adhippāyo. Te hi mahābhinihārato paṭṭhāya mahābodhiyaṃ sattā āsattā laggā niyatabhāvūpagamanena kenaci asaṃhāriyabhāvato. Yato nesam na kathañci tattha saddhāya aññathattaṃ hoti, eteneva tesam kammaphalaṃ saddhāyapi aññathattābhāvo dīpito daṭṭhabbo. **Tasmāti** yasmā atisayavacanicchāvasena, “anuppattaṃ taṃ bhagavatā” ti saddantarasannidhānena ca viṣiṭṭhavisayaṃ “saddhena kulaputtēnā” ti idaṃ padaṃ, tasmā. Lokuttaradhammasamadhiḡamamūlakattā sabbabuddhaguṇasamadhiḡamassa “nava lokuttaradhammā” ti vuttaṃ. “**Āradhavīriyēnā**” tiādīsu samāsapadesu “**vīriyaṃ thāmo**” tiādīni avayavapadāni. **Ādi**-saddena parakkamapadaṃ saṅgaṇhāti, na dhorayhapadaṃ. Na hi taṃ vīriyavevacanaṃ, atha kho vīriyavantavācakaṃ. Dhurāya niyuttoti hi **dhorayho**. Tenāha “taṃ dhuraṃ vahanasamatthena mahāpurisenā” ti. **Paggahitavīriyēnāti** asithilavīriyena. **Thiravīriyēnāti** ussoḥhībhāvūpagamanena thirabhāvappattavīriyena. **Asamadhurehīti** anaññasādhāraṇadhurehi. Paresaṃ asayhasahanā hi lokanāthā. **Taṃ sabbam** acinteyyāparimeyyabhedam buddhānaṃ guṇajātaṃ. Pāramitā, buddhaguṇā, veneyyasattāti yasmā idaṃ tayaṃ sabbesampi buddhānaṃ samānameva, tasmā āha “**atītānāgata...pe... ūno natthī**” ti.

**Kāmasukhallikānuyoganti** kāmasukhe allīnā hutvā anuyuñjanaṃ. **Ko jānāti paralokaṃ** “atthī” ti, ettha “ko ekavisayo yaṃ indriyagocaro” ti evaṃdiṭṭhi hutvāti adhippāyo. **Sukhoti** iṭṭho sukhāvaho. **Paribbājikāyāti** tāpasaparibbājikāya taruṇiyā. **Mudukāyāti** sukhumālāya. **Lomasāyāti** taruṇamudulomavatiyā. **Moḷibandhāhīti** moḷiṃ katvā bandhakesāhi. **Paricārentīti** attano pāricārikaṃ karonti, indriyāni vā tattha parito cārenti. **Lāmakanti** paṭikiliṭṭhaṃ. **Gāmaṃvāsīnaṃ** bālānaṃ **dhammaṃ**. Puthujjanānamidanti **pothujjanikaṃ**. Yathā pana taṃ “puthujjanānamida” nti vattabataṃ labhati, taṃ dassetuṃ “**puthujjanehi sevitabba**” nti āha. Anariyehi sevitabbanti vā **anariyaṃ**. Yasmā pana niddosatto ariyattho, tasmā “**anariyanti na niddosa**” nti vuttaṃ. **Anatthasamyuttanti** diṭṭhadhammikasamparāyikādivividhaviḷulānatthasañhitam. **Attakilamathānuyoganti** attano kilamathassa khedanassa anuyuñjanaṃ. Dukkhaṃ etassa atthīti **dukkhaṃ**. Dukkhamanaṃ etassāti **dukkhamam**.

**Ābhicetasikānanti** **abhiceto** vuccati abhikkantaṃ visuddhaṃ cittaṃ, adhicittaṃ vā, tasmīṃ abhicetasi jātānīti ābhicetasikāni, abhicetosannissitāni vā. **Diṭṭhadhammasukhavihārānanti** diṭṭhadhamme sukhavīhārānaṃ, **diṭṭhadhammo** vuccati paccakkho attabhāvo, tattha sukhavīhārabhūtānanti attho, rūpāvacarajhānānametaṃ adhivacanaṃ. Tāni hi appētvā nisinnā jhāyino imasmiṃyeva attabhāve asaṃkiliṭṭhaṃ nekkhammasukhaṃ vindanti, tasmā “diṭṭhadhammasukhavīhārāni” ti vuccantīti. **Kathitā** “diṭṭhadhammasukhavīhāro” ti sappītikattā, lokuttaravīpākasukhumasañhitattā ca. **Saha maggena vipassanāpādakajjhānaṃ** kathitaṃ “cattārome cunda sukhallikānuyogā ekantanibbidāyā” tiādīnā (dī. ni. 3.184) **catutthajjhānikaphalasamāpattīti** catutthajjhānikā phalasamāpatti diṭṭhadhammasukhavīhārābhāvena kathitā. Cattāri rūpāvacarāni “**diṭṭhadhammasukhavīhārājjhānāni**” ti **kathitānīti** attho. **Nikāmalābhīti** nikāmena lābhī attano icchāvasena lābhī. Icchiticchitakkhaṇe samāpajjituṃ samatthoti attho. Tenāha “**yathākāmalābhī**” ti. **Adukkhalābhīti** sukheneva paccanīkadhammānaṃ samucchinnattā samāpajjituṃ samattho. **Akasiralābhīti** akasirānaṃ vīḷulānaṃ lābhī, yathāparicchedeneva vuṭṭhātuṃ samattho. Ekacco hi lābhīyeva hoti, na pana sakkoti icchiticchitakkhaṇe samāpajjituṃ. Ekacco tathā samāpajjituṃ sakkoti, pāribandhake pana kicchena vikkhambheti. Ekacco tathā ca samāpajjati, pāribandhake ca akiccheneva vikkhambheti, na sakkoti nāḷikayantaṃ viya yathāparicchede vuṭṭhātuṃ. Bhagavā pana sabbaso samucchinnapāribandhakattā vasibhāvassa sammadeva samadhigatattā sabbametaṃ sammadeva sakkoti.

### Anuyogadānappakāraṇānaṃ

161. **Dasasahasilokadhātuyāti** imāya lokadhātuyā saddhiṃ imaṃ lokadhātuṃ parivāretvā ṭhitāya dasasahasilokadhātuyā. Jātikhettabhāvena hi taṃ ekajjhaṃ gaḡetvā “ekissā lokadhātuyā” ti vuttaṃ,



tattakāya eva jātikhettabhāvo dhammatāvasena veditabbo. “Pariggahavasena”ti keci. Sabbesampi buddhānaṃ tattakaṃ eva jātikhettaṃ. “Tannivāsīnaṃyeva ca devānaṃ dhammābhisamayo”ti vadanti. Pakampanadevatūpasāṅkamanādinā jātacakkavālena samānayogakkhamatthānaṃ **jātikhettaṃ**. Saraseneva āṇāpavattanaṭṭhānaṃ **āṇākhettam**. Buddhañāṇassa visayabhūtaṃ ṭhānaṃ **visayakhettaṃ**. **Okkamanādīnaṃ** channameva gahaṇaṃ nidassanamattaṃ mahābhinihārādikālepi tassa pakampanalabbhānato. **Āṇākhettam nāma**, yaṃ ekaccaṃ samvaṭṭati, vivaṭṭati ca. **Āṇā vattati** tannivāsīdevatānaṃ sirasā sampañicchanena, tañca kho kevalaṃ buddhānaṃ ānubhāveneva, na adhippāyavasena. “Yāvataṃ pana ākaṅkheyyā”ti (a. ni. 3.81) vacanato tato parampi āṇā pavatteyyeva.

**Nuppajjantīti pana atthīti** “na me ācariyo atthi, sadiso me na vijjati”ti (ma. ni. 1.285; 2.341; mahāva. 11; kathā. 405) imissā lokadhātuyā ṭhatvā vadantena bhagavatā, imasmimīyeva sutte “kiṃ panāvuso, sārīputta, atthetarahi añño samaṇo vā brāhmaṇo vā bhagavatā samasamo sambodhiya”nti (dī. ni. 3.161) evaṃ puṭṭho “ahaṃ bhante notī vadeyya”nti (dī. ni. 3.161) vatvā tassa kāraṇaṃ dassetuṃ “atthānametaṃ anavakāso, yaṃ ekissā lokadhātuyā dve arahanto sammāsambuddhā”ti (dī. ni. 3.161; ma. ni. 3.129; a. ni. 1.277; netti. 57; mī. pa. 5.1.1) imaṃ suttaṃ dassentena dhammasenāpatinā ca buddhakhettabhūtaṃ imaṃ lokadhātuṃ ṭhapetvā aññattha anuppatti vuttā hotīti adhippāyo.

**Ekato**ti saha, ekasmiṃ kāleti attho. So pana kālo kathaṃ paricchinnoti? Carimabhava paṭisandhiggahaṇato paṭṭhāya yāva dhātuparinibbānanti dassento “**tattha bodhipallaṅke**”tiādimāha. **Nisinnakālato paṭṭhāyāti** paṭilomakkamena vadati. **Khettapariggaho katova** hoti “idaṃ buddhānaṃ jātikhetta”nti. Kena pana pariggaho kato? Uppajjamānena bodhisattena. **Parinibbānato paṭṭhāyāti** anupādisesāya nibbānadhātuyā parinibbānato paṭṭhāya. **Etthantareti** carimabhava bodhisattassa paṭisandhiggahaṇaṃ, dhātuparinibbānanti imehi dvīhi paricchinne etasmiṃ antare.

### Tipiṭakaantaradhānakathāvaṇṇanā

“Na nivāritā”ti vatvā tattha kāraṇaṃ dassetuṃ “**tīṇi hī**”tiādi vuttaṃ. Paṭipattiantaradhānena sāsanaṃ osakkittatā aparassa uppatti laddhāvasarā hoti. **Paṭipadāti** paṭivedhāvahā pubbabhāgapaṭipadā.

“Pariyatti pamāṇa”nti vatvā tamatthaṃ bodhisattaṃ nidassanaṃ katvā dassetuṃ “**yathā**”tiādi vuttaṃ. Tayidaṃ hīnaṃ nidassanaṃ katanti daṭṭhabbaṃ. Niyyānikadhammassa hi ṭhitiṃ dassento aniyyānikadhammaṃ nidasseti.

**Mātikāya antarahitāyāti** “yo pana bhikkhū”tiādi (pārā. 39, 44; pāci. 45) nayappavattāya sikkhāpadapālimātikāya antarahitāya. Nidānuddesasaṅkhāte pātimokkhe, pabbajjāupasampadākammesu ca **sāsanaṃ tiṭṭhati**. Yathā vā pātimokkhe dharante eva pabbajjā upasampadā ca, evaṃ sati eva tadubhaya pātimokkhaṃ tadubhayaḥbhāve pātimokkhābhāvato. Tasmā tayidaṃ tayaṃ sāsanaṃ ṭhitihetūti āha “**pātimokkhapabbajjāupasampadāsu ṭhitasu sāsanaṃ tiṭṭhati**”ti. Yasmā vā upasampadādhīnaṃ pātimokkhaṃ anupasampannaṃ anicchittatā, upasampadā ca pabbajjādhīnā, tasmā pātimokkhe, taṃ siddhiyā siddhāsu pabbajjāupasampadāsu ca sāsanaṃ tiṭṭhati. **Osakkitaṃ nāmāti** pacchimakapaṭivedhasīlabhedadvayaṃ ekato katvā tato paraṃ vinaṭṭhaṃ nāma hoti, pacchimakapaṭivedhato paraṃ paṭivedhasāsanaṃ, pacchimakasīlabhedato paraṃ paṭipattisāsanaṃ vinaṭṭhaṃ nāma hotīti attho.

### Sāsanaantarahitavaṇṇanā

Etena kāmāṃ “sāsanaṭṭhitiyā pariyatti pamāṇa”nti vuttaṃ, pariyatti pana paṭipattihetukāti paṭipattiyā asati sā appaṭiṭṭhā hoti paṭivedho viya, tasmā paṭipattiantaradhānaṃ sāsanaosakkanaṃ visesakāraṇanti dassetvā tayidaṃ sāsanaosakkanaṃ dhātuparinibbānosānanti dassetuṃ “**tīṇi parinibbānāni**”tiādi vuttaṃ. **Dhātūnaṃ sannipātanādi** buddhānaṃ adhiṭṭhānēvāti veditabbaṃ.

**Tāti rasmiyo. Kāruññanti** paridevanakāruññam. Jambudīpe, dīpantaresu, devanāgabrahmalokesu ca vippakiritvā t̄hitānaṃ dhātūnaṃ mahābodhipallāṅkaṭṭhāne ekajjhaṃ sannipātaṇaṃ, rasmivissajjanaṃ, tattha tejodhātuyā uṭṭhānaṃ, ekajjalibhāvo cāti sabbametaṃ satthu adhiṭṭhānavasenevāti veditabbaṃ.

**Anacchariyattāti** dvīsipi uppajjamānesu acchariyattābhāvadosatoti attho. Buddhā nāma majjhe bhinnasuvaṇṇaṃ viya ekasadisāti tesam desanāpi ekarasā evāti āha “**desanāya ca visesābhāvato**”ti, etena ca anacchariyattameva sādheti. “**Vivādabhāvato**”ti etena vivādābhāvattaṃ dve ekato na uppajjantīti dasseti.

**Tatthāti** milindapañhe (mi. pa. 5.1.1). **Ekuddesoti** eko ekavidho abhinno uddeso. Sesapadesupi eseva nayo.

Ekam eva buddhaṃ dhāretīti **ekabuddhadhāraṇī**, etena evaṃsabhāvā ete buddhaguṇā, yena dutiyaṃ buddhaguṇaṃ dhāretuṃ asamattā ayaṃ lokadhātūti dasseti. Paccayavisesanipphannaṇāñhi dhammānaṃ sabhāvaviseso na sakkā nivāretunti. “Na dhāreyyā”ti vatvā tameva adhāraṇaṃ pariyāyehi pakāsentō “**caleyyā**”tiādīmāha. Tattha **caleyyāti** paripphandeyya. **Kampeyyāti** pavedheyya. **Nameyyāti** ekapassena natā bhaveyya. **Oṇameyyāti** osīdeyya. **Vinameyyāti** vividhā ito cito ca nameyya. **Vikireyyāti** vātena bhusamuṭṭhi viya vippakireyya. **Vidhameyyāti** vinasseyya. **Viddhamseyyāti** sabbaso viddhastā bhaveyya. Tathābhūtā ca na katthaci tiṭṭheyāti āha “**na thānaṃ upagaccheyyā**”ti.

Idāni tattha nidassanaṃ dassentō “**yathā mahārājā**”tiādīmāha. Tattha **samupādikāti** samaṃ uddhaṃ pajjati pavattatīti samupādikā, udakassa upari samaṃgāminīti attho. **Vañṇenāti** saṅghānena. **Pamāṇenāti** ārohana. **Kisathūlenāti** kisathūlabhāvena, pariṇāhenāti attho. **Dvinnampīti** dvepi, dvinnampī vā sarīrabhāraṃ.

**Chādentanti** rocentaṃ ruciṃ uppādentam. **Tandīkatoti** tena bhojanena tandībhūto. **Anoṇamitadaṇḍajātōti** yāvadaṭṭhabhojanena oṇamituṃ asamattatāya anoṇamitadaṇḍo viya jāto. **Sakim bhuttovāti** ekam vaḍḍhitakaṃ bhuttamattova **mareyyāti**. **Atidhammabhārenāti** dhammena nāma pathavī tiṭṭheyya, sakim teneva calati vinassatīti adhippāyena pucchati. Puna thero ratanaṃ nāma loke kuṭumbaṃ sandhārentam, abhimatañca lokena; tam attano garusabhāvātāya sakaṭabhaṅgassa kāraṇaṃ atibhārabhūtaṃ diṭṭhamevaṃ dhammo ca hitasukhavisesehi taṃsamaṅginaṃ dhārento, abhimato ca viññūnaṃ gambhīrappameyyabhāvena garusabhāvattā atibhārabhūto pathavicalanassa kāraṇaṃ hotīti dassentō “**idha mahārāja dve sakaṭā**”tiādīmāha, eteneva tathāgatassa mātukucchiokkamanādīkāle pathavikampanakāraṇaṃ samvaṇṇitanti daṭṭhabbaṃ. **Ekassāti** ekasmā, **ekassa** vā sakaṭassa **ratanaṃ** tasmā **sakaṭato gahetvāti** attho.

**Osāritanti** uccāritaṃ, kathitanti attho.

**Aggoti** sabbasattehi aggo.

**Sabhāvapakatikāti** sabhāvabhūtā akittimā pakatikā. **Kāraṇamahantattāti** kāraṇānaṃ mahantatāya, mahantehi buddhakaradhammehi pāramisaṅkhātehi kāraṇehi buddhaguṇānaṃ nibbattitoti vuttaṃ hoti. **Pathaviādīni** mahantāni vatthūni, mahantā ca **sakkabhāvādayo** attano attano visaye ekekāva, evaṃ **sammāsambuddhōpi** mahanto attano visaye eko eva. Ko ca tassa visayo? Buddhābhūmi, yāvatakaṃ vā ñeyyamevaṃ “ākāso viya anantavisayo bhagavā eko eva hotī”ti vadanto “ekissā lokadhātuyā”ti vuttalokadhātuto aññesupi cakkavālesu aparassa buddhassa abhāvaṃ dasseti.

“Sammukhā meta”ntīdinā pavattitaṃ attano byākaraṇaṃ aviparītattatāya satthari pasāduppādanena sammāpaṭipajjamānassa anukkamena lokuttaradhammāvahampi hotīti āha “**dhammassa...pe... paṭipada**”nti. Vādassa anupataṇaṃ anuppavattīti **vādānupātōti** āha

“vādoyevā”ti.

### Acchariyaabbhutavaṇṇanā

162. Udāyīti nāmaṃ, mahāsarīratāya pana thero **mahāudāyīti** paññāyittha, yassa vasena vinaye nisīdanassa dasā anuññātā. **Pañcavaṇṇāti** khuddikādibhedato pañcappakārā. Pītisamuṭṭhānehi pañītarūpehi atibyāpitadeho “**nirantaraṃ pītiyā phuṭasarīro**”ti vutto, tato evassā pariyāyato pharaṇalakkhaṇampi vuttaṃ. **Appa**-saddo “appakasirenevā”tiādīsu (saṃ. ni. 1.101; 5.158; a. ni. 7.71) viya idha abhāvattthoti āha “**appicchatāti nittaṇhatā**”ti. **Tihākārehīti** yathālābhayathābalayathāsārappapakārehi.

Na na **katheti** kathetiyeva. **Cīvarādihetunti** cīvaruppādādihetubhūtaṃ payuttakathaṃ na **katheti**. **Veneyyavasenāti** vinetabbapuggalavasena. **Katheti** “evamayaṃ vinayaṃ upagacchatī”ti. “Sabbābhībhū sabbavidūhamasmi”tiādīkā (ma. ni. 1.285; 2.341; mahāva. 11; kathā. 405; dha. pa. 353) **gāthāpi** “dasabalasamannāgato, bhikkhave, tathāgato”tiādīkā (saṃ. ni. 2.21, 22) **suttantāpi**.

163. **Abhikkhaṇanti** abhiṇṇaṃ. **Niggāthakattā**, pucchanavissajjanavasena pavattitattā ca “**veyyākaraṇa**”nti **vuttaṃ**. Sesam sabbam suviññeyyaṃ evāti.

Sampasādanīyasuttavaṇṇanāya līnatthappakāsanā.

## 6. Pāsādikasuttavaṇṇanā

### Nigaṇṭhanāṭaputtakālāṅkiriyaṇṇanā

164. Lakkhassa saravedhaṃ avirajjhītvāna vijjhanavidhiṃ jānantīti **vedhaññā**. Tenāha “**dhanumhi katasikkhā**”ti. **Sippaṃ uggahaṇatthāyāti** dhanusippādisippassa uggahaṇatthāya. Majjhīmena pamāṇena sarapātayogyatāvasena katattā **dīghapāsādo**.

**Sampati kālaṃ katoti** acirakālaṃ kato. **Dvedhikajātāti** jātadvedhikā sañjātabhedā. **Dvejhhajātāti** duvidhabhāvappattā. Bhaṇḍanti paribhāsanti etenāti **bhaṇḍanaṃ**, viruddhacittaṃ. **Tanti** bhaṇḍanaṃ. “Idaṃ nahānādi na kattabba”nti paññattavattaṃ **paṇṇatti**. **Dhammavinayanti** pāvacaṇaṃ siddhantaṃ. **Vijjhantā** mukhasattīhi. **Sahitaṃ meti** mayhaṃ vacanaṃ sahitaṃ siliṭṭhaṃ pubbāparasambandhaṃ atthayuttaṃ kāraṇayuttaṃ. Tenāha “**atthasamhita**”nti. **Adhiciṇṇanti** āciṇṇaṃ. **Viparāvattanti** virodhadassanavasena parāvattitaṃ, parāvattaṃ dūsitanti attho. Tenāha “**cirakālavasena paguṇaṃ, taṃ mama vādaṃ āgamma nivatta**”nti. **Pariyesamāno vicara** tattha gantvā sikkhāti attho. **Sace sakkosi**, idāniyeva mayā veṭhitaṃ dosaṃ nibbeṭhehi. **Maraṇamevāti** aññamaññaghātanavasena maraṇameva. Nāṭaputtassa imeti **nāṭaputtiyā**, te pana tassa sissāti āha “**antevāsikesū**”ti. Purimapaṭipattito paṭinivattanaṃ **paṭivānaṃ**, taṃ rūpaṃ sabhāvo etesanti **paṭivānarūpā**. Tenāha “**nivattanasabhāvā**”ti. **Kathanaṃ** atthassa ācikkhanaṃ. **Pavedanaṃ** hetudāharaṇāni āharitvā bodhanaṃ. Tenāha “**duppavediteti duviññāpīte**”ti. Na upasamāya saṃvattatīti **anupasamasamvattanaṃ**, tadeva **anupasamasamvattanikaṃ**, tasmīṃ. Samussitaṃ hutvā patiṭṭhāhetubhāvato **thūpaṃ**, patiṭṭhāti āha “**bhinnathūpeti bhinnapatiṭṭhe**”ti, **thūpoti** vā dhammassa niyyānabhāvo vedītabbo aññe dhamme abhībhuyya samussitaṭṭhena, so nigaṇṭhassa samaye. Kehici abhinnaṣammatopi bhīnno vīnaṭṭho eva sabbena sabbam abhāvato so **bhinnathūpo**, so eva niyyānabhāvo vaṭṭadukkhato muccitukāmānaṃ **paṭisaraṇaṃ**, tamettha natthīti **appaṭisaraṇo**, tasmīṃ bhinnathūpe appaṭisaraṇeti evamettha attho vedītabbo.

Ācariyappamāṇanti ācariyamuṭṭhi hutvā pamāṇabhūtaṃ. **Nānānihārenāti** nānākārena.

**165. Tatheva samudācarimṣu** bhūtapubbagatiyā. **Sāmākānanti** sāmākadhaññānaṃ.

“Yenassa upajjhāyo”ti vatvā yathāssa āyasmato cundassa dhammabhaṇḍāgāriko upajjhāyo ahosi, taṃ vitthārena dassetuṃ “**buddhakāle kirā**”tiādi vuttaṃ. Tattha **buddhakāleti** bhūtakathanametam, na visesanaṃ. Satthu parinibbānato puretameva hi dhammasenāpati parinibbuto.

### Dhammaratanapūjāvaṇṇanā

**Saddhivihārikam adāsīti** saddhivihārikam katvā adāsī.

**Kathāya mūlanti** bhagavato santikā labhitabbadhammakathāya kāraṇaṃ. **Samuṭṭhāpetīti** uṭṭhāpeti, dāliddiyapaṅkato uddharatīti adhippāyo. **Sandhamanti** sammadeva dhamanto. Ekekasmim pahāreyeva tayo tayo vāre katvā **divā navavāre rattiṃ navavāre**. **Upaṭṭhānameva gacchati** buddhupaṭṭhānavasena, pañhāpucchanādivasena pana antarantarāpi gacchateva, gacchanto ca **divasassa...pe... gacchati**. Nātuṃ icchitassa atthassa uddharaṇabhāvato pañhova **pañhuddhāro**, taṃ **gahetvāva gacchati** attano mahāpaññatāya, satthu ca dhammadesanāyaṃ akilāsubhāvato.

### Asammāsambuddhappaveditadhammavinayavaṇṇanā

**166. Ārocitepi** tasmiṃ atthe. **Sāmiko** hoti, tassa sāmikabhāvaṃ dassetuṃ “**sova tassā ādimajjhapariyosānaṃ jānātī**”ti āha. **Evanti** vacanasampañcchanaṃ. Cundattherena hi ānītaṃ kathāpābhatam bhagavā sampañcchanto “**eva**”nti āha. “**Eva**”nti durakkhāte dhammavinaye sāvakanāṃ dvedhikādibhāvena viharāṇakiriyāparāmasanañhetam.

**Yasmā ...pe... pākātam hoti** byatirekamukhena ca neyyassa atthassa vibhūtabhāvāpattito. Atha vā **yasmā...pe... pākātam hoti** dosesu ādīnavadassanena tappaṭipakkhesu guṇesu ānisaṃsassa vibhūtabhāvāpattito. **Vokkammāti** apasakketvā. Āmeditalopena cāyaṃ niddeṣo, vokkamma vokkammāti vuttaṃ hoti, tena tassa vokkamanassa antarantarāti ayamatto labbhatīti āha “**na nirantara**”ntiādi. **Dhammānudhammapaṭipattiādayoti** tena satthārā vuttamuttidhammassa anudhammaṃ appaṭipajjanādayo. **Ādi-saddena** pāliyaṃ āgatā asāmīcipaṭipadādayo ca saṅgayhanti. **Manussattampīti pi-saddena** “vicāraṇapaññāya asambhavo, dosesu anabhinivesitā, asandiṭṭhiparāmāsītā”ti evamādinam saṅgaho daṭṭhabbo. “Tathā eva”nti padehi yathākkamaṃ pakārassa kāmaṃ tirokkhatā, paccakkhatā vuccati, tathāpi yathā “tathā paṭipajjatū”ti padena paṭipajjanākāro niyamevā vihito, tathā “evaṃ paṭipajjatū”ti imināpīti idaṃ tassa atthadassanabhāvena vuttaṃ. **Samādapattā** micchāpaṭipadāya **apuññaṃ pasavati**.

**167. Nāyati** muttidhammo etenāti **ñāyo**, tena satthārā vutto dhammānudhammo, taṃ paṭipannoti **ñāyappaṭipanno**, so pana yasmā tassa muttidhammassa adhigame kāraṇasammato, tasmā vuttaṃ “**kāraṇappaṭipanno**”ti. **Nippādessatīti** sādheṣṣati, siddhiṃ gamissatīti vuttaṃ hoti. **Dukkhanibbattakanti** sampati, āyatiñca dukkhassa nibbattakam. **Vīriyaṃ karoti** micchāpaṭipannattā.

### Sammāsambuddhappaveditadhammavinayādivaṇṇanā

**168. Niyyātīti** vattati, saṃvattatīti vā attho.

**170.** Idha sāvakassa sammāpaṭipattiyā ekantikaapassayadassanattam satthu sammāsambuddhatā, dhammassa ca svākkhātātā kittitātī “**sammāpaṭipannassa kulaputtassa pasamsam dassetvā**”ti vuttaṃ. Evañhi imissā desanāya saṃkilesabhāgiyabhāvena uṭṭhitāya vodānabhāgiyabhāvena yathānusandhinā pavatti dīpitā hoti. **Abodhitatthāti** appaveditatthā, paramattham catutthasaccapaṭivedham apāpitātī attho. Pāliyaṃ “assā”ti padaṃ “sāvakā saddhamme”ti dvīhi padehi

yojetabbaṃ “assa sammāsambuddhassa sāvakā, assa saddhamme”ti. **Sabbasaṅgahapadehi katanti** sabbassa sāsanatthassa saṅgaṇhanapadehi ekajjhaṃ kataṃ. Tenāha “**sabbasaṅgāhikaṃ kataṃ na hotīti attho**”ti. Pubbenāparaṃ sambandhatthabhāvena saṅgahetabbatāya vā saṅgahāni padāni katāni etassāti **saṅgahapadakatam**, brahmacariyaṃ. Tappaṭikkhepena na ca saṅgahapadakatanti yojanā. Rāgādipaṭipakkhaharaṇaṃ, yathānusiṭṭhaṃ vā paṭipajjamānānaṃ vaṭṭadukkhato paṭiharaṇaṃ nibbānapāpanaṃ **paṭihāro**, so eva ā-kārassa i-kāraṃ katvā **paṭihiro**, paṭihiro eva **pāṭihiro**, saha pāṭihirenāti **sappāṭihiraṃ**, tathā suppeditatāya sappāṭihiraṃ katanti **sappāṭihirakatam**. Tādisaṃ pana vaṭṭato niyyāne niyuttaṃ, niyyānappayojanañca hotīti āha “**niyyānika**”nti. **Devalokatoti** devalokato paṭṭhāya rūpīdevanikāyato pabhuṭi. **Suppakāsitanti** suṭṭhu pakāsitaṃ. **Yāva devamanussehīti** vā yāva devamanussehi yattakā devā manussā ca, tāva te sabbe abhibyāpetvā **suppakāsitaṃ**. Anutāpāya hotīti **anutappo**, so pana anutāpaṃ karonto viya hotīti vuttaṃ “**anutāpakaro hoti**”ti.

172. **Thiroti** ṭhitadhammo kenaci asaṃhāriyo, asekkhā sīlakkhandhādayo therakārakā dhammā.

173. **Yogehi khemattāti** yogehi anupaddutattā. **Saddhammassāti** assa saddhammassa. **Assāti** ca assa satthuno.

174. Upāsakā brahmacārino nāma visesato anāgāmino. Sotāpannasakadāgāminopi tādisā tathā vuccantīti “**brahmacariyavāsaṃ vasamānā ariyasāvakā**” icceva vuttaṃ.

176. **Sabbakāraṇasampannanti** yattakehi kāraṇehi sampannaṃ nāma hoti, tehi sabbehi kāraṇehi sampannaṃ sampattaṃ upagataṃ paripuṇṇaṃ, samannāgataṃ vā. **Imameva dhammanti** imameva sāsanadhammaṃ.

Udakena padesaññunā attano paññāveyyattiyataṃ dassetuṃ aniyyānike atthe payuttaṃ pahlīkasadisam vacanaṃ, bhagavatā attano sabbaññūtāya niyyānike atthe yojetvā dassetuṃ “udako suda”ntiādi vuttanti taṃ dassetuṃ “**so kirā**”tiādimāha.

### Saṅgāyitabbadhammādivaṇṇanā

177. **Saṅgama samāgammāti** tasmimyeva ṭhāne labbhamānānaṃ gativasena saṅgama ṭhānantarato pakkosanena samāgatānaṃ vasena samāgama. Tenāha “**saṅgantvā samāgantvā**”ti. **Atthena atthanti** padantare āgataatthena saha tattha tattha āgatamatthaṃ. **Byañjanena byañjananti** etthāpi eseva nayo. **Samānentehīti** samānaṃ karontehi, opammaṃ vā ānentehi. **Saṅgāyitabbanti** sammadeva gāyitabbaṃ kathetabbaṃ, taṃ pana saṅgāyanaṃ vācanāmaggoti āha “**vācetaṃ**”nti.

178. **Tassa vā bhāsiteti** tassa bhikkhuno bhāsita atthe ceva byañjane ca. Atthamicchāgahaṇaropanāni yathā honti, taṃ dassetuṃ “**cattāro satipaṭṭhānā**”tiādi vuttaṃ. **Ārammaṇaṃ “satipaṭṭhāna”nti gaṇhāti**, na satiyeva “satipaṭṭhāna”nti. “**Satipaṭṭhānāni**”ti **byañjanaṃ ropeti** tasmim atthe, na “satipaṭṭhānā”ti. **Upapannatarānīti** yuttatarāni. **Allīnatarānīti** siliṭṭhatarāni. **Yā cevāti** līngavipallāsena vuttaṃ, vibhattilopena vā. Puna **yā cevāti** līngavipallāseneva niddeho. **Neva ussādetabboti** na ukkaṃsetabbo virajjhivā vuttattā. **Na apasādetabboti** na santajjetabbo vivādapariharaṇatthaṃ. **Dhāraṇatthanti** upadhāraṇatthaṃ sallakkhaṇatthaṃ.

181. **Atthena upetanti** aviparītena atthena upetaṃ taṃ “ayamettha attho”ti upecca paṭijānitvā ṭhitaṃ. Tathārūpo ca tassa bujjhitā nāma hotīti āha “**atthassa viññātāra**”nti. **Evametam bhikkhum pasamsathāti** vuttanayena dhammabhāṇakaṃ amuṃ bhikkhum “evaṃ lābhā no āvuso”tiādiākārena pasamsatha. Idānissa pasamsabhāvaṃ dassetuṃ “**eso hī**”tiādi vuttaṃ. **Esāti** pariyattidhammassa satthukiccakaraṇato, tattha cassa sammadeva avaṭṭhitabhāvato “**buddho nāma esā**”ti vutto. “Lābhā no”tiādinā cassa bhikkhūnaṃ piyagarubhāvaṃ vibhāvento sathā taṃ attano ṭhāne ṭhapesīti vutto.

### Paccayānuññātakāraṇādivaṇṇanā

**182. Tatopi uttaritaranti** yā pubbe sammāpaṭipannassa bhikkhuno pasamsanavasena “idha pana cunda satthā ca hoti sammāsambuddho”tiādinā (dī. ni. 3.167, 169) pavattitadesanāya upari “idha cunda satthā ca loke udapādī”tiādinā (dī. ni. 3.170, 171) desanā vaḍḍhitā. Tatopi uttaritarāṃ savisesaṃ desanaṃ vaḍḍhento “**paccayahetū**”tiādimāha. Tattha **paccayahetū**ti paccayasamvattanahetu. **Uppajjanakā āsavāti** paccayānaṃ pariyesanahetu ceva paribhogahetu ca uppajjanakā kāmāsavādayo. Tesāṃ diṭṭhadhammikānaṃ āsavānaṃ “idha, bhikkhave, ariyasāvako micchāājīvaṃ pahāya sammāājīvena jīvitāṃ kappeti”ti (saṃ. ni. 5.8) “idha, bhikkhave, bhikkhu paṭisaṅkhā yoniso cīvaraṃ paṭisevati”tiādinā (ma. ni. 1.23; a. ni. 6.58) ca sammāpaṭipattiṃ upadisanto bhagavā **paṭighātāya dhammaṃ deseti** nāma. “Yo tumhesu pāliya atthabyañjanāni micchā gaṇhāti, so neva ussādetabbo, na apasādetabbo, sādhukaṃ saññāpetabbo tasseva atthassa nisantiyā”ti evaṃ pariyaṭṭidhamme micchāpaṭipanne sammāpaṭipattiyaṃ bhikkhū niyojento bhagavā bhaṇḍanahetu uppajjanakānaṃ samparāyikānaṃ āsavānaṃ paṭighātāya dhammaṃ deseti nāma. **Yathā te na pavisantīti** te āsavā attano cittasantānaṃ yathā na otaranti. **Mūlaghātena paṭihanānāyāti** yathā mūlaghāto hoti, evaṃ mūlaghātavasena pajahanāya. **Tanti cīvaraṃ. Yathā cīvaraṃ** idamatthikatameva upādāya anuññātaṃ, **evaṃ piṇḍapātādayopi**.

### Sukhallikānuyogādivaṇṇanā

**183. Sukhitanti** sañjātasukhaṃ. **Pīṇitanti** dhātaṃ suhitaṃ. Tathābhūto pana yasmā thūlasarīro hoti, tasmā “**thūlaṃ karoti**”ti vuttaṃ.

**186. Naḥitasabhāvāti** anavaṭṭhitasabhāvā, evarūpāya kathāya anavaṭṭhānabhāvato sabhāvopi tesāṃ anavaṭṭhitoti adhippāyo. Tenāha “**jivhā no atthī**”tiādi. Kāmaṃ “pañcahi cakkhūhi”ti vuttaṃ, aggahitaggahaṇena pana cattāri cakkhūni veditabbāni. Sabbaññutaññāṇāhi samantacakkhūti. Tassa vā ñeyyadhammesu jānanavasena pavattiṃ upādāya “**jānatā**”ti vuttaṃ. Hatthāmalakaṃ viya paccakkhato dassanavasena pavattiṃ upādāya “**passatā**”ti vuttaṃ. **Nemaṃ** vuccati thambhādīhi anupaviṭṭhabhūmippedesoti āha “**gambhīrabhūmiṃ anupaviṭṭho**”ti. **Suṭṭhu nikhātoti** bhūmiṃ nikhānitvā sammadeva ṭhapito. **Tasminti** khīṇāsava. **Anajjhācāro acalo asampavedhī**, yasmā ajjhācāro setughāto khīṇāsavānaṃ. **Sotāpannādayoti** ettha **ādi**-saddena gahitesu anāgāmino tāva navasupi ṭhānesu khīṇāsavā viya abhabbā, sotāpannasakadāgāmino pana “tatiyapañcamatṭhānesu abhabbā”ti na vattabbā, itaresu sattasu ṭhānesu abhabbāva.

### Pañhabyākaraṇavaṇṇanā

**187. Gihibyañjanenāti** gihilingena. Khīṇāsavo pana gihibyañjanena arahattaṃ pattopi na tiṭṭhati vivekaṭṭhānassa abhāvāti adhippāyo. **Tassa vassenāti** bhummadevattabhāve ṭhatvā arahattappattassa vasena. **Ayaṃ pañhoti** “abhabbo so nava ṭhānāni ajjhācaritu”nti ayaṃ pañho **āgato** itarassa pabbajjāya, parinibbānena vā abhabbatāya avuttasiddhattā. Yadi evaṃ kathaṃ bhikkhugahaṇanti āha “**bhinnadosattā**”tiādi. **Aparicchedanti** apariyaṇtaṃ, tayidaṃ suvipulanti āha “**mahanta**”nti. Ñeyyassa hi vipulatāya ñāṇassa vipulatā veditabbā, etena “apariccheda”nti vuccamānampi ñeyyaṃ satthu ñāṇassa vasena paricchedamevāti dassitaṃ hoti. Vuttañhetuṃ “ñāṇapariyaṇtikaṃ neyya”nti (mahāni. 69, 156; cūḷani. 85; paṭi. ma. 3.5) **anāgate apaññāpananti** anāgate visaye ñāṇassa apaññāpanaṃ. “Paccakkhaṃ viya katvā”ti kasmā viya-saddaggahaṇaṃ kataṃ, nanu buddhānaṃ sabbampi ñāṇaṃ attano visayaṃ paccakkhameva katvā pavattati ekappamañabhāvato? Saccametaṃ, “**akkha**”nti pana cakkhādiindriyaṃ vuccati, taṃ akkhaṃ pati vattatīti cakkhādinissitaṃ viññānaṃ, tassa ca āramaṇaṃ “**paccakkha**”nti loke nirulhametanti taṃ nidassanaṃ katvā dassento “**paccakkhaṃ viya katvā**”ti avoca, na pana bhagavato ñāṇassa appaccakkhākārena pavattanato. Tathā hi vadanti –

“Āvibhūtaṃ pakāsaṇaṃ, anupaddutacetasaṃ;  
Atītānāgate ñāṇaṃ, paccakkhānaṃ vasissatī”ti.

**Aññattha vihita**kenāti aññasmiṃ visaye pavattitena. **Saṅgāhetabbanti** samaṃ katvā kathayitabbaṃ, kathaṇaṃ pana paññāpanaṃ nāma hotūti **paññāpetabbanti** attho vutto. **Tādisanti** satataṃ samitaṃ pavattakāṃ. **Ñāṇaṃ nāma natthīti** āvajjanaena vinā ñāṇupattiyā asambhavato. Ekākārena ca ñāṇe pavattamāne nānākārassa visayassa avabodho na siyā. Athāpi siyā, anirupitarūpeneva avabodho siyā, tena ca ñāṇaṃ ñeyyaṃ aññātasadisameva siyā. Na hi “idaṃ ta”nti vivekena anavabuddho attho ñāto nāma hoti, tasmā “carato ca tiṭṭhato cā”tiādi bālalāpanamattaṃ. Tenāha “**yathariva bālā abyattā, evaṃ maññantī**”ti.

Satiṃ anussaratīti **satānusāri**, satiyānuvattanavasena pavattañāṇaṃ. Tenāha “**pubbenivāsānussatisampayuttaka**”nti. **Ñāṇaṃ pesesīti** ñāṇaṃ pavattesi. Sabbatthakameva ñeyyāvaraṇassa suppahīnattā **appaṭihatāṃ anivāritaṃ ñāṇaṃ gacchati** pavattaticceva attho. “Bodhi vuccati catūsu maggesu ñāṇa”nti (cūḷani. 211) vacanato catumaggañāṇaṃ **bodhi**, tato tassa adhigatattā uppajjanakaṃ paccavekkhaṇañāṇaṃ “bodhiṃ ñāṇaṃ uppajjati”ti vuttaṃ. **Bodhiṃ** bodhimūle jātaṃ catumaggañāṇaṃ, tañca kho **anāgataṃ ārabba** uddissa tassa appavattiatthaṃ **tathāgatassa uppajjati** tassa uppannattā āyatiṃ punabbhavābhāvato. Kathaṃ tathāgato anāgatamaddhānaṃ ārabba atīrakaṃ ñāṇadassanaṃ paññāpetīti? Atītassa pana addhuno mahantatāya atīrakaṃ ñāṇadassanaṃ tattha paññāpetīti ko ettha virodho. Tiṭṭhiyā pana imamattaṃ yāthāvato ajānantā – “tayidaṃ kiṃ su, tayidaṃ kathaṃsū”ti attano aññāṇameva pākaṭaṃ karonti. Tasmā bhagavatā sasantaṭṭhāyānupannadhammapavattim sandhāya “aññavihitakaṃ ñāṇadassana”ntiādi vuttaṃ. Itaraṃ pana sandhāya vuccamāne sati tathārūpe payojane anāgatampi addhānaṃ ārabba atīrakameva ñāṇadassanaṃ paññāpeyya bhagavāti anattasamhitanti ayamettha atthoti āha “**na idhalokattaṃ vā paralokattaṃ vā nissita**”nti. Yaṃ pana sattānaṃ anattābhavattā anattasamhitāṃ, tattha setuḅhāto tathāgatassa. “**Bhāratayuddhasītāharaṇasādisa**”nti iminā tassā kathāya yebhuyyena abhūtatthataṃ dīpeti. **Sahetukanti** ñāpakena hetunā sahetukaṃ. So pana hetu yena nidassanaena sādhiyati, taṃ tassa kāraṇanti tena **sakāraṇaṃ katvā**. Yathā hi paṭiññātatthasādhanato hetu, evaṃ sādhaṃ nidassananti. **Yuttapattakāleyevāti** yuttānaṃ pattakāle eva. Ye hi veneyyā tassā kathāya yuttā anucchavikā, tesameva yojane sandhāya vā kathāya patto upakāravaho kālo, tadā eva **kathetīti** attho.

**188. “Tathā tatheva gadanato”**ti iminā “tathāgato”ti āmeditalopenāyaṃ niddesoti dasseti. **Tathā tathevāti** ca dhammaatthasabhāvānurūpaṃ, veneyyājjhāsāyānurūpañcāti adhippāyo. **Diṭṭhanti rūpāyatanaṃ** daṭṭhabbato, tena yaṃ diṭṭhaṃ, yaṃ dissati, yaṃ dakkhati, yaṃ sati samavāye passeyyaṃ, taṃ sabbaṃ “diṭṭhaṃ” tveva gahitaṃ kālavisesassa anāmaṭṭhabhāvato. “**Suta**”ntiādisupī eseva nayo. **Sutanti saddāyatanaṃ** sotabbato. **Mutanti** sanissayena ghānādiindriyena sayāṃ patvā pāpuṇitvā gahetabbaṃ. Tenāha “**patvā gahetabbato**”ti. **Viññānti** vijānitabbaṃ, taṃ pana diṭṭhādivinimuttaṃ viññeyyanti āha “**sukhadukkhādidhammāyatana**”nti. **Pattanti** yathā tathā pattaṃ, hatthagataṃ adhigatanti attho. Tenāha “**pariyesitvā vā apariyesitvā vā**”ti. **Pariyesitanti** pattiyāmatthaṃ pariyiṭṭhaṃ, taṃ pana pattaṃ vā siyā appattaṃ vā ubhayathāpi pariyesitamevāti āha “**pattaṃ vā appattaṃ vā**”ti. Padadvayenāpi dvippakāraṃpi pattaṃ, dvippakāraṃpi pariyesitaṃ, tena tena pakārena tathāgatena abhisambuddhanti dasseti. **Cittena anusañcaritanti** copanaṃ apāpetvā citteneva anusaṃcaritaṃ, parivittakanti attho. **Pītakanti ādīti ādi**-saddena lohitakaodātādi sabbaṃ rūpārammaṇavibhāgaṃ saṅgaṇhāti. **Sumanoti** rāgavasena, lobhavasena, saddhādivasena vā sumano. **Dummanoti** byāpādavittakkavasena, vihiṃsāvitakkavasena vā dummano. **Majjhantoti** aññāṇavasena vā ñāṇavasena vā majjhanto. Eseva nayo sabbattha. Tattha tattha **ādi**-saddena saṅkhasaddo paṇavasaddo, pattaḅandho pupphagandho, pattaraso phalaraso, upādinnaṃ anupādinnaṃ, majjhantavedanā kusalakammaṃ akusalakammanti evaṃ ādīnaṃ saṅgaho daṭṭhabbo.

**Appattanti** ñāṇena asampattaṃ, aviditanti attho. Tenāha “**ñāṇena asacchikata**”nti. **Tatheva gatattāti** tatheva ñātattā abhisambuddhattā. **Gata-saddena ekatthaṃ** buddhiatthanti attho. “Gatiatthā

hi dhātavo buddhiatthā bhavanti”ti akkharacintakā.

### Abyākatatṭhānādivaṇṇanā

189. “Asamataṃ kathetvā”ti vatvā samopi nāma koci natthi, kuto uttaritaroti dassetuṃ “**anuttarata**”nti vuttaṃ. Sā panāyaṃ asamatā, anuttaratā ca sabbaññutaṃ pūretvā ṭhitāti dassetuṃ “**sabbaññuta**”nti vuttaṃ. Sā sabbaññutā saddhammavaracakkavattibhāvena loke pākaṭā jātāti dassetuṃ “**dhammarājabhāvaṃ kathetvā**”ti vuttaṃ. Tathā sabbaññubhāvena ca satthā imesu diṭṭhigatavipallāsesu evaṃ paṭipajjati dassento “**idāni**”tiādīmāha. Tattha **sīhanāda**nti abhītanādaṃ seṭṭhanādaṃ. Seṭṭhanādo hesa, yadidaṃ ṭhapanīyassa pañhassa ṭhapanīyabhāvadassanaṃ. Ṭhapanīyatā cassa pāliārulhā eva “na heta”ntiādīnā. Yathā upacitakammakilesena itthattaṃ āgantabbaṃ, tathā naṃ āgatoti **tathāgato**, satto. Tathā hi so rūpādīsu satto visattoti katvā “**satto**”ti ca vuccati. **Itthattanti** ca paṭiladdhattā tathā paccakkabhūto attabhāvoti veditabbo.

“**Atthasamhitā na hoti**”ti iminā ubhayattha vidhuratādassanena niratthakavippalāpataṃ tassa vādassa vibhāveti, ubhayalokatthavidhurampi samānaṃ “kiṃ nu kho vivaṭṭanissita”nti koci āsaṅkeyyāti tadāsaṅkānivattanattaṃ “**na ca dhammasamhitā**”nti vuttaṃ. Tenāha “**navalokuttaradhammanissitaṃ na hoti**”ti. Yadipi taṃ na vivaṭṭogataṃ hoti, vivaṭṭassa pana adhiṭṭhānabhūtaṃ nu khoti koci āsaṅkeyyāti tadāsaṅkānivattanattaṃ “**na ādibrahmacariyaka**”ntiādi vuttaṃ.

190. Kāmaṃ taṇhāpi dukkhasabhāvattā “**dukkha**”nti byākātabbā, pabhavabhāvena pana sā tato visuṃ kātabbāti “**taṇhaṃ ṭhapetvā**”ti vuttaṃ. Tenāha “**tasseva dukkhassa pabhāvikā**”tiādi. Nanu ca avijjādayopi dukkhassa samudayoti? Saccāṃ samudayo, tassā pana kamma vicittabhāva hetu, dukkhuppādane visapaccayabhāvato ca sātīsayo samudayaṭṭhoti sā eva suttasu tathā vuttā. Tenāha “**taṇhā dukkhasamudayoti byākata**”nti. **Ubhinnaṃ appavattīti** dukkhasamudayānaṃ appavattinimittaṃ. “**Dukkhaparijānana**”tiādi maggakiccadassanaṃ, tena maggassa bhāvanatthopi atthato dassitovāti daṭṭhabbaṃ. Na hi bhāvanābhisamayena vinā pariññābhisamayādayo sambhavantīti. Saccavavatthāpanaṃ appamādapāṭipattibhāvato asammohakalyāṇakittisaddādinimittatāya yathā sātīsayā idhalokatthāvahaṃ, evaṃ yāva ñāṇassa tikkhavisadabhāvappattiyā bhāvena navalokuttaradhammasampāpakaṃ na hoti, tāva tattha tattha sampattibhave abbhudayasampatti anugata meva siyāti vuttaṃ “**etaṃ idhalokaparalokatthanissita**”nti. **Navalokuttaradhammanissitanti** navavidhampi lokuttaradhammaṃ nissāya pavattaṃ tadadhigamūpāyabhāvato. Yasmā saccasambodhaṃ uddissa sāsānabrahmacariyaṃ vussati, na aññadattaṃ, tasmā etaṃ saccavavatthāpanaṃ “**ādīpadhāna**”nti vuttaṃ paṭhamataraṃ citte ādātabbato.

### Pubbantasahagatadiṭṭhinissayaṇṇanā

191. **Taṃ mayā byākatamevāti** taṃ mayā tathā byākatameva, byākātabbaṃ nāma mayā abyākataṃ natthīti byākaraṇāvekaḷlena attano dhammasudhammatāya buddhasubuddhataṃ vibhāveti. Tenāha “**sīhanādaṃ nadanta**”ti. Purimuppannā diṭṭhiyo aparāparuppannānaṃ diṭṭhīnaṃ avassayā hontīti “**diṭṭhiyova diṭṭhinissayā**”ti vuttaṃ. **Diṭṭhigatikāti** diṭṭhigatiyo, diṭṭhippavattiyoti attho. **Idameva dassanaṃ saccanti** “sassato attā ca loko cā”ti idameva dassanaṃ saccāṃ amoghaṃ aviparītaṃ. **Aññesaṃ vacanaṃ moghanti** “asassato attā ca loko cā”ti evamādikāṃ aññesaṃ samaṇabrāhmaṇānaṃ vacanaṃ moghaṃ tucchaṃ, micchāti attho. Na sayāṃ kātabboti **asayaṃkāroti** āha “**asayaṃkato**”ti, yādicchikattāti adhippāyo.

192. **Atthi khoti ettha kho-saddo** pucchāyaṃ, atthi nūti ayamettha atthoti āha “**atthi kho idaṃ āvuso vuccati**”tiādi. **Āvuso yaṃ tumhehi** “**sassato attā ca loko cā**”ti **vuccati**, idamatthi kho idaṃ vācāmattaṃ, no natthi, tasmā vācāvattumattato tassa **yaṃ kho te evamāhaṃsu** “**idameva saccāṃ moghaṃ añña**”nti, **taṃ tesāṃ nānujānāmīti** evamettha attho ca yojanā ca veditabbā. Yaṃ panettha



vattabbaṃ, taṃ **brahmajālaṭīkāyaṃ** (dī. ni. 1.30) vuttameva. **Diṭṭhipaññattiyā** diṭṭhiyā paññāpane “evaṃ esā diṭṭhi uppannā”ti tassā diṭṭhiyā samudayato, atthaṅgamato, assādato, ādīnavato, nissaraṇato ca yāthāvato paññāpane. Aviparītavuttiyā **samena nāṇena samaṃ** kañci neva samanupassāmi. **Adhipaññattī** abhiññeyyadhammapaññāpanā. Yaṃ ajānantā bāhirakā diṭṭhipaññattiyeva allīnāti tañca paññattito ajānantā thāmasā parāmāsā abhinivissa voharanti. Ettha ca yāyaṃ “diṭṭhipaññatti nāmā”ti vuttā diṭṭhiyā diṭṭhigatikehi evaṃ gahitatāya vibhāvanā, tattha ca bhagavato uttaritaro nāma koci natthi, svāyamattho **brahmajāle** (dī. ni. aṭṭha. 1.30) vibhāvito eva. “Adhipaññatti”ti vuttā pana vibhāviyamānā lokassa nibbidāhetubhāvena bahulīkāraṭi tassā vasena bhagavā anuttarabhāvaṃ pavedento ‘neva attanā samasamaṃ samanupassāmi’ti sīhanādaṃ nadī’ti keci. Aṭṭhakathāyaṃ (dī. ni. aṭṭha. 3.192) pana “yañca vuttaṃ ‘paññattiyā’ti yañca ‘adhipaññattī’ti, ubhayametam atthato eka”nti “idha pana paññattiyāti etthāpi paññatti ceva adhipaññatti ca adhippetā, adhipaññattīti etthāpi”ti ca vuttā, ubhayassapi vasenettha bhagavā sīhanādaṃ nadīti viññāyati. **Ubhayaṃ petam atthato ekanti** ca paññattibhāvasāmaññaṃ sandhāya vuttaṃ, na bhedābhāvato. Tenāha “**bhedato hī**”tiādi. **Khandhapaññattī** khandhānaṃ “khandhā”ti paññāpanā dassanā pakāsanā ṭhapanā nikkhipanā. “Ācikkhati dasseti paññāpeti paṭṭhāpeti”ti (saṃ. ni. 2.20, 97) āgataṭṭhāne hi paññāpanā dassanā pakāsanā **paññatti** nāma, “supaññattaṃ mañcapīṭha”nti (pārā. 269) āgataṭṭhāne ṭhapanā nikkhipanā **paññatti** nāma, idha ubhayampi yujjati.

### Diṭṭhinissayappahānavaṇṇanā

**196. Pajahanatthanti** accantāya paṭinissajjanatthaṃ. Yasmā tena pajahanena sabbe diṭṭhinissayā sammadeva atikkantā honti vītikkantā, tasmā “**samatikkamāyāti tasseva vevacana**”nti avoca. Na kevalaṃ satipaṭṭhānā kathitamattā, atha kho veneyyasantāne patiṭṭhāpitāti dassetuṃ “desitā”ti vatvā “paññattā”ti vuttanti āha “**desitāti kathitā. Paññattāti ṭhāpitā**”ti. Idāni satipaṭṭhānadesanāya diṭṭhinissayānaṃ ekantikaṃ pahānāvahabhāvaṃ dassetuṃ “**satipaṭṭhānabhāvanāya hī**”tiādi vuttaṃ. Tattha satipaṭṭhānabhāvanāyāti iminā tesam bhāvanāya eva nesaṃ pahānaṃ, desanā pana tadupanissayabhāvato tathā vuttāti dasseti. Sesam sabbaṃ suviññeyyamevāti.

Pāsādikasuttavaṇṇanāya līnatthappakāsanā.

## 7. Lakkhaṇasuttavaṇṇanā

### Dvattiṃsamahāpurisalakkhaṇavaṇṇanā

**199.** Abhinīhārādiguṇamahattena mahanto purisoti **mahāpuriso**, so lakkhīyati etehīti **mahāpurisalakkhaṇāni**. Taṃ mahāpurisaṃ byañjayanti pakāsentīti **mahāpurisabyañjanāni**. Mahāpuriso nimīyati anumīyati etehīti **mahāpurisanimittāni**. Tenāha “**ayaṃ...pe... kāraṇāni**”ti.

**200. Dhārentī**ti lakkhaṇapāṭhaṃ dhārenti, tena lakkhaṇāni te sarūpato jānanti, na pana samuṭṭhānatoti dasseti. Tenāha “**no ca kho**”tiādi, tena anaññasādhāraṇametam, yadidaṃ mahāpurisalakkhaṇānaṃ kāraṇavibhāvananti dasseti. **Kasmā āhāti** yathāvuttassa suttassa samuṭṭhānakāraṇaṃ pucchati, ācariyo “aṭṭhuppattiyā anurūpattā”ti vatvā tamevassa aṭṭhuppattim vitthārato dassetuṃ “**sā panā**”tiādimāha. **Sabbapāliphuloti** sabbaso samantato vikasitapuppho. Vikasanameva hi pupphassa nipphatti. **Pāricchattako viyāti** anussavaladdhamattaṃ gahetvā vadanti. **Uppajjatī**ti labbhati, nibbattatīti attho.

**Yena kammenāti** yena kusalakammunā. **Yaṃ nibbattanti** yaṃ yaṃ lakkhaṇaṃ nibbattaṃ. **Dassanatthanti** tassa tassa kusalakammassa sarūpato, kiccato, pavattiākāravisesato, paccayato, phalavisesato ca dassanatthaṃ, eteneva paṭipāṭiyā uddiṭṭhānaṃ lakkhaṇānaṃ asamuddesakāraṇavibhāvanāya kāraṇaṃ dīpitaṃ hoti samānakāraṇānaṃ lakkhaṇānaṃ ekajjhaṃ

kāraṇadassanavasena pāvattatā. **Evamāhāti** “bāhirakāpi isayo dhārentī” tiādinā iminā iminā pakārena āha.

### Suppatiṭṭhitapādatālakkaṇavaṇṇanā

**201.** “**Purimaṃ jātinti** purimāyaṃ jātiyaṃ, bhummatthe etaṃ upayogavacana” nti vadanti. “Pubbe nivutthakkhandhasantāne ṭhito” ti vacanato accantasamyoge vā upayogavacanaṃ. Yattha yattha hi jātiyaṃ mahāsatto puññakammaṃ kātuṃ ārabhati, ārabhato paṭṭhāya accantameva tattha puññakammappasuto hoti. Tenāha “dalhasamādāno” tiādi. Sesapadadvayepi eseva nayo. **Nivutthakkhandhā** “**jāti**” ti **vuttā** khandhavinimuttāya jātiyā abhāvato, nibbatilakkaṇassa ca vikārasa idha anupayujjanato. **Jātavasenāti** jāyanavasena. “**Tathā**” ti iminā “pubbe nivutthakkhandhā” ti imaṃ padaṃ upasaṃharati. **Bhavanavasenāti** paccayato nibbattanavasena. **Nivutthavasenāti** nivusitatāvasena. **Ālayaṭṭhenāti** āvasitabhāvena. Nivāsatto hi nicketattho.

**Tatthāti** devalokādimhi. **Ādi**-saddena ekaccaṃ tiracchānayoṇiṃ saṅgaṇhāti. **Na sukaranti** devagatiyā ekantasukhatāya, duggatiyā ekantadukkhatāya, dukkhabahulatāya ca puññakiriyāya okāso na sulabharūpo paccayasamavāyassa dullabhabhāvato, uppajjamānā ca sā ulārā, vipulā ca na hotīti gativasenāpi khettavisesatā icchitabbā “tiracchānagate dānaṃ datvā sataguṇā dakkhiṇā pāṭikaṅkhitabbā, puthujjanadussīle dānaṃ datvā sahasaguṇā dakkhiṇā pāṭikaṅkhitabbā” ti (ma. ni. 3.379) vacanato. Manussagatiyā pana sukhabahulatāya puññakiriyāya okāso sulabharūpo paccayasamavāyassa ca yebhuyyena sulabhabhāvato. Yañca tattha dukkhaṃ uppajjati, tampi visesato puññakiriyāya upanissayo hoti, dukkhūpanisā saddhāti. Yathā hi ayoghanena satthake nipphādiyamāne tassa ekantato aggimhi tāpanaṃ, udakena vā temaṃ chedanakiriyāsamattatāya na visesapaccayo, tāpetvā pana samānayo gato udakate manaṃ tassā visesapaccayo, evameva sattasantānassa ekantadukkhasamaṅgitā dukkhabahulatā ekantasukhasamaṅgitā sukhabahulatā ca puññakiriyāsamattatāya na visesapaccayo, sati pana samānayo gato dukkhasantāpane, sukhumabrūhane ca laddhūpanissayā puññakiriyā samattatāya sambhavati, tathā sati uppajjamānā puññakiriyā mahājutikā mahāvippahārā paṭipakkhacchedanasamattā hoti. Tasmā manussabhāvo puññakiriyāya visesapaccayo. Tena vuttaṃ “**tattha na sukaraṃ, manussabhūtasaveva sukara**” nti.

Atha “manussabhūtasā” ti ettha ko vacanattho? “Manassa ussannatāya **manussāti**, sūrabhāvasatimantatābrahmacariyayogyatādiguṇavasena upacitamanakā ukkaṭṭhaguṇacittāti attho. Ke pana te? Jambudīpavāsino sattavisesā. Tenāha bhagavā –

‘Tīhi, bhikkhave, ṭhānehi jambudīpakā manussā uttarakuruke ca manusse adhiggaṇhanti deve ca tāvatimse. Katamehi tīhi? Sūrā satimanto idha brahmacariyavāso’ ti (a. ni. 9.21; kathā. 271).

Tathā hi buddhā bhagavanto, paccekabuddhā, aggasāvakā, mahāsāvakā, cakkavattino, aññe ca mahānubhāvā sattā tattheva uppajjanti. Te hi samānarūpādītāya pana saddhiṃ parittadīpavāsīhi itaramahādīpavāsīnopi manussā tveva paññāyimsū” ti keci. Apare pana bhaṇanti “lobhādīhi, alobhādīhi ca sahitassa manassa ussannatāya **manussā**. Ye hi sattā manussajātikā, tesu visesato lobhādayo, alobhādayo ca ussannā, te lobhādiussannatāya apāyamaggaṃ, alobhādiussannatāya sugatimaggaṃ, nibbānagāmimaggaṃca paripūrenti, tasmā lobhādīhi, alobhādīhi ca sahitassa manassa ussannatāya parittadīpavāsīhi saddhiṃ catudīpavāsino sattavisesā manussāti vuccantī” ti. Lokiyā pana “manuno apaccabhāvena **manussā**” ti vadanti. **Manu** nāma paṭhamakappiko lokamariyādāya ādibhūto sattānaṃ hitāhitavidhāyako kattabbā kattaṭṭasū niyojanatāvasena pituṭṭhāniyo, yo sāsane “mahāsammato” ti vuccati amhākaṃ mahābodhisatto, paccakkhato, paramparā ca tassa ovādānusāsaniyaṃ ṭhitā sattā puttasadisatāya “manussā, mānusā” ti ca vuccanti. Tato eva hi te “mānavā, manujā” ti ca vohariyanti. **Manussabhūtasāti** manussesu bhūtasā jātassa, manussabhāvaṃ vā pattassāti attho. Ayañca nayo lokiyamahājanassa vasena vutto. Mahābodhisattānaṃ pana santānassa mahābhinihārato paṭṭhāya

kusaladhammapaṭipattiyam sammadeva abhisaṅkhatattā tesam sugatiyam, attano uppajjanaduggatiyañca nibbattānaṃ kusalakammaṃ garutaramevāti dassetum “**akāraṇaṃ vā eta**”ntiādi vuttaṃ.

**Evarūpe attabhāveti** hatthiādiattabhāve. **Ṭhitena katakammaṃ na sakkā sukkena dīpetum** loke appaññatarūpattā. **Sukkena dīpetum** “asukasmim̐ dese asukasmim̐ nagare asuko nāma rājā, brāhmaṇo hutvā imaṃ kusalakammaṃ akāsī”ti evaṃ suviññāpayabhāvato. **Thiraggahaṇoti** asithilaggāhī thāmappattaggahaṇo. **Niccaggahaṇoti** acañcalaggāhī tatha kenacipi asaṃhāriyo. **Paṭikuṭatīti** saṃkuṭati, jigucchanavasena vivatṭati vā. **Pasāriyatīti** vitthataṃ hoti vepullaṃ pāpuṇāti.

**Taveso mahāsamuddasadisoti** eso udakogho teva mahāsamuddasadisoti.

Dīyati etenāti **dānaṃ**, pariccāgacetanā. **Diyyanavasena**ti deyyadhammassa pariyattaṃ katvā pariccājanavasena **dānaṃ**. **Samvibhāgakarāṇavasena**ti tasseva attanā saddhim̐ parassa samvibhājanavasena **samvibhāgo**, tathāpavattā cetanā. **Silasamādāneti** silassa sammadeva ādāne, gahaṇe pavattaneti attho. Taṃ pavattikālena dassento “**pūraṇakāle**”ti āha. Mātu hito matteyyo, yassa pana dhammassa vasena so “matteyyo”ti vuccati, so **matteyyatāti** āha “**mātu kātabbavatte**”ti. Eseva nayo “**petteyyatāyā**”tiādisu. **Aññataraññataresūti** aññamaññavisitṭhesu aññesu, te pana kusalahāvena vuttā kusalāti āha “**evārūpesū**”ti. **Adhikusalesūti** abhivisitṭhesu kusalesu, sā pana abhivisitṭhatā upādāyupādāya hoti. Yaṃ panettha ukkaṃsagataṃ adhikusalaṃ, tadukkaṃsanayena idhāhippetanti taṃ dassetum “**atthi kusalā, atthi adhikusalā**”tiādi vuttaṃ. Nanu paññāpāramisaṅgahaññasambhārabhūtā kusalā dhammā nippariyāyena sabbaññūtaññāpaṭilābhapaccayā kusalā nāma, ime pana mahāpurisalakkhaṇanibbattakā puññasambhārabhūtā kasmā tathā vuttāti? Sabbesampi mahābodhisattasantānagātānaṃ pāramidhammānaṃ sabbaññūtaññāpaṭilābhapaccayabhāvato. Mahābhinihāro paṭṭhāya hi mahāpuriso yaṃ kiñci puññaṃ karoti, sabbaṃ taṃ sammāsambodhisamadhiḡamāyeva pariṇāmeti. Tathā hi sasambhārābyāso, dīghakālābyāso, nirantarābyāso, sakkaccābyāsoti cattāro abyāsā caturadhiṭṭhānaparipūritasambandhā anupubbena mahābodhiṭṭhānā sampajjanti.

**Sakimpīti pi**-saddena anekavārampi kataṃ vijātiyena antaritaṃ saṅgaṇhāti. **Abhiṅhakarāṇenāti** bahulīkārena. **Upacitanti** uparūpari vaḍḍhitaṃ. **Piṇḍikatanti** piṇḍaso kataṃ. **Rāsikatanti** rāsibhāvena kataṃ. Anekakkhattuñhi pavattiyamānaṃ kusalakammaṃ santāne tathāladhaparibhāvanam̐ piṇḍibhūtaṃ viya, rāsibhūtaṃ viya ca hoti. Vipākaṃ pati saṃhaccakāribhāvattā **cakkavālaṃ atisambādham̐ bhavaggaṃ atinīcaṃ**, sace pane taṃ rūpaṃ siyāti adhippāyo. **Vipulattāti** mahantattā. Yasmā pana taṃ kammaṃ mettākaraṇāsatisampajaññāhi pariggahitatāya durasamussāritaṃ pamāṇakaraṇadhammanti pamāṇarahitatāya “appamāṇa”nti vattabataṃ arahati, tasmā “**appamāṇattā**”ti vuttaṃ.

**Adhibhavatīti** phalassa ulārabhāvena abhibhuyya tiṭṭhati. Atthato pañitapañitānaṃ bhogānaṃ paṭilābho evāti āha “**atirekaṃ labhati**”ti. **Adhigacchatīti** vindati, nibbattamānova tena samannāgato hotīti attho. Ekadesena aphasitvā sabbappadesehi phusanato sabbappadesehi phusantiyo etesaṃ pādatalānaṃ santīti “**sabbāvantehi pādatalēhi**”ti vuttaṃ. Yathā nikkhipane sabbe pādatalappadesā saṃhaccakārino aninnatāya samabhāvato, evaṃ uddharaṇepīti vuttaṃ “**samaṃ phusati, samaṃ uddharatī**”ti. Idāni imassa mahāpurisalakkhaṇassa samadhiḡamena laddhabbanissandaphalavibhāvanamukhena ānubhāvaṃ vibhāvetum “**sacepi hī**”tiādi vuttaṃ. Tattha **narakanti** āvātaṃ. **Anto pavasati** samabhāvāpattiyā. “**Cakkalakkhaṇena patiṭṭhātabbattāhāna**”nti idaṃ yaṃ bhūmippadesaṃ pādatalaṃ phusati, tattha cakkalakkhaṇampi phusanavasena patiṭṭhātīti katvā vuttaṃ. Tassa pana tathā patiṭṭhānaṃ suppatiṭṭhitapādātāya evāti suppatiṭṭhitapādātāya ānubhāvakittane “lakkhāṇantarānayanam̐ kimatthiya”nti na cintetabbaṃ. **Silatejenāti** silappabhāvena. **Puññatejenāti** kusalappabhāvena. **Dhammatejenāti** ñāṇappabhāvena. Tīhipi padehi bhagavato buddhabhūtassa dhammā gahitā, “**dasannaṃ pāramīna**”nti iminā buddhakaradhammā gahitā.

**202. Mahāsamuddova sīmā** sabbabhūmissarabhāvato. “**Akhilamanimittamakaṅṭhaka**”nti tīhipi padehi theyyābhāvova vuttoti āha “**niccora**”ntiādi. **Kharasamphassaṭṭhenā**ti ghaṭṭanena dukkhasamphassabhāvena **khilā**ti. **Upaddavapaccayaṭṭhenā**ti anattahetutāya **nimittā**ti. “**Akhila**”ntiādinā ekacārīhi corābhāvo vutto, “**nirabbuda**”nti iminā pana gaṇabandhavasena vicaraṇacorābhāvo vuttoti dassetuṃ “**gumbaṃ gumbaṃ hutvā**”tiādi vuttaṃ. **Avikkhambhanīyoti** na vibandhanīyo kenaci appaṭibāhanīyo ṭhānato anikkaḍḍhanīyo. Paṭipakkhaṃ anīṭṭhaṃ atthetīti **paccatthiko**, etena pākaṭabhāvena virodhaṃ akaronto veripuggalo vutto. Paṭiviruddho amitto **paccāmitto**, etena pākaṭabhāvena virodhaṃ karonto veripuggalo vutto. **Vikkhambhetuṃ nāsakkhiṃsu**, aññadattu sayameva vighātabyasanaṃ pāpuṇiṃsu ceva sāvakattañca pavedesuṃ.

“**Kamma**”ntiādisu **kammaṃ nāma** buddhabhāvaṃ uddissa katūpacito lakkhaṇasaṃvattaniyo puññasambhāro. Tenāha “**satasahassakappādhikānī**”tiādi. **Kammasarikkhakaṃ nāma** tasseva puññasambhārasa karaṇakāle kenaci akampanīyassa dalhāvattitabhāvassa anucchaviko suppatiṭṭhitapādatāsankhātassa lakkhaṇassa parehi avikkhambhanīyatāya nāpakanimittabhāvo, svāyaṃ nimittabhāvo tasseva lakkhaṇassāti aṭṭhakathāyaṃ “**kammasarikkhakaṃ nāma...pe... mahāpurisalakkhaṇa**”nti vuttaṃ. Ṭhānagamanesu pādānaṃ dalhāvattitabhāvo **lakkhaṇaṃ nāma**. Pādānaṃ bhūmiyaṃ samaṃ nikkhipanaṃ, pādalanānaṃ sabbabhāgehi phusanaṃ, samameva uddharaṇaṃ, tasmā suṭṭhu samaṃ sabbabhāgehi patiṭṭhitā pādā etassāti **suppatiṭṭhitapādo**, tassa bhāvo **suppatiṭṭhitapādatā**ti vuccati lakkhaṇaṃ. Suṭṭhu samaṃ bhūmiyā phusaneneva hi nesamaṃ tattha dalhāvattitabhāvo siddho, yaṃ “kammasarikkhaka”nti vuttaṃ. **Lakkhaṇānisamsoti** lakkhaṇapaṭilābhassa udrayo, lakkhaṇasaṃvattaniyassa kammaṃ ānisamsaphalanti attho. Nissandaphalaṃ pana heṭṭhā bhāvitameva.

**203. Kammādibhedeti** kammakammasarikkhakalakkhaṇa lakkhaṇānisamsavisaññite vibhāge. **Gāthābandhaṃ sandhāya vuttaṃ**, attho pana apubbaṃ natthīti adhippāyo. **Porāṇakattherā**ti aṭṭhakathācariyā. **Vaṇṇanāgāthā**ti thomanāgāthā vuttamevatthaṃ gahetvā thomanāvasena pavattattā. **Aparabhāge therā** nāma pālīṃ, aṭṭhakathañca potthakāropanavasena samāgatā mahātherā, ye sāṭṭhakathaṃ piṭakattayaṃ potthakāruḷhaṃ katvā saddhammaṃ addhaniyaciraṭṭhitikaṃ akamsu. **Ekapadikoti** “**dalhasamādāno ahoṣī**”tiādi pāṭhe ekekapadagāhī. **Atthuddhāroti** tadatthassa sukhaggahaṇatthaṃ gāthābandhavasena uddharaṇato atthuddhārabhūto, tayidaṃ pālīyaṃ āgatapadāni gahetvā gāthābandhavasena tadatthavicāraṇabhāvadassanaṃ, na pana dhammabhaṇḍāgārikena ṭhapitabhāvapaṭikkhipananti daṭṭhabbaṃ.

Kusaladhammānaṃ vacīsaccassa bahukāraṃ, tappaṭipakkhassa ca musāvādassa mahāsāvajjataṃ dassetuṃ anantareva kusalakammāpathadhamme vadantopi tato vacīsaccaṃ nīharitvā katheti **sacceti** vā sannidhāneva “dhamme”ti vuccamānā kusalakammāpathadhammā eva yuttāti vuttaṃ “**dhammeti dasakusalakammāpathadhamme**”ti. Gobalībaddaṇāyena vā ettha attho veditabbo. **Indriyadamaneti** indriyasaṃvare. Kusalakammāpathaggaṇeṇassa vārittasiḷameva gahitanti itarampi saṅgahetvā dassetuṃ saṃyamasseva gahaṇaṃ katanti “**saṃyameṭi sīlasaṃyame**”ti vuttaṃ. **Suci** vuccati puggalo yassa dhammassa vasena, taṃ **soceyyaṃ**, kāyasucaritādi. Etasseva hi vibhāgassa dassanatthaṃ vuttampi cetamaṃ puna vuttaṃ, manoceyyaggahaṇeṇa vā jhānādiuttarimanussadhammānampi saṅgaṇhanatthaṃ **soceyyaggahaṇaṃ**. **Ālayabhūta**nti samathavipassanānaṃ adhiṭṭhānabhūtaṃ. **Uposathakammanti** uposathadivase samādiyitvā samācaritabbaṃ puññakammaṃ **uposatho** sahacaraṇaṇāyena. “**Avihimsāyāti** sattānaṃ aviheṭṭhanāyā”ti vadanti, taṃ pana sīlaggaṇeṇeva gahitaṃ. Tasmā **avihimsāyāti** karuṇāyāti attho. **Avihimsā**ggahaṇeṇeva cettha appamaññāsāmaññeṇa cattāropi brahmavīhārā upacāravattā gahitā lakkhaṇahāraṇayena. **Sakalanti** anavasesaṃ paripuṇṇaṃ. Evamettha kāmāvacarattabhāvapariyāpanattā lakkhaṇassa taṃsaṃvattanikakāmāvacarakusaladhammā eva pāramitāsaṅgahapūññasambhārabhūtakāyasucaritādīhi dvādasadhā vibhattā eva. Gāthāyaṃ “sacce”tiādinā dasadhā saṅgayha dassitā. Esa nayo sesalakkhaṇepi.

**Aṃnubhī**ti gāthāsukhatthaṃ akāraṃ sānūāsikaṃ katvā vuttaṃ. Byañjanāni lakkhaṇāni

ācikkhantīti **veyañjanikā**. **Vikkhambhetabbanti** paṭibāhitabbaṃ **tassāti** mahāpurisassa, **tassa** vā mahāpurisalakkhaṇassa. Lakkhaṇasīsenā ceththa taṃsaṃvattanikapuññasambhāro vuccati.

### Pādatalacakkalakkhaṇavaṇṇanā

**204. Bhayaṃ** nāma bhīti, taṃ pana ubbijjanākārena, uttasanākārena ca pavattiyā duvidhanti āha “**ubbegabhayañceva uttāsabhayañcā**”ti. Tadubhayampi bhayaṃ vibhāgena dassetuṃ “**tatthā**”tiādi vuttaṃ. **Apanūditāti** yathā corādayo viluppanabandhanādīni parassa na karonti, katañca paccāharaṇādīnā paṭipākatikaṃ hoti, evaṃ yathā ca caṇḍahatthiādayo dūrato parivajjitā honti, aparivajjite tassa yathā thāne thitehi abhibhavo na hoti, evaṃ apanūditā. **Ativāhetīti** atikkāmeti. **Taṃ ḥhānanti** taṃ sāsākaṭṭhānaṃ. **Asakkontānanti** upayogathe sāmivacanaṃ, asakkonteti atho. **Asakkontānanti** vā anādare sāmivacanaṃ. Saha parivārenāti **saparivāraṃ**. Tattha kiñci deyyadhammaṃ dento yadā tassa parivārabhāvena aññampi deyyadhammaṃ deti, evaṃ tassa taṃ dānamayaṃ puññaṃ saparivāraṃ nāma hoti.

Tamatthaṃ vitthārena dassetuṃ “**tattha anna**”ntiādi vuttaṃ. Tattha yathā deyyadhammaṃ tassa annadānassa parivāro, evaṃ tassa sakkaccakaraṇaṃ pīti dassento “**atha kho**”tiādimāha. Yāgubhattaṃ datvāva adāsīti yojanā. Esa nayo ito paratopi. **Suttaṃ vaṭṭeti** cīvarassa sibbanasuttakaṃ duvaṭṭatitvaṭṭādivasena vaṭṭitaṃ akāsi. **Rajananti** alliādirajanavatthūṃ. **Paṇḍupalāsanti** rajanupagameva paṇḍuvaṇṇaṃ palāsaṃ.

**Heṭṭhimānīti** annādīni **cattāri**. **Nisadaggahaṇeneva** nisadapotopi gahito. **Cīnapiṭṭhaṃ** sindhurakacuṇṇaṃ. **Kojavanti** uddalomekantalomīādikojavattharaṇa. **Suvibhattaantarānīti** suṭṭhu vibhattaantarāni, etena cakkāvayaṃvaṭṭhānānaṃ suparicchinnataṃ dasseti.

Laddhābhisekā khattiyā attano vijite visavitāya brāhmaṇādike catūhi saṅgahavatthūhi rañjetuṃ sakkonti, na itarāti āha “**rājānoti abhisittā**”ti. Rājato yathā laddhagāmanigamādiṃ issaravatāya bhūñjantīti **bhojakā**, tādiso bhogo etesaṃ atthi, tattha vā niyuttāti **bhogikā**, te eva “**bhogiyā**”ti vuttā. **Saparivāraṃ dānanti** vuttanayena saparivāradānaṃ. **Jānātūti** “sadevako loko jānātū”ti iminā viya adhippāyena **nibbattaṃ cakkalakkhaṇanti** lakkhaṇasseva kammasarikkhatā dassitā. Evaṃ sati tikameva siyā, na catukkaṃ, tasmā cakkalakkhaṇassa mahāparivāratāya ṇāpakanimittabhāvo kammasarikkhakaṃ nāma. Tenevāha “saparivāraṃ...pe... jānātūti nibbatta”nti. “Dīghāyukatāya taṃ nimitta”nti (dī. ni. 3.207) ca vakkhati, tathā “taṃ lakkhaṇaṃ bhavati tadatthajotaka”nti (dī. ni. 3.221) ca. Nissandaphalaṃ pana paṭipakkhābhībhavo daṭṭhabbo. Tenevāha gāthāyaṃ “sattumaddano”ti.

**205. Etanti** etaṃ gāthābandhabhūtaṃ vacanaṃ, taṃ panatthato gāthā evāti āha “**imā tadatthaparidīpanā gāthā vuccanti**”ti.

**Puratthāti** vā “pure”ti vuttatopi pubbe. Yasmā mahāpuriso na atītāya ekajātiyaṃ, nāpi katipayajātīsu, atha kho purimapurimatarāsu tathāva paṭipanno, tasmā tattha paṭipattiṃ dassetuṃ “pure puratthā”ti vuttaṃ. Imissāpi jātiyaṃ atītakālavasena “purepuratthā”ti vuttuṃ labbhāti tato visesanatthaṃ “purimāsu jātīsū”ti vuttanti āha “**imissā**”tiādi. Keci “imissā jātiyā pubbe tusitadevaloke katakammapaṭikkhepavacana”nti vadanti, taṃ tesam matimattaṃ tattha tādisassa katakammasa abhāvato. **Apanūdanoti** apānetā. **Adhimuttoti** yuttapayutto.

**Puññakammenāti** dānādipuññakammena. **Evaṃ santeti** satamattena puññakammena ekekaṃ lakkhaṇaṃ nibbatteyya, evaṃ sati. **Na rocayimsūti** kevalaṃ satamattena puññakammena lakkhaṇanibbattiṃ na rocayimsu aṭṭhakathācariyā. Kathaṃ pana rocayimsūti āha “**anantesu panā**”tiādi. **Ekekaṃ kammanti** ekekaṃ dānādipubbakammaṃ. **Ekekaṃ sataguṇaṃ katvāti** anantāsu lokadhātūsū yattakā sattā, tehi sabbehi paccekaṃ satakkhattuṃ katāni dānādipuññakammāni yattakāni, tato ekekaṃ puññakammaṃ mahāsattena sataguṇaṃ kataṃ “sata”nti adhippetam, tasmā idha **sata-**

saddo bahubhāvapariyāyo, na saṅkhyāvacanoti dasseti “satagghi satam devamanussā”tiādīsu viya. Tenāha “**tasmā satapuññalakkhaṇoti imamattham rocayimsū**”ti.

### Āyatapaṇhitādītilakkhaṇavaṇṇanā

**206. Sarasacuti** nāma jātassa sattassa yāvajīvaṃ jīvitvā pakatiyā maraṇaṃ. Ākaḍḍhajiyyassa dhanudaṇḍassa viya pādānaṃ antomukhaṃ kuṭilatāya **antovaṅkapādatā**. Bahimukhaṃ kuṭilatāya **bahivaṅkapādatā**. Pādatalassa majjhe ūnatāya **ukkuṭikapādatā**. Aggapaḍdena khañjanakā **aggakoṇḍā**. Paṇhippadesena khañjanakā **paṇhikoṇḍā**. **Unnatakāyenāti** anonatabhāvena samussitasarīrena. **Muṭṭhikatahatthāti** āvudhādīnaṃ gahaṇattham katamuṭṭhihatthā. **Phaṇahatthakāti** aññamaññaṃ saṃsaṭṭhaṅgulihatthā. **Idamettha kamma sarikkhakanti** idaṃ imesaṃ tiṇṇampi lakkhaṇānaṃ tathāgatassa dīghāyukatāya ñāpakanimittabhāvo ettha āyatapaṇhitā, dīghaṅgulitā brahmujugattatāti etasmim lakkhaṇattaye kamma sarikkhakattam. Nissandaphalaṃ pana anantarāyatādi daṭṭhabbaṃ.

**207.** Bhāyitabbavatthunimittam uppajjamānampi bhayaṃ attasinehahetukam pahīnasinehassa tadabhāvatoti āha “**yathā mayham maraṇato bhayaṃ mama jīvitam piya**”nti. **Suciṇṇenāti** suṭṭhu katūpacitena sucaritakammunā.

**Cavitvāti** saggato cavitvā. “**Sujātagatto subhujo**”ti ādayo sarīrāvayavaguṇā imehi lakkhaṇehi avinābhāvinoti dassetuṃ vuttā. **Cirayapanāyāti** attabhāvassa cirakālam pavattanāya. Tenāha “**dīghāyukabhāvāyā**”ti. **Tatoti** cakkavattī hutvā yāpanato. **Vasippattoti** jhānādīsu vasībhāvañceva cetovasībhāvañca patto **hutvā**, katham iddhibhāvanāya iddhipādabhāvanāyāti attho. Yāpeti cirataranti yojanā.

### Sattussadatālakkaṇavaṇṇanā

**208.** Raso jāto etesanti **rasitāni**, mahārasāni. Tenāha “**rasasampannāna**”nti. **Piṭṭhakhajjakādīnīti** pūpasakkhalimodakādīni. **Ādi-saddena** pana kadaliphalādīm saṅgaṇhāti. Piṭṭham pakkhipitvā pacitabbapāyasam **piṭṭhapāyasam**. **Ādi-saddena** tathārūpabhōjjayāguādīm saṅgaṇhāti.

Idha kamma sarikkhakam nāma sattussadatālakkaṇassa paṇītalābhitāya ñāpakanimittabhāvo. Iminā nayena tattha tattha lakkhaṇe kamma sarikkhakam niddhāretvā yojetabbam.

**209. Uttamo aggarasadāyakoti** sabbasattānaṃ uttamo lokanātho aggānaṃ paṇītānaṃ rasānaṃ dāyako. **Uttamānaṃ aggarasānanti** paṇītesupi paṇītarasānaṃ. **Khajjabhōjjādījotakanti** khajjabhōjjādīlābhajotakam. Lābhasamvattanikassa kamma phalaṃ “**lābhasamvattanika**”nti kāraṇūpacārena vadati. **Tadatthajotakanti** vā tassa paṇītabhōjanadāyakattasaṅkhātassa atthassa jotakam. **Tadādhigacchatīti** ettha ā-kāro nipātamattanti āha “**taṃ adhigacchatī**”ti. **Lābhiruttamanti** ra-kāro padasandhikaro.

### Karacaraṇādīlakkaṇavaṇṇanā

**210. Pabbajitaparikkhāram** pattacīvarādīm **gihiparikkhāram** vatthāvudhayānasayanādīm.

**Sabbanti** sabbam upakāram. **Makkhetvā nāseti** makkhibhāve ṭhatvā. **Telena viya makkhetīti** satadhotatelena makkheti viya. **Atthasamvaḍḍhanakathāyāti** hitāvahakathāya. **Kathāgahaṇaṇicettha** nidassanamattam. Pasesam hitāvaho kāyapayogopi **atthacariyā**. Atthakathāyam pana vacīpayogavaseneva atthacariyā vuttā.

**Samānattatāyāti** sadisabhāve samānaṭṭhāne ṭhapanena, tam panassa samānaṭṭhāne ṭhapanam

attasadisatākaraṇaṃ, sukkena ekasambhogatā, attano sukhuṃpattiyā; tassa ca dukkhuṃpattiyā tena attano ekasambhogatāti āha “**samānasukhadukkhabhāvenā**”ti. Sā ca samānasukhadukkhātā ekato nisajjādīnā pākāṭā hotīti taṃ dassento “**ekāsane**”tiādimāha. **Na hi sakkā ekaparibhogo kātuṃ** jātiyā hīnattā. **Tathā akariyamāne ca so kujjhati** bhogena adhikattā, tasmā **dussaṅgaho. Na hi so ekaparibhogaṃ icchati** jātiyā hīnabhāvato. **Na akariyamāne ca kujjhati** bhogena hīnabhāvato. **Ubhohīti** jātibhogehi. **Sadisopi susaṅgaho** ekasadisabhāveneva itarena saha ekaparibhogassa paccāsīsāya, akaraṇe ca tassa kujjhanassābhāvato. **Adīyamānepi** kismiñci āmise **akariyamānepi** saṅgahe. **Na pāpakena cittena passati** pesalabhāvato. Tato eva **paribhogopi...pe... hoti. Evarūpanti** gihī ce, ubhohi sadisaṃ; pabbajito ce, sīlavantanti adhippāyo.

**Susaṅgahitāva hontīti** suṭṭhu saṅgahitā eva honti daḷhabhattibhāvato. Tenāha “**na bhijjantī**”ti.

**Dānādisaṅgahakammanti** dānādibhedam parasaṅgaṇhanavasena pavattam kusalakammaṃ.

**211. Anavaññātena** aparibhūtena sambhāvitena. **Pamodo** vuccati hāso, **na appamodenāti** ettha paṭisedhadvayena so eva vutto. So ca odagyasabhāvattā na dīno dhammūpasañhitattā na gabbhayuttoti āha “**na dīnena na gabbhitenāti attho**”ti. Sattānaṃ agaṇhanaguṇenāti yojanā.

**Atiruciranti** ativiya rucirakataṃ, taṃ pana passantānaṃ pasādāvahanti āha “**supāsādika**”nti. **Suṭṭhu chekanti** ativiya sundaraṃ. **Vidhāttaboti** vidhātuṃ sandisitum sakkuṇeyyo. Piyāṃ vadatīti **piyavadū** yathā “**sabbavidū**”ti. Sukhameva sukhatā, taṃ **sukhataṃ. Dhammañca anudhammañcāti** lokuttaradhammañceva tassa anurūpapubbabhāgadhammañca.

### Ussaṅkhapādādilakkhaṇavaṇṇanā

**212. “Atthūpasamhita”**nti iminā vaṭṭanissitā dhammakathā vuttāti āha “**idhalokaparalokatthanissita**”nti. “**Dhammūpasamhita**”nti iminā vivaṭṭanissitā, tasmā dasakusalakammapathā vivaṭṭasannissayā veditabbā. **Nidaṃsesīti** sandassesī te dhamme paccakkhe katvā pakāsesī. **Nidaṃsanakathanti** pākāṭakaraṇakathaṃ. Jeṭṭhatṭhena **aggo**, pāsaṃsaṭṭhena **seṭṭho**, pamukhatṭhena **pāmokkho**, padhānaṭṭhena **uttamo**, hitasukhatthikehi pakārato varaṇīyato rajanīyato **pavaroti** evaṃ atthavisesavācīnampi “**aggo**”tiādīnaṃ padānaṃ bhāvatthassa bhedābhāvato “**sabbāni aññamaññavevacanāni**”ti āha.

**Uddhaṅgamanīyāti** suṇantānaṃ uparūpari visesaṃ gamentīti uddhaṅgamanīyā. Saṅkhāya adho piṭṭhipādasamīpe eva patiṭṭhitattā adhosāṅkhā pādā etassāti **adhosāṅkhapādo. Saṅkhāti** ca gopphakānamidaṃ nāmaṃ.

**213. Dhammadānayaññanti** dhammadānasaṅkhātaṃ yaññaṃ.

**Suṭṭhu saṅghitāti** sammadeva saṅghitā. Piṭṭhipādassa upari pakatiāṅgulena caturaṅgule jaṅghāpadese **nigūḷhā** apaññāyamānarūpā hutvā ṭhitāti attho.

### Eṇijaṅghalakkhaṇavaṇṇanā

**214. Sippanti** sikkhitabbaṭṭhena “**sippa**”nti laddhanāmaṃ sattānaṃ jīvikāhetubhūtaṃ ājīvavidhiṃ. Jīvikatthaṃ, sattānaṃ upakāratthañca vedītabbaṭṭhena **vijjā**, mantasatthādi. Caranti tena sugatiṃ, sukhañca gacchantīti **caranaṃ**. Kammassakatāññaṃ uttarapadalopena “**kamma**”nti vuttanti āha “**kammanti kammassakatājānanapaññā**”ti. **Tāni cevāti** pubbe vuttahatthiādīni ceva. **Satta ratanāni**ti muttādīni satta ratanāni. **Ca-saddena** rañño upabhogabhūtanāṃ vatthaseyyādīnaṃ saṅgaho. **Rañño anucchavikāni**ti rañño paribhuñjanayogyāni. **Sabbesanti** “**rājārahāni**”tiādīnā vuttānaṃ

sabbesaṃyeva ekajjhaṃ **gahaṇaṃ**. Buddhānaṃ parisā nāma odhiso anodhiso ca samitapāpā, tathatthāya paṭipannā ca hotīti vuttaṃ “**samaṇānaṃ koṭṭhāsabhūtā catasso parisā**”ti.

**Sippādivācananti** sippānaṃ sikkhāpanaṃ. Pāḷiyampi hi “vācetā”ti vācanasīsenā sikkhāpanaṃ dassitaṃ. **Ukkuṭikāsananti** taṃtaṃveyyāvaccakaraṇena ukkuṭikassa nisajjā. Payojanavasena gehato gehaṃ gāmato gāmaṃ jaṅghāyo kilamētvā pesanaṃ **jaṅghapesanikā**. **Likhitvā pātitaṃ viya hoti** aparipuṇṇabhāvato. **Anupubbauggatavaṭṭitanti** goppakaṭṭhānato paṭṭhāya yāva jāṇupadesā maṃsūpacayassa anukkamena samantato vaḍḍhitattā anupubbena uggaṭaṃ hutvā suvaṭṭitaṃ. **Ḥṇijaṅghalakkhaṇanti** saṅṭhānamattena ḇṇimigajaṅghāsadisajaṅghalakkhaṇaṃ.

**215. “Yatupaghātāyā”**ti ettha **ta-kāro** padasandhikaro, anuṇāsikalopena niddesoti āha “**ya**”ntiādi. “Uddhaggaḷomā **sukhumattacotthata**”ti vuttattā codakena “kiṃ pana aññaena kammaena aññaṃ lakkhaṇaṃ nibbattati”ti codito, ācariyo “na nibbattati”ti vatvā “yadi evaṃ idha kasmā lakkhaṇantaraṃ kathita”nti antolīnameva codanaṃ pariharanto “**yaṃ pana nibbattatī...pe... idha vutta**”nti āha. Tattha **yaṃ pana nibbattatī** yaṃ lakkhaṇaṃ vuccamānalakkhaṇanibbattakena kammunā nibbattati. **Taṃ anubyañjanaṃ hotīti** taṃ lakkhaṇaṃ vuccamānassa lakkhaṇassa anukūlalakkhaṇaṃ nāma hoti. **Tasmā** tena kāraṇena **idha** ḇṇijaṅghalakkhaṇakathane “uddhaggaḷomā sukhumattacotthata”ti lakkhaṇantaraṃ **vuttaṃ**.

### Sukhumacchavilakkhaṇavaṇṇanā

**216. Samitapāpaṭṭhena samaṇaṃ**, na pabbajjāmattena. **Bāhitapāpaṭṭhena brāhmaṇaṃ**, na jātimattena.

Mahantānaṃ atthānaṃ pariggaṇhanato mahatī pañña etassāti **mahāpañño**. Sesapadesupi eseva nayoti āha “**mahāpaññādīhi samannāgatoti attho**”ti. **Nānattanti** yāhi mahāpaññādīhi samannāgatattā bhagavā “mahāpañño”tiādinā kittiyati, tāsamaṃ mahāpaññādīnaṃ idaṃ nānattaṃ ayaṃ vemattatā.

Yassa kassaci viśesato arūpadhammassa mahattaṃ nāma kiccāsiddhiyā veditabbanti tadassā kiccāsiddhiyā dassento “**mahante silakkhandhe pariggaṇhātīti mahāpañña**”tiādimāha. Tattha hetumahantatāya, paccayamahantatāya, nissayamahantatāya, pabhedaṃmahantatāya, kiccamahantatāya, phalamahantatāya, ānisaṃsamahantatāya ca sīlakkhandhassa mahantabhāvo veditabbo. Tattha **hetu** alobhādayo. **Paccayo** hirottappasaddhāsativīriyādayo. **Nissayo** sāvakabodhipaccekabodhisammāsambodhiniyatatā, taṃsamaṅgino ca purisavisesā. **Pabhedo** cārittavārittādivibhāgo. **Kiccaṃ** tadaṅgādivasena paṭipakkhavidhamaṇaṃ. **Ānisaṃso** piyamaṇāpatādi. Ayamettha saṅkhepo, vitthāro pana **visuddhimagge**, (visuddhi. 1.6) **ākaṅkheyyasuttādīsu** (ma. ni. 1.65) ca āgatanayeneva veditabbo. Iminā nayena **samādhikkhandhādīnampi** mahantatā yathārahaṃ vitthāretvā veditabbā. **Ṭhānāṭhānānaṃ** pana mahāvisayatāya, sā **bahudhātukasutte** āgatanayena veditabbā. **Vihārasamāpattiyo** samādhikkhandhaniddhāraṇanayena veditabbā. **Ariyasaccānaṃ** sakalasāsanasaṅghato, so saccavibhaṅga- (vibha. 189) taṃsaṃvaṇṇanāsu (vibha. aṭṭha. 189) āgatanayena, **satipaṭṭhānā** dīnaṃ satipaṭṭhānavibhaṅgādīsu, (vibha. 355) taṃsaṃvaṇṇanāsu (vibha. aṭṭha. 355) ca āgatanayena, **sāmaññaphalānaṃ** mahato hitassa, mahato sukhasa, mahato atthassa, mahato yogakkhemassa nibbattibhāvato, santapaṇītanipuṇaatakkāvacarapaṇḍitavedanīyabhāvato ca; **abhiññānaṃ** mahāsambhārato, mahāvisayato, mahākiccato, mahānubhāvato, mahānibbattito ca, **nibbānassa** madanimmadanādīmahattasiddhito mahantatā veditabbā.

**Puthupaññāti** etthāpi vuttanayānusārena attho veditabbo. Ayaṃ pana viśeso – **nānākkhandhesu ṇānaṃ pavattatīti** “ayaṃ rūpakkhandho nāma...pe... ayaṃ viññāṇakkhandho nāmā”ti evaṃ pañcannaṃ khandhānaṃ nānākaraṇaṃ paṭicca ṇānaṃ pavattati. Tesupi “ekavidhena rūpakkhandho, ekādasavidhena rūpakkhandho. Ekavidhena vedanākkhandho, bahuvividhena vedanākkhandho. Ekavidhena saññākkhandho. Ekavidhena saṅkhārakkhandho. Ekavidhena viññāṇakkhandho,



bahuvidhena viññāṅakkhandho”ti evaṃ ekekassa khandhassa atītādibhedavasenāpi nānākaraṇaṃ paṭicca ñāṇaṃ pavattati. Tathā “idaṃ cakkhāyatanaṃ nāma...pe...idaṃ dhammāyatanaṃ nāma. Tattha dasāyatanaṃ kāmāvacarā, dve catubhūmakā”ti evaṃ āyatanaṃ nānattaṃ paṭicca ñāṇaṃ pavattati. **Nānādhātūsūti** “ayaṃ cakkhūdhātu nāma...pe... ayaṃ manoviññādhātu nāma. Tattha soḷasa dhātuyo kāmāvacarā, dve dhātuyo catubhūmikā”ti evaṃ nānādhātūsu ñāṇaṃ pavattati, tayidaṃ upādinnakadhātuvaseṇa vuttaṃ. Paccekabuddhānampi hi dvinnāṅga aggasāvakaṇaṃ upādinnakadhātūsu evaṃ nānākaraṇaṃ paṭicca ñāṇaṃ pavattati, taṅca kho ekadesatova, na nippadesato. Anupādinnakadhātūnaṃ pana lakkhaṇādimmattameva jānanti, na nānākaraṇaṃ. Sabbaññubuddhānameva pana “imāya nāmadhātuyā ussannattā imassa rukkhassa khandho seto, imassa kāḷo, imassa maṭṭho, imassa bahalattaco, imassa tanutaco. Imassa pattaṃ vaṇṇasaṅghānādivaseṇa evarūpaṃ. Imassa pupphaṃ nīlaṃ, imassa pītakaṃ, lohitaṃ, odātaṃ, sugandhaṃ, duggandhaṃ. Phalaṃ khuddakaṃ, mahantaṃ, dīghaṃ, vattaṃ, susaṅghānaṃ, dussaṅghānaṃ, maṭṭhaṃ, pharuṣaṃ, sugandhaṃ, duggandhaṃ, madhuraṃ, tittakaṃ, ambilaṃ, kaṭukaṃ, kasāvaṃ. Kaṇṭako tikhiṇo, atikhiṇo, ujuko, kuṭilo, kaṇho, nīlo, odāto hotī”ti dhātunānattaṃ paṭicca ñāṇaṃ pavattati.

**Nānāpaṭicasamuppādesūti** ajjhatabhiddhābhedato ca nānāpabhedesu paṭicasamuppādaṅgesu. Avijjādiṅgāni hi paccekaṃ paṭicasamuppādasaññitāni. Tenāha **saṅkhāraṇi** “dvādasa paccayā dvādasa paṭicasamuppādā”ti. **Nānāsuññatamanupalabbhesūti** nānāsabhāvesu niccasārādivirahitesu suññatābhāvesu tato eva itthipurisaattattaniyādivaseṇa anupalabbhanasabhāvesu pakāresu. **Ma-kāro** hettha padasandhikaro. **Nānāatthesūti** atthapaṭisambhidāya visayabhūtesu paccayuppannādivaseṇa nānāvidhesu atthesu. **Dhammesūti** dhammapaṭisambhidāya visayabhūtesu paccayādivaseṇa nānāvidhesu dhammesu. **Niruttisūti** tesamyeva atthadhammānaṃ niddhāraṇavacanasāṅkhātesu nānāniruttisu. **Paṭibhānesūti** atthapaṭisambhidādisu visayabhūtesu “imāni ñāṇāni idamatthajotakāni”ti (vibha. 726, 729, 731, 732, 734, 736, 739) tathā tathā paṭibhānato upatiṭṭhanato “paṭibhānāni”ti laddhanāmesu nānāñānesu. **“Puthunānāsīlakkhandhesū”**tiādīsu sīlassa puthuttaṃ vuttameva, itaresaṃ pana vuttanayānusāreṇa suviññeyyattā pākāṭameva. Yaṃ pana abhinnaṃ ekameva nibbānaṃ, tattha upacāravaseṇa puthuttaṃ gahetabbanti āha **“pūthujjanasādhāraṇe dhamme samatikkammā”**ti, tenassa madanimmadānādivipariyāyena puthuttaṃ paridīpitaṃ hoti.

Evaṃ visayavasena paññāya mahattaṃ, puthuttaṃ dassetvā idāni sampayuttadhammavasena hāsabhāvaṃ, pavattīkāravaseṇa javanabhāvaṃ, kiccavasena tikkhādibhāvaṃ dassetuṃ **“katamā hāsapaññā”**tiādī vuttaṃ. Tattha **hāsabahuloti** pītibahulo. Sesapadāni tasseva vevacanāni. **Sīlaṃ paripūreṭi** haṭṭhapahaṭṭho udaggudaggo hutvā ṭhapetvā indriyasamvaram tassa viṣuṃ vuttattā anavasesasīlaṃ paripūreṭi. Pītisomanassasahagatā hi paññā abhirativaseṇa ārammaṇe phullitavikasitā viya pavattati, na evaṃ upekkhāsahagatā. Puna **sīlakkhandhanti** ariyasīlakkhandhamāha. **“Samādhikkhandha”**ntiādīsūpi eseva nayo.

**Sabbaṃ taṃ rūpaṃ aniccato khippaṃ javatīti** yā rūpadhamme “aniccā”ti sīghavegena pavattati, paṭipakkhadūrabhāvena pubbābhisaṅkhārassa sātisayattā indena viṣaṭṭhavaṃ viya lakkhaṇaṃ avirajjhantī adandhāyantī rūpakkhandhe aniccalakkhaṇaṃ vegasā paṭivijjhanti, sā javanapaññā nāmāti attho. Sesapadesūpi eseva nayo. Evaṃ lakkhaṇārammaṇikavipassanāvasena javanapaññānaṃ dassetvā balavavipassanāvasena dassetuṃ **“rūpa”**ntiādī vuttaṃ. Tattha **khayaṭṭhenāti** yattha yattha uppajjati, tattha tattheva bhijjanato khayasabhāvattā. **Bhayaṭṭhenāti** bhayānakabhāvato. **Asāraṇaṭṭhenāti** asāraṇabhāvato attasāravirahato, niccasārādivirahato ca. **Tulayitvāti** tulanabhūtāya vipassanāpaññāya tuletivā. **Tīrayitvāti** tāya eva tīraṇabhūtāya tīrayitvā. **Vibhāvayitvāti** yāthāvato pakāsetvā paccakkhaṃ katvā. **Vibhūtaṃ katvāti** pākāṭaṃ katvā. **Rūpanirodheti** rūpakkhandhanirodhahetubhūte **nibbāne** ninnapaṇapabbhārabhāvena. Idāni sikhāppattavipassanāvasena javanapaññānaṃ dassetuṃ puna **“rūpa”**ntiādī vuttaṃ. “Vuṭṭhānagāminivipassanāvasenā”ti keci.

Ñāṇassa tikkhabhāvo nāma savisesaṃ paṭipakkhapahānena vedittabboti. “Khippaṃ kilese chindatīti tikkhapaññā”ti vatvā te pana kilese vibhāgena dassento **“uppannaṃ kāmavitakka”**ntiādīmāha.

Tikkhapañño khippābhiñño hoti, paṭipadā cassa na calatīti āha “**ekasmim āsane cattāro ariyamaggā...pe... adhigatā hontī**”tiādi.

“Sabbe saṅkhārā aniccā dukkhā vipariṇāmadhammā, saṅkhatā paṭiccasamuppannā khayadhammā vayadhammā virāgadhammā nirodhadhammā”ti yāthāvato dassanena saccappaṭivedho ijjhati, na aññathāti kāraṇamukhena nibbedhikapaññaṃ dassetuṃ “**sabbasaṅkhāresu ubbegabahulo hotī**”tiādi vuttaṃ. Tattha **ubbegabahuloti** vuttanayena sabbasaṅkhāresu abhiṇhapavattasaṃvego. **Uttāsabahuloti** ñāṇuttāsavasena sabbasaṅkhāresu bahuso utrāsamānaso, etena ādīnavānupassanamāha. “**Ukkaṇṭhanabahulo**”ti pana iminā nibbidānupassanamāha, “**aratibahulo**”tiādinā tassā eva aparāparuppattim. **Bahimukhoti** sabbasaṅkhārato bahibhūtaṃ nibbānaṃ uddissa pavattañānamukho, tathā vā pavattitavimokkhamukho. Nibbijhanaṃ **nibbedho**, so etissā atthi, nibbijjhatīti vā **nibbedhikā**, sā eva paññā **nibbedhikapaññā**. Yaṃ panettha atthato avibhattaṃ, taṃ heṭṭhā vuttanayattā, uttānatthattā ca suviññeyyameva.

**217. Pabbajitaṃ upāsītāti** ettha yādisaṃ pabbajitaṃ upāsato paññapaṭilābho hoti, taṃ dassetuṃ “**paṇḍitaṃ pabbajita**”nti vuttaṃ. **Upāsanañcetta** upaṭṭhānavasena icchitaṃ, na upanisīdanamattenāti āha “**payirupāsītā**”ti. **Atthanti** hitaṃ. **Abbhantaraṃ karitvāti** abbhantaragataṃ katvā. Tenāha “**atthayutta**”nti. Bhāvanapūṃsakaniddeso cāyaṃ, hitūpasañhitaṃ katvāti attho. **Antara-saddo** vā cittapariyāyo “yassantarato na santi kopā”tiādīsu (udā. 20) viya. Tasmā **atthantaroti** hitajjhāsayoti attho.

**Paṭilābhatthāya gatenāti** paṭilābhatthāya pavattena, paṭilābhasaṃvattaniyenāti attho. **Uppāde ca nimitte ca chekāti** uppādaividhimhi ceva nimittavidhimhi ca kusalā. Uppādanimittakovidatāsīsena cettha lakkhaṇakosallameva dasseti. Atha vā sesalakkhaṇānaṃ nibbattiyā buddhānaṃ, cakkavattīnañca uppādo anumīyati, yāni tehi laddhabbañisaṃsāni nimittāni, tasmim **uppāde ca nimitte ca** anumīnādivasena **chekā** nipuṇāti attho. **Ñatvā passissatīti** ñāṇena jānitvā passissati, na cakkhuvīññānenāti adhippāyo.

**Atthānusāsānisūti** atthānaṃ hitānaṃ anusāsānisu. Yasmā anattapaṭivajjanapubbikā sattānaṃ atthapaṭipatti, tasmā anattopari paricchijja gahetabbo, jānitabbo cāti vuttaṃ “**atthānatthaṃ pariggāhakāni ñāṇāni**”ti, yato “āyupāyakosallaṃ viya apāyakosallampi icchitabba”nti vuttaṃ.

### Suvaṇṇavaṇṇalakkhaṇavaṇṇanā

**218.** Paṭisaṅkhānabalena kodhavinayena **akkodhano**, na bhāvanābalenāti dassetuṃ “**na anāgānimaggenā**”tiādi vuttaṃ. **Evaṃ akkodhavasikattāti** evaṃ maghamāṇavo viya na kodhavasāṃ gatattā. **Nābhisajjīti** kujjhanavaseneva na abhisajjī. Yañhi kodhassa uppattiṭṭhānabhūte ārammaṇe upanāhassa paccayabhūtaṃ kujjhanavasena abhisajjanaṃ, taṃ idhādhippettaṃ, na lubbhanavasena. Tenāha “**kuṭilakaṇṭako viyā**”tiādi. So hi yattha laggatī, taṃ khobhento eva laggatī. **Tattha tatthāti** tasmim tasmim mammaṭṭhāne. **Mammanti** phutṭhamattepi rujjanaṭṭhānaṃ. **Pubbuppattikoti** paṭhamuppanno. **Tato balavataro byāpādo** laddhāsevanatāya cittassa byāpajjanato. **Tato balavatarā patitthiyanāti** sātisaṃ laddhāsevanatāya tato byāpādāvattāyapi balavatarā patitthiyanā paccatthikabhāvena thāmapattito.

**Sukhumattharaṇādīti ādi-saddena** paṇītabhojanīyādīnampi saṅgaho daṭṭhabbo bhojanadānassapi vaṇṇasampadānimittabhāvato. Tenāha bhagavā “bhojanaṃ bhikkhave dadamāno dāyako paṭiggāhakānaṃ...pe... āyumaṃ deti, vaṇṇaṃ detī”ti (a. ni. 5.37) tathā ca vakkhati “āmisaḍānena vā”ti.

**219.** Ti adāsi. **Devoti** megho, pajjunno eva vā. **Varataroti** uttamataro. Pabbajjāya visadisāvattādi bhāvato na pabbajjāti **apabbajjā**, gihibhāvo. Acchādenti kopīnaṃ paṭicchādenti etehīti acchādānāni, nivāsānāni, tesāṃ **acchādānānañceva** sesa **vatthānañca** kojavādī **uttamapāvuraṇānañca**. **Vināsoti** katassa kamma avipaccitvā vināso.

### Kosohitavatthaguyhalakkhaṇavaṇṇanā

**220. Samānetā**ti sammadeva ānetā samāgamaṭā. **Rajje paṭiṭṭhitena sakkā kātum** bahubhatikasēva ijjhanato. Kattā nāma natthīti vajjam paṭicchādentīti ānetvā sambandho, karonti vajjapaṭicchādanakammanti vā. Nanu vajjapaṭicchādanakammaṃ nāma sāvajjanti? Saccam sāvajjam saṃkiliṭṭhacittena paṭicchādentassa, idaṃ pana asaṃkiliṭṭhacittena parassa uppajjanakaanattham parihaṇavasena pavattam adhippetam. “**Ñāṭisaṅgahaṃ karontenā**”ti etena ñātathacariyāvasena tam kammaṃ pavattatīti dasseti.

**221. Amittatāpanā**ti amittānaṃ tapanasīlā, amittatāpanaṃ hotu vā mā vā evaṃsabhāvāti attho. Na hi cakkavattino puttānaṃ amittā nāma keci honti, ye te bhaveyyuṃ, cakkānubhāveneva sabbepe khattiyādayo anuvattakā tesam bhavanti.

Paṭhamabhāṇavāraṇṇanā niṭṭhitā.

### Parimaṇḍalādilakkhaṇavaṇṇanā

**222. Samanti samānaṃ. Tena tena** loka viññātaguṇena **samaṃ samānaṃ jānāti**, yato tattha paṭipajjanavidhināva itarasmiṃ paṭipajjati. **Sayaṃ jānāti**ti aparaneyyo hutvā sayameva jānāti. **Purisaṃ jānāti**ti vā “ayaṃ seṭṭho, ayaṃ majjhimo, ayaṃ nihīno”ti tam tam purisaṃ yāthāvato jānāti. **Purisavisesaṃ jānāti**ti tasmim tasmim purise vijjamānaṃ visesaṃ jānāti, yato tattha tattha anurūpadānapadānādipaṭipattiyā yuttapattakārī hoti. Tenāha “**ayamidamarahatī**”tiādi.

**Sampattipaṭilābhattṭhenā**ti diṭṭhadhammikādisampattīnaṃ paṭilābhāpanaṭṭhena. **Samaṅgahakammanti** samaṃ jānitvā tadanurūpaṃ tassa tassa saṅgaṇhanakammaṃ.

**223. Tulayitvā**ti tīrayitvā. **Paṭivicinitvā**ti vīmaṃsitvā. Nipunaṃyogato **nipuna**, ativiya nipuna **atinipuna**, sā pana tesam nipunatā saṅhasukhumā paññāti āha “**sukhumapaññā**”ti.

### Sihapubbaddhakāyādilakkhaṇavaṇṇanā

**224. Khemakāmoti** anupaddavakāmo. Kammassakatāññaṃ sattānaṃ vaḍḍhiāvahaṃ sabbasampattividhāyakanti āha “**paññāyāti kammassakatāpaññāyā**”ti.

**Samantaparipūrānī**ti samantato sabbabhāgehi paripuṇṇāni. Tato eva **ahīnāni** anūnāni. **Dhanādīhī**ti dhanadhaññādīhi.

**225. Okappanasaddhā** saddheyyavatthum okkanditvā pakkhanditvā saddahanasaddhā. Sā eva pasādanīyavatthusmimpi abhippasīdanavasena pavattiyā **pasādasaddhā**. **Pariyattisavanenā**ti sattānaṃ hitasukhāvahāya pariyattiyā savanena. Dhāraṇaparicayādīnaṃ tammulakattā tathā vuttam. **Etesanti** saddhādīnaṃ. Saha hānadhammenāti **sahānadhammo**, na sahānadhammoti **asahānadhammo**, tassa bhāvo asahānadhammatā, tam **asahānadhammatam**, aparihānīyasabhāvanti attho.

### Rasaggasaggitālakkhaṇavaṇṇanā

**226. Tilaphalamattampi** bhojanaṃ. **Sabbattha pharatī**ti sabbā rasāharaṇīyo anussarantaṃ sabhāvena sabbasmim kāye pharati. **Samā hutvā vahantī**ti avisamā ujukā hutvā pavattanti.

**Ārogyakaraṇakammanti** arogabhāvakaraṃ sattānaṃ aviheṭhanakammaṃ. Madhurādibhedam rasaṃ gasati harati etehi, sayameva vā tam gasanti gilanti anto pavesentīti **rasaggasā**, rasaggasānaṃ

aggā **rasaggasaggā**, te ettha santīti **rasaggasaggi**, tadeva lakkhaṇaṃ. Bhavati hi abhinnepi vatthusmiṃ taggatavisesāvabodhanatthaṃ bhinnaṃ viya katvā vohāro yathā “silāputtakassa sarīra”nti. Rasaggasaggitāsāṅkhātāṃ vā lakkhaṇaṃ **rasaggasaggilakkhaṇaṃ**.

**227. Vadha-saddo** “attānaṃ vadhivā vadhivā rodātī”tiādīsu (pāci. 879) bādhanatthopi hotīti tato visesanatthaṃ “**māraṇavadhenā**”ti vuttaṃ, māraṇasāṅkhātena vadhenāti attho. Bādhanattho eva vā **vadha-saddo**, māraṇena, bādhanena cāti attho. **Ubbādhanāyāti** bandhanāgāre pakkhipitvā uddhaṃ uddhaṃ bādhanena. Tenāha “**bandhanāgārappavesanē**”ti.

### Abhinīlanettādīlakkhaṇavaṇṇanā

**228. Viṣaṇanti** kujjhanavasena vinisaṇaṃ katvā. Tenāha “**kakkaṭako viyā**”tiādi. **Visācīti** virūpaṃ sācitakam, vijimhanti attho. Tenāha “**vaṅkakkhikoṭiyā**”ti, kuṭīlaakkhikoṭipātenāti attho. **Viceyya pekkhitāti** ujukaṃ anoloketvā diṭṭhipātaṃ vicāretvā oloketvā. Tenāha “**yo kujjhivā**”tiādi. **Paroti** kujjhito. **Na oloketi** taṃ sammukhā gacchantam kujjhivā na oloketi, parammukhā. **Viteyyāti** virūpaṃ tīriyaṃ, viññūnaṃ olokanakkamaṃ vītikkamītvāti attho. Jimhaṃ anoloketvā ujukaṃ olokanam nāma kuṭīlabhāvakarānaṃ pāpadhammānaṃ abhājanaujukatacittatasseva hotīti āha “**ujumano hutvā ujum pekkhitā**”ti. Yathā ca ujum pekkhitā hotīti ānetvā sambandho. **Pasaṇanti** ummīlanavasena sammadeva patthaṇaṃ. **Vipulaṃ vitthanti** tasseva vevacanaṃ. Piyam piyāyitabbaṃ dassanaṃ olokanam etassāti piyadassano.

**Kāṇoti** akkhīni nimmīletvā pekkhanako. **Kākakkhīti** kekarakkho. **Vaṅkakkhīti** jimhapekkhanako. **Āvilakkhīti** ākuladiṭṭhipāto. Nīlapītalohitasetakāḷavaṇṇanaṃ vasena **pañcavaṇṇo**. Tattha pītalohitavaṇṇa setamaṇḍalagatarājjivasena, nīlasetakāḷavaṇṇa pana taṃtaṃmaṇḍalavaseneva vedītabbā. “**Pasādoti** pana tesam vaṇṇanaṃ pasannākāraṃ sandhāya vutta”nti keci. **Pañcavaṇṇo pasādoti** pana yathāvuttapañcavaṇṇaparivāro, tehi vā paṭimaṇḍito pasādoti attho. **Nettasampattikarānīti** “pañcavaṇṇapasādatā tirohitavidūragatadassanasamatthātā”ti evamādi cakkhusampadāya kāraṇāni. **Lakkhaṇasatthe yuttāti** lakkhaṇasatthe āyuttā sukusalā.

### Uṇhīsāsīsalakkhaṇavaṇṇanā

**230. Pubbaṅgamoti** ettha pubbaṅgamatā nāma pamukhatā, jeṭṭhaseṭṭhakabhāvo bahujaṇassa anuvattaniyatāti āha “**gaṇajeṭṭhako**”tiādi.

**Pubbaṅgamatāti** pubbaṅgamassa kammaṃ. Yassa hi kāyasucaritādīkammaṃ vasena mahāpuriso bahujaṇassa pubbaṅgamo ahoṣi, tadassa kammaṃ “pubbaṅgamatā”ti adhippetam, na pubbaṅgamabhāvo. Tenāha “**idha kammaṃ nāma pubbaṅgamatā**”ti. **Pītipāmojjena paripuṇṇasīsoti** pītiyā, pāmojjena ca sampuṇṇapaññāsīso bahulaṃ somanassasahagataññāsam payuttacittasamaṅgī eva hutvā **vicarati**. **Mahāpurisoti** mahāpurisajātiko.

**231. Bahujaṇanti** sāmiatthe upayogavacananti āha “**bahujaṇassā**”ti. Paribhuṅjanaṭṭhena **paṭibhogo**, upayogavatthu paṭibhogo, tassa hitāti **paṭibhogiyā**. Desakālam ṇatvā tadupakaraṇūpaṭṭhānādi **veyyāvaccakarā** sattā. **Abhiharantīti** byāharanti. Tassa tassa veyyāvaccassa paṭiharanaṇato pavattanakaraṇato **paṭihāro**, veyyāvaccakaro, tassa bhāvo **paṭihārakanti** āha “**veyyāvaccakarabhāva**”nti. Visavanaṃ **visavo**, kāmakāro vasitā, so etassa atthīti **visavīti** āha “**ciṇṇavasī**”ti.

### Ekekalomatādīlakkhaṇavaṇṇanā

**232. Upavattatīti** anukūlabhāvaṃ upecca vattati. Tenāha “**ajjhāsayaṃ anuvattatī**”ti.

**Ekekalomalakkhaṇanti** ekekasmim lomakūpe ekekalomatālakkhaṇam. **Ekekehi lomehīti** aññesaṃ sarīre ekekasmimpi lomakūpe anekānipi lomāni uṭṭhahanti, na tathāgatassa. Tehi puna paccekaṃ lomakūpesu ekekeheva uppannehi kuṇḍalāvattehi padakkhiṇāvattakajātehi nicitam viya sarīram hotīti vuttam “ekekalomūpacitaṅgavā”ti.

### Cattālīsādilakkhaṇavaṇṇanā

**234. Abhinditabbapariso**ti parehi kenaci saṅgahena saṅgahetvā, yuttikāraṇam dassetvā vā na bhinditabbapariso.

**Apisuṇavācāyāti** upyogathe sāmivacanam, pesuññassa paṭipakkhabhūtam kusalakammaṃ. Pisuṇā vācā etassāti pisuṇavāco, tassa **pisuṇavācassa** puggalassa. **Aparipuṇṇāti** cattārisato ūnabhāvena na paripuṇṇā. **Viraḷāti** savivarā.

### Pahūtajivhādilakkhaṇavaṇṇanā

**236. Ādeyyavācoti** ādaragāravavasena ādātavvacano. “Evameta”nti **gahetabbavacano** sirasā sampañcchitasāsano.

**Baddhajivhāti** yathā sukkena parivattati, evaṃ sirādīhi palibuddhajivhā. **Gūlhajivhāti** rasabahalatāya gūlhagaṇḍasadisajivhā. **Dvijivhāti** agge kappabhāvena dvidhābhūtajivhā. **Mammanāti** apparipputatalāpā. Kharapharusakakkasādivasena **saddo bhijjati** bhinnakāro hoti. Vicchinditvā pavattassaratāya **chinnassarā vā**. Anekākāratāya **bhinnassarā vā**. Kākassa viya amanuññassaratāya **kākassarā vā**. **Madhuroti** iṭṭhe, kammaphalena vatthuno suvisuddhattā. **Pemanīyoti** pītisañjanano, piyāyitabbo vā.

**237. Akkosayuttattāti** akkosupasañhitattā akkosavatthusahitattā. **Ābādhakarinti** ghaṭṭanavasena paresam pīlavahaṃ. Bahuno janassa avamaddanato, pamaddābhāvakarāṇato vā **bahujanappamaddanam**. **Abāḷhanti** vā ettha a-kāro vuddhiattho “asekkhā dhammā”tiādīsu (dha. sa. tikamātikā 11) viya, tasmā ativiya bāḷhaṃ pharusam **giranti** evamettha attho veditabbo. **Na bhaṇīti** cettha “na abhaṇi na bhaṇi”ti saralopena niddeso. **Susamhitanti** suṭṭhu samhitam. Kena pana suṭṭhu samhitam? “Madhura”nti anantameva vuttattā madhuratāyāti viññāyati, kā panassa madhuratāti āha “**suṭṭhu pemasamhita**”nti. Upyogaputhuttavisayo yaṃ **vācā**-saddoti āha “**vācāyo**”ti, sā cassā upyogaputhuttavisayatā “hadayagāminiyo”ti padena samānādhikaraṇatāya daṭṭhabbā. “**Kaṇṇasukha**”nti pāṭhe bhāvanapūmsakaniddesoyanti dassetum “**yathā**”tiādi vuttam. **Vedayathāti** kālavipallāsenāyaṃ niddesoti āha “**vedayitthā**”ti. **Brahmassaratanti** seṭṭhassarataṃ, brahmuno sarasadisassarataṃ vā. **Bahūnaṃ bahunti** bahūnaṃ janānaṃ bahum subhaṇitanti yojanā.

### Sīhahanulakkhaṇavaṇṇanā

**238. Appadhaṃsikoti** appadhaṃsiyo. **Ya-kārassa** hi **ka-kāraṃ** katvā ayam niddeso yathā “niyyānikā dhammā”ti (dha. sa. dukamātikā 97) **guṇatoti** attanā adhigataguṇato. **Ṭhānatoti** yathāḥhitatṭhānantarato.

**Palāpakathāyāti** samphappalāpakathāya. **Antopaviṭṭhahanukā** ekato, ubhato vā samkucitavisukā. **Vaṅkahanukā** ekapassena kuṭilavisukā. **Pabbhārahanukā** purato olambamānavisukā.

**239. Vikiṇṇavacanā** nāma samphappalāpino, tappatikkhepena **avikiṇṇavacanā** mahābodhisattā. Vācā eva tadatthādhigamupāyatāya “**byāppatho**”ti vuttāti āha “**avikiṇṇa...pe... vacanapatho assā**”ti. “**Dvīhi dvīhi**”ti nayidaṃ āmedītavacanam asamānādhikaraṇato, atha kho dvīhi

diguṇatādassananti āha “**dvīhi dvīhīti catūhī**”ti. Tasmā “dvidugamā”ti catugamā vuttāti āha “**catuppadāna**”nti. **Tathāsabhāvoti** yathāssa vuttanayena kenaci appadhamsiyatā hoti guṇehi, tathāsabhāvo.

### Samadantādilakkhaṇavaṇṇanā

**240.** Visuddhasīlācāratāya parisuddhā samantato sabbathā vā suddhā puggalā parivārā etassāti **parisuddhparivāro**.

**241.** **Pahāsīti** tadaṅgavasena, vikkhambhanavasena ca pariccaji. Tidivaṃ tāvatiṃsabhavanam puram nagaram etesanti **tidivapurā**, tāvatiṃsadevā, tesam varo tidivapuravaro, indo. Tena **tidivapuravarena**. Tenāha “**sakkenā**”ti. Lapanti kathenti etenāti **lapanam**, mukhanti āha “**lapanajanti mukhaja**”nti. Suṭṭhu dhavalatāya **sukkā**, īsakampi asaṃkiliṭṭhatāya **suci**. Sundarasaṅṭhānatāya suṭṭhu bhāvanato, vipassanato ca **sobhanā**. Kāmaṃ janānam manussānam nivāsanaṭṭhānādibhāvena patiṭṭhābhūto desaviseso “janapado”ti vuccati, idha pana saparivāracatumahādīpasaññito sabbo padeso tathā vuttoti āha “**cakkavāḷaparicchinnō janapado**”ti. Nanu ca yathāvutto padeso samuddaparicchinnō, na cakkavāḷapabbataparicchinnoti? So padeso cakkavāḷaparicchinnopi hotīti tathā vuttaṃ. Ye vā samuddanissitā, cakkavāḷapādanissitā ca sattā, tesam te te padesā patiṭṭhāti tepi saṅgaṇhanto “**cakkavāḷaparicchinnō**”ti avoca. **Cakkavāḷaparicchinnoti** ca cakkavāḷena paricchinnoti evamettha attho daṭṭhabbo. **Tassāti** tassa cakkavattino. Puna **tassāti** tassa janapadassa. **Bahujana sukhanti** ettha paccatabhuvacanālopana bahujanaggahaṇanti āha “**bahujanā**”ti. Yathā pana te hitasukham caranti, taṃ vidhiṃ dassetuṃ “**samānasukhadukkhā hutvā**”ti vuttaṃ. **Vigatapāpoti** sabbaso samucchindanena viniddhutapāpadhammo. **Daratho** vuccati kāyiko, cetasiko ca pariḷāho. Tattha cetasikapariḷāho “vigatapāpo”ti imināva vuttoti āha “**vigatakāyikadarathakilamatho**”ti. Rāgādayo yasmim santāne uppannā, tassa malīnabhāvakaṇaṇena **malā**. Kacavarabhāvena **khilā**. Sattānam mahānatthakarattā visesato doso **kalīti** vuttaṃ “**dosakalīnaṅcā**”ti. **Panūdehīti** samucchindanavasena sasantānato nīhārakehi, pajahanakehīti attho. Sesam suviññeyyameva.

Ettha ca yasmā sabbesampi lakkhaṇānam mahāpurisasantānagatapuññasambhārahetukabhāvena sabbamyeva taṃ puññakammaṃ sabbassa lakkhaṇassa kāraṇam visiṭṭharūpattā phalassa. Na hi abhinnarūpakāraṇam bhinnasabhāvassa phalassa paccayo bhavitum sakkoti, tasmā yassa yassa lakkhaṇassa yaṃ yaṃ puññakammaṃ visesakāraṇam, taṃ taṃ vibhāgena dassentī ayam desanā pavattā. Tattha yathā yādisam kāyasucaritādīpuññakammaṃ suppatiṭṭhitapādatāya kāraṇam vuttaṃ, tādisameva “uñhīsasīsātāya” kāraṇanti na sakkā vattum daḷhasamādānatāvisiṭṭhassa tassa suppatiṭṭhitapādatāya kāraṇabhāvena vuttattā, itarassa ca pubbaṅgamatāvisiṭṭhassa vuttattā, evam yādisam āyatapaṇhitāya kāraṇam, na tādisameva dīghaṅgulitāya, brahmujugattatāya ca kāraṇam visiṭṭharūpattā phalassa. Na hi abhinnarūpakāraṇam bhinnasabhāvassa phalassa paccayo bhavitum sakkoti. Tattha yathā ekeneva kammunā cakkhādīnāndriyupattiyam avatthābhedato, sāmattiyaḥbhedato vā kammabhedo icchitabbo. Na hi yadavattham kammaṃ cakkhussa kāraṇam, tadavatthameva sotādīnam kāraṇam hoti abhinnasāmattiyaṃ vā, tasmā pañcāyatanikattabhāvapatthanābhūtā purimanipphannā kāmataṅhā paccayavasena visiṭṭhasabhāvā kammassa visiṭṭhasabhāvaphalanibbattanasamatthatāsāddhanavasena paccayo hotīti ekampi anekavidhaphalanibbattanasamatthatāvasena anekarūpatam āpannam viya hoti, evamidhāpi “ekampi pānātipātā veramaṇivasena pavattam kusalakammaṃ āyatapaṇhitādīnam tiṇṇampi lakkhaṇānam nibbattakam hoti”ti vuccamānepi na koci virodho. Tena vuttaṃ “so tassa kammassa katattā...pe... imāni tīni mahāpurisalakkhaṇāni paṭilabhatī”ti nānākammunā pana tesam nibbattiyam vattabbameva natthi, pāḷiyam pana “tassa kammassā”ti ekavacananiddeso sāmāññavasenāti daṭṭhabbo. Evañca katvā satapuññalakkhaṇavacanam samatthitam hoti. “Imāni dve mahāpurisalakkhaṇāni paṭilabhatī”tiādīsipi eseva nayoti.

Lakkhaṇasuttavaṇṇanāya līnatthappakāsanā.

## 8. Singālasuttavaṇṇanā

### Nidānavāṇṇanā

242. Pākārena parikkhittanti padaṃ ānetvā sambandho. **Gopuraṭṭālakayuttanti** dvārapāsādena ceva tattha tattha pākāramatthake paṭiṭṭhāpitaatṭālakehi ca yuttaṃ. Veḷūhi parikkhittattā, abbhantare pupphūpagaphalūpagarukkhasañchannattā ca **nilobhāsaṃ**. Chāyūdakasampattiyā, bhūmibhāgasampattiyā ca **manoramaṃ**.

**Kālakavesenāti** kalandakarūpena. **Nivāpanti** bhojanaṃ. **Tanti** uyyānaṃ.

“**Kho panā**”ti vacanālanākāramattametanti **tena samayenāti** atthavacanaṃ yuttaṃ. **Gahapati mahāsāloti** gahapatibhūto mahāsāro, ra-kārassa la-kāraṃ katvā ayaṃ niddeso. Vibhavasampattiyā mahāsārappatto kuṭumbiko. “**Putto panassa assaddho**”tiādi aṭṭhuppattiko yaṃ suttanikkhepoti taṃ aṭṭhuppattiṃ dassetuṃ āraddhaṃ. Kammaphalasaddhāya abhāvena **assaddho**. Ratanattaye pasādābhāvena **appasanno**. **Evamāhāti** evaṃ idāni vuccamānākārena vadati.

**Yāvajīvaṃ anussaraṇīyā hoti** hitesitāya vuttā pacchimā vācāti adhippāyena. **Puthudisāti** visuṃ visuṃ disā, tā pana anekāti āha “**bahudisā**”ti.

243. “**Na tāva pavitṭho**”tiādīsu vattabbaṃ heṭṭhā vuttameva. **Na idānevāti** na imāya eva velāya. Kiṃ carahīti āha “**paccūsasamayepī**”tiādi. **Gihivinayanti** gihīnaṃ gahaṭṭhānaṃ vinayatantibhūtaṃ “gihīnā evaṃ vattitabba”nti gahaṭṭhācārassa gahaṭṭhavattassa anavasesato imasmim sutte savisesaṃ katvā vuttattā. **Tathevāti** yathā buddhacakkhunā diṭṭhaṃ, theva passi. **Namassati** vattavasena kattabbanti gahetvā ṭhitattā.

### Chadisādivāṇṇanā

244. **Vacanaṃ sutvāva cintesi** buddhānubhāvena attasammāpaṇidhānamimittena puññabalena ca codiyamāno. **Na kira tā etāti** tā cha disā etā idāni mayā namassiyamānā puratthimādikā na honti kirāti. **Nipātamattanti** anattakabhāvaṃ tassa vadati. **Pucchāpadanti** pucchāvacanaṃ.

Bhagavā gahapatiputtana namassitabbā cha disā pucchito desanākusalatāya ādito eva tā akathetvā tassa tāva paṭipattiyā naṃ bhājanabhūtaṃ kātuṃ vajjanīyavajjanatthañceva sevittabasevanatthañca ovādaṃ dento “**yato kho gahapatiputtā**”tiādīnā desanaṃ ārabhi. Tattha **kammakilesāti** kammabhūtā saṃkilesā. **Kilissantīti** kiliṭṭhā malīnā viya ṭhitā, upatāpitā ca hontīti attho. **Tasmāti** kilissananimittattā. Yādipi surāpānaṃ pañcaverabhāvena upāsakehi parivajjanīyaṃ, tassa pana apāyamukhabhāvena parato vattukāmatāya pāṇātipātādike eva sandhāya “cattāro”ti vuttaṃ, na “pañcā”ti. “Visuṃ akammāpathabhāvato cā”ti apare. “Surāpānampi ‘surāmerayapānaṃ, bhikkhave, āsevitāṃ bhāvitaṃ bahulīkataṃ nirayaṃvattanika’ntiādi (a. ni. 8.40) vacanato visuṃ kammāpathabhāvena āgataṃ. Tathā hi taṃ duccharitakammaṃ hutvā duggatigāmiṭṭhivattakabhāvena niyata”nti keci, tesāṃ matena ekādasa kammāpathā siyuṃ. Tasmā yathāvuttessveva kammāpathesu upakāraṃkattasabhāgattavasena anuppaveso daṭṭhabboti “visuṃ akammāpathabhāvato cā”ti suvuttametaṃ. Surāpānassa bhogāpāyamukhabhāvena vattukāmatāya “cattāro” tveva avoca. Tiṭṭhati ettha phalaṃ tadāyattavuttitāyāti **ṭhānaṃ**, hetūti āha “**ṭhānehīti kāraṇehī**”ti. Apenti apagacchanti, apeti vā etehīti **apāyā**, apāyānaṃ, apāyā eva vā mukhāni dvārānīti **apāyamukhāni**. **Vināsamukhānīti** etthāpi eseva nayo.

Kiñcāpi “ariyasāvakaṃ”ti pubbe sādharmaṇato vuttaṃ, visesato pana paṭhamāya bhūmiyaṃ ṭhitasseva vakkhamānanayo yujjati “**soti so sotāpanno**”ti vuttaṃ. Pāpaka-saddo nihīnapariyāyoti “**lāmakehi**”ti vuttaṃ. Apāyadukkaṃ, vaṭṭadukkaṃ paṇentīti vā pāpakā, tehi **pāpakehi**. **Cha disā**

**paṭicchādentoti** tena tena bhāgena dissantīti “disā”ti saññite cha bhāge satte yathā tehi saddhiṃ attano chiddaṃ na hoti, evaṃ paṭicchādentō paṭisandhārento. **Vijjanatthāyāti** abhibhavanatthāya. Yo hi diṭṭhadhammikaṃ, samparāyikaṃ anattaṃ parivajjanavasena abhibhavati, tato eva tadubhayatthaṃ sampādeti, so ubhayalokavijayāya paṭipanno nāma hoti paccatthikaniggaṇhanato, sakatthasampādanato ca. Tenāha “**ayañceva loko**”tiādi. Pāṇātipātādīni **pañca verāni** verappasavanato. **Āraddho hotīti** saṃsādhito hoti, tayidaṃ saṃsādhanam kittisaddena idha sattānam cittatosanena, verābhāvāpādanena ca hotīti āha “**paritosito ceva nipphādito cā**”ti. Puna **pañca verāni**ti pañca veraphalāni uttarapadalopena.

**Katamassāti** katame assa. **Kilesasampayuttattā kilesoti** taṃyogato taṃsadisam vadati yathā “pītisukhaṃ paṭhamam jhānam, (dī. ni. 1.226; ma. ni. 1.271, 287, 297; saṃ. ni. 2.152; a. ni. 4.123; 5.28; pārā. 11; dha. sa. 499; vibha. 508) nīlam vattha”nti ca. Sampayuttatā cettha tadekaṭṭhatāya veditabbā, na ekuppādādītāya. Evañca katvā pāṇātipātakammassa diṭṭhimānalobhādīhipi kiliṭṭhatā siddhā hoti, micchācārassa dosādīhi kiliṭṭhatā. Tenāha “**saṃkilesoyevā**”tiādi. Pubbe vuttaatthavasena pana sammukhenapi nesam kilesapariyāyo labbhateva. **Etadatthaparidīpakamevāti** yo “pāṇātipāto kho”tiādinā vutto, etassa atthassa paridīpakameva. Yadi evaṃ kasmā puna vuttanti āha “**gāthābandha**”nti, tassa atthassa sukhaggaṇatthaṃ bhagavā gāthābandham avocāti adhippāyo.

### Catuṭṭhānādivaṇṇanā

246. “Pāpakammaṃ karotī”ti kasmā ayaṃ uddesaniddeso pavattoti antolīnacodanam sandhāya “**idaṃ bhagavā**”tiādi vuttaṃ. Sukkapakkhavasena hi uddeso kato, kaṇhapakkhavasena ca niddeso āraddho. **Kāraṅketi** pāpakammassa kāraṅke. **Akāraṅko pākaṭo hoti** yathā paṭipajjanto pāpam karotī nāma, tathā appaṭipajjanato. Saṃkilesadhammavivajjanapubbakam vodānadhammapaṭipattiācikkhanam idha desanākosallam. **Paṭhamataram kārakam dassento āha** yathā “vāmam muñca dakkhiṇam gaṇhā”ti (dha. sa. aṭṭha. 498) tathā hi bhagavā aṭṭhatimṣa maṅgalāni dassento “asevanā ca bālāna”nti (khu. pā. 5.3; su. ni. 262) vatvā “paṇḍitānañca sevanā”ti (khu. pā. 5.3; su. ni. 262) avoca. **Chandāgatinti** ettha sandhivasena saralopoti dassento āha “**chandena pemena agati**”nti. **Chandāti** hetumhi nissakkavacananti āha “**chandenā**”ti. Chanda-saddo cettha taṇhāpariyāyo, na kusalachandādi-pariyāyoti āha “**pemenā**”ti. **Parapadesūti** “dosāgatim gacchanto”tiādīsu vākyesu. “**Eseva nayo**”ti iminā “dosena kopenā”ti evamādi atthavacanam atidisati. **Mittoti** daḷhamitto, sambhattoti attho. **Sandiṭṭhoti** diṭṭhamattasahāyo. **Pakativeravasenāti** pakatiyā uppannaveravasena, cirakālānubandhavirodhavasenāti attho. Tenevāha “**taṅkhaṇuppannakodhavasena vā**”ti. **Yaṃ vā taṃ vā** ayuttam akāraṇam **vatvā**. Visame corādiṅke, visamāni vā kāyaduccarītādīni samādāya vattanena nissito **visamanissito**.

**Chandāgatiādīni na gacchati** maggeneva catunnampi agatigamanānam pahīnattā, **agatigamanānīti** ca tathāpavattā apāyagamanīyā akusalacittuppādā veditabbā agati gacchati etehīti.

Yassati tena kittiyatīti **yaso**, thutighoso. Yassati tena purecarānucarabhāvena parivāriyatīti **yaso**, parivāroti āha “**kittiyasopi parivārayasopi**”ti. **Parihāyatīti** pubbe yo ca yāvatake labbhati, tato parito hāyati parikkhayaṃ gacchati.

### Chaapāyamukhādivaṇṇanā

247. Pūve bhājane pakkhipitvā tajjam udakam datvā madditvā katā **pūvasurā**. Evaṃ sesasurāpi. **Kiṇṇāti** pana tassā surāya bījam vuccati, ye “surāmodakā” tipi vuccanti, te pakkhipitvā katā **kiṇṇapakkhittā**. Harītakīsāpādīnānāsambhārehi saṃyojitā **sambhārasamyuttā**. Madhukatālanāḷikerādipuppharaso cirapārivāsiko **pupphāsavo**. Panasādiphalaraso **phalāsavo**. Muddikāraso **madhvāsavo**. Ucchuraso **guḷāsavo**. Harītakāmalakakaṭukabhaṇḍādīnānāsambhārānam raso cirapārivāsiko **sambhārasamyutto**. **Tam sabbampīti** tam sabbam dasavidhampi. **Madakaraṇavasena majjam** pivantam madayatīti katvā. Surāmerayamajje pamādaṭṭhānam



**surāmerayamajjapamādaṭṭhānaṃ.** Anu anu yogoti punappunaṃ taṃsamaṅgitā. Tenāha “**punappunaṃ karaṇa**”nti, aparāparaṃ pavattananti attho. **Uppannā ceva bhogā parihāyanti** pānabyasanena byasanakaraṇato. **Anuppannā ca nuppajjanti** pamattassa kammantesu ñāyakaraṇābhāvato. **Bhogānti** bhujjītabbaṭṭhena “bhogā”ti laddhanāmānaṃ kāmagaṇānaṃ. Apāyamukha-saddassa attho heṭṭhā vutto eva. **Avelāyāti** ayuttavelāya. Yadā vicarato attharakkhādayo na honti. **Visikhāsu cariyāti** racchāsu vicaraṇaṃ.

**Samajjā** vuccati maho, yattha naccānipi payojjīyanti, tesam dassanādiatthaṃ tattha abhiraivasena caraṇaṃ upagamaṇaṃ **samajjābhicaraṇaṃ.** **Naccādidassanavasena**ti naccādīnaṃ dassanādivasenaṃti ādisaddalopo daṭṭhabbo, dassanena vā savanampi gahitaṃ virūpekasesanayena. Ālocanasabhāvatāya vā pañcaviññānaṃ savanakiriyaṃyapi dassanasankhepasambhavato “dassanavasena” icceva vuttaṃ. Idha cittālasiyatā akāraṇanti “**kāyālasiyatā**”ti vuttaṃ. **Yuttappayuttatāti** tappasutatā atirekataratāya.

### Surāmerayassa chaādīnavādivaṇṇanā

**248.** Sayam daṭṭhabbanti **sandiṭṭhaṃ.** Sandiṭṭhameva **sandiṭṭhikaṃ,** dhanajānisaddāpekkhāya pana itthilingavasena niddeso, diṭṭhadhammikāti ayamettha atthoti āha “**idhalokabhāvinī**”ti. Samaṃ, sammā passitabbāti vā **sandiṭṭhikā,** pānasamakālabhāvinīti attho. **Kalahappavaḍḍhanī** mittassa kalahe anādīnavadassibhāvato. **Khettaṃ** uppattiṭṭhānabhāvato. **Āyatananti** vā kāraṇaṃ, ākaro vāti attho. **Paraloke akittim pāpuṇanti** akittisaṃvattaniyassa kammassa pasavanato. **Kopīnaṃ** vā pākaṭabhāvena akattabbarahassakammaṃ. Surāmadamattā ca pubbe attanā kataṃ tādisaṃ kammaṃ amattakāle chādentā vicarivā mattakāle paccatthikānampi vivaranti pākaṭaṃ karonti, tena tesam sā surā tassa kopīnassa nidaṃsanato “**kopīnanidaṃsanī**”ti vuccatīti evamettha attho daṭṭhabbo. **Kammassakatāpaññanti** nidassanamattaṃ daṭṭhabbaṃ. “Yaṃ kiñci lokiyaṃ paññaṃ dubbalaṃ karotiye vā”ti hi sakkā viññātum. Tathā hi byatirekamukhena tamattaṃ patiṭṭhapetuṃ “**maggapaññaṃ panā**”tiādi vuttaṃ. “**Antomukhameva na pavisaṭī**”ti iminā surāya maggapaññādubbalakaraṇassa durasamussāritabhāvamāha. Nanu cevaṃ surāya tassā paññāya dubbalaṃ karaṇe sāmattiyaṃvighāto acodito hoti ariyānaṃ anuppayogasseva coditattāti? Nayidaṃ evaṃ upayogopi nāma sadā tesam natthi, kuto kiccakaraṇanti imassa atthassa vuttattā. Atha pana aṭṭhānaparikkappavasenaṃ kadāci siyā upayogo, tathāpi so tassā dubbaliyaṃ īsakampi kātuṃ nālemeva sammadeva paṭipakkhadūrībhāvena suppatiṭṭhitabhāvato. Tenāha “maggapaññaṃ pana dubbalaṃ kātuṃ na sakkotī”ti. Maggasīsenā cettha ariyānaṃ sabbassāpi lokiyalokuttarāya paññāya dubbalabhāvāpādāne asamatthātaṃ dassitāti daṭṭhabbaṃ. Pajjati etena phalanti **padam,** kāraṇaṃ.

**249.** Attāpissa akālacārissa **agutto** sarasato **arakkhito** upakkamatopi parivajjanīyānaṃ aparivajjanato. Tenāha “**avelāya caranto hī**”tiādi. **Kaṇṭakādīnipīti pi**-saddena sobbhādi ke saṅgaṇhāti. **Verinopīti pi**-saddena corādikā saṅgayhanti. **Puttadārāti** ettha puttaggahaṇena puttīpi gahitāti āha “**puttadhītarō**”ti. **Bahi patthananti** kāmāpatthanāvasena antogehassitato nibaddhavatthuto bahiddhā patthanaṃ katvā. **Aññehi katapāpakammesūti** parehi katāsu pāpakiriyaṃsu. **Saṅkitabbo hoti** akāle tattha tattha caraṇato. **Ruhati** yasmiṃ padese corikā pavattā, tattha parehi diṭṭhattā. **Vattuṃ na sakkāti** “**ettakaṃ dukkhaṃ, ettakaṃ domanassa**”nti paricchinditvā vattuṃ na sakkā. **Taṃ sabbampi vikālacārimhi** puggale **āharitabbaṃ** tassa upari pakkhipitabbaṃ **hoti.** Kathaṃ? **Aññasmiṃ puggale** tathārūpe āsaṅkitabbe **asati.** Itīti evaṃ. **Soti vikālacārī.** **Purakkhato** purato attano upari āsaṅkante katvā carati.

**250.** **Naṭanātakādīnaccanti** naṭehi nātakehi naccitabbanātakādīnaccavidhi. **Ādi**-saddena avasiṭṭhaṃ sabbam saṅgaṇhāti. “Tattha gantabbaṃ hoti”ti vatvā tatthassa gamanena yathā anuppannānaṃ bhogānaṃ anuppādo, uppannānaṃ vināso hoti, taṃ dassetuṃ “**tassā**”tiādi vuttaṃ. **Gīti** saragataṃ, pakaraṇagataṃ, tālagataṃ, apadhānagatanti gandhabbasatthavihitam aññampi sabbam gītam veditabbaṃ. **Vādīti** viñāveṇumudiṅgādivādanaṃ. **Akkhānti** bhāratayuddhasitāharaṇādiakkhānaṃ. **Pāñissaranti** kaṃsatālam, “pāñitāla”ntipi vadanti.

**Kumbhathūnanti** caturassaambaṇakatālaṃ. “Kuṭabherisaddo” ti keci. “Eseva nayo” ti iminā “kasmim ṭhāne” tiādīnā nacce vuttamattham gītādīsu atidīsati.

**251. Jayanti** jūtaṃ jinanto. **Veranti** jītena kīlakapurisena jayanimittam attano upari veraṃ virodham **pasavati** uppādeti. Tañhissa verapasavanaṃ dassetuṃ “**jitaṃ mayā**” tiādi vuttam. **Jinoti** jūtaparājayāpannāya dhanajāniyā jino. Tenāha “**aññena jito samāno**” tiādi. **Vittam anusocati** tam jinam vittam uddissa anutthunati. **Vinicchayaṭṭhāneti** yasmim kismiñci aṭṭavinicchayaṭṭhāne. **Sakhipuṭṭhassāti** sakkhibhāvena puṭṭhassa. **Akkhasoṇḍoti** akkhadhutto. **Jūtakaroti** jūtapamādaṭṭhānānuyutto. **Tvampi nāma kulaputtoti** kulaputto nāma tvam, na mayaṃ tayi kolaputtiyaṃ idāni passāmāti adhippāyo. **Chinnabhinnakoti** chinnabhinnahirottappo, ahiriko anottappīti attho. **Tassa kāraṇāti** tassa atthāya.

**Anicchitoti** na icchito. **Positabbā bhavissati** jūtaparājayena sabbakālaṃ rittatucchabhāvato.

### Pāpamittatāya chaādīnavādivaṇṇanā

**252. Akkhadhuttāti** akkhesu dhuttā, akkhanimittam atthavināsakā. **Itthisoṇḍāti** itthīsu soṇḍā, itthisambhoganimittam ātappanakā. Tathā **bhattasoṇḍā** dayo veditabbā. **Pipāsāti** uparūpari surāpipāsā. Tenāha “**pānasoṇḍā**” ti. **Nekatikā** dayo heṭṭhā vuttā eva. Mettiuppattiṭṭhānatāya **mittā honti**. **Tasmāti** pāpamittatāya.

**253. Kammantanti** kammaṃ, yathā suttaṃyeva suttanto, evaṃ kammaṃyeva kammanto, tam kātuṃ **gacchāmāti vutto**. Kammaṃ vā anto niṭṭhānaṃ gacchati etthāti **kammanto**, kammakaraṇaṭṭhānaṃ, tam **gacchāmāti vutto**.

**Pannasakhāti** suraṃ pātuṃ panne paṭipajante eva sakhāti pannasakhā. Tenāha “**ayamevattho**” ti. “**Sammiyasammiyo**” ti vacanamettha atthīti **sammiyasammiyo**. Tenāha “**sammasammāti vadanto**” ti. **Sahāyo hotīti** sahāyo viya hoti. **Otārameva gavesati** randhameva pariyesati anattamassa kātukāmo. **Verappasavoti** parehi attani verassa pasavanaṃ anupavattanaṃ. Tenāha “**verabahulatā**” ti. Paresaṃ kariyamāno anatto ettha atthīti **anatto**, tabbhāvo **anattatāti** āha “**anattakāritā**” ti. Yo hi paresaṃ anattam karoti, so atthato attano anattakāro nāma, tasmā **anattatāti** ubhayānatthakāritā. **Ariyo** vuccati satto, kucchito ariyo **kadariyo**. Yassa dhammassa vasena so “**kadariyo**” ti vuccati, so dhammo **kadariyatā**, macchariyaṃ. Tam pana dubbisajjanīyabhāve ṭhitaṃ sandhāyāha “**suṭṭhu kadariyatā thaddhamacchariyabhā**” voti. Avipaṇṇasabhāvato uṭṭhātuṃ asakkonto ca iṇaṃ gaṇhanto **samsīdantova iṇaṃ vigāhati** nāma. Sūriye anuggate eva kammante anārabhanto rattim **anuṭṭhānasīlo**.

**Atthāti** dhanāni. **Atikkamantīti** apagacchanti. Atha vā **atthāti** kiccāni. **Atikkamantīti** atikkantakālāni honti, tesam atikkamopi atthato dhanānameva atikkamo. **Iminā kathāmaggenāti** iminā “**yato kho gahapatiputtā**” tiādi (dī. ni. 3.244) nayappavattena kathāsāṅkhātena hitādhigamūpāyena. **Ettakam kammanti** cattāro kammakilesā, cattāri agatigamanāni, cha bhogaṇaṃ apāyamukhānīti evaṃ vuttam cuddasavidham pāpakammaṃ.

### Mittapatirūpakavaṇṇanā

**254. Anattoti** “bhogajāni, āyasakyaṃ, parisamajjhe maṅkubhāvo, sammūlhamaraṇa” nti evaṃ ādiko diṭṭhadhammiko “**duggatiparikilesa, sugatiyañca appāyukatā, bahvābādhatā, atidaliddatā, appannapānatā**” ti evaṃ ādiko ca anatto **uppajjati**. **Yāni kānici bhayānīti** attānuvādabhayaparānuvādabhayadaṇḍabhayādīni loke labbhamānāni yāni kānici bhayāni. **Upaddavāti** antarāyā. **Upasaggāti** sarīrena saṃsaṭṭhāni viya uparūpari uppajjanakāni byasanāni. **Aññadatthūti** ekantenāti etasmim atthe nipāto “**aññadatthudaso**” tiādīsu (dī. ni. 1.42) viyāti vuttam “**ekamsenā**” ti.

**Yaṃ kiñci** gahaṇayogyāṃ **haratiyeva** gaṇhātiyeva. Vācā eva paramā etassa kammanti **vacīparamo**. Tenāha “**vacanamattenevā**”tiādi. **Anuppiyanti** takkanaṃ, yaṃ vā “**ruci**”ti vuccati yehi surāpānādīhi bhogā apenti vigacchanti, tesu tesāṃ **apāyesu** byasanahetūsu **sahāyo hoti**.

**255. Hārakoyeva hoti**, na dāyako, tamassa ekaṃsato hārakabhāvaṃ dassetuṃ “**sahāyassā**”tiādi vuttaṃ. **Yaṃ kiñci appakanti** pupphaphalādi yaṃ kiñci parittaṃ vatthuṃ **datvā**, **bahuṃ pattheti** bahuṃ mahaggaṃ vatthayugādiṃ paccāsīsati. Dāso viya hutvā mittassa taṃ taṃ kiccaṃ karonto kathaṃ amitto nāma jātoti āha “**aya**”ntiādi. Yassa kiccaṃ karoti anathaparihāratthaṃ, attano mittabhāvadassanattaṃca, taṃ **sevati**. **Atthakāraṇāti** vaḍḍhinimittaṃ, ayametesāṃ bhedo.

**256. Pareti** paradivase. **Na āgato sīti** āgato nāhosi. **Khīṇanti** tādisassa, asukassa ca dinnattā. **Sassasaṅgaheti** sassato kātabbadhaññaṃsaṅgahe **kate**.

**257.** “Dānādīsu yaṃ kiñci karomā”ti vutte “sādhu samma karomā”ti anujānātīti imamatthaṃ “**kalyāṇepi eseva nayo**”ti atidisati. Nanu evaṃ anujānanto ayaṃ mitto eva, na amitto mittapatirūpakoti? Anuppiyabhāṇīdassanamattametāṃ. Sahāyena vā desakālaṃ, tasmīṃ vā kate uppajjanakavirodhādiṃ asallakkhetvā “karomā”ti vutte yo taṃ jānanto eva “sādhu samma karomā”ti anuppiyaṃ bhaṇati, taṃ sandhāya vuttaṃ “kalyāṇaṃ pissa anujānātī”ti. Tena vuttaṃ “kalyāṇepi eseva nayo”ti.

**259. Mittapatirūpakā ete** mittāti **evaṃ jānitvā**.

### Suhadamittavaṇṇanā

**260. Sundarahadayāti** pemassa atthivasena bhaddacittā.

**261. Pamattaṃ rakkhatīti** ettha pamādavasena kiñci ayutte kate tādisa kāle rakkhaṇaṃ “bhītassa saraṇaṃ hoti”ti imināva taṃ gahitanti tato aññaṃeva pamattassa rakkhaṇavidhiṃ dassetuṃ “**majjaṃ pivivā**”tiādi vuttaṃ. Gehe ārakkhaṃ asaṃvihitassa bahigamanampi pamādapakkhikamevāti “**sahāyo bahigato vā hoti**”ti vuttaṃ. **Bhayaṃ harantoti** bhayaṃ paṭibāhanto. Bhogahetutāya phalūpacārena dhanāṃ “**bhoga**”nti vadati. **Kiccakaraṇīyeti** khuddake, mahante ca kātabbe **uppanne**.

**262. Nigūhituṃ yuttakathanti** nigūhituṃ chādetuṃ yuttakathaṃ, nigūhituṃ vā yuttā kathā etassāti **nigūhituṃ yuttakathaṃ**, attano kammaṃ. **Rakkhatīti** anāvīkaronto chādeti. **Jīvitampīti pi**-saddena kimāṅgaṃ pana aññaṃ pariggahitavattuntī dasseti.

**263. Passantesu passantesūti** āmeḍitavacanena nivāriyamānassa pāpassa punappunaṃ karaṇaṃ dīpeti. Punappunaṃ karonto hi pāpato visesena nivāretabbo hoti. **Saraṇesūti** saraṇesu **vattassu** abhinnāni katvā paṭipajja, **saraṇesu** vā upāsakabhāvena **vattassu**. **Nipuṇanti** saṅhaṃ. **Kāraṇanti** kammassakatādībhedayuttaṃ. **Idaṃ kammanti** imaṃ dānādībhedaṃ kusalakammaṃ. “Kamma”nti sādharmaṇato vuttassāpi tassa “sagge nibbantī”ti padantarāsannidhānena saddhāhirottappālobhādiguṇadhammasamaṅgītā viya kusalabhāvo jotito hoti. Saddhādayo hi dhammā saggagāmiṃmaggo. Yathāha –

“Saddhā hiriyaṃ kusalañca dānaṃ,  
Dhammā ete sappurisānuyātā;  
Etañhi maggaṃ diviyaṃ vadanti,  
Etena hi gacchati devaloka”nti. (a. ni. 8.32);

**264.** Bhavanaṃ sampattivaḍḍhanaṃ **bhavoti** attho, tappaṭikkhepena **abhavoti** āha “**abhavena**

**avuḍḍhiyā**’ti. **Pārijuññanti** jāni. **Anattamano hotīti** attamano na hoti anukampakabhāvato. Aññadattu taṃ abhavaṃ attani āpatitaṃ viya maññati. Idāni taṃ bhavaṃ sarūpato dassetuṃ **“tathārūpa”**ntiādi vuttaṃ. **Virūpoti** bībhaccho. **Na pāsādikoti** tasseva vevacanaṃ. **Sujātoti** sundarajātiko jātisampanno.

**265. Jalanti** jalanto. **Aggīvāti** aggikkhandho viya. **Bhāsati** virocāti. Yasmāssa bhagavatā savisesaṃ virocanaṃ loke pākaṭabhāvañca dassetuṃ **“jalaṃ aggīva bhāsati”**ti vuttaṃ, tasmā yadā aggi savisesaṃ virocāti, yattha ca t̥hito dūre t̥hitānampi paññāyati, taṃ dassanādivasena tamatthaṃ vibhāvetuṃ **“ratti”**ntiādi vuttaṃ.

**“Bhamarasseva irīyato”**’ti etenevassa bhogasamharaṇaṃ dhammikaṃ ñāyopetanti dassento **“attānampi”**tiādīmāha. **Rāsīm karontassāti** yathāssa dhanadhaññādibhogajātaṃ sampiṇḍitaṃ rāsibhūtaṃ hutvā tiṭṭhati, evaṃ irīyato āyūhantassa ca. **Cakkappamāṇanti** rathacakkappamaṇaṃ. **Nicayanti** vuḍḍhiṃ parivuḍḍhiṃ. **“Bhogā sannicayaṃ yanti”**’ti keci paṭhanti.

**Samāhatvāti** saṃharitvā. **Alaṃ**-saddo **“alameva sabbasaṅkhāresu nibbindituṃ, alaṃ virajjitu”**ntiādīsu (dī. ni. 2.272; saṃ. ni. 2.124, 129, 134, 143) yuttanti imamatthaṃ joteti, **“alamariyaññadassanavisesa”**ntiādīsu (ma. ni. 1.328) pariyattanti. Yo veṭhitattotiādīsu (su. ni. 217) viya atta-saddo sabhāvaparīyāyoti taṃ sabbaṃ dassento **“yuttasabhāvo”**tiādīmāha. **Sanṭhapetunti** sammā ṭhapetuṃ, sammadeva pavattetunti attho.

**Evaṃ vibhajantoti** evaṃ vuttanayena attano dhanaṃ catudhā vibhajanto vibhajanahetu **mittāni ganthati** soḷasa kalyāṇamittāni mettāya ajirāpanena pabandhati. Tenāha **“abhejjanāni ṭhapeti”**ti. Kathaṃ pana vuttanayena catudhā bhogaṇaṃ vibhajanena mittāni ganthatīti āha **“yassa hi”**tiādi. Tenāha bhagavā **“dadaṃ mittāni ganthati”**ti (saṃ. ni. 1.246). **Bhuñjeyyāti** upabhuñjeyya, upayūñjeyya cāti attho. Samaṇabrāhmaṇakapaṇaddhikādīnaṃ dānavasena ceva adhivatthadevatādīnaṃ petabalivasena, nhāpitādīnaṃ vetanavasena ca viniyogopi upayogo eva. Tathā hi vakkhati **“imesu panā”**tiādi āyo nāma heṭṭhimantena vayato catugguṇo icchitabbo, aññathā vayo avicchedavasena na santāneyya, nidheyya, bhājeyya ca asambhateti vuttaṃ **“dvīhi kammaṃ payojaye”**ti. **Nidhetvāti** nidahitvā, bhūmigataṃ katvāti attho. **Rājādivasenāti ādi**-saddena aggiudakacoradubbhikkhādike saṅgaṇhāti. **Nhāpitādīnanti ādi**-saddena kulālarajakādīnaṃ saṅgaho.

### Chaddisāpaṭicchādanakaṇḍavaṇṇanā

**266. Catūhi kārāṇehīti** na chandagamanādīhi catūhi kārāṇehi. **Akusalaṃ pahāyāti** **“cattāro kammakilesā”**’ti vuttaṃ akusalañceva agatigamanākusalañca pajahitvā. **Chahi kārāṇehīti** surāpānādīsu ādīnavadassanasāṅkhātehi chahi kārāṇehi. Surāpānānuyogādibhedaṃ chabbidhaṃ **bhogaṇaṃ apāyamukhaṃ** vināsamukhaṃ **vajjetvā. Soḷasa mittānīti** upakārādivasena cattāro, pamattarakkhaṇādikkavisesavasena paccekaṃ cattāro cattāro katvā soḷasavidhe kalyāṇamitte **sevanto** bhajanto. Satthavāñijjādīmicchājīvaṃ pahāya ñāyeneva vattanato **dhammikenā ājīvena jīvati. Namassitabbāti** upakāravasena, guṇavasena ca namassitabbā sabbadā natena hutvā vattitabbā. Disā-saddassa attho heṭṭhā vutto eva. **Āgamanabhayanti** tattha sammā appaṭipattiyā, micchāpaṭipattiyā ca uppajjanakaanattho. So hi bhāyanti etasmāti **“bhaya”**nti vuccati. Yena kārāṇena mātāpituādayo puratthimādibhāvena apadiṭṭhā, taṃ dassetuṃ **“pubbupakāritāyā”**tiādi vuttaṃ, tena atthasarikkhatāya nesam puratthimādibhāvoti dasseti. Tathā hi mātāpitaro puttānaṃ puratthimabhāvena tāva upakāribhāvena dissanato, apadissanato ca puratthimā disā. Ācariyā antevāsikassa dakkhiṇabhāvena, hitāhitam patikusalabhāvena dakkhiṇārahātāya ca vuttanayena dakkhiṇā disā. Iminā nayena **“pacchimā disā”**tiādīsu yathārahaṃ attho veditabbo. Gharāvāsassa dukkhabahulatāya te te ca kiccavisesā yathāuppatitadukkhaniṭṭharaṇatthāti vuttaṃ **“te te dukkhavisesa uttarati”**ti. Yasmā dāsakammakarā sāmikassa pādānaṃ payirupāsānavasena ceva tadanucchavikakiccāsādhānavasena ca yebhuyyena santikāvacarā, tasmā vuttaṃ **“pādamūle patitṭhānavasenā”**ti. **Guṇehīti** uparibhāvāvahehi guṇehi.

**Upari ʘhitabhāvenā**ti saggamagge mokkhamagge ca patiʘhitabhāvena.

**267. Bhatoti** posito, taṃ pana bharaṇaṃ jātakā lato paʘṭhāya sukhapaccayūpaharaṇena dukkhapaccayūpaharaṇena ca tehi pavattitanti dassetuṃ “**thaññaṃ pāyevā**”tiādi vuttaṃ. **Jaggitoti** paʘijaggito. **Teti** mātāpitaro.

Mātāpitūnaṃ santakaṃ khettādiṃ avināsetvā rakkhitaṃ tesāṃ paramparāya ʘhitiyā kāraṇaṃ hotīti “**taṃ rakkhanto kulavaṃsaṃ saṅghapeti nāma**”ti vuttaṃ. **Adhammikavaṃsatoti** “kulappadesādinā attanā sadisaṃ ekaṃ purisaṃ ghaṭetvā vā gīvāyaṃ vā hatthe vā bandhamañiyaṃ vā hāretabba”nti evaṃ ādinā pavattaadhammikapaveṇito. **Hāretvā**ti apanetvā taṃ gāhaṃ vissajjāpetvā. Mātāpitaro tato gāhato vivecaneneva hi āyatim tesāṃ paramparāhārikā siyā. **Dhammikavaṃseti** hiṃsādiviratiyā dhammike vaṃse dhammikāya paveṇiyaṃ. **ʘhapentoti** patiʘhapento. **Salākabhattādīni anupacchindivā**ti salākabhattadānādīni avicchindivā.

**Dāyajjaṃ paʘipajjāmī**ti ettha yasmā dāyapaṭilābhassa योग्यabhāvena vattamānoyeva dāyajjaṃ paʘipajjati nāma, na itaro, tasmā tamatthaṃ dassetuṃ “**mātāpitaro**”tiādi vuttaṃ. **Dāraketi** putte. **Vinicchayaṃ patvā**ti “puttassa cajavissajjana”nti evaṃ āgataṃ vinicchayaṃ āgamma. **Dāyajjaṃ paʘipajjāmīti vuttanti** “dāyajjaṃ paʘipajjāmī”ti idaṃ catutthaṃ vattanaʘṭhānaṃ vuttaṃ. **Tesanti** mātāpitūnaṃ. **Tatiyadivasato paʘṭhāyā**ti matadivasato tatiyadivasato paʘṭhāya.

Pāpato nivāraṇaṃ nāma anāgatavisayaṃ. Sampattavatthutopi hi nivāraṇaṃ vītikkame anāgate eva siyā, na vattamāne. Nibbattitā pana pāpakiriya garahaṇamattapaṭikārāti āha “**katampi garahanti**”ti. **Nivesenti**ti patiʘhapenti. Vuttappakārā mātāpitaro anavajjameva sippaṃ sikkhāpentīti vuttaṃ “**muddāgaṇanādisippa**”nti. **Rūpādīhīti ādi**-saddena bhogaparivārādiṃ saṅgaṇhāti. **Anurūpenā**ti anucchavikena.

Niccabhūto samayo abhiṇhakarānakālo. Abhiṇhattho hi ayaṃ nicca-saddo “niccapahaṃsito niccapahaṭṭho”tiādīsu viya. Yuttapattakālo eva samayo **kālasamayo**. “**Uʘṭhāya samuʘṭhāyā**”ti imināssa niccameva dāne tesāṃ yuttapayuttataṃ dasseti. **Sikhāʘhapanāṃ** dāraakāle. **Āvāhavivāhaṃ** puttadhītūnaṃ yobbanappattakāle.

**Taṃ** bhayaṃ yathā nāgacchati, evaṃ pihitā hoti “puratthimā disā”ti vibhattim pariṇāmetvā yojanā. Yathā pana taṃ bhayaṃ āgaccheyya, yathā ca nāgaccheyya, tadubhayaṃ dassetuṃ “**sace hi**”tiādi vuttaṃ. **Vippaʘipannā**ti “bhato ne bharissāmī”tiādinā uttasammāpaʘipattiyā akāraṇena ceva tappaʘipakkhamicchāpaʘipattiyā akāraṇena ca vippaʘipannā **puttā assu**. **Etāṃ bhayanti etāṃ** “**mātāpitūnaṃ appatirūpā**ti viññūnaṃ garahitabbatābhayaṃ, paravādabhaya”nti evamādi **āgaccheyya** puttesu. **Puttānaṃ nānurūpā**ti ettha “puttāna”nti padaṃ etāṃ bhayaṃ puttānaṃ āgaccheyyāti evaṃ idhāpi ānetvā sambandhitabbaṃ. Tādisānañhi mātāpitūnaṃ puttānaṃ ovādānusāsaniyo dātuṃ samatthakā lato paʘṭhāya tā tesāṃ dātabbā evāti katvā tathā vuttaṃ. Puttānañhi vasenāyaṃ desanā anāgatā **sammāpaʘipannesu** ubhosu attano, mātāpitūnañca vasena uppajjanakatāya **sabbaṃ bhayaṃ na hoti** sammāpaʘipannattā. Evāṃ paʘipannattā eva **paʘicchannā hoti** tattha kātābbaṭṭasanthāraṇassa sammadeva katattā. **Khemā**ti anupaddavā. Yathāvuttasammāpaʘipattiyā akāraṇena hi uppajjanakaupaddavā karaṇena na hontīti.

“Na kho te”tiādinā vutto saṅgītanāruḷho bhagavatā tadā tassa vutto paramparāgato attho veditabbo. Tenāha “**bhagavā siṅgālakāṃ etadavocā**”ti. **Ayañhī**ti ettha **hi**-saddo avadhāraṇe. Tathā hi “**no aññā**”ti aññadisaṃ nivatteti.

**268.** Ācariyaṃ dūratova disvā uʘṭhānavacaneneva tassa paccuggamanādisāmīkiriya avuttasiddhāti taṃ dassento “**paccuggamaṇaṃ katvā**”tiādimāha. **Upaʘṭhānenā**ti payirupāsanena. **Tikkhattuṃupaʘṭhānagamanenā**ti pāto, majjhanhike, sāyanti tīsu kālesu upaʘṭhānatthaṃ

upagamanena. Sippuggahaṇatthaṃ pana upagamanam upaṭṭhānantogadham payoJanavasena gamanabhāvatoti āha “**sippuggahaṇa...pe... hoti**”ti. Sotum icchā **sussūsā**, sā pana ācariye sikkhitabbasikkhe ca ādaraḡāravapubbikā icchitabbā “addhā iminā sippena sikkhitena evarūpaṃguṇam paṭilabhissāmī”ti. Tathābhūtaṇca taṃ savanam saddhāpubbaṅgamam hotīti āha “**saddahitvā savanenā**”ti. Vuttamevatthaṃ byatirekavasena dassetum “**asaddahitvā...pe... nādhigacchatī**”ti vuttam. Tasmā tassattho vuttapaṭipakkhanayena veditabbo. Yam sandhāya “avasesakhuddakapāricariyāyā”ti vuttam, taṃ vibhajanam anavasesato dassetum “**antevāsikena hī**”tiādi vuttam. **Paccupaṭṭhānādīnīti ādi**-saddena āsanapaññāpanam bījananti evamādiṃ saṅgaṇhāti. **Antevāsikavattanti** antevāsikena ācariyamhi sammāvattitabbavattam. **Sippapaṭiggahaṇenāti** sippaganthassa sakkaccaṃ uggahaṇena. Tassa hi suṭṭhu uggahaṇena tadanusārenassa payogopi sammadeva uggahito hotīti. Tenāha “**thokaṃ gahetvā**”tiādi.

**Suvinītam vinentīti** idha ācāravīnayo adhippeto. Sippasmim̄ pana sikkhāpanavīnayo “suggahitam gāhāpentī”ti imināva saṅgahitoti vuttam “**evam te nisīditabba**”ntiādi. Ācariyā hi nāma antevāsike na diṭṭhadhammike eva vinenti, atha kho samparāyikepīti āha “**pāpamittā vajjetabbā**”ti. Sippaganthassa uggahaṇanam nāma yāvadeva payogasampādanatthanti āha “**payogaṃ dassetvā gaṇhāpentī**”ti. **Mittāmaccesūti** attano mittāmaccesu. **Paṭiyādentīti** pariggahetvā nam mamattavasena paṭiyādentī. “Ayaṃ amhākaṃ antevāsiko”tiādinā hi attano pariggahitadassanamukhena ceva “bahussuto”tiādinā tassa guṇapariggaṇhanamukhe ca taṃ tesam paṭiyādentī. **Sabbadisāsu rakkham karonti** cātuddisabhāvasampādanenassa sabbattha sukhajīvibhāvasādhanato. Tenāha “**uggahitasippo hī**”tiādi. Sattānañhi duvidhā sarīrarakkhā abbhantaraparissayaapaṭighātena, bāhiraparissayaapaṭighātena ca. Tattha **abbhantaraparissayo** khuppipāsādibhedo, so lābhasiddhiyā paṭihaññati tāya tājāparihārasaṃvidhānato. **Bāhiraparissayo** coraamanussādihetuko, so vijjāsiddhiyā paṭihaññati tāya tājāparihārasaṃvidhānato. Tena vuttam “**yaṃ yaṃ disa**”ntiādi.

Pubbe “**uggahitasippo hī**”tiādinā sippasikkhāpaneneva lābhuppattiyā disāsu parittāṇakaraṇam dassitam, idāni “yaṃ vā so”tiādinā tassa uggahitasippassa nipphattivāsena guṇakittanamukhena paggaṇhanenapi lābhuppattiyāti ayametesam vikappānam bhedo. **Sesanti** “paṭicchannā hoti”tiādikam pālīāgatam, “evaṇca pana vatvā”tiādikam aṭṭhakathāgataṇca. **Etthāti** etasmim̄ dutiyadisāvāre. **Purimanayenevāti** pubbe paṭhamadisāvāre vuttanayeneva.

**269. Sammānanā** nāma sambhāvanā, sā pana atthacariyālakkaṇā ca dānalakkaṇā ca catutthapaṇcamatṭhāneheva saṅgahitāti piyavacanalakkaṇam taṃ dassetum “**sambhāvitakathākathanenā**”ti vuttam. Vigatamānanā **vimānanā**, na vimānanā **avimānanā**, vimānanāya akaraṇam. Tenāha “**yathā dāsakammakarādayo**”tiādi. Sāmikena hi vimānitānam itthīnam sabbo parijano vimānetiyeva. **Paricarantoti** indriyāni paricaranto. **Tam aticarati nāma** taṃ attano gihinim̄ atimaññitvā agaṇetvā vattanato. **Issariyavossaggenāti** ettha yādiso issariyavossaggo gihinīyā anucchaviko, taṃ dassento “**bhattagehe vissatṭhe**”ti āha. Gehe eva ṭhatvā vicāretabbampi hi kasivāñijjādikammam kulitthiyā bhāro na hoti, sāmikasēva bhāro, tato āgatasāpateyyam̄ pana tāya suguttam̄ katvā ṭhapetabbam̄ hoti. “**Sabbam̄ issariyam̄ vissatṭham̄ nāma hoti**”ti etā maññantīti adhippāyo. Itthīyo nāma puttalābhena viya mahagghavīpulālaṅkāralābhenapi na santussantevāti tāsam̄ tosanam̄ alaṅkāradānanti āha “**attano vibhavānurūpenā**”ti.

Kulitthiyā saṃvihitabbakammantā nāma āhārasampādanavicārappakārāti āha “**yāgubhattapacanakālādīnī**”tiādi. **Sammānanādīhi** yathāraham̄ piyavacanehi ceva bhojanadānādīhi ca **paheṇakapesanādīhi** aññato, tattheva vā uppannassa paṇṇākārassa chaṇadivasādīsū pesetabbapiyabhaṇḡehi ca **saṅgahitaparījanā**. Gehasāminīyā antogehajano niccam̄ saṅgahito evāti vuttam̄ “**idha parījano nāma...pe... nātijano**”ti. **Ābhatadhananti** bāhirato antogeham̄ pavesitadhanam̄. Gihinīyā nāma paṭhamam̄ āhārasampādane kosallam̄ icchitabbam̄, tattha ca yuttapayuttatā, tato sāmikassa itthījanāyattesu kiccākiccesu, tato puttānam̄ parījanassa kātabbakiccesūti āha “**yāgubhattasampādanādīsū**”tiādi. “Nikkosajjā”ti vatvā tameva nikkosajjatam̄ byatirekato,

anvayato ca vibhāvetuṃ “**yathā**”tiādi vuttaṃ. **Idhāti** imasmiṃ tatiyadisāvāre. **Purimanayenevāti** paṭhamadisāvāre vuttanayeneva. Iti bhagavā “pacchimā disā puttadārā”ti uddisitvāpi dāravaseneva pacchimaṃ disaṃ vissajjesi, na puttavasena. Kasmā? Puttā hi dārakakāle attano mātu anuggaṇhaneneva anuggahitā honti anukampitā, viññutaṃ pattakāle pana yathā tepi tadā anuggahetabbā, svāyaṃ vidhi “pāpā nivārentī”tiādinā paṭhamadisāvāre dassito evāti kiṃ puna vissajjanenāti. Dānādisaṅgahavatthūsu yaṃ vattabbaṃ, taṃ heṭṭhā vuttamevāti.

**270.** Cattāripi ṭhānāni laṅghitvā pañcamameva ṭhānaṃ vivarituṃ “**avisamvādanatāyā**”tiādi vuttaṃ. Tattha **yassa yassa nāmaṃ gaṇhātīti** sahāyo atthikabhāvena yassa yassa vatthuno nāmaṃ katheti. **Avisamvādetvāti** ettha duvidhaṃ avisamvādanaṃ vācāya, payogena cāti taṃ duvidhampi dassetuṃ “**idampi**”tiādi vuttaṃ. “**Dānenā**”ti ca idaṃ nidassanamattaṃ datṭhabbaṃ itarasaṅgahavatthuvasenapi avisamvādetvā saṅgaṇhanassa labbhanato, icchitabbato ca. Aparā pacchimā pajā **aparapajā**, aparāparaṃ uppannā vā pajā **aparapajā**. **Paṭipūjanā** nāma mamāyanā, sakkārikariyā cāti tadubhayaṃ dassetuṃ “**kelāyantī**”tiādi vuttaṃ. **Mamāyantīti** mamattaṃ karonti.

**271. Yathābalaṃ kammantaṃ vidhānenāti** dāsakammakarānaṃ yathābalaṃ balānurūpaṃ tesam tesam kammantānaṃ samvidahanena vicāraṇena, kāraṇanenāti attho. Tenāha “**daharehī**”tiādi. **Bhattavetanānuppādānenāti** tassa tassa dāsakammakarassa anurūpaṃ bhattassa, vetanassa ca padānena. Tenevāha “**ayaṃ khuddakaputto**”tiādi. **Bhesajjādīnīti ādi-saddena** sappāyāhārasanaṭṭhānādiṃ saṅgaṇhāti. Sātabhāvo eva rasānaṃ **acchariyatāti** āha “**acchariye madhurarase**”ti. **Tesanti** dāsakammakarānaṃ. **Vossajjanenāti** kammakaraṇato vissajjanena. **Velaṃ ṇatvāti** “pahārāvaseso, upaḍḍhapahārāvaseso vā divaso”ti velaṃ jānitvā. Yo koci mahussavo **chaṇo** nāma. Kattikussavo, phagguṇussavoti evaṃ nakkhattasallakkhito mahussavo **nakkhattaṃ**. **Pubbuṭṭhāyitā, pacchānipātītā** ca mahāsudassane vuttā evāti idha anāmaṭṭhā.

**Dinnādāyino**ti pubbapadāvadhāraṇavasena sāvadhāraṇavacananti avadhāraṇena nivattitaṃ dassetuṃ “**corikāya kiñci aggahetvā**”ti vuttaṃ. Tenāha “**sāmikehi dinnasseva ādāyino**”ti. **Na mayaṃ kiñci labhāmāti anujjhāyitvāti** paṭisedhadvāyena tehi laddhabbassa lābhaṃ dasseti. “**Kim etassa kammena katenāti anujjhāyitvā**”ti idaṃ tuṭṭhahadayatāya kāraṇadassanaṃ paṭipakkhadūrībhāvato. **Tuṭṭhahadayatādassanampi** kammaṃ sukatakāritāya kāraṇadassanaṃ. Kitti eva vaṇṇo **kittivaṇṇo**, taṃ kittivaṇṇaṃ guṇakathaṃ haranti, taṃ taṃ disaṃ upāharantīti **kittivaṇṇaharā**. Tathā tathā kittetabbato hi **kitti**, guṇo, tesam vaṇṇanaṃ kathanam **vaṇṇo**. Tenāha “**guṇakathāhārakā**”ti.

**272.** Kāraṇabhūtā mettā etesaṃ atthīti **mettāni**, kāyakammādīni. Yāni pana tāni yathā yathā ca sambhavanti, taṃ dassetuṃ “**tatthā**”tiādi vuttaṃ. “**Vihāragamana**”ntiādisu “mettacittaṃ paccupaṭṭhāpetvā”ti padaṃ āharitvā yojetabbaṃ. **Anāvaṭadvārātāyāti** ettha **dvāraṃ** nāma alobhajjhāsayaṭā dānassa mukhabhāvato. Tassa sato deyyadhammassa dātukāmatā **anāvaṭatā** evaṃhi gharamāvasanto kulaputto gehadvāre pihitepi anāvaṭadvāro eva, aññathā apihitepi gharadvāre āvaṭadvāro evāti. Tena vuttaṃ “**tatthā**”tiādi. Vivaritvāpi vasantoti vacanaseso. **Pidahitvāpīti** etthāpi eseva nayo. “**Sīlavantesū**”ti idaṃ paṭiggāhakato dakkhiṇavisuddhidassanattaṃ vuttaṃ. Karuṇākhettepi dānena anāvaṭadvārātā eva. “**Santaññevā**”ti iminā asantaṃ natthivacanaṃ pucchitapaṭivacanaṃ viya icchitabbaṃ evāti dasseti viññūnaṃ atthikānaṃ cittaṃ maddavakaraṇato. “**Purehattaṃ paribhuñjitabba**”nti idaṃ yāvakālike eva āmisabhāvassa niruḷhatāya vuttaṃ.

“**Sabbe sattā**”ti idaṃ tesam samaṇabrāhmaṇānaṃ ajjhāsayasampattidassanaṃ pakkhapātābhāvadīpanato, odhiso pharaṇāyapi mettābhāvanāya labbhanato. Yāya kusalābhivaḍḍhīkaṅkhāya tesam upaṭṭhākaṇaṃ, tathā nesaṃ gehapavisaṇaṃ, taṃ sandhāyāha “**pavisantāpi kalyāṇena cetasā anukampanti nāmā**”ti. **Sutassa pariyaḍāpanaṃ** nāma tassa yāthāvato atthaṃ vibhāvetvā vicikicchātamavidhāmanena visodhananti āha “**atthaṃ kathetvā kaṅkhaṃ vinodenti**”ti. Savanaṃ nāma dhammassa yāvadeva sammāpaṭipajjanāya asati tasmim tassa

niratthakabhāvato, tasmā sutassa pariyodāpanaṃ nāma sammāpaṭipajjāpananti āha “**tathattāya vā paṭipajjāpentī**”ti.

**273. Alamattoti** samatthasabhāvo, so ca atthato samattho evāti “**agāraṃ ajjhāvasanasamattho**”ti vuttaṃ. **Disānamassanaṭṭhāneti** yathāvuttadisānaṃ paccupaṭṭhānasaññite namassanakāraṇe. Paṇḍito hutvā kusalo cheko labhate yasanti yojanā. Saṅhaguṇayogato **saṅho, saṅhaguṇoti** panettha sukhumanipuṇapaññā, muduvācāti dassento “**sukhuma...pe... bhaṇanena vā**”ti vuttaṃ. **Disānamassanaṭṭhānenāti** yena ñāṇena yathāvuttā cha disā vuttanayena paṭipajjanto namassati nāma, taṃ ñāṇaṃ disānamassanaṭṭhānaṃ, tena **paṭibhānavā**. Tena hi taṃtaṃkiccayuttapattavasena paṭipajjanto idha “paṭibhānavā”ti vutto. **Nivātavuttīti** paṇipātasīlo. **Atthaddhoti** na thaddho **thambharahitoti** cittassa uddhumātalakkhaṇena thambhitabhāvena virahito. **Uṭṭhānavīriyasampannoti** kāyikena vīriyena samannāgato. **Nirantarakaraṇavasenāti** āradhassa kammassa satatakāritāvasena. **Ṭhānuppattiyā paññāyāti** tasmim tasmim atthakicce upaṭṭhite ṭhānaso taṅkhaṇe eva uppajjanakapaññāya.

**Saṅgahakaroti** yathārahaṃ sattānaṃ saṅgaṇhanako. **Mittakaroti** mittabhāvakaro, so pana atthato mitte pariyesanako nāma hotīti vuttaṃ “**mittagavesano**”ti. Yathāvuttaṃ vadaṃ vacanaṃ jānātīti **vadaññūti** āha “**pubbakārinā vuttavacanaṃ jānātī**”ti. Idāni tamevatthaṃ saṅkhepena vuttaṃ vitthāravasena dassetuṃ “**sahāyakassā**”tiādi vuttaṃ. Pubbe yathāpavattāya vācāya jānane vadaññutaṃ dassetvā idāni ākārasallakkhaṇena appavattāya vācāya jānanepi vadaññutaṃ dassetuṃ “**apicā**”tiādi vuttaṃ. “**Yena yena vā panā**”tiādinā vacanīyatthataṃ **vadaññū**-saddassa dasseti. **Netāti** yathādhippetamatthaṃ paccakkhato pāpetā. Tenāha “**taṃ tamatthaṃ dassento paññāya netā**”ti. Neti taṃ tamatthanti ānetvā sambandho. **Punappunaṃ netīti** anu anu neti, taṃ tamatthanti ānetvā yojanā.

**Tasmim tasminti** tasmim tasmim dānādīhi saṅgahehi saṅgahetabbe **puggale**. **Āṇiyāti** akkhasīsatāya āṇiyā. **Yāyatoti** gacchato. **Puttakāraṇāti** puttanimittaṃ. Puttaketukañhi puttana kattabbaṃ mānaṃ vā pūjamaṃ vā.

**Upayogavacaneti** upayogatthe. Vuccatīti **vacanaṃ**, attho. Upayogavacane vā vattabbe. **Paccattanti** paccattavacanaṃ. **Sammā pekkhantīti** sammadeva kātabbe pekkhantī. **Pasamsaniyāti** pasamsitabbā. **Bhavanti** ete saṅgahetabbe tattha puggale yathārahaṃ pavattentāti adhippāyo.

**274. “Iti bhagavā”**tiādi nigamanaṃ. **Yā disāti** yā mātāpituādīlakkhaṇā puratthimādīdisā. **Namassāti** namasseyyāsīti attho “yathā kathaṃ panā”tiādikāya gahapatiputtassa pucchāya vasena desanāya āradhattā “**pucchāya ṭhatvā**”ti vuttaṃ. **Akathitaṃ natthi** gihīhi kattabbakamme appamādapaṭipattiyā anavasesato kathitattā. Mātāpituādīsu hi tehi ca paṭipajjitabbapaṭipattiyā niravasesato kathaneneva rājādīsūpi paṭipajjitabbavidhi atthato kathito eva hotīti. Gihino vinīyanti, vinayaṃ upenti etenāti **gihivinayo**. **Yathānusiṭṭhanti** yathā idha satthārā anusīṭṭhaṃ gihicārittaṃ, tathā tena pakārena taṃ avirādhavā. **Paṭipajjamānassa vuddhiyeva pāṭikañkhāti** diṭṭhadhammikasamparāyikaparamatthehi vuddhiyeva icchitabbā avassambhāvinīti.

Singālasuttavaṇṇanāya līnatthappakāsanā.

## 9. Āṭānāṭiyasuttavaṇṇanā

### Paṭhamabhāṇavāraṇṇanā

**275.** “Catuddisaṃ rakkhaṃ ṭhapetvā”ti idaṃ dvīsu ṭhānesu catūsu disāsu ṭhapitaṃ rakkhaṃ sandhāya vuttanti tadubhayaṃ dassetuṃ “**asurasenāyā**”tiādi vuttaṃ. Attano hi adhikāre, attano rakkhāya ca appamajjanena tesam idaṃ dvīsu ṭhānesu catūsu disāsu ārakkhaṭṭhapanam. Yañhi taṃ



asurasenāya paṭisedhanattham devapure catūsu disāsu sakkassa devānamindassa ārakkhaṭṭhapanam, tam attano **adhikāre appamajjanam**. Yam pana nesam bhagavato santikam upasaṅkamanē catūsu disāsu ārakkhaṭṭhapanam, tam attano katā **rakkhāya appamajjanam**. Tena vuttam “**asurasenāya nivāraṇattha**”ntiādi. Pāliyam **catuddisanti** bhummatthe upayogavacananti bhummavasena tadattham dassento “**catūsu disāsū**”ti āha. **Ārakkham ṭhapetvāti** vessavaṇādayo cattāro mahārājāno attanā attanā rakkhitabbadisāsu ārakkham ṭhapetvā guttim sammadeva vidahitvā. **Balagumbam ṭhapetvāti** yakkhasenādisenābalasamūham ṭhapetvā. **Ovaraṇam ṭhapetvāti** paṭipakkhanisedhanasamattham āvaraṇam ṭhapetvā. Iti tīhi padehi yathākkamam paccekam devanagaradvārassa anto, dvārasamīpe, dvārato bahi, disārakkhāvasanoti tividhāya rakkhāya ṭhapitabhāvo vā dīpito. Tenāha “**evam sakkassa... pe... katvā**”ti. **Satta buddhe ārabbhāti** ettha satteva buddhe ārabhha paribandhanakāraṇam **mahāpadānaṭikāyam** (dī. ni. ṭī. 2.12) vuttanayeneva veditabbam. **Dhammāṇanti** dhammamayam āṇam, satthu dhammacakkanti attho. “Parisato bāhirabhāvo, asambhogo”ti evamādiṃ **idañcidañca** vivajjanakāraṇam **karissāmāti**. **Sāvananti** catunnampi parisānam tikkhattam parivārena anusāvanam, yathā sakko devānamindo asurasenāya nivāraṇattham catūsu disāsu ārakkham ṭhapēpeti, evam mahārājānopi tādise kiccavisesse attano ārakkham ṭhapenti. Imesampi hi tato sāsankam sappatibhayanti. Tena vuttam “**attanopī**”tiādi.

**Abhikkantāti** atikkantā, viḡatāti atthoti āha “**khaye dissatī**”ti. Teneva hi “nikkhanto paṭhamo yāmo”ti anantaram vuttam. **Abhikkantataroti** ativiya kantataro. Tādiso ca sundaro bhaddako nāma hotīti āha “**sundare dissatī**”ti.

**Koti** devanāgayakkhagandhabbādīsu ko katamo. **Meti** mama. **Pādānīti** pāde. **Iddhiyāti** imāya evarūpāya deviddhiyā. “**Yasasā**”ti iminā edisena parivārena, paricchena ca. **Jalanti** vijjotamāno. **Abhikkantenāti** ativiya kantena kamanīyena abhirūpena. **Vaṇṇenāti** sarīravaṇṇanibhāya. **Sabbā obhāsayaṃ disāti** dasapi disā pabhāsento cando viya, sūriyo viya ca ekobhāsam ekālokaṃ karontoti gāthāya attho. **Abhirūpeti** ulārarūpe sampannarūpe. **Abbhanumodaneti** sampahaṃsane. **Idha panāti** “abhikkantāya rattiyā”ti etasmiṃ pade. **Tenāti** khayapariyāyattā.

**Rūpāyatanādīsūti ādi**-saddena akkharādīnam saṅgaho daṭṭhabbo. **Suvaṇṇavaṇṇoti** suvaṇṇacchavīti ayamettha atthoti āha “**chaviya**”nti. Tathā hi vuttam “kañcanasannibhattaco”ti (dī. ni. 2.35; 3.200, 218; ma. ni. 2.386) **saññūlhāti** saṅganthitā. **Vaṇṇāti** guṇavaṇṇanāti āha “**thutiya**”nti, thomanāyanti attho. **Kulavaggeti** khattiyādikulakoṭṭhāse. Tattha “accho vippasanno”tiādinā vaṇṇitabbatṭhena **vaṇṇo**, chavi. Vaṇṇanatṭhena **vaṇṇo**, thuti. Abhitthavanatṭhena **vaṇṇo**, thuti, aññamaññam asaṅkarato vaṇṇitabbato ṭhapetabbato **vaṇṇo**, khattiyādikulavaggo. Vaṇṇiyati ñāpīyati etenāti **vaṇṇo**, ñāpakaṃ kāraṇam. Vaṇṇanato thūlarassādibhāvena upaṭṭhānato **vaṇṇo**, saṅghānam. “Mahantam khuddakam, majjhima”nti vaṇṇetabbato pamānetabbato **vaṇṇo**, pamāṇam. Vaṇṇiyati cakkhunā vivarīyatīti **vaṇṇo**, rūpāyatananti evam tasmim tasmim atthe **vaṇṇa**-saddassa pavatti veditabbā. **Soti** vaṇṇasaddo. **Chaviyam daṭṭhabbo** rūpāyatane gayhamānassa chavimukheneva gahetabbato. “Chaviḡatā pana vaṇṇadhātu eva suvaṇṇavaṇṇoti ettha vaṇṇaggahaṇena gahitā”ti apare.

**Kevalaparipuṇṇanti** ekadesampi asesetvā niravasesatova paripuṇṇanti ayamettha atthoti āha “**anavasesatā attho**”ti. **Kevalakappāti kappa**-saddo nipāto padapūraṇamattam, kevalam icceva attho. **Kevala**-saddo bahulavācīti āha “**yebhuyatā attho**”ti. Keci pana “īsakaṃ asamattā kevalakappā”ti vadanti. Evam sati anavasesattho eva kevala-saddattho siyā, anattantarena pana kappa-saddena padavaḍḍhanam katam kevalameva kevalakappanti. Atha vā kappanīyatā, paññāpetabbatā kevalakappā. **Abyāmissatā** vijātiyena asaṅkarā suddhatā. **Anatirekatā** tamparamatā visesābhāvo. **Kevalakappanti** kevalam dalham katvāti attho. **Kevalam** vuccati nibbānam sabbasaṅkhatavivittattā. Tam etassa adhiḡatam atthīti **kevalī**, sacchikatanirodho khīṇāsavo.

Kappa-saddo panāyam sa-upasaggo, anupasaggo cāti adhippāyena okappaniyapade labbhamānam kappaniyasaddamattam nidasseti, aññathā kappa-saddassa atthuddhāre okappaniyapadam

anidassanameva siyā. **Samaṇakappehīti** vinayakkamasiddhehi samaṇavohārehi. **Niccakappanti** niccakālaṃ. **Paññattīti** nāmañhetam tassa āyasmato, yadidaṃ kappoti. **Kappitakesamassūti** kattariyā cheditakesamassu. **Dvaṅgulakappoti** majjhanhikavelāya vītikantāya dvaṅgulatāvikkappo. **Lesoti** apadeso. Anavasesaṃ pharituṃ samatthassa obhāsassa kenaci kāraṇena ekadesapharaṇampi siyā, ayaṃ pana sabbasova pharīti dassetuṃ samantattho kappa-saddo gahitoti āha “**anavasesaṃ samantato**”ti.

Yasmā devatānaṃ sarīrappabhā dvādasayojanamattaṃ ṭhānaṃ, tato bhiyyopi pharivā tiṭṭhati, tathā vatthābharaṇādīhi samuṭṭhitā pabhā, tasmā vuttaṃ “**candimā viya, sūriyo viya ca ekobhāsaṃ ekaṃ pajjotaṃ karitvā**”ti. Kasmā ete mahārājāno bhagavato santike nisīdīmsu? Nanu yebhuyyena devatā bhagavato santikaṃ upagatā ṭhatvāva kathetabbaṃ kathentā gacchantīti? Saccametaṃ, idha pana nisīdane kāraṇaṃ atthi, taṃ dassetuṃ “**devatāna**”ntiādi vuttaṃ. “Idaṃ parittaṃ nāma sattabuddhapaṭisaṃyuttaṃ garu, tasmā na amhehi ṭhatvā gahetabba”nti cintetvā **parittagāravavasena nisīdīmsu**.

276. Kasmā panettha vessavaṇo eva kathesi, na itaresu yo kocīti? Tattha kāraṇaṃ dassetuṃ “**kiñcāpī**”tiādi vuttaṃ. **Vissāsiko** abhiṇhaṃ upasaṅkamanena. **Byattoti** visārado, tañcassa veyyattiyam suṭṭhu sikkhitabhāvenāti āha “**susikkhito**”ti. Manussesu viya hi devesupi kocideva purimajātiparicayena susikkhito hoti, tatrāpi kocideva yathādhippetamatthaṃ vattuṃ samattho paripuṇṇapadabyañjanāya poriyā vācāya samannāgato. “Mahesakkhā”ti imassa atthavacanam “ānubhāvasampannā”ti, **mahesakkhāti** vā mahāparivārāti attho. Pāṇātipāte ādīnavadassaneneva taṃ vipariyāyato tato veramaṇiyam ānisaṃso pākaṭo hotīti “**ādīnavam dassetvā**” icceva vuttaṃ. **Tesu senāsanesūti** yāni “araññavanappathānī”tiādinā (ma. ni. 1.34-45) vuttāni bhikkhūnaṃ vasanaṭṭhānabhūtāni araññāyatanāni, tesu bhikkhūhi sayitabbato, āsitabbato ca senāsanaaññitesu. **Nibaddhavāsīnoti** rukkhapabbatapaṭibaddhesu vimānesu niccavāsītāya nibaddhavāsīno. **Baddhattāti** gāthābhāvena ganthitattā sambandhitattā.

“Uggaṇhātu bhante bhagavā”ti attanā vuccamānaṃ parittaṃ bhagavantaṃ uggaṇhāpetukāmo vessavaṇo avocāti adhippāyena codako “**kiṃ pana bhagavato appaccakkhadhammo nāma atthī**”ti codesi. Ācariyo sabbattha appaṭihataññācārassa bhagavato na kiñci appaccakkhanti dassento “natthī”ti vatvā “uggaṇhātu bhante bhagavā”ti vadato vessavaṇassa adhippāyamaṃ vivaranto “**okāsakaraṇattha**”ntiādimāha. Yathā hi pañcasikho gandhabbadevaputto devānaṃ tāvatimsānaṃ, brahmuno ca sanaṅkumārassa sammukhā attano yathāsutaṃ dhammaṃ bhagavato santikaṃ upagantvā pavedeti, evamayampi mahārājā itarehi saddhiṃ āṭānāṭanagare gāthāvasena bandhitaṃ parittaṃ bhagavato pavedetuṃ **okāsaṃ kārento** “uggaṇhātu bhante bhagavā”ti **āha**, na naṃ tassa pariyāpuṇane niyojento. Tasmā **uggaṇhātūti** yathidaṃ parittaṃ mayā paveditamattameva hutvā catunnaṃ parisānaṃ ciraṅkālāṃ hitāvahaṃ hoti, evaṃ uddham ārakkhāya gaṇhātu, sampaṭicchātūti attho. **Satthu kathitēti** satthu ārocite, catunnaṃ parisānaṃ satthu kathane vāti attho. **Sukhavihārāyāti** yakkhādīhi avihimsāya laddhabbasukhavihārāya.

277. **Sattapi buddhā cakkhumanto** pañcahi cakkhūhi cakkhumabhāve visesābhāvato. **Tasmāti** yasmā cakkhumabhāvo viya sabbabhūtānukampitādayo sabbepi visesā sattannampi buddhānaṃ sādharmaṇā, tasmā, guṇanemittakāneva vā yasmā buddhānaṃ nāmāni nāma, na līngikāvattikayādicchakāni, tasmā buddhānaṃ guṇavisesadīpanāni “cakkhumantassā”tiādinā (dī. ni. 3.277) vuttāni **etāni ekekassa satta satta nāmāni honti**. Tesam nāmānaṃ sādharmaṇabhāvaṃ atthavasena yojetabbāti dassetuṃ “**sabbepī**”tiādi vuttaṃ. **Sabbabhūtānukampinoti** anaññasādhāraṇamahākaruṇāya sabbasattānaṃ anukampikā. **Nhātakilesattāti** aṭṭhaṅgikena ariyamaggajalena saparasantānesu niravasesato dhotakilesamalattā. **Mārasenāpamaddinoti** saparivāre pañcapi māre pamadditavanto. **Vusitavantoti** maggabrahmacariyavāsaṃ, dasavidhaṃ ariyavāsaṅca vusitavanto. Vusitavantatāya eva bāhitapāpatā vuttā hotīti “brāhmaṇassā”ti padaṃ anāmaṭṭhaṃ. **Vimuttāti** anaññasādhāraṇānaṃ pañcannampi vimuttīnaṃ vasena niravasesato muttā. **Aṅgoti** sarīraṅgato, ñāṇaṅgato ca, dvattimsamahāpurisalakkhaṇa- (dī. ni. 2.33; 3.200; ma. ni. 2.385)

asītianubyañjanehi nikkhamanappabhā, byāmappabhā, ketumālāuṇhīsappabhā ca sarīraṅgato nikkhamanakarasmīyo, yamakamahāpāṭihāriyādīsu uppajjanakappabhā ñāṅgato nikkhamanakarasmīyo. **Na etāneva** “cakkhumā”tiādīnā (dī. ni. 3.277) vuttāni **satta nāmāni**, atha kho aññānīpi bahūni aparimitāni nāmāni. Kathanti āha “**asañkhyeyyāni nāmāni saguṇena mahesinoti vutta**”nti (dha. sa. aṭṭha. 1313; udā. aṭṭha. 53; paṭi. aṭṭha. 76). Kena vuttaṃ? Dhammasenāpatinā.

Yadi evaṃ kasmā vessavaṇo etāneva gaṇhīti āha “**attano pākaṭanāmavasenā**”ti. **Khīṇāsava janāti adhippetā**. Te hi kammakilesehi jātāpi evaṃ na puna jāyissantīti iminā atthena **janā**. Yathāha “yo ca kālaghaso bhūto”ti (jā. 1.2.190) **desanāsīsamattanti** nidassanamattanti attho, avayavena vā samudāyupalakkhaṇametam. Sati ca piṣuṇavācappahāne pharusavācā pahīnāva hoti, pageva ca musāvādoti “**apisuṇā**” icceva vuttā. **Mahattāti** mahā attā sabhāvo etesanti mahattā. Tenāha “**mahantabhāvaṃ pattā**”ti. **Mahantāti** vā mahā antā, parinibbānapariyosānāti vuttaṃ hoti. Mahantehi vā sīlādīhi samannāgatā. Ayaṃ tāva aṭṭhakathāyaṃ āgatanayena attho. Itaresaṃ pana matena buddhādīhi ariyehi mahanīyato pūjanīyato **mahaṃ** nāma nibbānaṃ, mahamanto etesanti **mahantā**, nibbānadiṭṭhāti attho. **Nissāradāti** sārājjarahitā, nibbhayāti attho. Tenāha “**vigatalomahaṃsā**”ti.

**Hitanti** hitacittaṃ, sattānaṃ hitesīti attho. **Yathābhūtaṃ vipassisunti** pañcupādānakkhandhesu samudayādito yāthāvato vividhenākārena passiṃsu. “Ye cāpi”ti pubbe paccattabahuvacanena aniyamato vutte **tesampīti** atthaṃ sampadānabahuvacanavasena niyametvā “namatthū”ti ca padaṃ ānetvā yojeti yaṃ taṃ-saddānaṃ abyabhicāritasambandhabhāvato. Vipassiṃsu namassantīti vā yojanā. **Paṭhamagāthāyāti** “ye cāpi nibbutā loke”ti evaṃ vuttagāthāya. **Dutiyagāthāyāti** tadantaragāthāya. Tattha **desanāmukhamattanti** itaresampi buddhānaṃ nāmaggaḥaṇe patte imasseva bhagavato nāmaggaḥaṇaṃ tathā desanāya mukhamattaṃ, tasmā tepi atthato gahitā evāti adhippāyo. Tenāha “**ayampi hī**”tiādi. Tattha **ayanti** ayaṃ gāthā. Purimayojanāyaṃ tassāti visisitabbatāya abhāvato “yanti nipātamatta”nti vuttaṃ, idha pana “tassa namatthū”ti evaṃ sambandhassa ca icchitattā “ya”nti nāmapadaṃ upayogekavacananti dassento “**yaṃ namassanti gotama**”nti āha.

278. “Yato uggacchati sūriyo”tiādikaṃ kasmā āradhāṃ? Yaṃ ye yakkhādayo satthu dhammānaṃ, attano ca rājānaṃ nādiyanti, tesam “idañcidañca niggahaṃ karissāmā”ti sāvanaṃ kātukāmā tattha tattha dvisahassaparittadīparivāresu catūsu mahādīpesu attano āṇāya vattānaṃ attano puttānaṃ, aṭṭhavīsatiyā yakkhasenāpatiādīnañca satthari pasādagaravabahumānañca pavedetvā niggahārahānaṃ santajjanatthaṃ āradhāṃ. Tattha “yato uggacchati”tiādīsu “**yato thānato udeti**”ti vuccati, kuto pana thānato udetīti vuccati? Pubbavidehavāsīnaṃ tāva majjhanhikaṭṭhāne thito jambudīpavāsīnaṃ udetīti vuccati, uttarakurukānaṃ pana oggacchatīti iminā nayena sesadīpesupi sūriyassa uggacchanoggacchanapariyāyo veditabbo. Ayañca attho heṭṭhā **aggaññasuttavaṇṇanāyaṃ** (dī. ni. aṭṭha. 3.121) pakāsito eva. **Aditīyā puttoti** lokasamudācāravasena vuttaṃ. Lokiyā hi deve aditīyā puttā, asure atithiyā puttāti vadanti. Ādippanato pana **ādicco**, ekappahārenea tīsu dīpesu ālokavidamaṇsanena samujjalanatoti attho. **Maṇḍalīti** ettha ī-kāro bhusatthoti āha “**mahantaṃ maṇḍalaṃ assāti maṇḍali**”ti. Mahantaṃ hissa vimānamaṇḍalaṃ paññāsāyojanāyāmvitthārato. “**Samvarīpi nirujjhati**”ti imināva divasopi jāyatīti ayampi attho vuttoti veditabbo. **Ratti antaradhāyatīti** sinerupacchāyālakkhaṇassa andhakārassa vigacchanato.

**Udakarhadoti** jaladhi. “**Tasmiṃ thāne**”ti idaṃ puratthimasamuddassa uparibhāgena sūriyassa gamanaṃ sandhāya vuttaṃ. Tathā hi jambudīpe thitānaṃ puratthimasamuddato sūriyo uggacchanto viya upaṭṭhāti. Tenāha “**yato uggacchati sūriyo**”ti. Samuddanaṭṭhena attani patitassa sammadeva, sabbaso ca undanaṭṭhena kiledanaṭṭhena **samuddo**. Samuddo hi kiledanaṭṭho rahado. **Sāritodakoti** anekāni yojanasahassāni vitthiṇṇodako, saritā nadiyo uduke etassāti vā **saritodako**.

Sinerupabbatarājā cakkavālassa vemajjhe thito, taṃ padhānaṃ katvā vattabbanti adhippāyena “itoti sineruto”ti vatvā tathā pana disāvavatthānaṃ anavaṭṭhitanti “**tesam nisinnaṭṭhānato vā**”ti vuttaṃ. **Tesanti** catunnaṃ mahārājānaṃ. **Nisinnaṭṭhānaṃ** āṭṇāṇanagaraṃ. Tattha hi nisinnā te imaṃ parittaṃ

bandhiṃsu. **Tesaṃ nisinnaṭṭhānato**ti vā satthu santike tesaṃ nisinnaṭṭhānato. Ubhayathāpi sūriyassa udayaṭṭhānā puratthimā disā nāma hoti. Purimapakkhamyevettha vaṇṇenti. Tena vuttam “ito sā purimā disā”ti. Sūriyo, pana candanakkhattādayo ca sineruṃ dakkhiṇato, cakkavālapabbatañca vāmato katvā parivattenti. Yattha ca nesaṃ uggamaṇaṃ paññāyati, sā puratthimā disā. Yattha okkamaṇaṃ paññāyati, sā pacchimā disā. Dakkhiṇapasse uttarā disā, vāmapasse dakkhiṇā disāti catumahādīpavāsīnaṃ paccekamaṃ sineru uttarādisāyameva, tasmā anavaṭṭhitā disāvavatthāti āha “iti naṃ ācikkhati jano”ti. **Yaṃ disanti** yaṃ puratthimadisamaṃ **yasassīti** mahāparivāro. Koṭisatasahassaparimāṇā hi devatā abhiṇhaṃ parivārenti. Candananāgarukkhādīsu osadhitiṇavanappatisugandhānaṃ abbanato, tehi dittaḥvūpagamaṇato “gandhabbā”ti laddhanāmānaṃ cātumahārājikadevānaṃ adhipati bhāvato. **Me sutanti** ettha **meti** nipātamattaṃ. **Sutanti** vissutanti attho. Ayañhettha yojanā – tassa dhataratṭhamahārājassa puttāpi bahavo. Kittakā? Asīti, dasa eko ca. Ekanāmā. Kathaṃ? Indanāmā. “Mahapphalā”ti ca sutamaṃ vissutametaṃ loketi.

Ādicco gotamagotto, bhagavāpi gotamagotto, ādiccena samānagottatāya ādicco bandhu etassātipi ādiccabandhu, ādiccassa vā bandhūti ādiccabandhu, taṃ **ādiccabandhunaṃ**. **Anavajjenāti** avajjapaṭipakkhena brahmavihārena. **Samekkhasi** odhiso, anodhiso ca pharaṇena olokesiāsayaṇusayacariyādhimuttiādivibhāgāvabodhavasena. **Vatvā vandantīti** “lokassa anukampako”ti kittetvā vandanti. **Sutamaṃ netanti** sutamaṃ nanūti etasmiṃ atthe **nu-saddo**. Aṭṭhakathāyaṃ pana nokāroyanti adhippāyena **amhehīti** attho vutto. **Etanti** etaṃ tathā parikittetvā amanussānaṃ devatānaṃ vandanaṃ. **Vadanti** dhataratṭhamahārājassa puttā.

**279. Yena petā pavuccantīti** ettha vacanasesena attho veditabbo, na yathārutavasenevāti dassento “**yena disābhāgena nīhariyantūti vuccantīti**”ti āha. **Ḍayhantu vāti** pete sandhāya vadati. **Chijjantu vā** hatthapādādi ke pisuṇā piṭṭhimamsikā. **Haññantu** pañātipātinotiādikā. **Pavuccantīti** vā samuccanti, “alam tesa”nti samācinīyantīti attho. Evañhi vacanasesena vinā eva attho siddho hoti. **Rahassaṅganti** bījaṃ sandhāya vadati.

**280. Yasmiṃ disābhāge sūriyo atthaṃ gacchatīti** ettha “yato ṭhānato udetī”ti ettha vuttanāyānusārena attho veditabbo.

**281.** Yena disābhāgena uttarakuru rammo avaṭṭhito, ito sā uttarā disāti yojanā. **Mahānerūti** mahanto, mahanīyo ca nerusaṅkhāto pabbato. Tenāha “**mahāsineru pabbatarājā**”ti. **Rajatamayamaṃ**. Tathā hi tassa pabhāya ajjhotthataṃ tassaṃ disāyaṃ samuddodakaṃ khīraṃ viya paññāyati. **Maṇimayanti** indanīlamayaṃ. Tathā hi dakkhiṇadisāya samuddodakaṃ yebhuyyena nīlavaṇṇaṃ hutvā paññāyati, tathā ākāsaṃ. **Manussā jāyanti**. Kathaṃ jāyanti? Amamā apariggahāti yojanā. **Mamattavirahitāti** “idaṃ mama idaṃ mamā”ti mamaṅkāravirahitāti adhippāyo. Yadi tesaṃ “ayaṃ mayhaṃ bhariyā”ti pariggaho natthi, “ayaṃ me mātā, ayaṃ bhaginī”ti evarūpā idha viya mariyādāpi na siyā mātuādibhāvassa ajānanatoti codanaṃ sandhāyāha “**mātaraṃ vā**”tiādi. **Chandarāgo nuppajjati** ettha “dhammatāsiddhassa sīlassa ānubhāvena putte diṭṭhamatte eva mātu thanato thaññaṃ paggharati, tena saññānaṃ nesaṃ mātari puttassa mātusaññā, mātu ca putte puttasaññā paccupaṭṭhitā”ti keci.

**Naṅgalāti** līngavipallāsena vuttanti āha “**naṅgalānipi**”ti. **Akaṭṭheti** akasite akatakasikamme.

**Taṇḍulāva tassa phalanti** sattānaṃ puññānubhāvahetukā thusādiabhāvena taṇḍulā eva tassa sālissa phalaṃ. **Tuṇḍikiranti** pacanabhājanassa nāmanti vuttamaṃ “**ukkhaliya**”nti. **Ākiritvāti** taṇḍulāni pakkhipitvā. **Niddhūmaṅgārenāti** dhūmaṅgārarahitena kevalena **agginā**. Jotikapāsāṇato aggimhi utṭhahante kuto dhūmaṅgārānaṃ sambhavo. **Bhojananti** odanamevādhippetanti “**bhojanamevā**”ti avadhāraṇaṃ katvā tena nivattetabbaṃ dassento “**añño sūpo vā byañjanaṃ vā na hotī**”ti āha. Yadi evaṃ rasavisesayutto tesaṃ āhāro na hotīti? Noti dassento “**bhuñjantānaṃ...pe... raso hotī**”ti āha. **Macchariyacittaṃ nāma na hotīti** dhammatāsiddhassa sīlassa ānubhāvena. Tathā hi te katthacipi

amamā pariggahāva hutvā vasanti.

Apica tattha uttarakurukānaṃ puññānubhāvasiddho ayampi viseso vedītabbo – tattha kira tesu tesu padesesu ghanacitapattasañchannasākhāpasākhā kūṭāgārūpamā manoramā rukkhā tesam manussānaṃ nivesanakiccaṃ sādheti, yattha sukhaṃ nivasanti, aññepi tattha rukkhā sujātā sabbadāpi pupphitaggaṃ tiṭṭhanti, jalāsayaṃpi vikasitakamalakuvalayapuṇḍarīkasogandhikādipupphasañchannā sabbakālaṃ paramasugandhaṃ samantato pavāyantā tiṭṭhanti. Sarīrampi tesam atidīghatādidosarahitaṃ ārohapariṇāhasampannaṃ jarāya anabhibhūtattā valipalitādidosarahitaṃ yāvatāyukaṃ aparikkhīṇajavabalarakkamasobhameva hutvā tiṭṭhati. Anuṭṭhānaphalūpajīvītāya na ca nesaṃ kasivāṇijjādivasena, āhārapariyettīhasena dukkhaṃ atthi, tato eva na dāsadāsikammakarādīpariggaho atthi, na ca tattha sītuṇhaḍaṃsamakasavātātapasarīsapavāḷādīparissayo atthi. Yathā nāmettha gimhānaṃ pacchime māse paccūsavēlayaṃ samasītuṇhātu hoti, evameva sabbakālaṃ samasītuṇhova utu hoti, na ca tesam koci upaghāto, vihesā vā uppajjati. Akatṭhapākimateva sāliṃ akaṇaṃ athusaṃ sugandhaṃ taṇḍulaphalaṃ paribhuñjantānaṃ nesaṃ kuṭṭhaṃ, gaṇḍo, kilāso, soso, kāso, sāso, apamāro, jaroti evamādiko na koci rogo uppajjati. Na te khujjā vā vāmanakā vā kāṇā vā kuṇī vā khañjā vā pakkhahatā vā vikalaṅgā vā vikalindriyā vā honti. Itthiyopi tattha nātidīghā nātirassā nātikisā nātitūlā nātikālā nāccodātā sobhaggappattarūpā honti. Tathā hi dīghaṅgulī tambanakhī lambatthanā tanumajjhā puṇṇacandamukhī visālakkhī mudugattā saṃhitūrū odātadantā gambhīranābhī tanujaṅghā dīghaṇīlavellitakesī puthulasuṇī nātilomānālomā subhagā utusukhasamphassā saṅhā sakhilasambhāsā nānābharaṇavibhūsitā vicaranti. Sabbadā hi soḷasavassuddesikā viya honti. Purisā ca pañcavīsativassuddesikā viya, na puttadāresu rajjanti. Ayaṃ tattha dhammatā.

Sattāhikameva ca tattha itthipurisā kāmaratiyā viharanti, tato vītarāgā yathāsakaṃ gacchanti. Na tattha idha viya gabbhokkantimūlakaṃ, gabbhapariharaṇamūlakaṃ, vijāyanamūlakaṃ vā dukkhaṃ hoti. Rattakañcukato kañcanaḷaṇimā viya dārakā mātukucchito amakkhitā eva semhādinā sukheneva nikkhamanti, ayaṃ tattha dhammatā.

Mātā pana puttaṃ vā dhītaṃ vā vijāyitvā tesam vicaraṇappadesa ṭhapetvā anapekkhā yathārucci gacchati. Tesam tattha sayitānaṃ ye passanti purisā, itthiyo vā, te attano aṅguliyo upanāmenti, tesam kammabalena tato khīraṃ pavattati, tena dārakā yāpenti. Evaṃ pana vaḍḍhantā katipayadivaseheva laddhabalā hutvā dārikā itthiyo upagacchanti, dārakā purise. Kapparukkhato eva ca tesam tattha tattha vatthābharaṇāni nippajjanti. Nānāvīrāgavaṇṇavicittāni hi sukhumāni mudusukhasamphassāni vatthāni tattha tattha kapparukkhesu olambantāni iṭṭhanti. Nānāvīdharmaṃsijālasamujjalavividhavaṇṇaratanavinaddhāni anekavidhamālākammalatākammabhittikammavicittāni sīsūpagagīvūpagahatthūpagakāṭūpagapādūpagāni sovaṇṇamayāni ābharaṇāni ca kapparukkhato olambanti. Tathā vīṇāmudiṅgapaṇavasammatāḷasaṅkhavaṃsavetāḷaparivānīvallakīpabhutikā tūriyabhaṇḍāpi tato tato olambanti. Tattha ca bahū phalarukkhā kumbhamattāni phalāni phalanti madhurarasāni, yāni paribhuñjitvā te sattāhampi khuppipāsāhi na bādhiyanti. Najjopi tattha suvisuddhajalā supatitthā ramaṇīyā akaddamā vālukatalā nātisītā nāccuṇhā surabhiḡandhīhi jalajapupphehi sañchannā sabbakālaṃ surabhiṃ vāyantiyo sandanti. Na tattha kaṇṭakatiṇakakkhaḷagacchalatā honti, akaṇṭakā pupphaphalasampannā eva honti. Candananāgarukkhā sayameva rasaṃ paggharanti. Nhāyitukāmā ca nadītitthe ekajjhaṃ vatthābharaṇāni ṭhapetvā nadiṃ otarivā nhatvā uttiṇṇuttiṇṇā upariṭṭhimaṃ vatthābharaṇaṃ gaṇhanti, na tesam evaṃ hoti “idaṃ mama, idaṃ parassā”ti, tato eva na tesam koci viggaho vā vivādo vā. Sattāhikā eva ca nesaṃ kāmaratikīḷā hoti, tato vītarāgā viya vicaranti. Yattha ca rukke sayitukāmā honti, tattheva sayanaṃ upalabhanti. Mate ca satte disvā na rodanti, na socanti, tañca maṇḍayitvā nikkhipanti. Tāvadeva ca nesaṃ tathārūpā sakuṇā upagantvā mataṃ dīpantaraṃ nenti. Tasmā susānaṃ vā asucitṭhānaṃ vā tattha natthi. Na ca tato matā nirayaṃ vā tiracchānayaṇiṃ vā pettivisaṃ vā upapajjanti. “Dhammatāsiddhassa pañcasīlassa ānubhāvena te devaloke nibbantanti”ti vadanti. Vassasahassameva ca nesaṃ sabbakālaṃ āyuppanānaṃ. Sabbametaṃ tesam pañcasīlaṃ viya dhammatāsiddhaṃ evāti vedītabbaṃ. **Tatthāti** tasmim

uttarakurudīpe.

**Ekakhuraṃ katvāti** anekasaphampi ekasaphaṃ viya katvā, assaṃ viya katvāti attho. “Gāvi”nti vatvā puna “pasu”nti vuttattā gāvito itaro sabbo catuppado idha “**pasū**”ti adhippetoti āha “**ṭhapetvā gāvi**”nti.

**Tassāti** gabbhinittiyā. **Piṭṭhi onamituṃ sahatīti** kucchiyā garubhāratāya tesam āruḷhakāle piṭṭhi onamati, tesam nisajjaṃ sahati pallaṅke nisinnā viya honti. **Sammādiṭṭhiketi** kamma pathasammādiṭṭhiyā sammādiṭṭhike. **Etthāti** jambudīpe. Ettha hi janapadavohāro, na uttarakurumhi. Tathā hi “**paccantimamilakkhuvāsike**”ti ca vuttaṃ.

**Tassa raññoti** vessavaṇamahārājassa. Iti so attānameva paraṃ viya katvā vadati. Eseva nayo paratopi. **Bahuviddhaṃ** nānāratana vicittam nānāsaṅghānaṃ rathādi **dibbayānaṃ upaṭṭhitameva hoti** sudantavāhanayuttaṃ, na nesam yānānaṃ upaṭṭhāpane ussukkaṃ āpajjitabbaṃ atthi. **Etānīti** hatthiyānādīni. **Nesanti** vessavaṇaparicārikānaṃ. Kappitāni hutvā uṭṭhitāni āruhituṃ **upakappanayānāni**. **Nipannāpi nisinnāpi vicaranti** candimasūriyā viya yathāsakaṃ vimānesu.

**Nagarā ahūti** līngavipallāsena vuttanti āha “**nagarāni bhaviṃsūti attho**”ti. **Āṭānāṭā nāmāti** itthilīngavasena laddhanāmaṃ **nagaraṃ āsi**.

**Tasmim ṭhatvāti** tasmim padese parakusiṭṭanāṭānāmake nagare ṭhatvā. Tato **ujuṃ uttaradisāyaṃ**. **Etassāti** kasivantanagaraṃ. **Aparabhāge** aparakoṭṭhāse, parato icceva attho.

**Kuveroti** tassa purimajāṭisamudāgataṃ nāmanti teneva pasaṅgena yenāyaṃ sampatti adhigatā, tadassa pubbakammaṃ ācikkhituṃ “**ayaṃ kirā**”tiādi vuttaṃ. **Ucchuvappanti** ucchusassaṃ. **Avasesasālāhīti** avasesayantasālāhi, nissakkavacanañcetam. **Tatthevāti** puññattham dinnasālāyameva.

**Paṭiesantoti** pati pati atthe esanto vīmaṃsanto. Na kevalam te vīmaṃsanti eva, atha kho tamattham patiṭṭhāpentīti āha “**visuṃ visuṃ atthe upaparikkhamānā anusāsamānā**”ti. **Yakkharaṭṭhikāti** yakkharaṭṭhādhipatino. Yakkhā ca vessavaṇassa rañño nivesanadvāre niyuttā cāti yakkhadovārikā, tesam **yakkhadovārikānaṃ**.

Yasmā dharaṇīporakkhaṇito purāṇodakaṃ bhassayantaṃ heṭṭhā vuṭṭhi hutvā nikkhamati, tasmā tam tato gahetvā meghehi pavuṭṭham viya hotīti vuttaṃ “**yato pokkharāṇito udakaṃ gahetvā meghā pavassanti**”ti. **Yatoti** yato dharaṇīpokkharāṇito. **Sabhāti** yakkhānaṃ upaṭṭhānasabhā.

**Tasmim ṭhāneti** tassā pokkharāṇiyā tīre yakkhānaṃ vasanavane. **Sadā phalitāti** niccakālam sañjātapalā. **Niccappupphitāti** niccam sañjātapupphā. **Nānādi jagaṇāyutāti** nānāvidhehi dijagaṇehi yuttā. Tehi pana sakuṇasaṅghehi ito cito ca sampatantehi paribbhamantehi yasmā sā pokkharāṇī ākulā viya hoti, tasmā vuttaṃ “**vividhapakkhisāṅghasamākulā**”ti. **Koṅcasakuṇehīti** sārasasakuntehi.

“**Evaṃ viravantāna**”nti iminā tathā vassitavasena “jīvañjīvakā”ti ayaṃ tesam samaññāti dasseti. **Uṭṭhavacittakāti** etthāpi eseva nayo. Tenāha “**evaṃ vassamānā**”ti. **Pokkharasātakāti** pokkharasaṅghānatāya “pokkharasātakā”ti evaṃ laddhanāmā.

**Sabbakālam sobhatīti** sabbautūsu sobhati, na tassā hemantādivasena sobhāvīrato atthi. Evambhūtā ca niccam pupphitajalajathalajapupphatāya, phalabhārabharitarukkhaparivāritatāya, aṭṭhaṅgasamannāgatasalilatāya ca **nirantaram sobhati**.

**282. Parikammanti** pubbupacāraṃ. **Parisodhetvāti** ekakkharassāpi avirādhanavasena

ācariyasantike sabbam sodhetvā. **Suṭṭhu uggahitā**ti parimaṇḍalapadabyañjanāya poriyā vācāya vissatṭhāya anelagalāya atthassa viññāpanīyā sammadeva uggahitā. Tathā hi “**atthañca byañjanañca parisodhetvā**”ti vuttaṃ. Attham jānato eva hi byañjanam parisujjhati, no ajānato. **Padabyañjanānī**ti padañceva byañjanañca **ahāpetvā**. Evañhi paripuṇṇā nāma hotīti. **Visamvādetvā**ti aññathā katvā. **Tejavantaṃ na hoti** virajjhanato ceva vimhayatthabhāvato ca. **Sabbasoti** anavasesato ādimajjhapariyosānato. **Tejavantaṃ hotīti** sabhāvaniruttiṃ avirādhetvā suppvattibhāvena sādhanato. Evaṃ payogavipattiṃ pahāya payogasampattiyaṃ sati parittassa atthasādhakataṃ dassetvā idāni ajjhāsavipattiṃ pahāya ajjhāsayasampattiyaṃ atthasādhakataṃ dassetuṃ “**lābhaḥetū**”tiādi vuttaṃ. Idam parittabhaṇanam sattānam anattapaṭibāhanahetūti tassa ñāṇakarūṇāpubbakatā **nissaraṇapakkho**. **Mettaṃ purecārikaṃ katvā**ti mettāmanasikārena sattesu hitapharaṇam purakkhatvā.

“**Vatthum vā**”tiādi pubbe catuparisamajjhe katāya sādhanāya bhagavato pavedanam. **Gharavattuntī** vasanageham. **Nibaddhavāsanti** paragehepi nevāsikabhāvena vāsam na labheyya, yaṃ pana mahārājānam, yakkhasenāpatīnañca ajānantānamyeva kadāci vasitvā gamanam, taṃ appamañanti adhippāyo. **Samitinti** yakkhādisamāgamam. Kāmam pāliyam “na me so”ti āgataṃ, itaresampi pana mahārājānamattanā ekajjhāsayatāya tesampi ajjhāsayaṃ hadaye ṭhapetvā vessavaṇo tathā avoca. Kaññam anu anu vahituṃ ayutto anāvayho, sabbakālam kaññam laddhum ayuttoti attho, taṃ **anāvayham**. Tenāha “**na āvāhayutta**”nti. Na vivayhanti **avivayham**, kaññam gahetumayuttanti attho. Tenāha “**na vivāhayutta**”nti. Ahito ahammāno etthāti **attā**, attabhāvo. Attā visayabhūto etāsam atthīti **attā**, paribhāsā, tāhi. Pariyattaṃ katvā vacanena **paripuṇṇāhi**. Yathā yakkhā akkositabbā, evaṃ pavattā akkosā **yakkhaakkosā** nāma, tehi. Te pana “kaḷārakkhi kaḷāradantā kaḷavaṇṇā”ti evaṃ ādayo.

**Viruddhā**ti virujjhanakā parehi virodhino. **Rabhasāti** sārāmbhakāti adhippāyo. Tenāha “**karaṇuttariyā**”ti. **Rabhasāti** vā sāhasikā. Sāmino manaso assavāti **manassā**, kiṅkarā. Ye hi “kiṃ karomi bhaddante”ti sāmikassa vase vattanti, te evaṃ vuccanti. Tena vuttaṃ “**yakkhasenāpatīnam ye manassā, tesa**”nti. Āṇāya avarodhitupacārā **avaruddhā**, te pana āṇāvato paccatthikā nāma hotīti “**paccāmittā verino**”ti vuttaṃ. **Ujjhāpetabbanti** heṭṭhā katvā cintāpetabbam, taṃ pana **ujjhāpanam** tesam nīcakiriyāya jānāpanam hotīti āha “**jānāpetabbā**”ti.

### Parittaparikkammakathāvaṇṇanā

**Parittassa parikkammaṃ kathetabbanti** āṇāṇāṭiyaparittassa parikkammaṃ pubbupacāratṭhāniyam mettasuttādi kathetabbam. Evañhi taṃ laddhāsevanam hutvā tejavantaṃ hoti. Tenāha “**paṭhamameva hī**”tiādi. **Piṭṭham vā maṃsam vāti vā**-saddo aniyamattho, tena macchaghatasūpādim saṅgaṇhāti. **Oṭāram labhanti** attanā piyāyitabbaāhārasena piyāyitabbaṭṭhānavasena ca. “**Paritta...pe... nisīditabba**”nti imināva parittakārakassa bhikkhuno parisuddhipi icchitabbāti dasseti.

“**Parittakāraḥko...pe... samparivāritenā**”ti idam parittakaraṇe bāhirarakkhāsamvidhānam. “**Mettacittam ...pe... kātabba**”nti idam abhantararakkhā ubhayato rakkhāsamvidhānam. Evañhi amanussā parittakaraṇassa antarāyam kātuṃ na visahanti. **Maṅgalakathā vattabbā** pubbupacārasena. **Sabbasannipātoti** tasmim vihāre, tasmim vā gāmakhette sabbesam bhikkhūnam sannipāto. **Ghoseṭabbo**, “cetiyaṅgaṇe sabbehi sannipatītabba”nti. **Anāgantum nāma na labbhāti** amanussena buddhāñābhayena, rājāñābhayena ca. Gahitakāpadesena amanussova pucchito hotīti āha “**amanussaggahitako ‘tvam ko nāmā’ti pucchitabbo**”ti. **Mālāgandhādīsu** pūjanattham viniyuñjyamānesu. **Pattīti** tuyham pattidānam. **Piṇḍapāte pattīti** piṇḍapāte diyyamāne pattidānam. **Devatānanti** yakkhasenāpatīnam. **Parittam bhaṇitabbanti** etthāpi “mettacittam purecārikaṃ katvā”ti ca “maṅgalakathā vattabbā”ti ca “vihārassa upavane”ti evamādi ca sabbam gihīnam parittakaraṇe vuttaṃ parikkammaṃ kātabbameva.

**Sarīre adhimuccatī** sarīram anupavisitvā viya āvisanto yathā gahitakassa vasena na vattati, attano eva vasena vattati, evaṃ adhimuccati adhiṭṭhahitvā tiṭṭhati. Tenāha “**āvisatīti tasseva vevacana**”nti.

**Laggatīti** tattheva laggo allīno hoti. Tenāha “**na apeti**”ti. **Rogaṃ vaḍḍhentoti** dhātūnaṃ samabhāvena vattituṃ appadānavasena uppannaṃ rogaṃ vaḍḍhento. Dhātūnaṃ visamabhāvāpattiyā ca āhārassa ca aruccanena gahitakassa sarīre lohitaṃ sussati, maṃsaṃ milāyati, taṃ panassa yakkho dhātukkabhānimittatāya karonto viya hotīti vuttaṃ “**appamaṃsalohitaṃ karonto**”ti.

**283. Tesam nāmāni** indādināmabhāvena voharitabbato. **Tatoti** tato ārocato paraṃ. **Teti** yakkhasenāpatayo. **Okāso na bhavissatī** bhikkhubhikkhuniyo, upāsakaupāsikāyo viheṭhetuṃ avasaro na bhavissatī sammadeva ārakkhāya vihitattāti.

Āṭṇāṭṭiyasuttavaṇṇanāya līnatthappakāsānā.

## 10. Saṅgītisuttavaṇṇanā

**296. Dasasahassacakkavāḷeti** buddhakhettabhūte dasasahassaparimāṇe cakkavāḷe. Tattha hi imasmiṃ cakkavāḷe devamanussāyeva katādhikārā, itaresu devā visesabhāgino. Tena vuttaṃ “**dasasahassacakkavāḷe nāṇajālaṃ pattharivā**”ti. **Nāṇajālapattharaṇanti** ca tesam tesam sattānaṃ āsayādivibhāvanavasena nāṇassa pavattanameva. Tenāha “**lokaṃ volokayamāno**”ti, sattalokaṃ byavalokayamāno āsayānusayacaritādhimuttīādike visesato ogāhetvā passantoti attho. **Maṅgalaṃ bhaṇāpessanti** “taṃ tesam āyatim visesādhigamassa vijjāṭṭhānaṃ hutvā dīgharattaṃ hitāya sukhāya bhavissā”ti. **Tiḥi piṭakehi sammasitvā**ti tipītakato ekakadukādīnā saṅghetabbassa saṅghaṇṇanavasena sammasitvā vīmaṃsitvā. Nātuṃ icchitā atthā **pañhā**, te pana imasmiṃ sutte ekakādivasena āgatā saḥassaṃ, cuddasa cāti āha “**cuddasapañhādhikena pañhasahassena paṭimaṇḍetvā**”ti. Evamidha sampiṇḍetvā dassite pañhe parato suttapariyosāne “ekakavasena dve pañhā kathitā”tiādīnā (dī. ni. aṭṭha. 3.349) vibhāgena pariṇaṇḍetvā sayameva dassessati.

### Ubbhatakanavasandhāgāraṇṇanā

**297.** Uccādhīṭṭhānatāya taṃ sandhāgāraṃ bhūmito ubbhataṃ viyāti “**ubbhataka**”nti nāmaṃ labhati. Tenāha “**uccattā vā evaṃ vutta**”nti. **Sandhāgārasālā**ti ekā mahāsālā. Uyyogakaraṇādīsu hi rājāno tattha ṭhatvā “**ettakā purato gacchantu, ettakā pacchā**”tiādīnā tattha nisīditvā sandhaṃ karonti mariyādaṃ bandhanti, tasmā taṃ ṭhānaṃ “**sandhāgāra**”nti vuccati. Uyyogaṭṭhānato ca āgantvā yāva gehaṃ gomayaparibhaṇḍādivasena paṭijagganaṃ karonti, tāva ekaṃ dve divase te rājāno tattha santhambhantītipi **sandhāgāraṃ**, tesam rājūnaṃ saha atthānūsāsanaagārantīpi **sandhāgāraṃ**ti. Yasmā vā te tattha sannipatitvā “imasmiṃ kāle kasituṃ vaṭṭati, imasmiṃ kālevapitu”ntiādīnā gharāvāsakiccaṃ sandharanti, tasmā chiddāvachiddaṃ gharāvāsaṃ tattha sandharantītipi **sandhāgāraṃ**, sā eva sālāti **sandhāgārasālā**. **Devatā**ti gharadevatā. Nivāsavasena anajjhāvutthattā “**kenaci vā manussabhūtenā**”ti vuttaṃ. Kammakaraṇavasena pana manussā tattha nisajjādīni kappesumeva. “Sayameva pana satthu idhāgamaṇaṃ amhākaṃ puñṇavaseneva, aho mayam puñṇavanto”ti haṭṭhatuṭṭhā evaṃ sammā cintesunti dassento “**amhehi**”tiādīmāha.

**298. Aṭṭakā**ti cittakammakaraṇatthaṃ baddhā mañcakā. **Muttamattā**ti tāvadeva sandhāgāre navakammaṃsa niṭṭhāpitabhāvamāha, tena “**acirakārī**”ntiādīnā vuttamevatthaṃ vibhāveti. Araññaṃ āraṃmo āramitabbaṭṭhānaṃ etesanti **araññārāmā**. Santharaṇaṃ **santhari**, sabbo sakalo santhari etthāti **sabbasanthari**, bhāvanapūṃsakaniddesoṃ. Tenāha “**yathā sabbaṃ santhataṃ hoti, eva**”nti.

**299. Samantapāsādikoti** samantato sabbabhāgena pasādāvaho cāturiyaso. “**Asīhatthaṃ ṭhānaṃ gaṇhātī**”ti idaṃ buddhānaṃ kāyappabhāya pakatiyā asīhatthe ṭhāne abhibyāpanato vuttaṃ. Iddhānubhāvena pana anantaṃ aparimāṇaṃ ṭhānaṃ vijjotaveva. Nīlapītalohitodātamañjaṭṭhapabhassaravasena **chabbaṇṇā**. **Sabbe disābhāgā**ti sarīrappabhāya bāhullato vuttaṃ.



Abbhamaḥikādīhi upakkiliṭṭhaṃ suññaṃ na sobhati, tārakācitaṃ pana antalikkhaṃ tāsam pabhāhi samantato vijjotamānaṃ virocatī āha “**samuggatātārakaṃ viya gaganatala**”nti. **Sabbapāliphulloti** mūlato paṭṭhāya yāva sākhaḡgā phullo. “**Paṭipāṭiyāṭhapitāna**”ntiādi parikappūpamā. Tathā hi **viya-**saddaḡgahaṇaṃ kataṃ. **Siriya sirim abhibhavamānaṃ viyāti** attano sobhāya tesam sobhanti attho. “**Bhikkhūpi sabbeva**”ti idaṃ nesaṃ “appicchā”tiādinā vuttagaṇesu lokiyagaṇānaṃ vasena yojetabbaṃ. Na hi te sabbeva dasakathāvattulābhino. Tena vuttaṃ “suttantaṃ āvajjetvā...pe... arahattaṃ pāpuṇissanti”ti (dī. ni. aṭṭha. 3.296). Tasmā ye tattha ariyā, te sabbesampi padānaṃ vasena bodhitā hontī. Ye pana puthujjanā, te lokiyagaṇadīpakehi padehīti na tathā heṭṭhā “asītimahātherā”tiādi vuttaṃ. Pubbe arahattabhāḡino gahitā.

Rūpakāyassa asītianubyañjana-paṭimaṇḡita-dvattiṃsamahāpurisalakkhaṇakāyappabhāyāmapabhāketumālāvicittatāva (dī. ni. 2.33; 3.200; ma. ni. 2.385) **buddhaveso**. Chabbaṇṇā buddharasmiyo vissajjentaṃsa bhagavato kāyassa ālokitavilokitādīsu paramukkaṃsaḡato buddhāveṇiko accantupasamo **buddhaviḡaso**. Assanti tassaṃ.

**Sandhāḡārānumodanapaṭisaṃyuttāti** “sītaṃ uṇhaṃ paṭihantī”tiādinā (cūḡava. 295, 315) nayena sandhāḡaragaṇūpasañhitā sandhāḡarakaraṇapuññaṇisaṃsabhāvinī. **Pakiṇṇakakathāti** saṅgītiaṇarūḡhā suṇantānaṃ ajjhāsayaṇurūpatāya vividhaviḡulahaṭṭupamāsamālaṅkatā nānāyavicittā vitthārakathā. Tenāha “**tadā hī**”tiādi. **Ākāsagaṇaḡam otārento viya** nirupakkilesatāya suvisuddhena, vipulodāratāya aparimeyyena ca atthena suṇantānaṃ kāyacittaparīḡāhavūpasamanato. **Pathavoḡam ākaḡḡhanto viya** aññesaṃ sudukkaratāya, mahāsāratāya vā atthassa. **Mahājambuṃ matthake gahetvā cāḡento viya** cālanapaccayaṭṭhānavasena pubbenāparaṃ anusandhānato. **Yojaniya...pe... pāyamāno viya** desanaṃ catusaccayante pakkhipitvā atthavedadhammavedasseva labhāpanena sātamadhuradhammāmatarasūpasamaḡharaṇato. **Madhugaṇḡanti** madhupaṭalam.

**300. “Tuṇhībḡutaṃ tuṇhībḡuta**”nti byāpanicchāyaṃ idaṃ āmedītavacananti dassetuṃ “**yaṃ yandisa**”ntiādi vuttaṃ. **Anuviloketvāti** ettha **anu-**saddo “parī”ti iminā samānattho, **vilokanañcetta** satthu cakkhudvayenapi icchitabbanti “maṃsacakkhunā...pe... tato tato viloketvā”ti saṅkhepatō vatvā tamatthaṃ vitthārato dassetuṃ “**maṃsacakkhunā hī**”tiādi vuttaṃ. Hatthena kucchitaṃ kataṃ **hatthakukkuccaṃ** kukatameva kukkucanti katvā. Evaṃ **pāḡakukkuccaṃ** daṭṭhabbaṃ. **Niccalā nisīḡimsu** attano suvinītabhāvena, buddhagaḡaravena ca. “**Ālokaṃ pana vaḡḡhayitvā**”tiādi kadāci bhagavā evampi karotīti adhippāyena vuttaṃ. Na hi satthu sāvakanāṃ viya evaṃ payogasampādanīyametaṃ ñāṇaṃ. Tirohitavidūravattanipi rūpagate maṃsacakkhuno pavattiyā icchitattā vīmaṃsitabbāṃ. **Arahattupagaṃ** arahattapadaṭṭhānaṃ. **Cakkhutaḡesu nimittaṃ ṭhapetvāti** bhāvanānuyogasampattiyā sabbesaṃ tesam bhikkhūnaṃ cakkhutaḡesu labbhamānaṃ santindriyaviḡatathinamidhatākārasaṅkhātaṃ nimittaṃ attano hadaye ṭhapetvā sallakkhetvā. **Kasmā āḡilāyati** koṭisatasahassaṭṭhināḡānaṃ balaṃ dhārentassāti codakassa adhippāyo. Ācariyo esa saṅkhārānaṃ sabhāvo, yadidaṃ aniccatā. Ye pana aniccā, te ekanteneva udayavayaḡaṭṭipīḡitatāya dukkhā eva, dukkhasabhāvesu tesu satthu kāye dukkhupattiyā ayaṃ paccayoti dassetuṃ “**bhagavato hī**”tiādi vuttaṃ. **Piṭṭhivāto uppajji**, so ca kho pubbe katakammaḡaccayā. Svāyamattho paramatthadīpaniyaṃ **udānaṭṭhakathāyaṃ** āḡatanayeneva vedītabbo.

### Bhinnanigaṇṭṭhavatthuvaṇṇanā

**301. Heṭṭhā vuttameva** pāsādikasuttavaṇṇanāyaṃ (dī. ni. aṭṭha. 3.164).

**302. Svākhyaṭaṃ dhammaṃ desetukāmoti** svākhyaṭaṃ katvā dhammaṃ kathetukāmo, satthārā vā svākhyaṭaṃ dhammaṃ sayāṃ bhikkhūnaṃ kathetukāmo. Satthārā desitadhammameva hi tato tato gahetvā sāvakā sabrahmacārīnaṃ kathenti.

### Ekakavaṇṇanā

**303. Samaggehi bhāsītabbanti aññamaññaṃ samaggehi hutvā bhāsītabbam, sajjhāyitabbañceva vaṇṇetabbañcāti attho.** Yathā pana samaggehi saṅgāyanam hoti, tampi dassetuṃ “**ekavacanehi**”tiādi vuttam. **Ekavacanehi**ti virodhābhāvena samānavacanehi. Tenāha “**aviruddhavacanehi**”tiādi. **Sāmaggirasam dassetukāmoti** yasmim dhamme saṅgāyane sāmaggirasānubhavanam icchitam desanākusalatāya, tattha ekakadukatikādivasena bahudhā sāmaggirasam dassetukāmo. **Sabbe sattāti** anavasesā sattā, te pana bhavabhedato saṅkhepeveva bhinditvā dassento “**kāmabhavādīsū**”tiādimāha. Byadhikaraṇānampi bāhiratthasamāso hoti yathā “urasilomo”ti āha “**āhārato ṭhiti etesanti āhāraṭṭhitikā**”ti. Tiṭṭhati etenāti **ṭhiti**, āhāro ṭhiti etesanti **āhāraṭṭhitikāti** evam vā ettha samāsaviggaho daṭṭhabbo. **Āhāraṭṭhitikāti** paccayaṭṭhitikā, paccayāyattavuttikāti attho. Paccayattho hettha āhāra-saddo “ayaṃ āhāro anuppannaṃ vā kāmaccchandassauppādāyā”tiādisu (saṃ. ni. 5.183, 232) viya. Evañhi “**sabbe sattā**”ti iminā asaññasattāpi pariggahitā honti. Sā panāyam āhāraṭṭhitikatā nipariyāyato saṅkhāraddhammo, na sattadhammo. Tenevāhu **aṭṭhakathācariyā** “sabbe sattā āhāraṭṭhitikāti āgataṭṭhāne saṅkhārāloko veditabbo”ti (visuddhi. 1.136; pārā. aṭṭha. verañjakaṇḍavaṇṇanā; udā. aṭṭha. 30; cūḷani. aṭṭha. 65; udā. aṭṭha. 186) yadi evam “sabbe sattā”ti idaṃ kathanti? Puggalādhiṭṭhānā desanāti nāyam doso. Yathāha bhagavā “ekadhamme bhikkhave bhikkhu sammā nibbindamāno sammā virajjamāno sammā vimuccamāno sammā pariyaṇṭassāvī sammattam abhisamecca diṭṭheva dhamme dukkhassantakaro hoti, katamasim ekadhamme? Sabbe sattā āhāraṭṭhitikā”ti (a. ni. 10.27) **eko dhammoti** “sabbe sattā āhāraṭṭhitikā”ti yvāyam puggalādhiṭṭhānāya kathāya sabbesam saṅkhārānam paccayāyattavuttitāya āhārapariyāyena sāmāññato paccayadhammo vutto, ayaṃ āhāro nāma eko dhammo. **Yāthāvato nātvāti** yathāsabhāvato abhisambujjhivā. **Sammadakkhātoti** teneva abhisambuddhākārena sammadeva desito.

Codako vuttampi attham yāthāvato appaṭipajjamāno neyyattham suttapadam nītatthato dahanto “sabbe sattā”ti vacanamatte ṭhatvā “**nanu cā**”tiādinā codeti. Ācariyo aviparītam tattha yathādhippetamattham pavedento “na virujjhatī”ti vatvā “**tesañhi jhānam āhāro hotī**”ti āha. **Jhānanti** ekavokārabhavāvaham saññāya virajjanavasena pavattam rūpāvacaracatutthajjhānam. Pāḷiyam pana “anāhārā”ti vacanam asaññabhāve catunnam āhārānam abhāvam sandhāya vuttam, na paccayāhārassa abhāvato. “**Evam santepī**”ti idaṃ sāsane yesu dhammesu visesato āhāra-saddo nirulho, “āhāraṭṭhitikā”ti ettha yadi te eva gayhanti, abyāpitadoso āpanno. Atha sabbopi paccayadhammo āhāroti adhippeto, imāya āhārapāḷiyā virodho āpannoti dassetuṃ āradham. “Na virujjhatī”ti yenādhippāyena vuttam, tam vivaranto “**etasmīhi sutte**”tiādimāha. Kabaḷikārāhārādīnam ojaṭṭhamakarūpāharaṇādī nipariyāyena āhārabhāvo. Yathā hi kabaḷikārāhāro ojaṭṭhamakarūpāharaṇena rūpakāyam upatthambheti, evam phassādayo ca vedanādīharaṇena nāmakāyam upatthambhenti, tasmā satipi janakabhāve upatthambhakabhāvo ojadīsū sātisayo labbamāno mukhyo āhāraṭṭhoti te eva nipariyāyena āhāralakkhaṇā dhammā vuttā. **Idhāti** imasmim saṅgītisutte. **Pariyāyena paccayo āhāroti vutto** sabbo paccayo dhammo attano phalam āharatīti imam pariyaṇṭam labhatīti. Tenāha “**sabbadhammāññhi**”tiādi. Tattha **sabbadhammānanti** sabbesam saṅkhatadhammānam. Idāni yathāvuttamattham suttena (a. ni. 10.61) samatthetuṃ “**tenevāhā**”tiādi vuttam. **Ayanti** paccayāhāro.

**Nipariyāyāhāropi gahitova hoti**, yāvatā sopi paccayabhāveneva janako, upatthambhako ca hutvā tam tam phalam āharatīti vattabbatam labhatīti. **Tatthāti** pariyaṇṭāhāro, nipariyāyāhāroti dvīsu āhāresu. Asaññabhāve yadipi nipariyāyāhāro na labbhati, **paccayāhāro** pana **labbhati** pariyaṇṭāhāralakkhaṇo. Idāni imamevattham vitthārena dassetuṃ “**anuppanne hi buddhe**”tiādi vuttam. Uppanne buddhe titthakaramatanissitānam jhānabhāvanāya asijjhanato “**anuppanne buddhe**”ti vuttam. Sāsanikā tādisam jhānam na nibbattenti “**titthāyatane pabbajitā**”ti vuttam. Titthiyā hi upattivisesa vimuttisaññino, aññāvirāgāvirāgesu ādīnavānisamsadassino vā hutvā asaññasamāpattim nibbattetvā akkhaṇabhūmiyam uppajjanti, na sāsanikā. **Vāyokasiṇe parikkammaṃ katvāti** vāyokasiṇe paṭhamādīni tīṇi jhānāni nibbattetvā tatiyājjhāne ciṇṇavasī hutvā tato vuttāyāya catutthajjhānādhiḡamāya parikkammaṃ katvā. Tenāha “**catutthajjhānam nibbattetvā**”ti. Kasmā panettha vāyokasiṇeyeva parikkammaṃ vuttanti? Yadettha vattabbam, tam **brahmajālaṭṭikāyam** (dī. ni. ṭī. 1.41) vitthāritameva. **Dhīti** jigucchānatthe nipāto, tasmā **dhī cittanti** cittam jigucchāmīti attho. **Dhibbatetaṃ cittanti** etaṃ mama

cittam jigucchitam vata hotu. **Vatāti** sambhāvane, tena jiguccham sambhāvento vadati. **Nāmāti** ca sambhāvane eva, tena cittassa abhāvaṃ sambhāveti. Cittassa bhāvābhāvesu ādināvanisamse dassetuṃ “**cittañhī**”tiādi vuttam. **Khantiṃ ruciṃ uppādetvāti** “cittassa abhāvo eva sādhu suṭṭhū”ti imam diṭṭhinijjhānakkhantiṃ, tattha ca abhiruciṃ uppādetvā.

Tathā bhāvitassa jhānassa tṭhitibhāgiyabhāvappattiyā aparihīnajjhānassa titthāyatane pabbajitasseva tathā jhānabhāvanā hotīti āha “**manussaloke**”ti. **Pañihito ahoṣīti** maraṇassa āsannakāle tṭhapito ahoṣi. Yadi tṭhānādinā ākārena nibbatteyya, kammabalena yāva bhedā tenevākārena tiṭṭheyya vāti āha “**so tena iriyāpathenā**”tiādi.

**Eva rūpānampīti** evam acetanānampi. **Pi-saddena** pageva sacetanānanti dasseti. Katham pana acetanānam nesam paccayāhārassa upakappananti codanam sandhāya tattha nidassanam dassento “**yathā**”tiādimāha.

Ye uṭṭhānavīriyeneva divasaṃ vītināmetvā tassa nissandaphalamattam kiñcideva labhitvā jīvikam kappenti, te **uṭṭhānaphalūpajīvino**. Ye pana attano puññaphalameva upajīventi, te **puññaphalūpajīvino**. Nerayikānam pana neva uṭṭhānavīriyavasena jīvikākappanam, puññaphalassa pana lesopi natthīti vuttam “**ye pana te nerayikā...pe... na puññaphalūpajīvīti vuttā**”ti. Paṭisandhiviññāṇassa āharaṇena manosañcetanāhāroti vuttā, na yassa kassaci phalassāti adhippāyena “**kiṃ pañca āhārā atthī**”ti codeti. Ācariyo nippariyāyāhāre adhippete siyā tava codanāyāvasaro, sā pana ettha anavasārāti dassetuṃ “pañca na pañcāti idam na vattabba”nti vatvā pariyāyāhārasseva panettha adhippetabhāvaṃ dassento “**nanu paccayo āhāroti vuttameta**”nti āha. **Tasmāti** yassa kassaci paccayassa “āhāro”ti icchitattā. Idāni vuttamevattham pāḷiyā samatthento “**yam sandhāyā**”tiādimāha.

Mukhyāhāravasenapi nerayikānam āhāraṭṭhitikatam dassetuṃ “**kabaḷikāram āhāram...pe... sādhetī**”ti vuttam. Yadi evam nerayikā sukhapaṭisaṃvedinopi hontīti? Noti dassetuṃ “**kheḷopi hī**”tiādi vuttam. **Tayoti** tayo arūpāhārā kabaḷikārāhārassa abhāvato. **Avasesānanti** asaññasattehi avasesānam. Kāmabhavādīsu nibbattasattānam paccayāhāro hi sabbesaṃ sādharāṇoti. **Etam pañhanti** “katamo eko dhammo”ti evam coditametaṃ pañham. **Kathetvāti** vissajjevā.

“**Tattha tattha...pe... dukkham hotī**”ti etena yathā idha paṭhamassa pañhassa niyyātanam, dutiyassa uddharaṇam na katam, evam iminā eva adhippāyena ito paresu dukatikādipañhesu tattha tattha ādipariyosānesu eva uddharaṇaniyyātanāni katvā sesesu na katanti dasseti. Paṭicca etasmā phalam etīti **paccayo**, kāraṇam, tadeva attano phalam sañkharotīti **sañkhāroti** āha “**imasmimpi...pe... sañkhāroti vutto**”ti. **Āhārapaccayoti** āharaṇaṭṭhavisitṭho paccayo. **Āharaṇa**ñcetta uppādakattappadhānam, **sañkharaṇam** upatthambhakattappadhānanti ayametesam viseso. Tenāha “**ayamettha heṭṭhimato viseso**”ti. Nippariyāyāhāre gahite “sabbe sattā”ti vuttepi asaññasattā na gahitā eva bhavissantīti padesavisayo sabba-saddo hoti yathā “sabbe tasantidaṇḍassā”tiādīsu (dha. pa. 130). Na hettha khīṇāsavādīnam gahaṇam hoti. **Pākaṭo bhaveyya** visesasāmaññassa visayattā pañhānam. **No ca gaṇhimsu** aṭṭhakathācariyā. **Dhammo nāma natthi** sañkhatoti adhippāyo. **Idha** dutiyapañhe “**sañkhāro**”ti paccayo eva kathitoti sambandho.

Yadā sammāsambodhisamadhiḡato, tadā eva sabbañeyyam sacchikatam jātanti āha “**mahābodhimaṇḍe nisīditvā**”ti. **Sayanti** sāmānyeva. **Addhaniyanti** addhānakkhamam cirakālāvattṭhāyi pārampariyavasena. Tenāha “**ekena hī**”tiādi. **Paramparakathāniyamenāti** paramparakathākathananiyamena, niyamitathabyañjanānupubbīyā kathāyāti attho. **Ekakavasenāti** ekaṃ ekaṃ parimāṇam etassāti **ekako**, pañho. Tassa ekakassa vasena. **Ekakam niṭṭhitam** vissajjananti adhippāyoti.

Ekakavaṇṇanā niṭṭhitā.

## Dukavaṇṇanā

**304. Cattāro khandhā**ti tesam tāva nāmanaṭṭhena nāabhāvam paṭhamam vatvā pacchā nibbānassa vattukāmo āha. Tassāpi hi tathā nāabhāvam parato vakkhati. “Nāmam karoti nāmayatī”ti ettha yaṃ nāmakaraṇam, taṃ nāmanti āha “**nāmanaṭṭhenāti nāmakaraṇaṭṭhenā**”ti, attanovāti adhippāyo. Evañhi sātisayamidaṃ tesam nāmakaraṇam hoti. Tenāha “attano nāmam karontāva uppajjantī”tiādi. Idāni tamattham byatirekamukhena vibhāvetum “**yathā hī**”tiādi vuttaṃ. Yassa nāmassa karaṇeṇeva te “nāma”nti vuccanti, taṃ sāmaññanāmam, kittimanāmam, guṇanāmam vā na hoti, atha kho opapātikanāmanti purimāni tīṇi nāmāni udāharaṇavasena dassetvā “na evam vedanādīna”nti te paṭikkhipitvā itaranāmameva nāmakaraṇaṭṭhena nāmanti dassento “**vedanādayo hī**”tiādimāha. “Mahāpathaviādayo”ti kasmā vuttaṃ, nanu pathaviāpādayo idha nāmanti anadhippetā, rūpanti pana adhippetāti? Saccametam, phassavedanādīnam viya pana pathaviādayo opapātikanāmatāsāmaññeṇa “pathaviādayo viyā”ti nidassanam kataṃ, na arūpadhammā viya rūpadhammānam nāmasabhāvattā. Phassavedanādīnañhi arūpadhammānam sabbadāpi phassādīnāmakattā, pathaviādayo kesakumbhādīnāmantarāpatti viya nāmantarānāpajjanato ca sadā attanāva katanāmatāya catukkhandhanibbānāni nāmakaraṇaṭṭhena nāmam. Atha vā adhivacanasamphasso viya adhivacananāmamantarena ye anupacitasambhārānam gahaṇam na gacchanti, te nāmāyattaggahaṇā **nāmam**. Rūpam pana vināpi nāmasādhanam attano ruppanasabhāvena gahaṇam upayātīti **rūpam**. Tenāha “**tesu uppannesū**”tiādi. Idhāpi “yathāpathaviyā”tiādisu vuttanayeneva attho veditabbo nidassanavasena āgatattā. “**Atītepi**”tiādinā vedanādīsu nāmasaññā nirulhā, anādikālikā cāti dasseti.

Iti atīdivibhāgavantānampi vedanādīnam nāmakaraṇaṭṭhena nāabhāvo ekantiko, tabbibhāgarahite pana ekasabhāve nicce nibbāne vattabbameva natthīti dassento “**nibbānam pana... pe... nāmanaṭṭhena nāma**”nti āha. **Nāmanaṭṭhenāti** nāmakaraṇaṭṭhena. **Namantīti** ekantato sārammaṇattā tanninnā honti, tehi vinā nappavattantīti attho. **Sabbanti** khandhacatukkaṃ, nibbānañca. Yasmim ārammaṇeṇeva vedanākkhandho pavattati, taṃsampayuttatāya saññākkhandhādayopi tattha pavattantīti so ne tattha nāmento viya hoti vinā appavattanato. Esa nayo saññākkhandhādīsūpīti vuttaṃ “**ārammaṇe aññamaññaṃ nāmentī**”ti. **Anavajjadhamme** maggaphalādiḷe. Kāmam kesuci rūpadhammesupi ārammaṇādhipatibhāvo labbhateva, nibbāne panesa sātisayo tassa accantasantapaṇītātākappabhāvatoṭi tadeva ārammaṇādhipatipaccayatāya “**attani nāmetī**”ti vuttaṃ. Tathā hi ariyā sakalampi divasabhāgam taṃ ārabha vītināmentāpi tittim na gacchanti.

“**Ruppanaṭṭhenā**”ti etena ruppatīti rūpanti dasseti. Tattha sītādivirodhipaccayasannipāte visadisuppatti **ruppanam**. Nanu ca arūpadhammānampi virodhipaccayasamāgame visadisuppatti labbhatīti? Saccaṃ labbhati, na pana vibhūtatarānam. Vibhūtatarāñhettha ruppanam adhippetam sītādiggaṇato. Vuttañhetam “ruppatīti kho bhikkhave tasmā ‘rūpa’nti vuccati. Kena ruppati? Sītenapi ruppati, uñhenapi ruppati”tiādi (saṃ. ni. 3.79). Yadi evam katham brahmaloke rūpasamaññāti? Tatthāpi taṃsabhāvānavattanato hotiyeva rūpasamaññā. Anuggāhakapaccayasena vā visadisapaccayasannipāteṭi evamattho veditabbo. “Yo attano santāne vijjamānassayeṇa visadisuppattihetubhāvo, taṃ **ruppana**”nti aññe. Imasmim pakkhe rūpayati vikāramāpādetīti **rūpam**. “Saṅghaṭṭanena vikārāpattiyam **ruppana**-saddo nirulho”ti keci. Etasmim pakkhe arūpadhammesu rūpasamaññāya pasaṅgo eva natthi saṅghaṭṭanābhāvato. “Paṭighato **ruppana**”nti apare. “**Tassāti rūpassā**”ti vadanti, nāmarūpassāti pana yuttaṃ. Yathā hi rūpassa, evam nāmāssāpi vedanākkhandhādivasena, madanimmadanādivasena ca vitthārakathā **visuddhimagge** (visuddhi. 2.456) vuttā evāti. Iti ayam duko kusalattikena saṅghahite sabhāvadhamme pariggahetvā pavattoti.

**Avijjā**ti avindiyam “attā, jīvo, itthī, puriso”ti evamādikaṃ vindatīti **avijjā**. Vindiyam “dukkham, samudayo”ti evamādikaṃ na vindatīti **avijjā**. Sabbampi dhammajātam aviditakaraṇaṭṭhena **avijjā**. Antarahite saṃsāre satte javāpetīti **avijjā**. Atthato pana sā dukkhādīnam catunnam saccānam sabhāvacchādako sammoho hotīti āha “**dukkhādīsū aññāna**”nti. **Bhavapatthanā** nāma

kāmabhavādīnaṃ patthanāvasena pavattataṇhā. Tenāha “**yo bhavesu bhavacchando**”tiādi. Iti “ayaṃ duko vaṭṭamūlasamudācārādassanattamaṃ gahito.

**Bhavadiṭṭhī** khandhapañcakaṃ “attā ca loko cā”ti gāhetvā taṃ “bhavissatī”ti gaṇhanavasena nivīṭṭhā sassatadiṭṭhīti attho. Tenāha “**bhavo vuccatī**”tiādi. Bhavissatīti **bhavo**, tiṭṭhati sabbakālaṃ atthīti attho. **Sassatanti** sassatabhāvo. **Vibhavadiṭṭhī** khandhapañcakameva “attā”ti ca “loko”ti ca gāhetvā taṃ “na bhavissatī”ti gaṇhanavasena nivīṭṭhā ucchedadiṭṭhīti attho. Tenāha “**vibhavo vuccatī**”tiādi. Vibhavissatī vinassatī ucchijjatīti **vibhavo**, ucchedo.

**Yaṃ na hiriyatīti** yena dhammena taṃsampayuttadhammasamūho, puggalo vā na hiriyati na lajjati, liṅgavipallāsaṃ vā katvā yo dhammoti attho veditabbo. **Hiriyitabbenāti** upayogatthe karaṇavacanāṃ, hiriyitabbayuttakaṃ kāyaduccarītādiddhammaṃ na jigucchatīti attho. **Nillajjatīti** pāpassa ajjucchanā. **Yaṃ na ottappatīti** etthāpi vuttanayeneva attho veditabbo. **Ottappitabbenāti** pana hetuatthe karaṇavacanāṃ, ottappitabbayuttakena ottappassa hetubhūtena kāyaduccarītādīnāti attho. **Hiriyitabbenāti** etthāpi vā evameva attho veditabbo. **Abhāyanakaākāro**ti pāpato anuttāsanākāro.

“**Yaṃ hiriyatī**”tiādīsu anantaraduke vuttanayena attho veditabbo. Niyakajjhataṃ jātiādīsamuṭṭhānaṃ etissatī **ajjhattasamuṭṭhānā**. Niyakajjhataṃ bahibhāvato bahiddhā parasantāne samuṭṭhānaṃ etissatī **bahiddhā samuṭṭhānā**. Attā eva adhipati **attādhipati**, ajjhattasamuṭṭhānattā eva attādhipatito āgamanato **attādhipateyyā**. **Lokādhipateyyanti** etthāpi eseva nayo. **Lajjāsabhāvasaṅghitātī** pāpato jigucchanarūpena avaṭṭhitā. **Bhayasabhāvasaṅghitanti** tato uttāsanarūpena avaṭṭhitā. Ajjhattasamuṭṭhānādītā ca hirottappānaṃ tattha tattha pākātabhāvena vuttā, na pana tesāṃ kadāci pi aññamaññavippayogato. Na hi lajjanaṃ nibbhayaṃ, pāpabhayaṃ vā alajjanaṃ atthīti.

**Dukkanti** kicchaṃ, anīṭṭhanti vā attho. **Vipparīkūlagāhimhīti** dhammānudhammapaṭipattiyā vilomaḡāhake. Tassā eva vipaccanīkaṃ duppaṭipattī sātāṃ iṭṭhaṃ etassatī vipaccanīkasāto, tasmim **vipaccanīkasāte**. Evaṃbhūto ca ovādabhūte sāsanaḡkame ovāḡake ca āḡarabhāvarahito hotīti āha “**anādare**”ti. **Tassa kammanti** tassa dubbacassa puggalassa anādariyavasena pavattacetanā **dovacassaṃ**. **Tassa bhāvotī** tassa yathāvuttassa dovacassassa atthibhāvo **dovacassatā**, atthato dovacassameva. Tenevāha “**sā atthato saṅkhārakkhandho hotī**”ti. Cetanāppadhānatāya hi saṅkhārakkhandhassa evaṃ vuttaṃ. **Etenākārenātī** appadakkhiṇaḡaggāhitākārena. Assaddhiyadussīlyāḡipāpadhammayogato puggalā pāpā nāma hontīti dassetaṃ “**ye te puggalā assaddhā**”tiādi vuttaṃ. Yāya cetanāya puggalo pāpasampavaṅko nāma hotī, sā cetanā **pāpamittatā**, cattāropi vā arūpino khandhā tadākārappavattā **pāpamittatātī** dassento “**sāpi atthato dovacassatā viya daṭṭhabbā**”ti āha.

“Sukhaṃ vaco etasmim padakkhiṇaḡaggāhimhi anulomasāte sādare puggaleti **subbacotī**ādīnā, “kalyāṇā saddhādayo puggalā etassa mittātī **kalyāṇamitto**”tiāḡīnā ca anantaradukassa attho icchitotī āha **sovacassatā...pe... vuttapaṭipakkhanayena veditabbā**”ti. **Ubhotī** sovacassatā, kalyāṇamittatā ca. Tesāṃ khandhānaṃ pavattīākāravisesā “sovacassatā, kalyāṇamittatā”ti ca vuccanti, te lokiyāpi hontī lokuttarāpīti āha “**lokiyalokuttaramissakā kathitā**”ti.

Vatthubhedāḡīnā anekabhedabhinnā taṃtaṃjātivāsena ekajjhaṃ katvā rāsito gaḡhamānā āpattiyova **āpattikkhandhā**. Tā pana antarāpattīnaṃ aggaḡaṇe **pañcapi āpattikkhandhā āpattīyo**, tāsāṃ pana gaḡaṇe **sattapi āpattikkhandhā āpattīyo**. “Imā āpattīyo, ettakā āpattīyo, evaṅca tesāṃ āpajjanaṃ hotī”ti jānanapaññā **āpattikusalatātī** āha “**yā tāsa**”ntīādi. **Tāsāṃ āpattīnanti** tāsū āpattīsu. Tattha yaṃ sambhinnavatthukāsu viya ṭhitāsu, duviññeyyavibhāḡāsu ca āpattīsu asaṅkarato vavatthāna, ayaṃ visesato **āpattikusalatātī** dassetaṃ dutiyaṃ āpattiggahaṇaṃ kataṃ. **Saha kammavācāyātī** kammavācāya saheva. Āpattito vuṭṭhāpanapayogaḡāya kammabhūtā vācā **kammavācā**, tathābhūtā anusāvanavācā ceva “passissāmī”ti evaṃ pavattavācā ca. Tāya kammavācāya saddhim samakālameva

“imāya kammavācāya ito āpattito vuṭṭhānaṃ hoti, hontañca paṭhame vā tatiye vā anusāvaneyyakārapatte, ‘saṃvarissāmī’ ti vā pade pariyosite hoti” ti evaṃ taṃ taṃ **āpattihi vuṭṭhānaparicchedaparijānanapaññā** āpattivuṭṭhānakusalatā. **Vuṭṭhānanti** ca yathāpannāya āpattiyā yathā tathā anantarāyatāpādanam, evaṃ vuṭṭhānaggahaṇeneva desanāyapi saṅgaho siddho hoti.

“Itto pubbe parikkammaṃ pavattaṃ, ito paraṃ bhavaṅga majjhe samāpatti” ti evaṃ samāpattīnaṃ **appanāparicchedajānanapaññā** samāpattikusalatā. Vuṭṭhāne kusalabhāvo **vuṭṭhānakusalatā**, pageva vuṭṭhāna paricchedakaraṃ ñāṇaṃ. Tenāha “**yathāparicchinnasamayavasenevā**” tiādi. **Vuṭṭhānasamatthāti** vuṭṭhāpane samatthā.

“Dhātukusalatā” ti ettha pathavīdhātuādayo, sukhadhātuādayo, kāmādhātuādayo ca dhātuyo etāsveva antogadhāti etāsu kosalle dassite tāsopi kosallaṃ dassitameva hotīti “**aṭṭhārasa dhātuyo cakkhuhātu...pe... manoviññādhātū**” ti vatvā “**aṭṭhārasannaṃ dhātūnaṃ sabhāvaparicchedakā**” ti vuttaṃ. Tattha **sabhāvaparicchedakāti** yathābhūtasabhāvāvabodhinī. “Savanapaññā dhāraṇapaññā” tiādinā paccekam paññā-saddo yojetabbo. Dhātūnaṃ savanadhāraṇapaññā **sutamayā**, itarā **bhāvanāmayā**. Tatthāpi sammasanapaññā lokiyā. Vipassanā paññā hi sā, itarā lokuttarā. Lakkhaṇādivasena, aniccādivasena ca manasikaraṇaṃ **manasikāro**, tattha kosallaṃ **manasikārakusalatā**. Taṃ pana ādimajjhāpariyosānavasena tidhā bhinditvā dassento “**sammasanapaṭivedhapaccavekkhaṇapaññā**” ti āha. **Sammasanapaññā** hi tassā ādi, **paṭivedhapaññā** majjhe, **paccavekkhaṇapaññā** pariyosānaṃ.

Āyatanānaṃ ganthato ca atthato ca uggaṇhanavasena tesam dhātulakkhaṇādivibhāgassa jānanapaññā **uggahajānanapaññā**. Sammasanapaṭivedhapaccavekkhaṇavidhino jānanapaññā **manasikārajānanapaññā**. Yasmā āyatanānīpi atthato dhātuyova manasikāro ca uggaṇhanādivasena tesameva manasikāravidhi, tasmā dhātukusalatādikā tissopi kusalatā ekadesa katvā dassetuṃ “**apicā**” tiādi vuttaṃ. Savanaṃ viya uggaṇhanapaccavekkhaṇānīpi parittañāṇakattukānīti āha “**savana uggahaṇapaccavekkhaṇā lokiyā**” ti. Ariyamaggakhaṇe sammasanāmanasikāraṇaṃ nipphatti pariniṭṭhānanti tesam lokuttaratāpariyāyopi labbhatīti vuttaṃ “**sammasanāmanasikārā lokiyalokuttaramissakā**” ti. Paccayadhammānaṃ hetuādīnaṃ attano paccayuppannānaṃ hetupaccayādivhāvena paccayabhāvo **paccayākāro**, so pana avijjādīnaṃ dvādasannaṃ paṭiccasamuppādaṅgānaṃ vasena dvādasavidhoti āha “**dvādasannaṃ paccayākārāna**” nti. **Uggahādivasenāti** uggahāmanasikārasavanasammasanapaṭivedhapaccavekkhaṇavasena.

**Ṭhānañceva** tiṭṭhati phalaṃ tadāyattavuttitāyāti **kāraṇaṅca** hetupaccayabhāvena karaṇato nipphādanato. **Tesaṃ** sotaviññāṇādīnaṃ. Etasmiṃ duke attho veditabboti sambandho. Ye dhammā yassa dhammassa kāraṇabhāvato **ṭhānaṃ**, teva dhammā taṃvidhurassa dhammassa akāraṇabhāvato **aṭṭhānanti** paṭhamanaye phalabhedenā tasseva dhammassa **ṭhānāṭṭhānatā** dīpitā; dutiyanaye pana abhinnepi phale paccayadhammabhedenā tesam **ṭhānāṭṭhānatā** dīpitāti ayametesam viseso. Na hi kadāci ariyā diṭṭhisampadā niccaggāhassa kāraṇaṃ hoti, akiriyaṭā pana siyā tassa kāraṇanti.

Ujuno bhāvo **ajjavam**, ajimhatā akuṭilatā avaṅkatāti atthoti tamatthaṃ anajjavapaṭikkhepamukhena dassetuṃ “**gomuttavaṅkatā**” tiādi vuttaṃ. Svāyaṃ anajjavo bhikkhūnaṃ yebhuyyena anesanāya, agocaracāritāya ca hotīti āha “**ekacco hi...pe... caratī**” ti. **Ayam gomuttavaṅkatā nāma** ādito paṭṭhāya yāva pariyosānā paṭipattiyā vaṅkabhāvato. **Purimasadisoti** paṭhamam vuttabhikkhusadisoti. **Candavaṅkatā nāma** paṭipattiyā majjhaṭṭhāne vaṅkabhāvāpattito. **Naṅgalakoṭivaṅkatā nāma** pariyosāne vaṅkabhāvāpattito. **Idam ajjavam nāma** sabbatthakameva ujubhāvasiddhito. **Ajjavatāti** ākāraniddeso, yenākārenassa ajjavo pavattati, tadākāraniddesoti attho. Lajjati **lajjī**, hirimā, tassa bhāvo **lajjavam**, hirīti attho. Lajjā etassa atthīti **lajjī** yathā “**mālī, māyī**” ti ca, tassa bhāvo **lajjībhāvo**, sā eva lajjā.

Parāparādhādīnaṃ adhvāsanaṅkhamam **advhāsanaṅkhamanti**. Sucisīlatā **soraccaṃ**. Sā hi

sobhanakammaratātā, suṭṭhu vā pāpato oratabhāvo viratatā **soraccaṃ**. Tenāha “**suratabhāvo**”ti.

“**Nāmañca rūpañcā**”tiādīsu ayaṃ aparo nayo – **nāmakaraṇaṭṭhenāti** aññaṃ anapekkhitvā sayameva attano nāmakaraṇasabhāvatoti attho. Yañhi parassa nāmaṃ karoti, tassa ca tadapekkhattā aññapekkhaṃ nāmakaraṇanti nāmakaraṇasabhāvatā na hoti, tasmā mahājanassa ñātīnaṃ, guṇānañca sāmāññanāmādikārakānaṃ nāmañcāvo nāpajjati. Yassa ca aññehi nāmaṃ karīyati, tassa ca nāmakaraṇasabhāvatā natthīti, natthiyeva nāmañcāvo. Vedanādīnaṃ pana sabhāvasiddhattā vedanādīnaṃ nāmakaraṇasabhāvato nāmatā vuttā. Pathavīdī nidassanena nāmassa sabhāvasiddhatāyeva nidasseti, na nāmañcāvasāmāññaṃ, niruḥhattā pana nāma-saddo arūpadhammesu eva vattati, na pathavīdīsūti na tesāṃ nāmañcāvo. Na hi pathavīdīnaṃ vijahitvā kesādīnaṃ rūpadhammānaṃ viya vedanādīnaṃ vijahitvā aññena nāmena arūpadhammānaṃ voharitabbena piṇḍākārena pavatti atthīti.

Atha vā rūpadhammā cakkhādayo rūpādayo ca, tesāṃ pakāsakapakāsītābhabhāvato vināpi nāmena pākāṭā honti, na evaṃ arūpadhammāti te adhivacanasamphasso viya nāmāyattaggahaṇīyabhāvena “nāma”nti vuttā. Paṭighasamphasso ca na cakkhādīni viya nāmena vinā pākāṭoti “nāma”nti vutto, arūpatāya vā aññanāmasabhāgattā saṅgahitoyaṃ, aññaphassasabhāgattā vā. Vacanatthopi hi rūpayatīti **rūpaṃ**, nāmāyatīti **nāma**nti idha pacchimapurimānaṃ sambhavati. **Rūpayatīti** vināpi nāmena attānaṃ pakāsetīti attho. **Nāmāyatīti** nāmena vinā apākāṭabhāvato attano pakāsakaṃ nāmaṃ karotīti attho. **Ārammaṇādhipatipaccayatāyāti** satipi rūpassa ārammaṇādhipatipaccayatāyā vā na taṃ paramassāsabhūtaṃ nibbānaṃ viya sātīsayā nāmanabhāvena paccayoti nibbānameva “nāma”nti vuttam.

“**Avijjā ca bhavataṇhā cā**”ti ayaṃ duko sattānaṃ vaṭṭamūlasamudācārādasanatto. Samudācaratīti hi **samudācāro**, vaṭṭamūlameva samudācāro **vaṭṭamūlasamudācāro**, vaṭṭamūladassanena vā vaṭṭamūlānaṃ pavatti dassitā hotīti vaṭṭamūlānaṃ samudācāro **vaṭṭamūlasamudācāro**, taṃdassanatto attho.

Ekekasmīna “attā”ti ca “loko”ti ca gahaṇavisesaṃ upādāya “attā ca loko cā”ti vuttam, ekaṃ vā khandhaṃ “attā”ti gahetvā aññaṃ attano upabhogabhūtaṃ “loko”ti gaṇhantassa, attano attānaṃ “attā”ti gahetvā parassa attānaṃ “loko”ti gaṇhantassa vā vasena “attā ca loko cā”ti vuttam.

Saha sikkhitabbo dhammo **sahadhammo**, tattha bhavaṃ sahadhammikaṃ, tasmim **sahadhammike**. Dovacassa-saddato āya-saddaṃ anaññattaṃ katvā “**dovacassāya**”nti vuttam, dovacassassa vā ayaṃ pavatti **dovacassāyaṃ**. Āsevantaṃsāpi anusikkhānaṃ ajjhāsāyena bhajānti āha “**sevanā...pe... bhajāna**”ti. Sabbatobhāgena bhānti **sambhatti**.

**Saha kammavācāyāti** abbhānatiṇavattārahakammavācāya, “ahaṃ bhante itthannāmaṃ āpattim āpajji”ntiādīkāya ca saheva. Saheva hi kammavācāya āpattivuttānañca paricchijjati, “paññattilakkhaṇāya āpattiyā vā kāraṇaṃ vītikkamalakkhaṇaṃ kāyakammaṃ, vacīkammaṃ vā, vuttānaṃ kāraṇaṃ kammavācā”ti kāraṇena saha phalassa jānanavasena “saha kammavācāyā”ti vuttam. “Saha kammavācāyā”ti. Iminā nayena **saha parikammenāti** etthāpi attho veditabbo.

Dhātuvisayā sabbāpi paññā **dhātukusalatā**. Tadekadesā **manasikārakusalatā**ti adhippāyena purimāpadepi sammasanapaṭivedhapaññā vuttā. Yasmā pana nippariyāyato vipassanādīpaññā eva manasikāraṇasallaṃ, tasmā “**tāsaṃyeva dhātūnaṃ sammasanapaṭivedhapaccavekkhaṇapaññā**”ti vuttam.

Āyatanavisayā sabbāpi paññā **āyatanakusalatā**ti dassento “dvādasannaṃ āyatanānaṃ uggahamanasikāraṇānaṃ paññā”ti vatvā puna “**apicā**”tiādī vuttam. Dvīsūpi vā padesu vācugatāya āyatanapāḷiyā, dhātupāḷiyā ca manasikāraṇaṃ **manasikāro**. Tathā uggaṇhantī, manasi karontī, tadattham

suṇantī, ganthato ca atthato ca dhārentī, “idaṃ cakkhāyatanam nāma, ayaṃ cakkhūdhātu nāmā” tiādīnā sabhāvato, gaṇanato ca paricchedaṃ jānantī ca paññā **uggahapaññādikā** vuttā. Manasikārapade pana catubbidhāpi paññā uggahoti tato pavatto aniccādimanasikāro “uggahamanasikāro” ti vutto. Tassa jānanam pavattanameva, “yathā pavattaṃ vā uggahaṃ, evameva pavatto uggaho” ti jānanam **uggahajānanam**. “Manasikāro evaṃ pavattetabbo, evañca pavatto” ti jānanam **manasikārajānanam**. Tadubhayampi “manasikāraḥkosalla” nti vuttaṃ. Uggahopi hi manasikārasampayogato manasikāraniruttiṃ laddhuṃ arahati. Yo ca manasikātabbo, yo ca manasikāraṇūpāyo, sabbo so “manasikāro” ti vuttuṃ vaṭṭati, tattha kosallaṃ **manasikārakusalatā**ti. **Sammasanam** paññā, sā maggasampayuttā aniccādisammasanakiccaṃ sādheti niccasaññādipajahanato. **Manasikāro** sammasanasampayutto, so tattheva aniccādimanasikāraḥkosallaṃ maggasampayutto sādhetīti āha “**sammasanamanasikārā lokiyalokuttaramissakā**” ti. “Iminā paccayenidaṃ hoti” ti evaṃ avijjādīnaṃ saṅkhārādipaccayuppannaṃ paccayabhāvajānanam **paṭiccasamuppādakusalatā**.

**Adhivāsanam** khamanam. Tañhi paresam dukkaṭam duruttañca paṭivirodhākaraṇena attano upari āropetvā vāsanam “adhivāsana” nti vuccati. **Acaṇḍikkanti** akujjhanam. Domanassavasena paresam akkhīsu assūnam anuppādanā **anassuro**. **Attamanatā**ti sakamanatā. Cittassa abyāpanno sako manobhāvo **attamanatā**. Cittanti vā cittappabandham ekattena gahetvā tassa antarā uppanna pītisahagatamanena **sakamanatā**. Attamano vā puggalo, tassa bhāvo **attamanatā**, sā na sattassāti puggaladitṭhinivāraṇattham “**cittassā**” ti vuttaṃ. Adhivāsanalakkhaṇā khanti **adhivāsanakhanti**. Suciṣilatā **soraccam**. Sā hi sobhanakammaratā. Suṭṭhu pāpato oratabhāvo viratatā soraccam. Tenāha “**suratabhāvo**” ti.

**Sakhilo** vuccati saṅhavāco, tassa bhāvo **sākhalyam**, saṅhavācatā. Tam pana byatirekamukhena vibhāventī yā pāli pavattā, tam dassento “**tattha katamam sākhalya**” ntiādīmāha. Tattha **aṇḍakā**ti sadosavaṇe rukkhe niyyāsapiṇḍiyo, ahicchattakādīni vā utṭhitāni “aṇḍakāni” ti vadanti. Pheggurukkhassa pana kuthitassa aṇḍāni viya utṭhitā cuṇṇapiṇḍiyo, gaṇṭhiyo vā **aṇḍakā**. Idha pana byāpajjanakakkasādibhāvato aṇḍakapakatibhāvena vācā “**aṇḍakā**” ti vuttā. Padumanālam viya sotaṃ ghaṃsayamānā pavisantī **kakkasā** daṭṭhabbā. Kodhena nibbattattā tassa parivārabhūtā **kodhasāmantā**. Pure saṃvaddhanārī **porī**, sā viya sukumārā mudukā vācā porī viyāti **porī**. **Tatthāti** “bhāsītā hoti” ti vuttāya kiriyāyātipi yojanā sambhavati, **tattha** vācāyāti vā. “**Saṅhavācatā**” tiādīnā tam vācam pavattayamānam cetanam dasseti. Sammodakassa puggalassa mudukabhāvo maddavaṃ **sammodakamudukabhāvo**. **Āmisena** alabbhamānena, tathā **dhammena cāti dvīhi chiddo**. Āmisassa, dhammassa ca alābhena attano parassa ca antare sambhavantassa hi chiddassa vivarassa bhedassa paṭisantharaṇam pidhanaṃ saṅgaṇhanaṃ **paṭisanthāro**. Tam sarūpato, paṭipattito ca pāḷidassanamukhena vibhāvetuṃ “**abhidhammepī**” tiādīmāha. **Aggaṃ aggahetvāti** aggaṃ attano aggahetvā. **Uddesadānanti** pāḷiyā, aṭṭhakathāya ca uddisanaṃ. **Pāḷivaṇṇanāti** pāḷiyā atthavaṇṇanā. **Dhammakathākathananti** sarabhaññasarabhaṇādivasena dhammakathanaṃ.

**Karuṇāti** karuṇābrahmavihāramāha. **Karuṇāpubbabhāgoti** tassa pubbabhāgaupacārajjhānam vadati. Pāḷipade pana yā kāci karuṇā “karuṇā” ti vuttā, **karuṇācetovimuttīti** pana appanāppattāva. **Mettāyapi** eseva nayo. Suci-saddato bhāve yya-kāram, i-kārassa ca e-kārādesam katvā ayaṃ niddesoti āha “**soceyyanti sucibhāvo**” ti. Hotu tāva sucibhāvo soceyyam, tassa pana mettāpubbabhāgatā kathanti āha “**vuttampi ceta**” ntiādi.

Muṭṭhā sati etassāti **muṭṭhassati**, tassa bhāvo **muṭṭhassaccam**, satipaṭipakkho dhammo, na satiyā abhāvamattaṃ. Yasmā paṭipakkhe sati tassa vasena sativigatā vipavutthā nāma hoti, tasmā vuttaṃ “**sativippavāso**” ti. “**Assati**” tiādīsū a-kāro paṭipakkhe daṭṭhabbo, na sattapaṭisedhe. Udaḥ lābu viya yena cittaṃ ārammaṇe pilavantā viya tiṭṭhati, na ogāhati, sā **pilāpanatā**. Yena gahitampi ārammaṇam sammussati na sarati, sā **sammussanatā**. Yathā vijjāpaṭipakkhā avijjā vijjāya pahātabbato, evaṃ sampajaññapaṭipakkham **asampajaññam**, avijjāyeva.



**Indriyaṣaṃvarabhedoti** indriyaṣaṃvaravināso. **Appaṭisaṅkhāti** appaccavekkhitvā ayoniso ca āhāraparibhoge ādinavānisamse avīmaṃsitvā.

**Appaṭisaṅkhāyāti** itikattabbatāsu appaccavekkhaṇāya nāmaṃ. Aññāṇaṃ appaṭisaṅkhāta nimittaṃ. **Akampanaññanti** tāya anabhibhavanīyaṃ ñāṇaṃ, tattha tattha paccavekkhaṇāññāṇaṃ paccavekkhaṇāya muddhabhūtaṃ lokuttaraññāṇaṃ. Nippariyāyato maggabhāvanā **bhāvanā** nāma, yā ca tadatthā, tadubhayaṇca bhāventasseva icchitabbaṃ, na bhāvitabhāvanassāti vuttaṃ “**bhāventassa uppannaṃ bala**”nti. Tenāha “**yā kusalānaṃ dhammānaṃ āsevanā bhāvanā bahulikamma**”nti.

Kāmaṃ sampayuttadhammesu thirabhāvopi balaṭṭho eva, paṭipakkhehi pana akampanīyatā sātisaṃvaraṃ balaṭṭhoti vuttaṃ “**assatiyā akampanavasenā**”ti. Paccanīkadhammasamanato **samatho samādhi**. Aniccādinā vividhenākārena dassanato **vipassanā paññā**. **Taṃ ākāraṃ gahetvāti** samādhānākāraṃ gahetvā. Yenākārena pubbe alīnaṃ anuddhataṃ majjhimaṃ bhāvanāvīthipaṭipannaṃ hutvā cittaṃ samāhitaṃ hoti, taṃ ākāraṃ gahetvā sallakkhetvā. **Nimittavasenāti** kāraṇavasena. “**Eseva nayo**”ti iminā paggahova taṃ ākāraṃ gahetvā puna pavattetabbassa paggāhassa nimittavasena paggāhanimittanti imamatthaṃ atidisi, tassattho samathe vuttanayānusārena vedītabbo. **Paggāho vīriyaṃ** kosajjapakkhato cittaṃ patitvaṃ adatvā paggaṇhanato. **Avikkhepo ekaggatā** vikkhepassa uddhaccassa paṭipakkhabhāvato. Paṭisaṅkhānakiccanibbattibhāvato lokuttaradhammānaṃ paṭisaṅkhānabalabhāvo, tathā pubbe pavattākārasallakkhaṇavasena samathapaggāhānaṃ upari pavattisabbhāvato samathanimittadukassapi missakatā vuttā.

Yathāsamādinnaṃ sīlassa bhedakaro **vītikamo**. Sīlavināsako **asaṃvaro**. **Sammādiṭṭhivināsikāti** “atthi dinna”ntiādi (ma. ni. 1.441; 2.94; vibha. 793) nayappavattāya sammādiṭṭhiyā dūsikā.

**Sīlassa sampādanaṃ** nāma sabbabhāgato tassa anūnatāpādananti āha “**sampādanato paripūraṇato**”ti. Pāripūrattho hi sampadā-saddoti. **Mānasikasīlaṃ** nāma sīlavīsodhanavasena abhijjhādiṭṭhānaṃ. **Diṭṭhipāripūribhūtaṃ ñāṇanti** atthikadiṭṭhiādisammādiṭṭhiyā pāripūribhāvena pavattaṃ ñāṇaṃ.

**Visuddhiṃ pāpetuṃ samatthanti** cittavisuddhiādiuparivissuddhiyā paccayo bhavītuṃ samatthaṃ. Suvisuddhameva hi sīlaṃ tassā padaṭṭhānaṃ hotīti. **Visuddhiṃ pāpetuṃ samatthaṃ dassananti** ñāṇadassanavisuddhiṃ, paramatthavisuddhinibbānaṇca pāpetuṃ upanetuṃ samatthaṃ kammassakatāññādisammādasanaṃ. Tenāha “**abhidhamme**”tiādi. Ettha ca “idaṃ akusalaṃ kammaṃ no sakaṃ, idaṃ pana kammaṃ saka”nti evaṃ byatirekato anvayato ca kammassakatāññānaṇca **kammassakatāññāṇaṃ**. Tenāha “**ettha cā**”tiādi. “**Parena katampī**”ti idaṃ nidassanavasena vuttaṃ yathā parena kataṃ, evaṃ attanā katampi sakakammaṃ nāma na hotīti. Attanā vā ussāhitena parena katampīti evaṃ vā attho daṭṭhabbo. Yañhi taṃ parassa ussāhanavasena kataṃ, tampi sakakammaṃ nāma hotīti ayañhettha adhippāyo. **Atthabhañjanatoti** diṭṭhadhammikādisabbaatthavināsanato. **Atthajanatoti** idhalokatthaparalokatthaparamatthānaṃ uppādanato. Ārabbhakāle “aniccaṃ dukkhaṃ anattā”ti pavattampi **vacīsaccaṇca** lakkhaṇāni paṭivijjhantaṃ **vipassanāññāṇaṃ anulometi** tattheva paṭivijjhanato. **Paramatthasaccaṇca** nibbānaṃ **na vilometi** na virodheti ekanteneva sampāpanato.

**Ñāṇadassananti** ñāṇabhūtaṃ dassanaṃ, tena maggaṃ vadati. **Taṃsampayuttameva vīriyanti** paṭhamamaggasampayuttaṃ vīriyamāha. Sabbāpi maggapaññā diṭṭhivissuddhiyevāti dassetuṃ “**apicā**”tiādi vuttaṃ. Ayameva ca nayo abhidhammapāḷiyā (dha. sa. 550) sametīti dassento “**abhidhamme panā**”ti ādiṃ avoca.

Yasmā saṃvego nāma sahotappañāṇaṃ, tasmā saṃvegavatthūṃ bhayato bhāyitabbato dassanavasena pavattañāṇaṃ. Tenāha “**jātibhaya**”ntiādi. Bhāyanti etasmāti **bhayaṃ**, jāti eva bhayaṃ **jātibhayaṃ**. **Saṃvejanīyanti** saṃvijjitaṃ bhāyitabbaṃ uttāsitaṃ. **Thānanti** kāraṇaṃ, vatthūti

attho. **Samvegajātassāti** uppannasamvegassa. **Upāyapadhānanti** upāyena pavattetabbaṃ vīriyaṃ.

**Kusalānaṃ dhammānanti** sīlādīnaṃ anavajjadhammānaṃ. **Bhāvanāyāti** uppādanena vaḍḍhanena ca. **Asantuṭṭhassāti** “alam ettāvata, kathaṃ ettāvata” ti saṅkocāpattivaseṇa na santuṭṭhassa. **Bhiyyokamyatāti** bhiyyo bhiyyo uppādanicchā. **Vosānanti** saṅkocaṃ asamatthanti. Tussanaṃ tuṭṭhi **santuṭṭhi**, natthi etassa santuṭṭhīti **asantuṭṭhi**, tassa bhāvo **asantuṭṭhitā**. Vīriyappavāhe vattamāne antarā eva paṭigamaṇaṃ nivattanaṃ **paṭivānaṃ**, taṃ tassa atthīti **paṭivānī**, na paṭivānī **appaṭivānī**, tassa bhāvo **appaṭivānitā**. **Sakkaccakiriyatāti** kusalānaṃ karaṇe sakkaccakiriyatā ādarakiriyatā. **Sātaccakiriyatāti** satatameva karaṇaṃ. **Aṭṭhitakiriyatāti** antarā aṭṭhapetvā khaṇḍaṃ akatvā karaṇaṃ. **Anolīnavuttitāti** na līnappavattitā. **Anikkhittachandatāti** kusalacchandassa anikkhipanaṃ. **Anikkhittadhuratāti** kusalakaraṇe vīriyadhurassa anikkhipanaṃ. **Āsevanāti** ādarena sevanā. **Bhāvanāti** vaḍḍhanā brūhanā. **Bahulīkammanti** punappunaṃ karaṇaṃ.

**Tisso vijjāti** pubbenivāsānussatiñāṇaṃ, dibbacakkhuñāṇaṃ āsavakkhayañāṇanti imā tisso vijjā. Paṭipakkhaviijhanaṭṭhena pubbe nivutthakkhandhādīnaṃ viditakaraṇaṭṭhena viṣiṭṭhā muttīti **vimutti**. Svāyaṃ viṣeso paṭipakkhavigamanaṇa, paṭiyogivigamanaṇa ca icchitabboti tadubhayaṃ dassetuṃ “**ettha cā**” tiādi vuttaṃ. Tatha yena viṣeseṇa samāpattiyo paccanīkadhammehi suṭṭhu muttā, tato nirāsaṅkatāya ārammaṇe ca abhiratā, taṃ viṣesaṃ upādāya tā adhikaṃ muccanato, ārammaṇe adhimuccanato ca **adhimuttiyo nāmāti** vuttaṃ “**cittassa ca adhimutti**” ti. **Muttattāti** sabbasaṅkhārehi viṣeseṇa nissaṭṭatā **vimutti**.

**Khaye ñāṇanti** samucchavedavasena kilese khepetīti **khayo**, ariyamaggo, tappariyāpannaṃ ñāṇaṃ **khaye ñāṇaṃ**. **Paṭisandhivasenāti** kilesānaṃ taṃtaṃmaggavajjhānaṃ uppannamagge khandhasantāne puna sandahanavasena. **Anuppādabhūtetī** taṃtaṃphale. **Anuppādapariyosānetī** anuppādakaro maggo **anuppādo**, tassa pariyosāne, kilesānaṃ vā anuppajjanasaṅkhāte pariyosāne, bhaṅgeti atthoti.

Dukavaṇṇanā niṭṭhitā.

### Tikavaṇṇanā

**305.** Dhammato añño kattā natthīti dassetuṃ kattusādhanavasena “**lubbhatīti lobho**” ti vuttaṃ. Lubbhati tena, lubbhanamattametanti karaṇabhāvasādhanavasena attho yujjateva. **Dussati muyhatīti** etthāpi eseva nayo. **Akusalañca taṃ** akosallasambhūtaṭṭhena ekantākusalabhāvato **mūlañca** attanā sampayuttadhammānaṃ suppatiṭṭhitabhāvasādhanato, na akusalabhāvasādhanato. Na hi mūlakato akusalānaṃ akusalabhāvo, kusalādīnañca kusalādibhāvo. Tathā sati momūhacittadvaye mohassa akusalabhāvo na siyā. **Tesanti** lobhādīnaṃ. “Na lubbhatīti alobo” tiādinā **paṭipakkhanayena**.

**Duṭṭhu caritānīti** paccayato, sampayuttadhammato, pavattiākārato ca na suṭṭhu asammā pavattitāni. **Virūpānīti** bībhacchāni sampati, āyatiñca aniṭṭharūpattā. **Kāyenāti** kāyadvāreṇa karaṇabhūtena. **Kāyatoti** kāyadvārato. “**Suṭṭhu caritānī**” tiādisu vuttavipariyāyena attho veditabbo. Yassa sikkhāpadassa vītikkame kāyasamuṭṭhānā āpatti hoti, taṃ **kāyadvāre paññattasikkhāpadaṃ**. **Avītikkamo kāyasucaritanti** vārittasiṭṭhassa vasena vadati, cārittasiṭṭhassa vā, yassa akaraṇe āpatti hoti. Vacīduccaritasucaritaniddhāraṇampi vuttanayānusāreṇa veditabbaṃ. **Ubhayattha paññattassāti** kāyadvāre, vacīdvāre ca paññattassa. **Sikkhāpadassa vītikkamova manoduccaritaṃ** manodvāre paññattassa sikkhāpadassa abhāvato, tayidaṃ dvāradvaye akiriyasamuṭṭhānāya āpattiyā vasena veditabbaṃ. **Avītikkamoti** yathāvuttāya āpattiyā avītikkamo **manosucaritaṃ**. “Sabbassāpi sikkhāpadassa avītikkamo **manosucarita**” nti keci. Tadubhayañhi cārittasiṭṭhaṃ uddissapaññattaṃ sikkhāpadaṃ, tassa avītikkamo siyā kāyasucaritaṃ, siyā vacīduccaritanti.

Pāṇo atipātīyati etāyāti **pāṇātipāto**, tathāpavattā cetanā, evaṃ adinnādānādayopīti āha “**pāṇātipātādayo pana tisso cetanā**” ti. **Vacīdvārepi uppannā kāyaduccaritaṃ** dvārantare

uppanassāpi kammaṣa sanāmaṃpariccāgato yebhuyyavuttiyā, tabbahulavuttiyā ca. Tenāhu  
**aṭṭhakathācariyā** –

“Dvāre caranti kammāni, na dvārā dvāracārino;  
Tasmā dvārehi kammāni, aññaṃaññaṃ vavatthitā”ti. (dha. sa. aṭṭha.  
kāmāvacarakusaladvārakathā);

Vacīduccaritaṃ kāyadvārepi vacīdvārepi uppannāti ānetvā sambandhitabbaṃ.

**Cetanāsampayuttadhammā**ti manokammabhūtāya cetanāya sampayuttadhammā.

Kāyavacīkammabhūtāya pana cetanāya sampayuttā abhijjhādayo taṃ taṃ pakkhikā vā honti abboharikā vāti. **Cetanāsampayuttadhammā** manosucaritanti etthāpi eseva nayo. Tividhassa duccharitassa akaraṇavasena pavattā **tisso cetanāpi viratiyopi kāyasucaritaṃ** kāyikassa vītikkamassa akaraṇavasena pavattanato, kāyena pana sikkhāpadānaṃ samādiyane sīlassa kāyasucaritabhāve vattabbameva natthi. Eseva nayo **vacīsucarite**.

**Kāmapaṭisaṃyuttoti** ettha dve kāmā vatthukāmo ca kilesakāmo ca. Tattha vatthukāmapakkhe ārammaṇakaraṇavasena kāmehi paṭisaṃyutto vitakko **kāmavitakko**. Kilesakāmapakkhe pana sampayogavasena kāmehi paṭisaṃyuttoti yojetabbaṃ. **“Byāpādapaṭisaṃyutto”**tiādīsu sampayogavaseneva attho veditabbo. Byāpādavatthupaṭisaṃyuttopi **byāpādapaṭisaṃyuttoti** gayhamāne ubhayathāpi yojanā labbhateva. **Vihimsāpaṭisaṃyuttoti** etthāpi eseva nayo. Vihimsanti etāya satte, vihimśanaṃ vā esā sattānanti **vihimśā**, tāya paṭisaṃyutto **vihimśāpaṭisaṃyuttoti** evaṃ saddattho veditabbo. Appiye amanāpe saṅkhāre ārabba byāpādavitakkappavatti aṭṭhānāghātavasena dīpetabbā. Byāpādavitakkassa avadhiṃ dassetuṃ **“yāva vināsanā”**ti vuttaṃ. **Vināsanā** pana pāṇātipāto evāti. **“Saṅkhāro”** hi dukkhāpetabbo nāma natthi”ti kasmā vuttaṃ, nanu ye **“dukkhāpetabbā”**ti icchitā sattasaññitā, tepi atthato saṅkhārā evāti? Saccametam, ye pana indriyabaddhā saviññāṇakatāya dukkhaṃ paṭisaṃvedenti, tasmā te vihimśavitakkassa visayā icchitā sattasaññitā. Ye pana na dukkhaṃ paṭisaṃvedenti vuttalakkhaṇāyogato, te sandhāya **“vihimśavitakko saṅkhāresu nuppajjati”**ti vuttaṃ. Yattha pana uppajjati, yathā ca uppajjati, taṃ dassetuṃ **“ime sattā”**tiādī vuttaṃ.

**Nekkhammaṃ** vuccati lobhato nikkhantattā alobho, nīvaraṇehi nikkhantattāpi paṭhamajjhānaṃ, sabbākusalehi nikkhantattā sabbo kusalo dhammo, sabbasaṅkhatehi pana nikkhantattā, nibbānaṃ. Upanissayato, sampayogato, ārammaṇakaraṇato ca nekkhammena paṭisaṃyuttoti **nekkhammapaṭisaṃyutto**. **Nekkhammavitakko** sammāsaṅkappo. Idāni taṃ bhūmivibhāgena dassetuṃ **“so”**tiādī vuttaṃ. **Asubhapubbabhāgeti** asubhajjhānassa pubbabhāge. Asubhaggahaṇācettha kāmavitakkassa ujuvipaccanīkadassanattaṃ kataṃ. Kāmavitakkapaṭipakkho hi nekkhammavitakkoti. Evañca katvā uparivitakkadvayassa bhūmiṃ dassentena sapubbabhāgāni mettākaraṇājhānādīni uddhaṭāni. **Asubhajjhāneti** asubhārammaṇe paṭhamajjhāne. Avayave hi samudāyavohāraṃ katvā niddisati yathā **“rukkhe sākā”**ti. **Jhānaṃ pādakaṃ katvāti** nidassanamattaṃ. Taṃ jhānaṃ sammāsivā uppannamaggaphalākālepi hi so lokuttaroti. Byāpādassa paṭipakkho, kiñcīpi na byāpādeti etenāti vā **abyāpādo**, mettā, tāya paṭisaṃyutto **abyāpādapaṭisaṃyutto**. **Mettājhāneti** mettābhāvanāvasena adhigate paṭhamajjhāne. **Karuṇājhāneti** etthāpi eseva nayo. Vihimsāya paṭipakkho, na vihimśanti vā etāya satteti **avihimśā**, karuṇā.

Nanu ca alobhādosānaṃ aññaṃaññaṃvirahato tesam vasena uppajjanakānaṃ imesaṃ nekkhammavitakkādīnaṃ aññaṃaññaṃ asaṅkaraṇato vavatthānaṃ na hotīti? Noti dassetuṃ **“yadā”**tiādī āradhamaṃ. **Alobho sīsaṃ hotīti** alobho padhāno hoti. Niyamitaparīnatasamudācārādivasena yadā alobhappadhāno nekkhammagaruko cittuppādo hoti, tadā laddhāvasaro nekkhammavitakko paṭiṭṭhahati. Taṃsampayuttassa pana adosalakkhaṇassa abyāpādassa vasena yo tasseva abyāpādavitakkabhāvo sambhaveyya, satī ca abyāpādavitakkabhāve kassaci pi aviheṭhanajātikatāya avihiṃsāvitakkabhāvo ca sambhaveyya, te **itare dve**. **Tadanvayikāti** tasseva nekkhammavitakkassa anugāmino, sarūpato adissanato **“tasmim satī honti, asatī na honti”**ti

tadanumānaneyyā bhavanti. Sesadvayepi iminā nayena attho veditabbo. **Vuttanayenevāti** “kāmapaṭisaṃyutto saṅkappo **kāmasaṅkappo**”tiādinā **vitakkattike** vuttanayeneva (dī. ni. 3.288) **veditabbo** atthato abhinnattā. Yadi evaṃ kasmā puna desanā katāti? Tathā desanāya bujjanakānaṃ ajjhāsayavasena desanāmatamevetam.

**Kānavitakkādīnaṃ viya uppajjanākāro veditabbo** “tāsu dve sattesupi saṅkhāresupi uppajjanti”tiādinā. Tattha kāraṇamāha “**taṃsāmpayuttāyeva hi etā**”ti. **Tathevāti** yathā nekkhammavitakkādīnaṃ “**asubhappubbabhāge kāmāvacaro hotī**”tiādinā kāmāvacarādibhāvo vutto, tatheva **tāsampi** nekkhammasaññādīnampi **kāmāvacarādibhāvo veditabbo**.

**Kāmapaṭisaṃyuttoti** sampayogavasena kāmena paṭisaṃyutto. Takkanavasena **takko**. Visesto takkanavasena **vitakko**. Saṅkappanaparikkappanavasena **saṅkappo**. Aññesupi kāmapaṭisaṃyuttasu dhammesu vijjamaṇesu vitakke eva kāmopapado dhātu-saddo niruḷho veditabbo vitakkassa kāmasaṅkappavattiyā sātisaṃyattā. Esa nayo **byāpādadhātu**ādīsu. **Sabbepi akusalā dhammā kāmādhātū** hīnājjhāsayehi kāmitabbadhātubhāvato kilesakāmassa ārammaṇasabhāvattāti attho. **Vihetthetī** vibādhati. **Tatthāti** tasmim yathāvutte kāmādhātuttike. Sabbākusalasaṅgāhikāya kāmādhātuyā itarā **dve** saṅgahetvā kathanāṃ **sabbasaṅgāhikā kathā**. Tisso dhātuyo aññamaññaṃ asaṅkarato kathā **asambhinnā**. **Itarā dve gahitāva hontī** itarā dve dhātuyo gahitā eva hontī sabbepi akusalā dhammā kāmādhātū”ti vuttattā sāmāññaṃjotanāya savisaṃyassa atibyaṇaṇa. **Tatoti** itaradhātudvayaṅgāhikāya kāmādhātuyā. **Nīharitvāti** niddhāretvā. **Dassetī** evaṃ bhagavā dassetī vattum vaṭṭati. **Byāpādadhātum...pe... kathesi**. Kasmā? Pageva apavādā abhinivisanti, tato paraṃ ussaggo pavattati, ṭhapetvā vā apavādavisayaṃ taṃ pariharantova ussaggo pavattatī, ñāyo hesa loke niruḷhoti.

**Dve kathāti** “sabbasaṅgāhikā, asambhinnā cā”ti (dī. ni. aṭṭha. 3.305) anantarattike vuttā dve kathā. Tattha **vuttanayena** ānetvā kathanavasena **veditabbā**. Tasmā tattha vuttaattho idhāpi āharitvā veditabbo “nekkhammādhātuyā gahitāya itarā dve gahitāva hontī”tiādinā.

**Suññataṭṭhenāti** attasuññatāya. Kāmabhavo kāmo uttarapadalopena suññataṭṭhena dhātu cāti **kāmādhātu**. **Brahmalokanti** paṭhamajjhānabhūmisaññaṃ brahmalokaṃ. **Dhātuyā āgataṭṭhānamhīti** “kāmādhātu rūpadhātū”tiādinā dhātuggahaṇe kate. **Bhavana paricchinditabbāti** “kāmabhavo rūpabhavo”tiādinā bhavavasena tadattho paricchinditabbo, na yāya kāyaci dhātuyā vasena. Yadaggena ca dhātuyā āgataṭṭhāne bhavana paricchedo kātabbo, tadaggena bhavassa āgataṭṭhāne dhātuyā paricchedo kātabbo bhavavasena dhātuyā paricchijjanato. Nirujjhati kilesavaṭṭametthāti **nirodho**, sā eva suññataṭṭhena **dhātūti nirodhadhātu**, nibbānaṃ. Niruddhe ca kilesavaṭṭe kammavipākavaṭṭā niruddhā eva hontī.

Hīnadhātuttiko **abhidhamme** (dha. sa. tikamātikā 14) hīnattikena paricchinditabboti vuttaṃ “**hīnā dhātūti dvādasa akusalacittuppādā**”ti. Te hi lāmakatṭhena **hīnadhātu**. Hīnapañtānaṃ majjhe bhavāti **majjhimadhātu**, avasesā tebhūmakadhammā. Uttamaṭṭhena atappakatṭhena ca **pañīthadhātu**, navalokuttaradhammā.

Pañcakāmaguṇā visayabhūtā etassa santīti **pañcakāmaguṇiko**, kāmarāgo. **Rūpārūpabhavesūti** rūpārūpūpapattibhavesu yathādhigatesu. Anadhigatesu pana so patthanā nāma na hotīti **bhavavasena patthanāti** imināva gahito. **Jhānanikantīti** rūpārūpajjhānesu nikanti. **Bhavavasena patthanāti** bhavesu patthanāti. Evaṃ catūhipi padehi yathākkamaṃ mahaggatūpapattibhavavisayā, mahaggatakammabhavavisayā, bhavadiṭṭhisahagatā, bhavapatthanābhūtā ca taṇhā “**bhavataṇhā**”ti vuttā. Vibhavadiṭṭhi **vibhavo** uttarapadalopena, vibhavasahagatā taṇhā **vibhavataṇhā**. Rūpādipañcavatthu kāmavisayā balavarāgabhūtā taṇhā **kāmataṇhāti** paṭhamanayo, “sabbepi tebhūmakadhammā kāmānīyatṭhena kāmā”ti (mahāni. 1) vacanato te ārabba pavattā diṭṭhivippayuttā sabbāpi taṇhā **kāmataṇhāti** dutiyanayoti ayametesam viseso.

**Abhidhamme panāti pana**-saddo visesatthajotano, tena pañcakāmaguṇikarāgato aññopi kāmāvacaradhammavisayo lobho **abhidhamme** (vibha. 915) “kāmataṇhā”ti āgatoti imaṃ visesaṃ joteti. Tikantarampi samānaṃ taṇhaṃyeva nissāya pavattitadesanānantaratāya taṃ “vāro”ti vattabbaṃ arahatīti “**iminā vārenā**”ti vuttaṃ. **Iminā vārenā**ti iminā pariyāyēnāti attho. **Rajanīyaṭṭhenā**ti kamanīyaṭṭhena. **Pariyādiyitvāti** pariggahetvā. **Tatoti** kāmataṇhāya. **Nīharitvāti** niddhāretvā. **Itarā dve taṇhāti** rūpataṇhaṃ, arūpataṇhaṃca **dasseti**. Etena “kāmataṇhā”ti sādharmaṇavacanamaṃ sabbassapi lobhassa, tassa pana “rūpataṇhā arūpataṇhā”ti visesavacanamaṃ yathā kāmagaṇikarāgo rūparāgo arūparāgoti dasseti. **Nirodhataṇhāti** bhavanirodhe bhavasamucchede taṇhā. Yasmā hi ucchedadiṭṭhi manussattaḥāve, kāmāvacaradevattaḥāve, rūpāvacaraarūpāvacarattaḥāve tḥitassa attano sammā samucchedo hotīti bhavanirodhaṃ ārabha pavattati, tasmā taṃsahagatāpi taṇhā tameva ārabha pavattatīti.

**Vaṭṭasminti** tividhepi vaṭṭe. Yathā te hi nissarituṃ appadānavasena kammavipākavaṭṭe taṃsamaṅgisattaṃ tesamaṃ parāparuppattiyā paccayabhāvena **saṃyojenti**, evamaṃ kilesavaṭṭepīti. **Satīti** paramatthato vijjamāne. **Rūpādibhedeti** rūpavedanādivibhāge. **Kāyēti** khandhasamūhe. **Vijjamānāti** satī paramatthato upalabbhamānā. Diṭṭhiyā parikappito hi attādi paramatthato natthi, diṭṭhi pana ayaṃ atthevāti. **Vicinantoti** dhammasabhāvaṃ vīmaṃsanto. **Kicchatīti** kilamati. **Parāmasatīti** parato āmasati. “Sīlena suddhi, vatena suddhi”ti gaṇhanto hi visuddhimaggaṃ atikkamitvā tassa parato āmasati nāma. **Visativatthukā diṭṭhīti** rūpādi-dhamme, paccekamaṃ te vā nissitaṃ, tesamaṃ vā nissayabhūtaṃ, sāmibhūtaṃ vā katvā parikappanavasena pavattiyā visativatthukā attadiṭṭhi vīsati. **Vimatīti** dhammesu sammā, micchā vā mananābhāvato saṃsayitaṭṭhena amati, appaṭipajjananti attho. **Vipariyāsaggāhoti** asuddhimagga “suddhimagga”ti viparītaggāho.

**Cirapārivāsiyaṭṭhenāti** ciraparivutthatāya purāṇabhāvena. **Āsavanaṭṭhenāti** sandanaṭṭhena, pavattanaṭṭhenāti attho. **Savatīti** pavattati. Avadhiattho ā-kāro, **avadhi** ca mariyādābhihividhibhedato duvidho. Tattha **mariyādo** kiriyamaṃ bahi katvā pavattati yathā “ā pāṭaliputtā vuṭṭho devo”ti. **Abhividhi** kiriyamaṃ byāpetvā pavattati yathā “ā bhavaggā bhagavato yaso pavatto”ti. Abhividhiattho ayaṃ ā-kāro veditabbo.

**Katthaci dve āsavā āgatāti** vinayapāliṃ (pārā. 39) sandhāyāha. Tattha hi “diṭṭhadhammikānaṃ āsavānaṃ saṃvarāya, samparāyikānaṃ āsavānaṃ paṭighātāya”ti (pārā. 39) dvidhā āsavā āgatāti. **Katthacīti** tikanipāte āsavasutte, (itivu. 56; saṃ. ni. 5.163) aññesu ca saḷāyatanasuttādīsu (saṃ. ni. 4.321). Saḷāyatanasuttēsūpi hi “tayome āvuso āsavā kāmāsavo bhavāsavo avijjāsavo”ti tayo eva āgatāti. Nirayamaṃ gamentīti **nirayagāminiyā**. Yasmā idha sāsavaṃ kusalākusalaṃ kammaṃ āsavapariyāyena desitaṃ, tasmā pañcagatisaṃvattanīyabhāvena āsavā āgatā. **Imasmiṃ saṅgītīsutte tayo** āgatāti. Ettha yasmā aññesu ca ā bhavaggamaṃ ā gotrabhuṃ pavattantesu mānādīsu vijjamānesu attattaniyādiggāhasena, abhibyāpanamadakaraṇavasena āsavasadisatā ca etesaṃyeva, na aññesaṃ, tasmā etesveva āsava-saddo niruḷho daṭṭhabbo. Na cettha “diṭṭhāsavo nāgato”ti cintetabbaṃ bhavataṇhāya, bhavadiṭṭhiyāpi bhavāsavaggahaṇeneva gahitattā. **Kāmāsavo nāma** kamaṇaṭṭhena, āsavanaṭṭhena ca. **Vuttāyeva atthato ninnānākarāṇato**.

Kāme esati gavesati etāyāti **kāmesanā**, kāmānaṃ abhipatthanāvasena, pariyeṭṭhivasena, paribhuñjanavasena vā pavattarāgo. **Bhavesanā** pana bhavapatthanā, bhavābhiratibhavajjhosānavasena pavattarāgo. **Diṭṭhigatikasammatassāti** aññatitṭhiyehi parikappitassa, sambhāvitassa ca. **Brahmacariyassāti** tapopakkamassa. **Tadekaṭṭhanti** tāhi rāgadiṭṭhīhi sahajekaṭṭhaṃ. **Kammanti** akusalakammaṃ. Tampi hi kāmādi ke nibbattanādiṭṭhānādivasena pavattaṃ “esatī”ti vuccati. **Antaggāhikā diṭṭhīti** nidassanamattamaṃ. Yā kāci pana micchādiṭṭhi tapopakkama hetukā **brahmacariyesanā** eva.

**Ākārasaṅghānanti** viṣiṭṭhākāravaṭṭhānaṃ **kathaṃvidhanti** hi kena pakārena saṅghitaṃ, samavaṭṭhitanti attho. Saddatthato pana vidhanaṃ viṣiṭṭhākārena avatṭhānaṃ **vidhā**, vidhīyati

visadisākārena ṭhapīyatīti **vidhā**, koṭṭhāso. Vidahanato hīnādivasena vividhenākārena dahanato upadhāraṇato **vidhā**, mānova. **Seyyasadisahīnānaṃ vasenāti** seyyasadisahīnabhāvānaṃ yāthāvā’ yāthāvabhūtānaṃ vasena. **Tayo mānā vuttā** seyyasseva uppajjanakā. Esa nayo sadisahīnesupi. Tenāha “**ayañhi māno**”tiādi. Idāni yathāuddiṭṭhe navavidhepi māne vatthuvibhāgena dassetuṃ “**tatthā**”tiādi vuttaṃ. **Rājūnañceva pabbajitānañca uppajjati** kasmā? Te visesato attānaṃ seyyato dahantīti. Idāni tamatthaṃ vitthārato dassento “**rājā hī**”tiādimāha. **Ko mayā sadiso atthīti ko-saddo** paṭikkhepattho, añño sadiso natthīti adhippāyo. **Etesaṃyevāti** rājūnaṃ, pabbajitānañca. **Uppajjati** seṭṭhavatthukattā tassa. “Hīnohamasmī”ti mānepi eseva nayo.

“**Ko mayā sadiso añño rājapuriso atthī**”ti vā “**mayhaṃ aññehi saddhiṃ kiṃ nānākaṇa**”nti vā “**amacco ti nāmāveva...pe... nāmāha**”nti vāti sadisassa seyyamānādīnaṃ tiṇṇaṃ pavattiākāradassanaṃ.

**Dāsādīnanti ādi-saddena** bhatika kammakarādīnaṃ parādhīnavuttikānaṃ gahaṇaṃ. **Ādi-saddena** vā gahite eva “pukkusaçaṇḍālādayopi”ti sayameva dasseti. Nanu ca māno nāmāyaṃ saṃpaggaharaso, so kathaṃ omāne sambhavatīti? Sopi avakaraṇamukhena vidhānavatthunā paggaṇhanavaseneva pavattatīti nāyaṃ virodho. Tenevāha “kiṃ dāso nāma ahanti ete māne karotī”ti. Tathā hissa yāthāvamānatā vuttā.

Yāthāvamānā bhavanikanti viya, attadiṭṭhi viya ca na mahāsāvajjā, tasmā te na apāyagamanīyā. Yathābhūtavattukātāya hi te yāthāvamānā. “**Arahattamaggavajjhā**”ti ca tassa anavasesappahāyitāya vuttaṃ. Dutiyatīyamaggehi ca te yathākkamaṃ pahīyanti, ye oḷārikatarā, oḷārikatamā ca. Māno hi “ahaṃ asmī”ti pavattiyā uparimaggesu sammādiṭṭhiyā ujuvippaccanīko hutvā pahīyati. **Ayāthāvamānā nāma** ayathābhūtavattukātāya, teneva te mahāsāvajjabhāvena **paṭhamamaggavajjhā** vuttā.

Atati satataṃ gacchati pavattatīti **addhā**, kāloti āha “**tayo addhāti tayo kālā**”ti. **Suttantapariyāyenāti** bhaddekarattasuttādīsu (ma. ni. 3.283) āgatanayena. Tattha hi “yo cāvuso mano, ye ca dhammā, ubhayametam paccuppannaṃ, tasmim ce paccuppanne chandarāgapaṭibaddhaṃ hoti viññānaṃ, chandarāgapaṭibaddhattā viññānaṃssa tadabhinandati, tadabhinandanto paccuppannesu dhammesu saṃhīratī”ti (ma. ni. 3.284) addhāpaccuppannaṃ sandhāya evaṃ vuttaṃ. Tenāha “**paṭisandhito pubbe**”tiādi. **Tadantaranti** tesam cutipaṭisandhīnaṃ vemajjhaṃ **paccuppanno addhā**, yo pubbantāparantānaṃ vemajjhatāya “pubbantāparante kaṅkhati, (dha. sa. 1123) pubbantāparante aññāna”nti (dha. sa. 1067, 1106, 1128) evamādīsu “pubbantāparanto”ti ca vuccati. Bhaṅgo dhammo atītaṃsena saṅgahitoti āha “**bhaṅgato uddhaṃ atīto addhā nāmā**”ti. Tathā anuppanno dhammo anāgataṃsena saṅgahitoti āha “**uppādato pubbe anāgato addhā nāmā**”ti. **Khaṇattayeti** uppādo, ṭhiti, bhaṅgoti tīsu khaṇesu. Yadā hi dhammo hetupaccayassa samavāye uppajjati, yadā ca veti, iti dvīsupi khaṇesu ṭhitikkhaṇe viya paccuppannoti. Dhammānañhi pākabhāvūpādhikaṃ pattabbaṃ **udayo**, viddhaṃsabhāvūpādhikaṃ **vayo**, tadubhayavemajjhaṃ **ṭhiti**. Yadi evaṃ addhā nāmāyaṃ dhammo eva āpannoti? Na dhammo, dhammassa pana avatthābhedo, tañca upādāya loke kālasamaññīti dassetuṃ “**atītādibhedo ca nāma aya**”ntiādi vuttaṃ. **Idhāti** imasmim loke. **Teneva vohārenāti** tam tam avatthāvisesaṃ upādāya dhammo “atīto anāgato paccuppanno”ti yena vohārena vohariyati, dhammappavattimattatāya hi paramatthato avijjamānopi kālo tasseva dhammassa pavattiavattāvisesaṃ upādāya teneva vohārena “atīto addhā”tiādinā vutto.

**Anta-saddo** loke pariyoṣāne, koṭiyam niruḷhoti tadatthaṃ dassento “**antoyeva anto**”ti āha, koṭi antoti attho. **Parabhāgoti** pārimanto. Amati gacchati bhavappabandho niṭṭhānaṃ etthāti **anto**, koṭi. Amanam niṭṭhānagamananti **anto**, oṣānaṃ. So pana “esevanto dukkhassā”ti (ma. ni. 3.393; saṃ. ni. 2.51) vuttattā dukkhaṇṇavassa pārimantoti āha “**parabhāgo**”ti. Ammati paribhuyyati hīḷiyatīti **anto**, lāmako. Ammati bhāgaso ñāyatīti **anto**, aṃsoti āha “**koṭṭhāso anto**”ti. Santo paramatthato vijjamāno kāyo dhammasamūhoti **sakkāyo**, khandhā, te pana ariyasaccabhūtā idhādhippetāti vuttaṃ “**pañcupādānakkhandhā**”ti. **Purimatāṇhāti** yesam nibbattikā, tannibbattito pageva siddhā taṇhā.

**Appavattibhūta**nti nappavattati tadubhayaṃ etthāti tesam appavattiṭṭhānabhūtaṃ. Yadi “sakkāyo anto” tiādinā aññaṃaññaṃ vibhattitāya dukkhasaccādayo gahitā, atha kasmā maggo na gahitoti āha “**maggo panā**” tiādi. Tatha **upāyattā**ti upāyabhāvato, sampāpakahetubhāvato attho.

Yadi pana hetumantaggahaṇeneva hetu gahito hoti, nanu evaṃ sakkāyaggahaṇeneva tassa hetubhūto sakkāyasamudayo gahito hotīti? Tassa gahaṇe saṅkhataduko viya, sappaccayaduko viya ca dukovāyaṃ āpajjati, na tiko. Yathā pana sakkāyaṃ gahetvā sakkāyasamudayopi gahito, evaṃ sakkāyanirodhaṃ gahetvā sakkāyanirodhupāyo gayheyya, evaṃ sati catukko ayaṃ āpajjeyya, na tiko, tasmā hetumantaggahaṇena hetuggahaṇaṃ na cintetabbaṃ. Ayaṃ panettha adhippāyo yutto siyā – idha sakkāyasakkāyasamudayā anādikālikā, asati maggabhāvanāyaṃ paccayānuparamena ariyantā ca, nibbānaṃ pana appaccayattā attano niccatāya eva sabbadābhāvīti anādikāliko, ariyanto ca. Iti imāni tīni saccāni mahāthero imāya sabhāgatāya “tayo antā” ti tikam katvā dasseti. Ariyamaggo pana kadāci karahaci labbhamāno na tathāti tassa ativiya dullabhapātubhāvataṃ dīpetuṃ tikato bahikatoti ayamettha attanomati.

**Dukkhatā**ti dukkhabhāvo, dukkhaṃyeva vā yathā devo eva devatā. Dukkha-saddo cāyaṃ adukkhasabhāvesupi sukhupekkhāsu kañci anīṭṭhatāvisesaṃ upādāya pavattatīti tato nivattento sabhāvadukkhavācinā ekena dukkha-saddena visesetvā “**dukkhadukkhata**” ti āha. Bhavati hi ekantato taṃsabhāvepi atthe aññaṃ dhammassa yena kenaci sadisatālesena byabhicārāsankāti visesitabbatā yathā “rūparūpaṃ tilatela” nti (vibha. aṭṭha. pakīṇṇakathā) ca. **Saṅkhārabhāvenā**ti saṅkhatabhāvena. Paccayehi saṅkharīyantīti **saṅkhārā**, adukkhamasukhavedanā. Saṅkhariyamānattā eva hi asāratāya paridubbalabhāvena bhaṅgabhaṅgābhimukhakkhaṇesu viya attalābhakkhaṇepi vibādhaṃpattā eva hutvā saṅkhārā pavattantīti āha “**saṅkhatattā uppādayarābhāṅgapīṭā**” ti. **Tasmāti** yathāvuttakāraṇato. **Aññadukkhasabhāvavirahato**ti dukkhadukkhata vipariṇāmadukkhatāsaṅkhātassa aññaṃ dukkhasabhāvassa abhāvato. **Vipariṇāmeti** pariṇāme, vigameti attho. Tenāha **papañcasūdanīyaṃ** “vipariṇāmadukkhāti natthibhāvo dukkha” nti. Apariṇātavatthukānañhi sukhavedanuparamo dukkhato upaṭṭhāti, svāyamattho piyavippayogena dīpetabbo. Tenāha “**sukhassa hi**” tiādi. Pubbe vuttanayo padesanissito vedanāvisesamattavisayattāti anavesato saṅkhāradukkhataṃ dassetuṃ “**apicā**” ti dutiyanayo vutto. Nanu ca “sabbe saṅkhārā dukkhā” ti (dha. pa. 278) vacanato sukhadukkhavedanānampi saṅkhāradukkhata āpannāti? Saccametam, sā pana sāmāññaṃjotanāpavādabhūtena itaradukkhata vacanena nivattīyatīti nāyaṃ virodho. Tenevāha “**ṭhapetvā dukkhavedanaṃ sukhavedanañcā**” ti.

**Micchāsabhāvoti** “hitasukhāvaho me bhavissatī” ti evaṃ āsīsitopi tathā abhāvato, asubhādīsuyeva “subha” ntiādiviparīṭappavattito ca micchāsabhāvoti, musāsabhāvoti attho. Mātughātakādīsū pavattamānāpi hi hitasukhaṃ icchantāva pavattantīti te dhammā “hitasukhāvahā me bhavissantī” ti āsīsitā hontī. Tathā asubhāsukhāniccānattesu subhādivipariyāsadaḷhatāya ānantariyakammaniyatamicchādiṭṭhīsū pavatti hotīti te dhammā asubhādīsū subhādiviparīṭappavattikā hontī. Vipākadāne sati khandhabhedānantameva vipākadānato **niyato**, micchatto ca so **niyato cāti micchattaniyato**. Anekesu ānantariyesu katesu yaṃ tatha balavaṃ, taṃ vipaccati, na itarānīti ekantavipākajanakatāya niyatatā na sakkā vattuntī “**vipākadāne sati**” ti vuttaṃ. **Khandhabhedānantaranti** cutianantaranti attho. Cuti hi maraṇaniddese “khandhānaṃ bhedo” ti (dī. ni. 2.390; ma. ni. 1.123; 3.373; vibha. 193) vuttā, etena vacanena sati phaladāne cutianantaro eva etesaṃ phalakālo, na aññoti phalakālaniyamena niyatatā vuttā hoti, na phaladānaniyamenāti niyataphalakālānaṃ aññesampi upapajjavedanīyānaṃ, diṭṭhadhammavedanīyānampi niyatatā āpajjati, tasmā vipākadhammadhammānaṃ paccayantaravikalatādīhi avipaccamānānampi attano sabhāvena vipākadhammatā viya balavatā ānantariyena vipāke dinne avipaccamānānampi ānantariyānaṃ phaladāne niyatasabhāvā, ānantariyasabhāvā ca pavattīti attano sabhāvena phaladānaniyameneva niyatatā, ānantariyatā ca veditabbā. Avassañca niyatasabhāvā, ānantariyasabhāvā ca tesam pavattīti sampañcchitabbametam aññaṃ balavato ānantariyassa abhāve cutianantaram ekantena phaladānato.

Nanu evaṃ aññesampi upapajjavedanīyānaṃ aññasmiṃ vipākadāyake asati cutianantarameva ekantena phaladānato ānantariyasabhāvā, niyatasabhāvā ca pavatti āpajjati? Nāpajjati asamānajātikena cetopaṇidhivasena, upaghātakena ca nivattetabbavipākattā anantarekantaphaladāyakkattābhāvā, na pana ānantariyānaṃ paṭhamajjhānādīnaṃ dutiyajjhānādīni viya asamānajātikāṃ phalanivattakāṃ atthi sabbānantariyānaṃ avīciphalattā, na ca heṭṭhūpapattiṃ icchato sīlavato cetopaṇidhi viya uparūpapattijanakkammabalaṃ ānantariyabalaṃ nivattetuṃ samattho cetopaṇidhi atthi anicchantasseva avīcipātānato, na ca ānantariyupaghātakāṃ kiñci kammaṃ atthi. Tasmā tesamyeva anantarekantavipākajanakasabhāvā pavattīti. Anekāni ca ānantariyāni katāni ekante vipāke niyatattā uparatāvipaccanasabhāvāsāṅkattā nicchitāni sabbhāvato niyatāneva. Cutianantaṃ pana phalaṃ **anantaraṃ** nāma, tasmīṃ anantare niyuttāni, tannibbattanena anantarakaraṇasīlāni anantarapayojanāni cāti sabbhāvato **ānantariyāneva** ca hontī. Tesu pana samānasabhāvesu ekena vipāke dinne itarāni attanā kātabbakiccasa teneva katattā na dutiyaṃ tatiyañca paṭisandhiṃ karonti, na samatthātāvighātattāti natthi tesam niyatānantariyatānivattīti. Na hi samānasabhāvam samānasabhāvassa samatthataṃ vihanatīti. Ekassa pana aññānipi upatthambhākāni hontīti daṭṭhabbānīti. **Sammāsabhāveti** saccasabhāve. Niyato ekantiko anantarameva phaladānenāti **sammattaniyamato**. **Na niyatoti** ubhayathāpi na niyato. **Avasesānaṃ dhammānanti** kilesānantariyakammaniyyānikadhammehi aññesaṃ dhammānaṃ.

**Tamandhakāro**ti tamo andhakāroti padavibhāgo. **Avijjā tamo nāma** ārammaṇassa chādanaṭṭhena. Tenevāha “tamo vihato, āloko uppanno (ma. ni. 1.385; pārā. 12), tamokkhandho padālito”ti (saṃ. ni. 1.164) ca ādi. **Avijjāsīsena vicikicchā vuttā** mahatā sammohena sabbakālaṃ aviyyujjanato. **Āgammāti** patvā. **Kaṅkhatīti** “ahosiṃ nu kho ahaṃ atītamaddhāna”ntiādīnā (ma. ni. 1.18; saṃ. ni. 2.20) kaṅkhaṃ uppādeti saṃsayam āpajjati. **Adhimuccituṃ na sakkoti**ti pasādādhimokkhasena adhimuccituṃ na sakkoti. Tenāha “**na sampasīdati**”ti. Yāvattakañhi yasmīṃ vatthusmiṃ vicikicchā na vigacchatī, tāva tattha saddhādhimokkho anavasaro. Na kevalam saddhādhimokkho, nicchayādhimokkhopi tattha na patiṭṭhahati eva.

**Na rakkhitabbānīti** “imāni mayā rakkhitabbānī”ti evaṃ katthaci rakkhākiccaṃ natthi parato rakkhitabbasseva abhāvato. **Satiyā eva rakkhitānīti** muṭṭhassaccassa bodhimūle eva savāsanaṃ samucchinnattā satiyā rakkhitabbāni nāma sabbadāpi rakkhitāni eva. **Natthi tathāgatassa kāyaduccaritanti** tathāgatassa kāyaduccaritaṃ nāma nattheva, yato suparisuddho kāyasamācāro bhagavato. **No aparissuddhā**, parisuddhā eva aparissuddhihetūnaṃ kilesānaṃ pahīnattā. Tathāpi vinaye apakataññūtavasena siyā tesam apārisuddhilesa, na bhagavatoti dassetuṃ “**na panā**”tiādi vuttaṃ. Tattha **vihārakāraṃ** āpattinti ekavacanasena “āpattiyō”ti ettha āpatti-saddam ānetvā yojetabbam. Abhidheyyānurūpañhi liṅgavacanāni hontī. Esa nayo sesesupi. “**Manodvāre**”ti idaṃ tassā āpattiyā akiriyaṃsamuttānātāya vuttaṃ. Na hi manodvāre paññattā āpatti atthīti. **Saupārambhavasena**ti savattabbatāvasena, na pana duccharitalakkaṇāpattivāsena, yato naṃ bhagavā paṭikkhipati. Yathā āyasmato mahākappinassāpi “gaccheyyam vāhaṃ uposathaṃ, na vā gaccheyyam. Gaccheyyam vāhaṃ saṅghakammaṃ, na vā gaccheyya”nti (mahāva. 137) parivitakkitaṃ. **Manoduccaritanti** manodvārikaṃ appasatthaṃ caritaṃ. Satthārā appasatthātāya hi taṃ duccharitaṃ nāma jātaṃ, na sabbhāvato.

Yasmā mahākāruṇiko bhagavā sadevakassa lokassa hitasukhāya eva paṭipajjamāno accantavivekajjhāsayatāya tabbidhuraṃ dhammasenāpatino cittuppādam paṭikkhipanto “na kho te... pe... uppādetabba”nti avoca, tasmā so therassa cittuppādo bhagavato na pāsamsoti katvā **manoduccaritaṃ** nāma jāto, tassa ca paṭikkhepo upārambhōti āha “**tasmīṃ manoduccarite upārambham āropento**”ti. **Bhagavato pana ettakampi natthi**, yato pavāraṇāsutte “handā dāni, bhikkhave, pavāremi vo, na ca me kiñci garahatha kāyikaṃ vā vācasikaṃ vā”ti (saṃ. ni. 1.215) vutto bhikkhusaṅgho “na kho mayam bhante bhagavato kiñci garahāma kāyikaṃ vā vācasikaṃ vā”ti satthu parisuddhakāyasamācārādikāṃ sirasā sampatīcchi. Ayañhi lokanāthassa duccharitābhāvo bodhisattabhūmiyampi cariyācīrānugato aho, pageva buddhabhūmiyanti dassento “**anacchariyañceta**”ntiādīmāha.



Buddhānaṃyeva dhammā guṇā, na aññesanti **buddhadhammā**. Tathā hi te buddhānaṃ āveṇīkadhammāti vuccanti. Tattha “**natthi tathāgatassa kāyaduccarita**”ntiādinā kāyavacīmanoduccaritābhāvavacanamaṃ yathādhikāraṃ kāyakammādīnaṃ ñāṇānuparivattitāya laddhaguṇakittanaṃ, na āveṇīkadhammantaradassanaṃ. Sabbasmiñhi kāyakammādike ñāṇānuparivattini kuto kāyaduccaritādīnaṃ sambhavo. “**Buddhassa appaṭihatañāṇa**”ntiādinā vuttāni sabbaññutaññāṇato visuṃyeva tīṇi ñāṇāni catuyonipaṅcagatiparicchedakaññāṇāni viyā”ti vadanti. Ekamaṃyeva hutvā tīsu kālesu appaṭihatañāṇamaṃ nāma sabbaññutaññāṇameva. **Natthi chandassa hānīti** sattesu hitachandassa hāni natthi. **Natthi vīriyassa hānīti** khemapavivekavitakkānugatassa vīriyassa hāni natthi. “**Natthi davāti** khiḍḍādhippāyena kiriyā natthi. **Natthi ravāti** sahasā kiriyā natthi”ti vadanti, sahasā pana kiriyā **davā** “aññaṃ karissāmi”ti aññakaraṇamaṃ **ravā**. **Khalitanti** virajjanaṃ ñāṇena apphuṭamaṃ. **Sahasāti** vegāyitattaṃ turitakiriyā. **Abyāvaṭo manoti** niratthako cittasamudācāro. **Akusalacittanti** aññāṇupekkhamāha, ayañca dīghabhāṇakānaṃ pāṭho ākulo viya. Ayaṃ pana pāṭho anākulo –

Atītaṃse buddhassa bhagavato appaṭihatañāṇamaṃ, anāgataṃse, paccuppannaṃse. Imehi tīhi dhammehi samannāgatassa buddhassa bhagavato sabbaṃ kāyakammaṃ ñāṇapubbaṅgamaṃ ñāṇānuparivatti, sabbaṃ vacīkammaṃ, sabbaṃ manokammaṃ. Imehi chahi dhammehi samannāgatassa buddhassa bhagavato natthi chandassa hāni, natthi dhammadesanāya, natthi vīriyassa, natthi samādhissa, natthi paññāya, natthi vimuttiyā. Imehi dvādasahi dhammehi samannāgatassa buddhassa bhagavato natthi davā, natthi ravā, natthi apphuṭamaṃ, natthi vegāyitattaṃ, natthi abyāvaṭamaṃ, natthi appaṭisaṅkhānupekkhāti.

Tattha **appaṭisaṅkhānupekkhāti** aññāṇupekkhā. Sesamaṃ vuttanayameva. Ettha ca tathāgatassa ājīvapārisuddhiṃ kāyavacīmanosamācārapārisuddhiyāva saṅgahetvā samācārattayavasena mahātherena tiko desito.

**Kiñcanāti** kiñcikkhā. Ime pana rāgādayo palibundhanaṭṭhena kiñcanā viyāti **kiñcanā**. Tenāha “**kiñcanāti palibodhā**”ti.

**Anudhanaṭṭhenāti** anu anu dahanāṭṭhena. Rāgādayo arūpadhammā ittarakkhaṇā kathaṃ anudhanatīti āsaṅkaṃ nivattetuṃ “**tattha vatthūnī**”ti vuttaṃ, daṭṭhabbānīti vacanaseso. **Tatthāti** tasmim rāgādīnaṃ anudhanaṭṭhe. **Vatthūnīti** sāsane, loke ca pākaṭattā paccakkhabhūtāni kāraṇāni. **Rāgo uppanno** tikhiṇakaro hutvā. Tasmā taṃsamutṭhānā tejodhātu ativiya tikhiṇabhāvena saddhiṃ attanā sahaṃjātadhammehi hadayappadesamaṃ jhāpesi yathā taṃ bāhirā tejodhātu sanissayamaṃ. Tena sā bhikkhunī supato viya byādhi jhāyitvā matā. Tenāha “**teneva jhāyitvā kālamakāsī**”ti. Dosassa nissayānaṃ dahanatā pākaṭā evāti itaraṃ dassetuṃ “**mohavasena hī**”tiādi vuttaṃ. **Ativattitvāti** atikkamitvā.

Kāmaṃ āhuneyyaggiādayo tayo aggī brāhmaṇehi icchitā santi, te pana tehi icchitamattā, na sattānaṃ tādīsā atthasādhakā. Ye pana sattānaṃ atthasādhakā, te dassetuṃ “**āhunaṃ vuccatī**”tiādi vuttaṃ. Tattha ādarena hunanaṃ pūjanaṃ **āhunanti** sakkāro “āhuna”nti vuccati, taṃ **āhunaṃ arahanti**. Tenāha bhagavā “āhuneyyāti bhikkhave mātāpitūnametaṃ adhivacana”nti (itivu. 106). Yadaggena ca te puttānaṃ bahukāratāya āhuneyyāti tesu sammāpaṭipatti nesamaṃ hitasukhāvahā, tadaggena tesu micchāpaṭipatti ahitadukkhāvahāti āha “**tesu...pe... nibbantantī**”ti. **Svāyamatthoti** yo mātāpitūnaṃ attano upari vipaṭipannānaṃ puttānaṃ anudhanaṃ paccayabhāvena anudhanaṭṭho, so ayamattho. **Mittavindakavatthunāti** mittavindakassa nāma mātari vipaṭipannassa purisassa tāya eva vipaṭipattiyā cirataraṃ kālaṃ āpāyikadukkhānubhavanadīpanena vatthunā vedītabbo.

Idāni tamatthamaṃ kassapassa bhagavato kāle pavattaṃ vibhāvetuṃ “**mittavindako hī**”tiādi vuttaṃ. **Dhanalobhena**, na dhammacchandenāti adhippāyo. **Akutobhayaṃ** kenaci anuṭṭhāpanīyatāya. **Nivāresi** samuddapayātā nāma bahvantarāyāti adhippāyena. **Antaraṃ katvāti** atikkamanavasena dvinnaṃ

pādānaṃ antare katvā.

**Nāvā aṭṭhāsi** tassa pāpakammabalena vātassa avāyanato. Ekadivasam rakkhitauposathakammānubhāvena **sampattiṃ anubhavanto**. Yathā purimāhi parato mā agamāsīti vutto, evaṃ aparāparāhipīti āha “**tāhi ‘parato parato mā agamāsī’ti vuccamāno**”ti. **Khuracakkadharanti** khuradhārūpamacakkadharam **ekaṃ** purisaṃ. **Upaṭṭhāsi** pāpakammaṃ balena.

**Catubbhīti** catūhi accharāsadisīhi vimānapetīhi, sampattiṃ anubhavitvāti vacanaseso. **Aṭṭhājḥagamāti** rūpādikāmaguṇehi tato visiṭṭhatarā aṭṭha vimānapetiyo adhigacchi. **Atricchanti** atricchāsānkhātena atilobhena samannāgatattā atra atra kāmaguṇe icchanto. **Cakkanti** khuracakkaṃ. **Āsadoti** anattāhāvahabhāvena āsādeti.

Soti gehasāmiko bhattā. **Purimanayenevāti** anudahanassa paccayatāya.

**Aticārinīti** sāmikaṃ atikkamitvā cārinī micchācārinī. **Rattiṃ dukkhanti** attano pāpakammānubhāvasamupaṭṭhitena sunakhena khāditabbatādukkhaṃ. **Vañcetvāti** taṃ ajānāpetvāva kāraṇaṭṭhānagamanaṃ sandhāya vuttaṃ. **Paṭapaṭanti** paṭapaṭā katvā. Anuravadassanañhetam. Mutṭhiyogo kirāyaṃ tassa sunakhantaradhānassa, yadidaṃ khelapiṇḍaṃ bhūmiyaṃ niṭṭhubhitvā pādena ghaṃsaṃ. Tena vuttaṃ “**so tathā akāsi. Sunakhā antaradhāyimsū**”ti.

**Dakkhiṇāti cattāro paccayā** diyyamānā dakkhanti etehi hitasukhānīti. Taṃ dakkhiṇaṃ arahatīti **dakkhiṇeyyo**, bhikkhusaṅgho. **Revatīvattu** vimānavatthupetavatthūsu (vi. va. 861 ādayo) tesam aṭṭhakathāyaṅca (vi. va. 977-980; pe. va. aṭṭha. 714-736) āgatanayena veditabbaṃ.

“Tividhena rūpasāṅgaho”ti ettha nanu saṅgaho ekavidhova, so kasmā “catubbidho”ti vuttoti? “Saṅgaho”ti atthaṃ avatvā aniddhāritatthassa saddasseva vuttattā. “Tividhena rūpasāṅgaho”tiādīsu (dha. sa. rūpakaṇḍa-tike) padesu saṅgaha-saddo tāva attano atthavasena catubbidhoti ayañhettha attho. Atthopi vā aniddhāritaviseso sāmāññena gahetabbataṃ patto “tividhena rūpasāṅgaho”tiādīsu (dha. sa. rūpakaṇḍa-tike) “saṅgaho”ti vuttoti na koci doso. Niddhārite hi visese tassa ekavidhatā siyā, na tato pubbeti. “**Jātisāṅgaho**”ti vuttepi jāti-saddassa sāpekkhasaddattā attano jātiyā saṅgahoti ayamattho viññāyateva sambandhārahassa aññassa avuttattā yathā “mātāpitu upaṭṭhāna”nti (khu. pā. 5.6; su. ni. 265). Aṭṭhakathāyaṃ pana yathādhippetamatthaṃ aparipuṇṇaṃ katvā dassetuṃ “**jātisāṅgaho**” icceva vuttaṃ. Samānajātikānaṃ saṅgaho, samānajātiyā vā saṅgaho sajjātisāṅgaho. Sañjāyati etthāti **sañjāti**, sañjātiyā saṅgaho **sañjātisāṅgaho**, sañjātideseṇa saṅgahoti attho. Kiriyāya evarūpāya saṅgaho **kiriyāsaṅgaho**. **Rūpakkhandhagaṇanaṃ**ti “rūpakkhandho”ti gaṇanaṃ saṅkhyāṃ **gacchati** ruppanasabhāvattā. **Tīhi koṭṭhāsehi rūpagaṇanaṃ**ti vakkhamānehi tīhi bhāgehi rūpassa saṅgaho, gaṇetabbatīti attho.

Rūpāyatanam nipassati paccakkhato vijānātīti **nidassanaṃ**, cakkhuvīññānaṃ, nidassatīti vā **nidassanaṃ**, daṭṭhabbhāvo, cakkhuvīññānaṃ gocarabhāvo, tassa ca rūpāyatanato anaññatṭepi aññehi dhammehi rūpāyatanam visesetuṃ aññaṃ viya katvā “**saha nidassanenāti sanidassana**”nti evamettha attho veditabbo. Dhammasabhāvasāmāññena hi ekībhūtesu dhammesu yo nānattakaro sabhāvo, so añño viya katvā upacarituṃ yutto. Evañhi atthavisesāvabodho hotīti. **Cakkhupaṭihananasamatthatoti** cakkhuno ghaṭṭanasamatthatāya. Ghaṭṭanaṃ viya ca **ghaṭṭanaṃ** daṭṭhabbaṃ. Dutiyena atthavikappena daṭṭhabbhāvasānkhātaṃ nāssa nidassanaṃti anidassanaṃti yojanā. Ettha ca dasannaṃ āyatanānaṃ yathārahaṃ sayam, nissayavasena ca sampattānaṃ, asampattānaṃca paṭimukhabhāvo aññaṃapātanaṃ **paṭihananaṃ**, yena byāpārādivikārapaccayantarasanidhāne cakkhādīnaṃ visayesu vikāruppattī. Tattha **byāpāro** cakkhādīnaṃ savisayesu āvicchannaṃ, rūpādīnaṃ iṭṭhāniṭṭhatā, tattha ca cittaṃ ābhujananti ime ādisaddasaṅgahitā. Tehi vikārapattiyā paccayantarabyāpārato aññaṃti katvā anuggahūpaghāto **vikāro**. Upanissayo pana appadhānassa paccayo idha gahito. Kāraṇakāraṇampi kāraṇamevāti gayhamāne siyā tassāpi saṅgahoti. **Vuttappakāraṇanti** “cakkhuvīññānaṃsaṅkhātā”nti

vuttappakāraṃ. **Nāssa paṭighoti** etthāpi “vuttappakāra”nti ānetvā sambandho. **Avasesaṃ** soḷasavidhaṃ **sukhumarūpaṃ**.

**Saṅkharontī**ti sampiṇḍenti. Cetanā hi āyūhanarasatāya yathā sampayuttadhamme yathāsakaṃ kiccesu saṃvidahantī viya abhisandahantī vattamānā teneva kiccavisesena te sampiṇḍentī viya hoti, evaṃ attano vipākadhammepi paccayasamavāye saṅkharontī sampiṇḍentī viya hoti. Tenāha “**sahajāta...pe... rāsī karontī**”ti. **Abhisāṅkharontī** abhivisiṭṭhaṃ katvā saṅkharoti. Puññābhisāṅkhāro hi attano phalaṃ itarassa phalato ativiya visiṭṭhaṃ bhinnaṃ katvā saṅkharoti paccayato, sabhāvato, pavattiākārato ca sayā itarehi visiṭṭhasabhāvattā. Esa nayo itarehipi. Pujjabhavaphalanibbattanato, attano santānassa punanato ca **puñño**.

**Mahācittacetanā**nti asaṅkhyeyyāyuniṭṭhādanādīmahānubhāvātāya mahācittesu pavattacetanānaṃ. **Aṭṭheva cetanā hontī**, yā kāmāvacarā kusalā. “Terasapī”ti kasmā vuttaṃ, nanu “navā”ti vattabbaṃ. Na hi bhāvanā ñāṇarahitā yuttāti anuyogaṃ sandhāyāha “**yathā hī**”tiādi. **Kasiṇaparikkammaṃ karontassa**ti kasiṇesu jhānaparikkammaṃ karontassa. “Pathavī pathavī”tiādi bhāvanā hi kasiṇaparikkammaṃ. Tassa hi parikkammaṃ supaguṇabhāvato anuyuttassa tattha ādarākaraṇena siyā ñāṇarahitacittaṃ. Jhānapaccavekkhaṇāyapi eseva nayo. Keci maṇḍalakarāṇampi bhāvaṇaṃ bhajāpenti.

Dānavasena pavattacittacetāsikadhammā **dānaṃ**, tattha byāpārabhūtā āyūhanacetanā dānaṃ ārabha, dānaṃca adhikicca uppajjatīti vuttā. Evaṃ itaresupi. **Ayaṃ saṅkhepadesanā**ti ayaṃ puññābhisāṅkhāre saṅkhepato atthadesanā, atthavaṇṇanāti attho.

**Somanassacittena**ti anumodanāpavattidassanamattametāṃ daṭṭhabbaṃ. Upekkhāsahagatenāpi hi anussarati evāti. Kāmaṃ niccasīlaṃ, uposathasīlaṃ, niyamasīlāpi sīlameva, paripuṇṇaṃ pana sabbaṅgasampannaṃ sīlaṃ dassetaṃ “**sīlapūraṇatthāyā**”tiādi vuttaṃ. Nayadassanaṃ vā etaṃ, tasmā “niccasīlaṃ, uposathasīlaṃ, niyamasīlaṃ samādiyissāmī”ti vihāraṃ gacchantassa, samādiyitvā samādinnaṃ ca tasmim, “sādhu suṭṭhū”ti āvajjantassa, taṃ sīlaṃ sodhentassa ca pavattā cetanā sīlamayāti evamettha yojanā veditabbā.

Pubbe samathavasena bhāvanānayo gahitoti idāni sammāsanaṇayena taṃ dassetaṃ “**paṭisambhidāyaṃ vuttenā**”tiādi vuttaṃ. Tattha **aniccatoti** aniccabhāvato. **Dukkhatō, anattatoti** etthāpi eseva nayo.

Tattha ye pañcupādānakkhandhā nāmarūpabhāvena pariggahitā, te yasmā dvārārammaṇehi saddhiṃ dvārappavattadhammasena vibhāgaṃ labhanti, tasmā dvārachakkādivasena cha chakkā gahitā. Yasmā pana lakkhaṇesu anattalakkhaṇaṃ dubbibhāvaṃ, tasmā tassa vibhāvanāya cha dhātuyo gahitā. Tato yesu kasiṇesu ito bāhirakānaṃ attābhiniveso, tāni imesaṃ jhānaṇaṃ ārammaṇabhāvena upaṭṭhānākāramattāni, imāni pana tāni jhānāntīti dassanattaṃ dasa kasiṇāni gahitāni. Tato dukkhānupassanāya parivārabhāvena paṭikkūlakāravasena dvattiṃsa koṭṭhāsā gahitā. Pubbe khandhavasena saṅkhepato ime dhammā gahitā, idāni nāti saṅkhepavittthāranayena ca manasi kātabbāti dassanattaṃ dvādasāyatanāni, aṭṭhārasa dhātuyo ca gahitā. Tesu ime dhammā satipi suññānirīhaabyāpārabhāve dhammasabhāvato ādhipaccabhāvena pavattantīti anattabhāvavibhāvanattaṃ indriyāni gahitāni. Evaṃ anekabhedabhinnāpi ime dhammā bhūmittayapariyāpannatāya tividhāva hontīti dassanattaṃ tisso dhātuyo gahitā. Ettāvataṃ nimittaṃ dassetvā pavattaṃ dassetaṃ kāmabhavādayo nava bhavā gahitā. Ettake abhiññeyyavisese pavattamanasikāraṃkosallena saṅhasukhumesu nibbattitamahaggatadhammesu manasikāro pavattetabboti dassanattaṃ jhānaappamaññārūpāni gahitāni. Tattha jhānāni nāma vuttāvasesārammaṇāni rūpāvacarajjhānāni. Puna paccayapaccayuppānavibhāgato ime dhammā vibhajja manasikātabbāti dassanattaṃ paṭiccasamuppādaṅgāni gahitāni. Paccayākāraṃmanasikāro hi sukkena, suṭṭhutarāṇica lakkhaṇattayaṃ vibhāveti, tasmā so pacchato gahito. Evaṃ ete sammāsanaṇiyabhāvena gahitā

khandhādivasena koṭṭhāsato pañcavīsatividhā, pabhedato pana atītādibhedam anāmasitvā gayhamānā dvīhi ūnāni dvesatāni honti. Idaṃ tāvettha pālīvavatthānaṃ, atthavicāraṃ pana icchantehi paramatthamañjūsāyaṃ **visuddhimaggasaṃvaṇṇanāyaṃ** vuttanayeneva veditabbaṃ.

Na puññoti **apuñño**. Tassa puñña-sadde vuttavipariyāyena attho veditabbo. Santānassa iñjanahetūnaṃ nīvaraṇādīnaṃ suvikkhambhanato rūpataṇhāsankhātassa iñjitassa abhāvato **aniñjaṃ**, aniñjameva “**āneñja**”nti vuttaṃ. Tathā hi rūpārammaṇaṃ rūpanimittārammaṇaṃ sabbampi catutthajjhānaṃ nipariyāyena “āneñja”nti vuccati.

Cattāro maggaṭṭhā, hetṭhimā tayo phalaṭṭhāti evaṃ **sattavidho**. **Tisso sikkhāti** adhisīlādikā tisso sikkhā. Tāsu jātoti vā **sekkho**, ariyapuggalo hi ariyāya jātiyā jāyamāno sikkhāsu jāyati, na yoniyam. Sikkhanasīloti vā **sekkho**. Puggalādhiṭṭhānāya vā kathāya sekkhassa ayanti aññāsādhāraṇamaggaphalattayadhammā sekkhāpariyāyena vuttā. **Asekkhoti** ca yattha sekkhabhāvāsankā atthi, tatthāyaṃ paṭisedhoti lokiyaniḃbānesu asekkhabhāvanāpatti daṭṭhabbā. Sīlasamādhīpaññāsankhātā hi sikkhā attano paṭipakkhakilesehivippamuttā parisuddhā upakkilesānaṃ ārammaṇabhāvampi anupagamanato etā “sikkhā”ti vattum yuttā aṭṭhasupī maggaphalesu vijjanti, tasmā catumaggaheṭṭhimaphalattayasamaṅgino viya arahattaphalasamaṅgīpi tāsu sikkhāsu jātoti ca taṃsamaṅgino arahato itaresaṃ viya sekkhatte sati sekkhassa ayanti ca sikkhā sīlaṃ etassāti ca “sekkho”ti vattabbo siyāti tannivattanatthaṃ **asekkhoti** yathāvuttasekkhabhāvapaṭisedho kato. Arahattaphale hi pavattamānā sikkhā pariniṭṭhitasikkhākiccattā na sikkhākiccaṃ karonti, kevalam sikkhāphalabhāveneva pavattanti, tasmā na tā sikkhāvacaṇaṃ arahanti, nāpi taṃsamaṅgī sekkhavacaṇaṃ, na ca “sikkhanasīlo, sikkhāsu jāto”ti ca vattabbaṃ arahati. Hetṭhimaphalesu pana sikkhā sakadāgāmimaggavipassanādīnaṃ upanissayabhāvato sikkhākiccaṃ karontīti sikkhāvacaṇaṃ arahanti, taṃsamaṅgino ca sekkhavacaṇaṃ, “sikkhanasīlā, sikkhāsu jātā”ti ca vattabbaṃ arahanti.

“Sikkhatīti sekkho”ti ca ariyositasikkho dassitoti. Anantameva “khīṇāsavo”ti ādiṃ vatvā “na sikkhatīti asekkho”ti vuttattā pariyositasikkho dassito, na sikkhārahito tassa tatiyapuggalabhāvena gahitattā. Uddhippattasikkho vā asekkhoti etasmim atthe sekkhadhammesu eva ṭhitassa kassaci ariyassa asekkhabhāvāpattīti arahattamaggadhammā uddhippattā, yathāvuttehi ca atthehi sekkhoti katvā taṃsamaṅgino aggamaggaṭṭhassa asekkhabhāvo āpannoti? Na taṃsadisesu tabbōhāro. Arahattamaggato hi ninnānākaraṇaṃ arahattaphalaṃ ṭhapetvā pariññādīkicckaraṇaṃ, vipākabhāvaṇca, tasmā te eva sekkhadhammā “aggaphaladhammabhāvaṃ āpannā”ti sakkā vattum, kusalasukhato ca vipākasukhaṃ santataratāya paṇītataranti, uddhippattā ca te dhammā hontīti taṃsamaṅgī “asekkho”ti vuccatīti.

**Jātimahallakoti** jātiyā vuḍḍhataro addhagato vayoanuppatto. So hi rattaññūtāya yebhuyyena jātidhammakuladhammapadesu thāvāriyappattiyā **jātiṭhero nāma**. **Therakaraṇā dhammā**ti sāsane thirabhāvakarā guṇā paṭipakkhanimmadanakā. **Theroti** vakkhamānesu dhammesu thirabhāvappatto. **Sīlavā**ti pāsaṃsena sātīsayena sīlena samannāgato, sīlasampannoti attho, etena dussīlyāsankhātassa bālyassa abhāvamāha. Suttageyyādi bahu sutam etenāti **bahussuto**, etenāssa sutavirahasankhātassa bālyassa abhāvaṃ, paṭīsankhānabalena ca paṭiṭṭhitabhāvaṃ vadati. “**Catunnaṃ jhānānaṃ lābhī**”ti iminā nīvaraṇādīsankhātassa bālyassa abhāvaṃ, bhāvanābalena ca paṭiṭṭhitabhāvaṃ katheti. “**Āsavānaṃ khayā**”tiādīnā avijjāsankhātassa bālyassa sabbaso abhāvaṃ, khīṇāsavattherabhāvena paṭiṭṭhitabhāvaṇcassa dasseti. Na cettha samudāye vākyaparisamāpanaṃ, atha kho paccekaṃ vākyaparisamāpananti dassento “**evaṃ vuttasu dhammesū**”tiādīmāha. **Theranāmako vā** “thero”ti evaṃ nāmako vā.

Anuggahavasena, pūjāvasena vā attano santakaṃ parassa dīyati etenāti **dānaṃ**, pariccāgacetanā. Dānameva **dānamayaṃ**. Padapūraṇamattaṃ maya-saddo. Puññaṇca taṃ yathāvuttenatthena kiriyā ca kammabhāvatoti **puññakiriyā**. Paresaṃ piyamaṇāpatāsevanīyatādīnaṃ **ānisamsānaṃ**. **Pubbe...pe...vasenevā**ti saṅkhārattike (dī. ni. 3.305; dī. ni. aṭṭha. 3.305)

vuttadānamayasīlamayabhāvanāmayacetanāvaseneva. Imāni veditabbānīti sambandho. **Etthāti** etesu puññakiriyavattḥūsu. **Kāyena karontassāti** attano kāyena pariccāgapayogaṃ pavattentassa. **Tadatthanti** dānattham. “Imaṃ deyyadhammaṃ dehi”ti **vācaṃ nicchārentassa. Dānapāramiṃ āvajjetvā vāti** yathā kevalaṃ “annadānādīni demī”ti dānakāle taṃ dānamayaṃ puññakiriyavattu hoti, evaṃ “imaṃ dānamayaṃ sammāsambodhiyā paccayo hotū”ti dānapāramiṃ āvajjetvā **dānakālepi** dānasīseneva pavattitattā. **Vattasīse thatvāti** “etaṃ dānaṃ nāma mayhaṃ kulavaṃso kulatanti kulapaveṇī kulacārīta”nti cārittasīle thatvā **dadato cārittasīlamayaṃ**. Yathā deyyadhammapariccāgavasena pavattamānāpi dānacetanā vattasīse thatvā dadato sīlamayaṃ puññakiriyavattu hoti pubbābhisaṅkhārassa, aparabhāgacetanāya ca tathā pavattattā, evaṃ deyyadhamme **khayato, vayato sammasanaṃ paṭṭhapetvā dadato bhāvanāmayam puññakiriyavattu hoti** pubbabhāgacetanāya, deyyadhamme aparabhāgacetanāya ca tathā pavattattā.

Apacīticetanā **apacitisahagataṃ** apacīyati etāyāti yathā nandīrāgo eva nandīrāgasahagatā, yathāvuttāya vā apacitīyā sahatam sahapavattanti **apacitisahagataṃ**. Apacāyanavasena pavattam **puññakiriyavattu**. Vayasā guṇehi ca vuḍḍhatarānaṃ vattapaṭipattīsu byāvaṭo hoti yāya cetanāya, sā **veyyāvaccam**, veyyāvaccameva **veyyāvaccasahagataṃ**. Veyyāvaccasāṅkhātāya vā vattapaṭipattīyā samuṭṭhāpanavaseneva sahatam pavattanti **veyyāvaccasahagataṃ**, tathāpavattam puññakiriyavattu. Attano santāne pattam puññaṃ anuppadīyati etenāti **pattānuppadānaṃ**. Tathā parena anuppadinnatāya pattam abbhānumodati etenāti **pattabbhānumodanaṃ**. Ananuppadinnaṃ pana kevalaṃ abbhānumodīyati etenāti **abbhānumodanaṃ**. Dhammaṃ deseti etāyāti **desanā**, desanāva **desanāmayam**. Suṇāti etenāti **savanaṃ**, savanameva **savanamayam**. Diṭṭhiyā ñāṇassa ujugamaṃ **diṭṭhijugataṃ**. Sabbattha “puññakiriyavattḥū”ti padaṃ apekkhitvā napuṃsakalingatā.

Pūjāvasena sāmīcikiriyā apacāyanaṃ **apaciti**. Vayasā guṇehi ca jeṭṭhānaṃ gilānānañca taṃtaṃkiccakaraṇaṃ **veyyāvaccam**. Ayametesam visesoti āha “**tathā**”tiādi. **Cattāro paccaye datvā sabbasattānanti** ca ekadesato ukkaṭṭhaniddeso, yaṃ kiñci deyyadhammaṃ datvā, puññaṃ vā katvā “katipayānaṃ, ekasseva vā patti hotū”ti pariṇāmanampi pattānuppadānameva. Taṃ na mahapphalaṃ taṇhāya parāmatṭhattā. Paresam deseti hitapharaṇena muducittenāti ānetvā sambandhitabbaṃ. **Evanti** evaṃ imaṃ dhammaṃ sutvā bahussuto hutvā pare dhammadesanāya anuggaṇhissāmīti **hitapharaṇena muducittena dhammaṃ suṇāti**. Evañhissa savanaṃ attano, paresaṅca sammāpaṭipattīyā paccayabhāvato mahapphalaṃ bhavissatīti. **Sabbesanti** sabbesampi dasannaṃ puññakiriyavattḥūnaṃ. **Niyamalakkhaṇanti** mahapphalabhāvassa niyāmakasabhāvaṃ. **Diṭṭhiyā ujubhāvenevāti** “atthi, natthi”ti antadvayassa durasamussāritatāya “atthi dinna”ntiādi (ma. ni. 2.94; 3.136; vibha. 793) nayappavattāya sammādiṭṭhiyā ujukameva pavattiyā. Dānādīsu hi yaṃ kiñci imāya eva sammādiṭṭhiyā parisodhitaṃ mahājutikaṃ mahāvippḥāraṃ bhavati.

**Purimeheva tīhīti** pāḷiyaṃ āgateheva tīhi. **Sīlamaye** puññakiriyavattḥūmhi **saṅgahaṃ gacchanti** cārittasīlabhāvato. **Dānamaye** saṅgahaṃ gacchanti dānasabhāvattā, dānavisayattā ca. Kāmaṃ desanā dhammādānasabhāvato dānamaye saṅgahaṃ gacchatīti vattum yuttā, kusaladhammāsevanabhāvato pana vimuttāyatanasīse thatvā pavattitā viya savanena saddhiṃ **bhāvanāmaye** saṅgahaṃ gacchantīti vuttaṃ. “Diṭṭhijugataṃ bhāvanāmaye”ti keci. **Diṭṭhijugate** eva ca attanā katassa puññaṃ anussaraṇaṃ, tassa ca paresam atthāya pariṇāmanaṃ, guṇapasamsā, aññehi kariyāmānāya puññakiriyāya, sammāpaṭipattīyā ca anumodanaṃ saraṇagamaṇanti evaṃ ādayo puññavisesā saṅgahaṃ gacchanti diṭṭhijukammavaseneva tesam ijjhanato.

Parassa paṭipattīyā sodhanattho anuyogo **codanā**, sā yāni nissāya pavattati, tāni **codanāvattḥūni** diṭṭhasutaparisaṅkitāni. Tenāha “**codanākāraṇāni**”ti. **Diṭṭhenāti** ca hetumhi karaṇavacanaṃ, diṭṭhena hetunāti attho. Kiṃ pana taṃ diṭṭhanti āha “**vītikkaṃ**”nti. **Disvāti** ca dassanahetūti ayamettha attho yathā “paññāya cassa disvā”ti. “**Sutenā**”tiādīsipi iminā nayena attho veditabbo. **Parassāti** parato, **parassa** vā vacanaṃ **sutvā**. **Diṭṭhaparisaṅkitenāti** diṭṭhānugatena parisāṅkitena, tathā parisāṅkitena vā vītikkaṃena. Sesapadadvayepi eseva nayo. **Codeti** vatthusandassanena vā saṃvāsappaṭikkhepena vā

sāmīcippaṭikkhepena vā. Imasmim̐ pana atthe vitthāriyamāne atippapañico hotīti āha “**ayamettha saṅkhepo**”ti. Vitthāraṃ pana icchantānaṃ tassa adhigamupāyaṃ dassento “**vitthāro pana...pe... veditabbo**”ti āha.

**Kāmūpapattiyoti** kāmehi upapannatā, samannāgatatāti attho. Samannāgamo ca tesam̐ paṭisevanaṃ, samadhigamo cāti āha “**kāmūpasevanā kāmapaṭilābhā vā**”ti. **Paccupaṭṭhitakāmāti** dutiyatatiyarāsīnaṃ viya sayam̐, parehi ca animmitā. Uṭṭhānakammaphalūpajīvibhāvato pana tadubhayavasena paccupaṭṭhitā kāmā etesanti **paccupaṭṭhitakāmā**. Te pana tesam̐ yebhuyyena nibaddhāni hontīti “**nibaddhakāmā**”ti vuttaṃ. **Catudevalokavāsinoti** cātumahārājikato paṭṭhāya yāva tusitā devā. **Vinipāṭikāti** āpāyikā. Paranimmitā kāmā etesanti **paranimmitakāmā**.

**Pakatisevanavasenāti** anumānato jānanaṃ vadati, na paccakkhato. **Vasaṃ vattentīti** yathāruci pātabyataṃ āpajjanti. “**Methunaṃ paṭisevanti**”ti idaṃ pana kecivādapaṭisedhanatthaṃ vuttaṃ. Tenāha “**keci panā**”tiādi. Te “yāmānaṃ aññamaññaṃ **āliṅgitamattena**, tusitānaṃ hatthāmasanamattena, nimmānaratīnaṃ **hasitamattena**, paranimmitavasavattīnaṃ **olokitamattena kāmakiccaṃ ijjhati**”ti **vadanti**. “Itaresaṃ dvinnam̐ dvayaṃdvayasamāpattiyā vā”ti vadanti tādisassa kāmesu virajjanassa tesu abhāvato, kāmānaṃca uttaruttari paṇītapāṇītataraṇītatamabhāvato. Kevalaṃ pana nissandābhāvo tesam̐ vattabbo. **Kāmakiccanti** taṅkhaṇīkapaṇīlāhūpasamāvahaṃ phassasukhaṃ. **Kāmāti** kāmūpabhogā. **Pākatikā evāti** heṭṭhimehi ekasadisā eva. **Ekasaṅkhātanti** ekarūpaṃ samānarūpanti, samaññātaṃ samānabhāvanti vā attho.

**Sukhapaṭilābhāti** sukhasamadhiḡamā. **Heṭṭhāti** paṭhamajjhānabhūmito heṭṭhā manussesu, devesu vā. **Paṭhamajjhānasukhanti** kusalaṇṇapaṭhamajjhānaṃ. Bhūmivasenapi heṭṭhupariabhāvo labbhateva brahmakāyikesu, brahmapurohitesu vā kusalaṇṇajjhānaṃ nibbattetvā brahmapurohitesu, mahābrahmesu vā vipākasukhānubhavanassa labbhanato. Ettha ca dutiyatatiyajjhānabhūmivasena dutiyatatiyasukhūpapattīnaṃ vuccamānattā paṭhamajjhānabhūmivaseneva paṭhamajjhānasukhūpapatti vuttā. **Tintāti** temitā, jhānasukhena ceva jhānasamuṭṭhānapaṇītarūpaphuṭṭhakāyena ca paṇītā vittāti attho. Tenevāha “**samantato tintā**”tiādi. Yasmā kusalasukhato vipākasukhaṃ santataratāya paṇītataraṃ bahulaṇca pavattati, tasmā vuttaṃ “**idampi vipākajjhānasukhaṃ eva sandhāya vutta**”nti. **Tesanti** ābhassarānaṃ. Sappītikassa sukhasa ativiya uḷārabhāvato tena ajjhotthatacittānaṃ **bhavalobho mahā uppajjati**. **Santamevāti** vitakkavicārasaṅkhobhapītiubbilāvivigamena ativiya upasantaṃyeva. Tathā santabhāveneva hi taṃ attano paccayehi padhānabhāvaṃ nītatāya “paṇīta”nti vuccati. Tenāha “**paṇītamevā**”ti. Atappakena sukhapāramippattena sukkena saṃyuttāya tusāya pītiyā itā pavattāti **tusitā**. Yasmā te tato uttari sukhasa abhāvato eva na patthenti, tasmā vuttaṃ “**tato...pe... santuṭṭhā hutvā**”ti. **Tatiyajjhānasukhanti** tatiyajjhānavipākasukhaṃ.

**Satta ariyapaññāti** atṭhamakato paṭṭhāya sattanaṃ ariyānaṃ tesam̐ tesam̐ āvenīkapaññā. Ṭhapetvā lokuttaraṃ paññaṃ **avasesā paññā** nāma. Sabbāpi tebhūmikā paññā “sekkhā”tipi na vattabbā, “asekkhā”tipi na vattabbāti **nevasekkhānāsekkhā**, puthujjanapaññā.

**Yogavīhitesūti** paññāvīhitesu paññāpariṇāmitesu upāyapaññāya sampāditesu. **Kammāyatanesūti** ettha kammameva **kammāyatanaṃ**, kammaṇca taṃ āyatanaṇca ājīvādīnanti vā **kammāyatanaṃ**. Esa nayo **sippāyatanesupi**. Tattha ca duvidhaṃ kammaṃ hīnaṇca vaḍḍhakikammādi, ukkaṭṭhaṇca kasivāñijjādi. Sippampi duvidhaṃ hīnaṇca naḷakārasippādi, ukkaṭṭhaṇca muddagaṇādi. Vijjāva **vijjāṭṭhānaṃ**, taṃ dhammikameva nāgamaṇḍalaparittaphudhamanakamantasadisam̐ veditabbaṃ. Tāni panetāni ekacce paṇḍitā bodhisattasadisā manussānaṃ phāsuvihāraṃ ākaṅkanta neva aññehi kariyamānāni passanti, na vā katāni uggaṇhanti. Na karontānaṃ suṇanti, atha kho attano dhammatāya cintāya karontī. Paññavantehi attano dhammatāya cintāya katānipi aññehi uggaṇhitvā karontehi katasadisāneva hontī. **Kammassakatanti** “idaṃ kammaṃ sattānaṃ sakaṃ, idaṃ no saka”nti evaṃ jānanaññaṃ. **Saccānulomikanti** vipassanāññaṃ. Tañhi saccapaṭivedhassa anulomanato “saccānulomika”nti vuccati. Idānissa pavattanākāraṃ dassetuṃ “**rūpaṃ aniccanti vā**”tiādi vuttaṃ.

Tattha **vā**-saddena aniyamatthena dukkhānattalakkhaṇānīpi gahitānevāti daṭṭhabbaṃ nānantariyakabhāvato. Yañhi aniccaṃ, taṃ dukkhaṃ. Yaṃ dukkhaṃ, tadanattāti [(sijjhanato) adhipapāṭho viya dissati]. **Yaṃ evarūpanti** yaṃ evaṃ heṭṭhā niddiṭṭhasabhāvaṃ. “**Anulomikaṃ khanti**”ntiādīni paññāvevacanāni. Sā hi heṭṭhā vuttānaṃ kammāyatanādīnaṃ pañcannaṃ kāraṇānaṃ apaccanīkadassanena anulomanato, tathā sattānaṃ hitacariyāya maggasaccassa, paramatthasaccassa ca nibbānassa avilomanato anulometīti ca **anulomikā**. Sabbānīpi etāni kāraṇāni khamati sahati daṭṭhumaṃ sakkotīti **khanti**. Passatīti **diṭṭhi**. Rocetīti **ruci**. Munātīti **muti**. Pekkhātīti **pekkhā**. Te ca kammāyatanādayo dhammā nijjhāyamānā etāya nijjhānaṃ khamantīti **dhammanijjhānakkhanti**. **Parato asutvā paṭilabhatīti** aññassa upadesavacanaṃ asutvā sayameva cintento paṭilabhati. **Ayaṃ vuccatīti** ayaṃ cintāmayā paññā nāma vuccati. Sā panesā abhiññātānaṃ bodhisattānameva uppajjati. Tatthāpi saccānulomikaññaṃ dvinnāmeva bodhisattānaṃ antimabhavikānaṃ, sesapaññā sabbesampi pūritapāramīnaṃ mahāpaññānaṃ uppajjati.

**Parato sutvā paṭilabhatīti** kammāyatanādīni parena kariyamānāni, parena katāni vā disvāpi parassa kathayamānassa vacanaṃ sutvāpi ācariyasantike uggahetvāpi paṭiladdhā sabbā parato sutvā paṭiladdhanāmāti veditabbā. **Samāpannassāti** samāpattisamaṅgissa, nidassanamattametam. Vipassanāmaggañña hi idha “bhāvanāpañña”ti viśesato icchitāti.

Āvudhaṃ nāma paṭipakkhāvimathanatthaṃ icchitabbaṃ, rāgādisadiso ca paṭipakkho natthi, tassa ca vimathanaṃ buddhavacanamevāti “sutameva āvudha”nti vatvā “**taṃ atthato tepitakaṃ buddhavacana**”nti āha. Idāni tamatthaṃ vivaranto “taṃ hī”ti ādiṃ vatvā “**sutāvudho**”tiādīnā (a. ni. 7.67) suttapadena samattheti. Tattha **akusalaṃ pajahatīti** tadaṅgādivasena akusalaṃ pariccajati. **Kusalaṃ bhāvetīti** samathavipassanādikusalaṃ dhammaṃ uppādeti vaḍḍheti ca. **Suddhaṃ attānaṃ pariharatīti** tena akusalappahānena, tāya ca kusalabhāvanāya rāgādisaṃkilesato visuddhaṃ attabhāvaṃ pavatteti.

**Vivekaṭṭhakāyānanti** gaṇasaṅgaṇikaṃ vajjetvā tato apakaḍḍhitakāyānaṃ. Svāyaṃ kāyaviveko na kevalaṃ ekākībhāvo, atha kho paṭhamajjhānādi nekkhammayogatoti āha “**nekkhammābhiratāna**”nti. **Cittavivekoti** kilesasaṅgaṇikaṃ pahāya tato cittassa vivittatā. Sā pana jhānavimokkhādīnaṃ vasena hotīti āha “**parisuddhacittānaṃ paramavodānappattāna**”nti. **Upadhivivekoti** nibbānaṃ. Tadadhigamena hi puggalassa nirupadhītā. Tenāha “**nirupadhīnaṃ puggalāna**”nti, visaṅkhāragatānaṃ adhiगतanibbānānaṃ, phalasaṃpattisamaṅgīnañcāti attho. Sutampi avassayaṭṭheneva āvudhaṃ vuttanti āha “**ayampi**”ti. Tathā hi vuttaṃ “tañhi nissāyā”ti. Kāmañcetta sutapavivekāpi paññāvaseneva yathādhippetaāvudhattasādhakā, paññā pana sutena, ekaccapavivekena vā vināpi idhādhippetaāvudhattasādhantīti tato paññā sāmattiyaḍḍassanattaṃ viṣuṃ āvudhabhāvena vuttā. Tenāha “**yassa sā atthi, so na kutoci**”tiādī.

**Nāññātāṃ aviditaṃ dhammanti** anamatagge saṃsāravaṭṭe na aññātāṃ aviditaṃ amatadhammaṃ, catusaccadhammameva vā **jānissāmīti paṭipannassa** iminā pubbābhogena **uppannaṃ indriyaṃ**. Yaṃ pāliyaṃ saṅgahavāre “nava indriyāni hontī”ti vuttaṃ, taṃ pubbābhogasiddhaṃ pavattiākāravisesaṃ dīpetuṃ vuttaṃ, atthato pana maggasaṃmādiṭṭhi eva sātī āha “**sotāpattimaggāññassetāṃ adhivacana**”nti. **Aññindriyanti** ājānanakaindriyaṃ, paṭhamamaggena nītamariyādaṃ anatikkamitvā tesameva tena maggena nītānaṃ catusaccadhammānaṃ jānanakaindriyanti vuttaṃ hoti. Tenāha “**aññābhūtaṃ ājānanabhūtaṃ indriya**”nti. Ājānatīti **añño**, aññassa bhūtaṃ, ājānavasena vā bhūtanti **aññabhūtaṃ**. **Aññātāvīsūti** jānitabbaṃ catuvariyasaccaṃ ājānitvā ṭhitesu. Tenāha “**jānanakiccāpariyosānappattesū**”ti, pariññādibhedassa jānanakiccassa pariniṭṭhānappattesu.

**Maṃsacakkhu cakkhupasādoti** maṃsacakkhu nāma catasso dhātuyo, vaṇṇo, gandho, raso, oḷā, sambhavo, saṅghānaṃ, jīvitaṃ, bhāvo, kāyappasādo, cakkhupasādoti evaṃ cuddasasambhāro maṃsapinḍo.

Kasiṇālokaṃ vaḍḍhetvā tathā rūpadassanato “**dibbacakkhu ālokanissitaṃ ṇāṇa**”nti vuttaṃ. Dibbacakkhupaṇṇāviniṃuttā eva lokiyapaṇṇā **paṇṇācakkhūti** ayamatto avuttasiddho dibbacakkhussa visuṃ gahitattāti vuttaṃ “**paṇṇācakkhu lokiyalokuttapaṇṇā**”ti.

Adhikaṃ visiṭṭhaṃ sīlanti **adhisiḷaṃ**. **Sikkhitabbatoti** āsevitabbato. **Adhisiḷaṃ** nāma anavasesakāyikavācasikaṣaṃvarabhāvato, maggasīlassa padaṭṭhānabhāvato ca. **Adhicittaṃ** maggasamādhissa adhiṭṭhānabhāvato. **Adhipaṇṇā** maggapaṇṇāya adhiṭṭhānabhāvato. Idāni nesam adhisiḷādibhāvaṃ kāraṇena paṭipādetuṃ “**anuppannepi hī**”tiādi vuttaṃ. Tathā **anuppanneti** appavatte. **Adhisiḷameva** nibbānādhigamassa paccayabhāvato. **Samāpannāti** ettha “nibbānaṃ patthayantenā”ti padaṃ ānetvā sambandhitabbaṃ.

“Kalyāṇakārī kalyāṇaṃ, pāpakārī ca pāpakaṃ;  
Anubhoti dvayampetuṃ, anubandhañhi kāraka”nti. (saṃ. ni. 1.256);

Evam atīte, anāgate ca vaṭṭamūlakadukkhassallakkaṇavasena saṃvegavatthutāya vimuttiākaṅkhāya paccayabhūtā kammassakatāpaṇṇā adhipaṇṇā”ti vadanti. Lokiyasīlādīnaṃ adhisiḷādibhāvo pariyāyenāti nipariyāyameva taṃ dassetuṃ “**sabbaṃ vā**”tiādi vuttaṃ.

**Pañcadvārikakāyoti** pañcadvāresu kāyo phassādidhammasamūho. Kāyo ca so bhāvitabhāvena bhāvanā cāti **kāyabhāvanā nāma**. Yasmā khīṇāsavānaṃ aggamaggādhigamanena sabbasaṃkilesā pahīnāti pahīnakālato paṭṭhāya sabbaso āsevanābhāvato natthi tesam bhāvinīyāpi cakkhusotaviññeyyā dhammā, pageva kālakā, tasmā pañcadvārikakāyo subhāvito eva hoti. Tena vuttaṃ “**khīṇāsavassa hi... pe... subhāvito hoti**”ti. Na aññesaṃ viya **dubbalā** dubbalabhāvakarānaṃ kilesānaṃ sabbaso pahīnattā.

**Vipassanā dassanānuttariyaṃ** aniccānupassanādivasena saṅkhārānaṃ sammadeva dassanato. **Maggo paṭipadānuttariyaṃ** taduttariyapaṭipadāya abhāvato. **Phalaṃ vimuttānuttariyaṃ** akuppabhāvato. **Phalaṃ vā dassanānuttariyaṃ** divasampi nibbānaṃ paccakkhato disvā pavattanato. **Nibbānaṃ vimuttānuttariyaṃ** sabbasaṅkhatavinissaṭṭā. Dassana-saddaṃ kammaśāhanaṃ gahetvā nibbānassa dassanānuttariyatā vuttāti dassento “**tato uttarañhi daṭṭhabbaṃ nāma natthī**”ti āha. Natthi ito uttaranti **anuttaraṃ**, anuttarameva **anuttariyanti** āha “**uttamaṃ jeṭṭhaka**”nti.

**Sesoti** vuttāvaseso pañcakanayena, catukkanayena ca tividho samādhī, iminā eva ca samādhittayāpadesena suttantesupī pañcakanayo āgato evāti veditabbaṃ. Tathā yaṃ vattabbaṃ, taṃ paramatthamañjūsāyaṃ **visuddhimaggasaṃvaṇṇanāyaṃ** (visuddhi. ṭī. 1.38) vuttameva, tasmā tathā vuttanayeneva veditabbaṃ.

Āgacchati nāmaṃ etasmāti āgamaṇaṃ, tato **āgamanato**. **Saguṇatoti** sarasato. **Ārammaṇatoti** ārammaṇadhammato. **Anattato abhinivisitvāti** “sabbe saṅkhārā anattā”ti vipassanaṃ paṭṭhapetvā. **Anattato disvāti** paṭhamaṃ saṅkhārānaṃ “anattā”ti anattalakkhaṇaṃ paṭivijjhivā. **Anattato vuṭṭhātīti** vuṭṭhānagāminīvipassanāya anattākārato pavattāya maggavuṭṭhānaṃ pāpuṇāti. **Asuññatattakārakānaṃ kilesānaṃ abhāvāti** attābhīnivesapaccayānaṃ diṭṭhekaṭṭhānaṃ kilesānaṃ vikkhambhanato vipassanā suññatā nāma attasuññatāya yāthāvato gahaṇato. Nanu evaṃ vipassanāya saguṇato suññatā, na āgamaṇatoti nipariyāyato natthīti? Saccametam nāmalābhe, na pana nāmadāneti nāyaṃ doso. Atha vā suttantakathā nāma pariyāyakathā, na abhidhammakathā viya nipariyāyāti bhiyyopi na koci doso.

Yasmā saguṇato, ārammaṇato ca nāmalābhe saṅkaro hoti ekasseva nāmantaralābhasambhavato. Āgamanato pana nāmalābhe saṅkaro natthi nāmantaralābhābhāvato, asambhavato ca, tasmā “**aparo**”tiādi vuttaṃ. **Nimittakārakakilesābhāvāti** niccanimittādigghākapaccayānaṃ kilesānaṃ vikkhambhanato. Kāmañcāyaṃ vipassanā niccanimittādiṃ ugghāṭentī pavattati, saṅkhāranimittassa pana avissajjanato na nipariyāyato animittanāmaṃ labhatīti. Pariyāyena panetaṃ vuttaṃ. Tathā hi



nippariyāyadesanattā abhidhamme maggassa animittanāmaṃ uddhaṭaṃ. Sutte ca –

“Animittañca bhāvehi, mānānusayamujjaha;  
Tato mānābhisamayā, upasanto carissasī”ti. (su. ni. 344; saṃ. ni. 1.212);

Animittapariyāyo āgato. **Paṇidhikāra**kakilesābhāvāti sukhaṇidhiādipaccayānaṃ kilesānaṃ vikkhambhanaṭo.

**Rāgādīhi suññattāti** samucchadavasena pajahanato rāgādīhi vivittattā. Rāgādayo eva **rāganimittādīni**. Purimuppanā hi rāgādayo parato uppajjanakarāgādīnaṃ kāraṇaṃ hoti. Rāgādayo eva tathā ṇidhānaṃ paccayabhāvato **rāgapaṇidhiādayo**. Nibbānaṃ viśāṅkhārahāveṇeva sabbasaṅkhāraviniṣṣaṭṭā rāgādīhi suññaṃ, rāgādīnimittapaṇidhivirahitañcāti daṭṭhabbaṃ. Ettha ca saṅkhārupekkhā sānulomā vuṭṭhānagāminivipassanā, sā suññato vipassantī “suññatā”ti vuccati, dukkhato passantī taṇhāpaṇidhisosanaṭo “appaṇihitā”ti. Sā maggādhigamāya āgamaṇapaṭipadāṭhāne ṭhatvā maggassa “suññataṃ animittaṃ appaṇihita”nti nāmaṃ deti. Āgamaṇato ca nāme laddhe saṅgato ca āramaṇato ca nāmaṃ siddhameva hoti, na pana saṅgāramaṇehi nāmalābhe sabbattha āgamaṇato nāmaṃ siddhaṃ hotīti pariṇāṇanāmasiddhihetuttā, “saṅgāramaṇehi sabbesampi nāmatayayogo, na āgamaṇato”ti vavatthānakaṛattā ca nippariyāyato āgamaṇatova nāmalābho padhānaṃ, na itarehi, pariṇāyato pana tidhā nāmalābho icchitabboti aṭṭhakathāyaṃ “tividhā kathā”tiādīnā ayaṃ vicāro katoti daṭṭhabbaṃ.

**Sucibhāvoti** kilesāsucivigamena suddhabhāvo asaṃkiliṭṭhabhāvo. Tenāha “**tiṇṇaṃ sucaritānaṃ vasena veditabbo**”ti.

Munino eṭānīti **moneyyāni**. Yehi dhammehi ubhayahitamunanaṭo **muni** nāma hoti, te evaṃ vuttāti āha “**munibhāvakarā moneyyapaṭipadā dhammā**”ti. Tattha yasmā kāyena akattabbassa akaraṇaṃ, kattabbassa ca karaṇaṃ, “atthi imasmiṃ kāye kesā”tiādīnā (dī. ni. 2.377; ma. ni. 1.110; 3.153; a. ni. 6.29; 10.60; vibha. 356; khu. pā. 3.1; netti. 47) kāyasaṅkhātassa āramaṇassa jānanaṃ, kāyassa ca samudayaṭo atthaṅgamaṭo assādato ādīnavato nissaraṇato ca yāthāvato pariṇānaṃ, tathā pariṇānavasena pavatto vipassanāmaggo, tena ca kāye chandarāgassa pajhanaṃ, kāyasaṅkhāraṃ nirodhetvā pattabbasamāpatti cāti sabbe ete kāyamukhena pavattā moneyyapaṭipadā dhammā kāyamoneyyaṃ nāma. Tasmā tamatthaṃ dassetuṃ “**tividhakāyaduccaritassa pahāna**”ntiādīnā pāḷi āgatā. Sesadvayepi eseva nayo. Tattha copanavācañceva saddavācañca ārabba pavattā paññā **vācāramaṇe ñānaṃ**. Tassa vācāya samudayādito pariṇānaṃ **vācāpariññā**. Ekāsītividhaṃ lokiyacittaṃ ārabba pavattañānaṃ **manāramaṇe ñānaṃ**. Tassa samudayādito pariṇānaṃ **manopariññāti** ayameva viśeso.

Ayanti ito sampattiyoti **āyo**, kusalānaṃ dhammānaṃ abhibuddhīti āha “**āyoti vuḍḍhī**”ti. Apenti sampattiyoti etenāti **apāyo**, kusalānaṃ dhammānaṃ hānīti āha “**apāyoti avuḍḍhī**”ti. Tassa tassāti āyassa ca apāyassa ca. **Kāraṇaṃ upāyo** upeti upagacchati etena āyo, apāyo cāti. Tattha duvidhā vuḍḍhi anatthahānito, atthupattito ca, tathā avuḍḍhi anatthahānito, anatthupattito ca. **Tesaṃ pajānaṇāti** tesaṃ āyāpāyasaññitānaṃ yathāvuttappabhedānaṃ vuḍḍhiavuḍḍhīnaṃ yāthāvato pajānaṇā. **Kosallaṃ** kusalatā nipuṇatā. Tadubhayampi pāḷivaseneva dassetuṃ “**vuttañheta**”ntiādi vuttaṃ.

Tattha **idaṃ vuccatīti** yā imesaṃ akusaladhammānaṃ anuppattinirodhesu, kusaladhammānaṃ uppattibhiyyobhāvesu paññā, idaṃ **āyakosallaṃ** nāma vuccati. Idāni apāyakosallampi pāḷivaseneva dassetuṃ “**tattha katama**”ntiādi vuttaṃ. Tattha **idaṃ vuccatīti** yā imesaṃ kusaladhammānaṃ anuppajjananirujjhānesu, akusaladhammānaṃ uppattibhiyyobhāvesu paññā, idaṃ **apāyakosallaṃ** nāma vuccatīti. Etthāhaāyakosallaṃ tāva paññā hotu, apāyakosallaṃ kathaṃ paññā nāma jātāti evaṃ maññati “apāyuppādanasamatthātā apāyakosallaṃ nāmā”ti, taṃ pana tassa matimattaṃ. Paññāvā eva hi “mayhaṃ evaṃ manasi karoto anuppanā kusalā dhammā nuppajjanti, uppanā nirujjhanti. Anuppanā

akusalā dhammā uppajjanti, uppannā vaḍḍhanti’’ti pajānāti, so evaṃ ñatvā anuppanne akusale dhamme na uppādeti, uppanne pajahati. Anuppanne kusale dhamme uppādeti, uppanne bhāvanāpāripūriṃ pāpeti. Evaṃ apāyakosallampi paññā evāti. **Sabbāpīti** āyakosallapakkhikāpi apāyakosallapakkhikāpi. **Tatrupāyāti** tatra tatra karaṇīye upāyabhūtā.

**Tassa tikicchanatthanti** accāyikassa kiccassa, bhayassa vā pariharaṇattham **ṭhānuppattiyakāraṇajānanavasenevāti** ṭhāne taṅkhaṇe eva uppatti etassa atthīti ṭhānuppattikam, ṭhānaso uppajjanakakāraṇam, tassa jānanavaseneva.

**Majjanākāravasena pavattamānāti** attano vatthuno madanīyatāya madassa āpajjanākārena pavattamānā unṇatiyo. **Nirogoti** arogo. **Mānakaraṇanti** mānassa uppādanam. **Yobbane ṭhatvāti** yobbane patiṭṭhāya, yobbanam apassāyāti attho. Sabbesampi jīvitam nāma maraṇapabhaṅguraṃ dukkhānubandhaṅga, tadubhayaṃ anoloketvā, pabandhaṭṭhitipaccayā sulabhataṅga nissāya uppajjanakamado **jīvitamadoti** dassetum **“ciraṃ jīvi”**ntiādi vuttam.

**Adhipati** vuccati jeṭṭhako, issaroti attho. Tato adhipatito āgataṃ **ādhipateyyam**. Kim tam? Pāpassa akaraṇam. Tenāha **“ettakomhī”**tiādi. Tattha sīlādayo lokiyā eva daṭṭhabbā, tasmā **vimuttiyāti** lokiyavimuttiyā. **Jeṭṭhakanti** issaram, garunti attho. Ettha ca attānam, dhammaṅga adhipatiṃ katvā pāpassa akaraṇam hiriyā vasena veditabbam. Lokam adhipatiṃ katvā akaraṇam ottappassa vasena.

**Kathāvatthūnīti** kathāya pavattiṭṭhānāni. Yasmā tehi vinā kathā nappavattati, tasmā **“kathākāraṇānī”**ti vuttam. Addhāna-saddassa attho heṭṭhā vutto eva, so panatthato dhammappavattimattam. **Dhammā** cettha khandhā eva, tabbinimuttā ca tesam gati natthīti āha **“atītam dhammam, atītakhandheti attho”**ti. Ayaṅga addhā nāma disādi viya atthato dhammappavattiṃ upādāya paññattimattam, na upādā na bhūtaḍḍhammoti tamattham dassetum **“apicā”**tiādi vuttam.

“Tamavijjhanatthena viditakaraṇatthēnā’’ti saṅkhepato vuttamattham vivaritam **“pubbenivāsā”**tiādi vuttam. **Pubbenivāsanti** pubbe nivutthakkhandhe. **Tamanti** mohatamam. **Vijjhatīti** vihanati, pajahatīti attho. Teneva ca paṭicchādatamavijjhanena **pubbenivāsāṅga viditam** pākaṭam **karotīti vijjāti**. **Tanti** cutūpapātam.

Upapattidevavisesabhāvāvaho vihāroti katvā **dibbo vihāro**. Nanu evaṃ aññamaññānampi dibbavihārabhāvo āpajjati? Na tāsam sattesu hitūpasamhārādivasena pavattiyā savisesam niddosatthēna, seṭṭhatthēna ca brahmavihārasamaññāya niruḷhabhāvato. Suvisuddhito paṭipakkhasamucchinnavasena araṇīyato pattabbato, ariyabhāvappattiyā vā anantaram **ariyo**. Ariyānam ayanti vā **ariyo** vihāro.

Sesam heṭṭhā vuttanayameva.

Tikavaṇṇanā niṭṭhitā.

### Catukkavaṇṇanā

**306. Pubbeti** heṭṭhā mahāsatiṭṭhānavaṇṇanāyam.

**Yo chandoti** yo chandiyanasena chando. **Chandikatāti** chandabhāvo, chandikaraṅkāro vā. **Kattukamyatāti** kattukāmatā. **Kusaloti** cheko kosallasambhūto. **Dhammacchandoti** sabhāvachchando. Ayaṅhi **chando** nāma taṅhāchando, diṭṭhichando, vīriyachando, dhammacchandoti bahuviddho. Idha kattukamyatākusaladhammacchando adhippeto. **Chandam janetīti** tam chandam uppādeti. Tam pavattento hi janeti nāma. **Vāyānam karotīti** payogaṃ parakkamaṃ karoti. **Vīriyam ārabhatīti**

kāyikacetāsikavīriyaṃ pavatteti. **Cittaṃ upatthambhetī** teneva sahaḷātavīriyena cittaṃ ukkhipati. **Padahaṭṭi** padhānaṃ vīriyaṃ karoti. Paṭipāṭiyā panetāni padāni uppādanāsevanābhāvanābahulīkammaśācakkiriyāhi yojetabbāni. Vitthāraṃ pariharanto “**ayametta saṅkhepa**”tiādīmāha.

**Chandaṃ nissāyāti** “chandaṃ cetosamādhī hoti, mayhaṃ evaṃ hoti”ti evaṃ chandaṃ nissāya chandaṃ dhuraṃ jeṭṭhakaṃ pubbaṅgamaṃ katvā **pavatto samādhī chandasamādhī. Padhānabhūṭāti** padhānāḷā, padhānabhāvaṃ vā pattā. **Saṅkhārāti** catukiccasādhakaṃ sammappadhānavīriyaṃ vadati. **Tehi dhammehīti** yathāvuttasamādhivīriyehi **upetaṃ** sampayuttaṃ. **Iddhiyā pādanti** nipphattipariyāyena ijḷhanaṭṭhena, ijḷhanti etāya sattā iddhā vuddhā ukkaṃsagatā hontīti iminā vā pariyaḷyena “iddhī”ti saṅkhyāṃ gaṭānaṃ upacārajḷhānādikusalacittasampayuttānaṃ chandasamādhīpadhānaśaṅkhārānaṃ adhiṭṭhānaṭṭhena pādabhūtaṃ. Yaśmā purimā iddhi pacchimāya iddhiyā pādo pādakaṃ padaṭṭhānaṃ hoti, tasmā “**iddhibhūtaṃ vā pāda**”nti ca vuttaṃ. **Sesesupīti** dutiyāiddhipādādīsu. Kāmañcetta **janavasabhasuttepi** iddhipādavicāro āgato, sopi saṅkhepato evāti āha “**vitthāro pana...pe... dīpito**”ti.

**307. Diṭṭhadhammo** vuccati paccakkhabhūto attabhāvoti āha “**imasmiṃyeva attabhāve**”ti. **Sukhavihāratthāyāti** nikkilesatāya nirāmisena sukkena viharānaṭṭhāya. **Phalasaṃpattijhānānti** cattāripi phalasaṃpattijhānāni. **Aparabhāgeti** āsavakkhayādhigamato aparabhāge. **Nibbattitajjhānānti** adhigatarūpārūpajjhānāni.

**Sūriyacandapajjotamaṇiādīnanti** pajjotaggahaṇena padīpaṃ vadati. **Ādi-**saddena ukkāvijḷulatādīnaṃ saṅgaho. **Ālokoti manasi karotīti** sūriyacandālokādīṃ divā, rattiṅca upaladdhaṃ yathāladhavaseneva manasi karoti citte ṭhpeti. Tathāva naṃ manasi karoti, yathāssa subhāvītālokakasiṇassa viya kasiṇāloko yadicchakaṃ yāvadicchakaṃ. So āloko rattiyaṃ upatiṭṭhati, yena tatha divāsaṅgānaṃ ṭhpeti divā viya viḷatathinamiddho hoti. Tenāha “**yathā divā tathā ratti**”nti. **Yathā rattiṃ āloko diṭṭhoti** yathā rattiyā candālokādīlōko diṭṭho upaladdho. **Evameva divā manasi karotīti** rattiṃ diṭṭhākāreneva divā taṃ ālokaṃ manasi karoti citte ṭhpeti. **Apihitenāti** thinamiddhapidhānena na pihitena. **Anaddhenāti** asaṅchādītena. **Saobhāsanti** saṅgānobhāsaṃ. Thinamiddhavinodanaālokopi vā hotu kasiṇālokopi vā parikammaālokopi vā, upakkilesāloko viya sabbāyaṃ āloko nāṇasaṃuṭṭhāno vāti. **Nāṇadassanaṭṭhāyāti** dibbacakkhuṅṇāṇaṭṭhāyā. Dibbacakkhuṅṇāṇāhi rūpagatassa dibbassa, itarassa ca dassanaṭṭhena idha “nāṇadassana”nti adhippetā. “Ālokasaṅgānaṃ manasi karotī”ti ettha vuttaāloko **thinamiddhavinodanaāloko. Parikammaālokoti** dibbacakkhuṅṇāyā parikammakaraṇavasena pavattitaāloko. Tatha purimassa vasena “**khīṇāsavassā**”ti visesvā vuttaṃ. Tassa hi thinamiddhaṃ suppaḷhānaṃ hoti, na añṇesaṃ. Dutiyassa vasena “**tasmīṃ vā āgatepi**”tiādī vuttaṃ. Tatha **tasmīnti** dibbacakkhuṅṇāṇe. **Āgatepi**ti ṭhṭiladdhepi. **Anāgatepi**ti appaṭṭiladdhepi. Yaśmā tathārūpassa pādakaḷḷhānaśseva vasena parikammaālokassa sambhavo, yato taṃ parisuddhapariyodātādīguṇavisesupasaṃhitā, tasmā āha “**pādaka...pe... bhāvetīti vutta**”nti.

**Sattaṭṭhānikassāti** “abhikkante ṭhṭikkante sampajānakārī hoti”tiādīnā (dī. ni. 1.214; 2.69; ma. ni. 1.102) vuttassa sattaṭṭhānikassa. Satipi sekkhānaṃ pariññātabhāve ekantato pariññātavatthukā nāma arahanto evāti vuttaṃ “**khīṇāsavassa vatthu viditaṃ hoti**”tiādī. **Vatthārammaṇaviditatāyāti** vatthuno, ārammaṇassa ca yāthāvato viditabhāvena. Yathā hi sappapariyesanaṃ carantena tassa āsaye vidite sopi vidito eva ca hoti mantāgadabalena tassa gahaṇassa sukarattā, evaṃ vedanāya āsayabhūte vatthumhi, ārammaṇe ca vidite ādikammikassapi vedanā viditā eva hoti salakkhaṇato, sāmaññalakkhaṇato ca tassā gahaṇassa sukarattā, pageva pariññātavatthukassa khīṇāsavassa. Tassa hi uppādakkhaṇepi ṭhṭikkhaṇepi bhaṅgakkhaṇepi vedanā viditā pākaṭā honti. Tenāha “**evaṃ vedanā uppajjantī**”tiādī. Nidassanamattañcetaṃ, yadidaṃ pāḷiyaṃ vedanāsaṅgāvitakkaggahaṇanti dassento “**na kevala**”ntiādīmāha, tena avasesato sabbadhammānampi uppādādito viditabhāvaṃ dasseti.

Idāni na kevalaṃ khaṇato eva, atha kho paccayatopi aniccāditopi na kevalaṃ khīṇāsavānaṃyeva vasena, atha kho ekaccānaṃ sekkhānampi vasena vedanādīnaṃ viditabhāvaṃ dassetuṃ “**apicā**”tiādi vuttaṃ. Tattha **avijjāsamudayā**ti avijjāya uppādā, atthibhāvāti attho. Nirodhavirodhī hi uppādo atthibhāvavācakopi hotīti tasmā purimabhavasiddhāya avijjāya sati imasmiṃ bhave vedanāya uppādo hotīti attho. Avijjādīhi atītakālikādīhi tesam sahakāraṇabhūtāni uppādādīnipi gahitānevāti veditabbaṃ. Vedanāya pavattipaccayesu phassassa balavabhāvato so eva gahito “**phassasamudayā**”ti. Tasmim pana gahite pavattipaccayatāsāmaññaena vatthārammaṇādīnipi gahitāneva hontīti sabbassāpi vedanāya anavasesato paccayatato udayadassanaṃ vibhāvitanti daṭṭhabbaṃ. “**Nibbattilakkhaṇa**”ntiādinā khaṇavasena udayadassanaṃ. Uppajjati etasmāti **uppādo**, uppajjanaṃ **uppādoti** paccayalakkhaṇaṃ, khaṇalakkhaṇaṃ ubhayaṃ ekajjhaṃ gahetvā āha “**evaṃ vedanāya uppādo vidito hoti**”ti.

**Aniccato manasi karototi** vedanā nāmāyaṃ anaccantikāyā ādiantavatī udayabbayaparicchinnā khaṇabhaṅgurā tāvakālikā, tasmā “aniccā”ti aniccato manasi karoto. Tassā khayato, vayato ca **upaṭṭhānaṃ viditaṃ** pākaṭaṃ **hoti**. **Dukkhatto manasi karototi** aniccattā eva vedanā udayabbayapaṭipīṭatāya, dukkhamatāya, dukkhavattutāya ca “**dukkhā**”ti manasi karoto **bhayato** bhāyitabbato tassā **upaṭṭhānaṃ viditaṃ** pākaṭaṃ **hotīti**. Tathā aniccattā, dukkhattā eva ca vedanā attarahitā asārā nissārā avasavattinī tucchāti vedanaṃ **anattato manasi karoto suññato** rittato asāmikato **upaṭṭhānaṃ viditaṃ** pākaṭaṃ hoti. “**Khayato**”tiādi vuttasseva atthassa nigamaṇaṃ. Tasmā vedanaṃ khayato bhayato suññato jānātīti atthavasena vibhattipariṇāmo veditabbo. **Avijjānirodhā vedanānirodhoti** aggamaḅḅena avijjāya anuppādanirodhato vedanāya anuppādanirodho hoti paccayābhāve abhāvato. Sesam samudayavāre vuttanayānusārena veditabbaṃ. Idha **samādhibhāvanā**ti sikhāpattā ariyānaṃ vipassanāsamādhibhāvanā. Tassā pādakabhūtā jhānasamāpatti veditabbā.

**Vuttanayameva** mahāpadāne (dī. ni. 2.62).

**308. Pamāṇaṃ aggahetvāti** asubhabhāvanā viya padesam aggahetvā. Ekasmimpi satte pamāṇāggahaṇena **anavasesapharaṇena**. Natthi etāsam gahetabbaṃ pamāṇanti hi **appamāṇā**, appamāṇā eva **appamaññā**.

Apassayitabbaṭṭhena **apassenāni**, idha bhikkhu yāni appassāya tisso sikkhā sikkhituṃ samattho hoti, tesameva adhivacanaṃ. Tāni panetāni paccayānaṃ saṅkhāya sevītā adhivāsanakkhanti, vajjanīyavajjanaṃ, vinodetabbavinodanaṃ. Tenāha “saṅkhāyekaṃ adhivāsetī”tiādi. Tattha sammadeva khāyati upaṭṭhāti paṭibhātīti **saṅkhā**, ñāṇanti āha “**saṅkhāyāti ñāṇena**”ti. Saṅkhāya sevītā nāma yaṃ sevato akusalā dhammā pariḅāyanti, kusalā dhammā bhivaḅḅhanti, tassa sevanāti āha “**sevītabbayuttakameva sevati**”ti. **Adhivāsanādīsupi** eseva nayo. **Anto pavisitunti** abhantare attano citte pavattituṃ **na deti**.

### Ariyavaṃsacatukkavaṇṇanā

**309. Vaṃsa-saddo** “piṭṭhivaṃsam atikkamitvā nisīdatī”tiādīsu dvinnam dvinnam gopānasīnam sandhānaṭṭhāne ṭhapetabbadaṇḅake āgato.

“Vaṃso visālova yathā visatto,  
Puttesu dāresu ca yā apekkhā;  
Vaṃse kaḷīrova asajjamāno,  
Eko care khaggavisāṇakappo”tiādīsu. (apa. 1.1.94);

Akaṇḅake. “Bherisaddo mudiṅgasaddo vaṃsasaddo kaṃsatāḷasaddo”tiādīsu tūriyavisese, yo “veṇū”tipi vuccati. “Abhinnena piṭṭhivaṃsena mato hatthī”tiādīsu hatthiādīnaṃ piṭṭhivemajjhe padese. “Kulavaṃsam ṭhapessāmī”tiādīsu (dī. ni. 3.267) kulavaṃse. “Vaṃsānurakkhako paveṇīpālako”tiādīsu (visuddhī. 1.42) guṇānupubbiyaṃ guṇānaṃ pabandhappavattiyaṃ. Idha pana

catupaccayasantosabhāvanārāmatāsañkhātaguṇānaṃ pabandhe daṭṭhabbo. Tassa pana vaṃsassa kulanvayaṃ, guṇanvayañca nidassanavasena dassetuṃ “**yathā hi**”tiādi vuttaṃ. Tattha **khattiyavaṃsoti** khattiyakulanvayo. Eseva nayo sesapadesupi. **Samaṇavaṃso** pana samaṇatanti samaṇapaveṇī. **Mūlagandhādīnanti ādi**-saddena yathā sāragandhādīnaṃ saṅgaho, evamettha gorasādīnampi saṅgaho daṭṭhabbo. Dutiyena pana **ādi**-saddena kāsikavatthasappimaṇḍādīnaṃ. **Ariya**-saddo amilakkhūsupi manussesu vattati, yesaṃ pana nivāsanaṭṭhānaṃ “ariyaṃ āyatana”nti vuccati. Yathāha “yāvata, ānanda, ariyaṃ āyatana”nti (dī. ni. 2.152; udā. 76) lokiyasādhujanēsupi “ye hi vo ariyā parisuddhakāyakkammantā...pe... tesam ahaṃ aññataro”tiādīsu (ma. ni. 1.35). Idha pana ye “ārakā kilesehī”tiādīnā laddhanibbacanā paṭividdhaariyasaccā, te eva adhippetāti dassetuṃ “ke pana te ariyā”ti puccham katvā “**ariyā vuccantī**”tiādi vuttaṃ.

Tattha ye mahāpaṇidhānakappato paṭṭhāya yāvāyaṃ kappo, etthantare uppannā sammāsambuddhā, te tāva sarūpato dassetvā tadaññēpi sammāsambuddhe, paccekabuddhe, buddhasāvake ca saṅgahetvā anavasesato ariye dassetuṃ “**apicā**”tiādi vuttaṃ. Tattha yāva sāsanaṃ na antaradhāyati, tāva satthā dharati eva nāmāti imameva bhagavantaṃ, ye ceterahi buddhasāvakā, te ca sandhāya **paccuppannaggahaṇaṃ**. Tasmim tasmim vā kāle te te paccuppannāti ce, **atītānāgataggahaṇaṃ** na kattabbaṃ siyā. Idāni yathā bhagavā “dhammaṃ vo, bhikkhave, desessāmi ādikalyāṇaṃ majjhakalyāṇaṃ pariyośanakalyāṇaṃ sātthaṃ sabyañjanaṃ kevalaparipuṇṇaṃ parisuddhaṃ brahmacariyaṃ pakāsessāmi, yadidaṃ chachakkāni”ti chakkadesanāya (ma. ni. 3.420) aṭṭhahi padehi vaṇṇaṃ abhāsi, evaṃ mahāariyavaṃsadesanāya ariyānaṃ vaṃsānaṃ “cattārome, bhikkhave, ariyavaṃsā aggaññā rattaññā vaṃsaññā porāṇā asaṃkiṇṇā asaṃkiṇṇapubbā na sañkīyanti na sañkīyissanti appaṭikuṭṭhā samaṇehi brāhmaṇehi viññūhi”ti (a. ni. 4.28) yehi navahi padehi vaṇṇaṃ abhāsi, tāni tāva ānetvā thomaṇavaseneva vaṇṇento “**te kho panete**”tiādīmāha. **Aggāti jānitabbā** sabbavaṃsehi seṭṭhabhāvato, seṭṭhabhāvasādhanato ca. **Dīgharattaṃ pavattāti jānitabbā** rattaññūhi, buddhādīhi tehi ca tathā anuṭṭhitattā. **Vaṃsāti jānitabbā** buddhādīnaṃ ariyānaṃ vaṃsāti jānitabbā. **Porāṇāti** purātanā. **Na adhunuppattikāti** na adhunātanā. **Asaṃkiṇṇāti** na khittā na chaḍḍitā. Tenāha “**anapanitā**”ti. **Na apanitapubbāti** na chaḍḍitapubbā tissannaṃ sikkhānaṃ paripūraṇūpāyabhāvato na paricattapubbā. Tato eva **idānipi na apaniyanti, anāgatepi na apaniyissanti**. Ye dhammasabhāvassa vijānaneva **viññū** samitapāpasamaṇā ceva bāhitapāpabrāhmaṇā ca, **tehi appaṭikuṭṭhā** appaṭikkhittā. Ye hi na paṭikkositabbā, te aneditabbā agarahitabbā. Apariccajitatbatāya appaṭikkhipitabbā hontīti.

**Santuṭṭhoti** ettha yathādhippetasantosameva dassento “**paccayasantosavasena santuṭṭho**”ti vuttaṃ. Jhānavipassanādivasenapi idha bhikkhuno santuṭṭhatā hotīti. **Itarītarenāti** itarena itarena. Itara-saddoyaṃ aniyamavacano, dvikkhattuṃ vuccamāno yaṃkiñci-saddehi samānattho hotīti vuttaṃ “**yena kenaci**”ti. Svāyaṃ aniyamavācītāya eva yathā thūlādīnaṃ aññataravacano, evaṃ yathā laddhādīnampi aññataravacanoti tattha dutiyapakhasseva idha icchitabhāvaṃ dassento “**atha kho**”tiādīmāha. Nanu ca yathā laddhādayopi thūlādayo eva? Saccametam, tathāpi atthi vireso. Yo hi yathā laddhesu thūlādīsu santoso, so **yathā lābhasantoso** eva, na itaro. Na hi so paccayamattasannissayo icchito, atha kho attano kāyabalasārubbhāvasannissayopi. Thūladukādayo ca tayopi cīvare labbhanti. Majjhimo catupaccayasādhāraṇo, pacchimo pana cīvare, senāsane ca labbhātīti daṭṭhabbaṃ. “**Ime tayo santose**”ti idaṃ sabbasaṅgāhikavasena vuttaṃ. Ye hi parato gilānapaccayaṃ piṇḍapāte eva pakkhipitvā cīvare vīsati, piṇḍapāte pannarasa, senāsane pannarasāti samapaṇṇāsasantosā vuccanti, te sabbepi yathārahaṃ imesu eva tīsu santosesu saṅgahaṃ samosaraṇaṃ gacchantīti.

**Cīvaraṃ jānitabbanti** “idaṃ nāma cīvaraṃ kappiya”nti jātito cīvaraṃ jānitabbam. **Cīvarakkhettanti** cīvarassa uppattikkhettaṃ. **Paṃsukūlanti** paṃsukūlacīvaraṃ, paṃsukūlalakkhaṇappattaṃ cīvaraṃ **jānitabbanti** attho. **Cīvarasantosoti** cīvare labbhamāno sabbo santoso **jānitabbo**. **Cīvarapaṭisaṃyuttāni dhutaṅgāni jānitabbāni**, yāni tosanto cīvarasantosena sammadeva santuṭṭho hotīti. Khomakappāsikakoseyyakambalasāṇabhaṅgāni **khomādīni**. Tattha **khomaṃ** nāma khomasuttehi vāyitaṃ khomapaṭacīvaraṃ, tathā sesānipi. **Sāṇanti** sāṇavākasuttehi katacīvaraṃ. **Bhaṅganti** pana khomasuttādīni sabbāni ekaccāni vomissetvā katacīvaraṃ. “Bhaṅgampi

vākamayamevā”ti keci. **Chāti** gaṇanaparicchedo. Yadi evaṃ ito aññā vatthajāti natthīti? No natthi, sā pana etesaṃ anulomāti dassetuṃ “**dukūlādīni**”tiādi vuttaṃ. **Ādi**-saddena paṭṭuṇṇaṃ, somārapaṭṭaṃ, cīnapaṭṭaṃ, iddhijaṃ, devadinnanti etesaṃ saṅgaho. Tattha **dukūlaṃ** sāṅassa anulomaṃ vākamayattā. Paṭṭuṇṇadese sañjātavattham **paṭṭuṇṇaṃ**. “Paṭṭuṇṇaṃ koseyyaviseso”ti hi amarakose vuttaṃ. Somāradese, cīnadese ca jātavatthāni **somāracīnapaṭṭāni**. **Paṭṭuṇṇādīni** tīṇi koseyyassa anulomāni pāṇakehi katasuttamayattā. **Iddhijaṃ** ehibhikkhūnaṃ puññiddhiyā nibbattaṃ cīvaraṃ, taṃ khomādīnaṃ aññataraṃ hotīti tesameva anulomañca. Devatāhi dinnam cīvaraṃ **devadinnam**, taṃ kapparukkhe nibbattaṃ jāliniyā devakaññāya anuruddhattherassa dinnavatthasadiṣaṃ, tampi khomādīnaṃyeva anulomaṃ hoti tesu aññatarabhāvato. **Imānīti** antogadhāvadhāraṇavacanam, imāni evāti attho. Buddhādīnaṃ paribhogayogyatāya **kappiyacīvarāni**.

Idāni avadhāraṇena nivattitāni ekadesena dassetuṃ “**kusacīra**”ntiādi vuttaṃ. Tattha kusatiṇehi, aññehi vā tādisehi tiṇehi katacīvaraṃ **kusacīraṃ**. Potakīvākādīhi vākehi katacīvaraṃ **vākacīraṃ**. Catukkoṇehi, tikoṇehi vā phalakehi katacīvaraṃ **phalakacīraṃ**. Manussānaṃ kesehi katakambalaṃ **kesakambalaṃ**. Cāmarīvālaassavālādīhi kataṃ **vālakambalaṃ**. Makacitantūhi vāyito **potthako**. **Camanti** miḡacammādi yaṃ kiñci cammaṃ. Ulūkapakkhehi ganthetvā katacīvaraṃ **ulūkapakkhaṃ**. Bhujatacādīmayam **rukkhadussaṃ**, tirīṭakanti attho. Sukhumatarāhi latāvākehi vāyitaṃ **latādussaṃ**. Erakavākehi kataṃ **erakadussaṃ**. Tathā **kadalidussaṃ**. Sukhumehi veḷuvilīvehi kataṃ **veḷudussaṃ**. **Ādi**-saddena vakkalādīnaṃ saṅgaho. **Akappiyacīvarāni** titthiyaddhajābhāvato.

**Aṭṭhannañca mātīkānaṃ vasenāti** “sīmāya deti, katikāya detī”tiādinā (mahāva. 379) āgatānaṃ aṭṭhannaṃ cīvaruppattimātīkānaṃ vasena. Cīvarānaṃ paṭilābhakkhattadassanattañhi bhagavatā “aṭṭhimā, bhikkhave, mātīkā”tiādinā mātīkā ṭhapitā. **Mātīkāti** hi mātaro cīvaruppattijanikāti. **Sosānikanti** susāne patitakaṃ. **Pāpaṇikanti** āpaṇadvāre patitakaṃ. **Rathiyanti** puññatthikehi vātapānantarena rathikāya chaḍḍitacoḷakaṃ. **Saṅkārakūṭakanti** saṅkāraṭṭhāne chaḍḍitacoḷakaṃ. **Sinānanti** nhānacoḷam, yaṃ bhūtavajjehi sīsam nhāpetvā “kāḷakaṇṇicoḷaka”nti chaḍḍetvā gacchanti. **Titthanti** titthacoḷakaṃ sinānatitthe chaḍḍitapilotikā. **Aggidaḍḍhanti** agginā daḍḍhappadesam. Tañhi manussā chaḍḍenti. **Gokhāyitakādīni** pākāṭāneva. Tānipi hi manussā chaḍḍenti.

**Dhajaṃ ussāpetvāti** nāvaṃ ārohantehi vā yuddham pavisantehi vā dhajayaṭṭhiṃ ussāpetvā tattha baddham pārutacīvaraṃ, tehi chaḍḍitanti adhippāyo.

**Sādakabhikkhunāti** gahapaticīvarassa sādiyanabhikkhunā. **Ekamāsamattanti** cīvaramāsasaññitaṃ ekamāsamattaṃ. **Vitakketuṃ vaṭṭati**, na tato paranti adhippāyo. Sabbassāpi hi taṇhāniggahatthāya sāsane paṭipattīti. **Pamsukūliko addhamāseneva karotīti** aparapaṭibaddhattā paṭilābhassa. Itarassa pana parapaṭibaddhattā māsamattaṃ anuññātaṃ. **Iti māsaddha...pe... vitakkasantoso** vitakkanassa parimitakālikattā.

Mahātheraṃ tattha attano sahāyaṃ icchantopi garugāravena gāmadvāraṃ “**bhante gamissāmi**” icceva māha. Mahātheropissa ajjhāsayaṃ ñatvā “**ahaṃ pāvuso gamissāmi**”ti āha. “Imassa bhikkhuno vitakkassa avasaro mā hotū”ti **pañham pucchamāno gāmaṃ pāvīsi**. **Uccārapalibuddhoti** uccārena pīḷito. Tadā bhagavato dukkarakiriyānussaraṇamukhena tathāgate uppannapītisomanassavegassa balavabhāvena kilesānaṃ vikkhambhitattā **tasmimyeva...pe... tīṇi phalāni patto**.

“Kattha labhissāmi”ti cintanāpi lābhāsāpubbikāti tathā “**acintetvā**”ti vuttaṃ, “sundaram labhissāmi, manāpaṃ labhissāmi”ti evamādicintanāya kā nāma kathā. Kathaṃ pana vattabbanti āha “**kammaṭṭhānasīseva gamana**”nti, tena cīvaraṃ paṭicca kiñcipi na cintetabbaṃ evāti dasseti.

Apesalo appatirūpāyapi pariyesanāya paccayo bhavēyyāti “**pesalam bhikkhuṃ gahetvā**”ti vuttaṃ.

**Āhariyamānanti** susānādīsu patitakaṃ vatthaṃ “ime bhikkhū paṃsukūlapariyesanaṃ carantī”ti ñatvā kenaci purisena tato āñīyamānaṃ.

**Evamaṃ laddhaṃ gaṇhantassāpīti** evamaṃ paṭilābhasantosaṃ akopetvāva laddhaṃ gaṇhantassāpī. **Attano pahonakamattenevāti** yathāladdhānaṃ paṃsukūlavatthānaṃ ekapaṭṭadupaṭṭānaṃ atthāya attano pahonakapamañeneva, avadhāraṇena uparipaccāsaṃ nivatteti.

Gāme bhikkhāya āhiṇḍantena sapaḍānacārinā viya dvārapaṭipāṭiyā caraṇaṃ **loluppavivajjanaṃ** nāma cīvaraloluppassa dūrasamussāritatā.

**Yāpetunti** attabhāvaṃ pavattetuṃ.

**Dhovanupagenāti** dhovanayoggena.

**Paṇṇānīti** ambajambādipaṇṇāni.

**Akopetvāti** santosaṃ akopetvā. **Pahonakanihārenevāti** antaravāsakādīsu yaṃ kātukāmo, tassa pahonakaniyameneva yathāladdhaṃ thūlasukhumādiṃ gahetvā **karaṇaṃ**.

**Timaṇḍalapaṭicchādanamattassevāti** “nivāsanaṃ ce nābhimaṇḍalaṃ; jāṇumaṇḍalaṃ, itaraṃ ce galavāṭamaṇḍalaṃ, jāṇumaṇḍala”nti evamaṃ timaṇḍalapaṭicchādanamattasseva **karaṇaṃ**; taṃ pana atthato tiṇṇaṃ cīvarānaṃ heṭṭhimantena vuttaparimāṇameva hoti.

**Avicāretvāti** na vicāretvā.

**Kusibandhanakāleti** maṇḍalāni yojetvā sibbanakāle. **Sattavāreti** sattasibbanavāre.

Kappabinduapadesena kassaci vikārassa akaraṇaṃ **kappasantoso**.

Sītapatiḅhātādi atthāpattito sijjhatīti mukhyameva cīvaraparibhoge payojanaṃ dassetuṃ “**hirikopīnapaṭicchādanamattavasena**”ti vuttaṃ. Tenāha bhagavā “yāvadeva hirikopīnapaṭicchādanattha”nti (ma. ni. 1.23; a. ni. 6.68; mahāni. 162).

**Vaṭṭati**, na tāvatā santoso kuppāti sambhāraṇaṃ, dakkhiṇeyyānaṃca alābhato.

**Sāraṇīyadhamme ṭhatvāti** sīlavantehi bhikkhūhi sādharmaṇato paribhoge ṭhatvā.

“**Iti**”tiādinā paṭhamassa ariyavaṃsassa paṃsukūlikaṅgatecīvarikaṅgānaṃ, tesaṅca tassa paccayatamaṃ dassento iti ime dhammā aññamaññassa samuṭṭhāpakā, upatthambhakā cāti dīpeti. Esa nayo ito paratopi.

“Santuṭṭho hoti vaṇṇavādī”ti ettha catukkoṭikaṃ sambhavati, tattha catutthoyeva pakkho satthārā vaṇṇito thomitoti mahātherena tathā desanā katā. **Eko santuṭṭho hoti, santosassa vaṇṇaṃ na katheti** seyyathāpi thero nālako (suttanipāte nālakasutte vitthāro) **eko na santuṭṭho hoti, santosassa vaṇṇavādī** seyyathāpi upanando sakyaputto (pārā. 515, 527, 532, 537 vākyakhandhesu vitthāro). **Eko neva santuṭṭho hoti, na santosassa vaṇṇaṃ katheti**. Seyyathāpi thero lāḷudāyī (theragā. aṭṭha. 2.udāyittheragāthāvaṇṇanā) **eko santuṭṭho ceva hoti, santosassa ca vaṇṇavādī** seyyathāpi thero mahākassapo.

**Anesananti** ayuttaṃ esanaṃ. Tenāha “**appatirūpa**”nti, sāsane ṭhitānaṃ na patirūpaṃ asārappaṃ

ayogyam. **Kohaṇṇam karontoti** cīvaruppādanimittam paresam kuhanam vimhāpanam karonto. **Uttasatīti** taṇhāsantāsenā uparūpari tasati. **Paritasatīti** parito tasati. Yathā sabbe kāyavacīpayogā tadatthā eva jāyanti, evam sabbabhāgehi tasati. **Gadhitaṃ** vuccati gaddho, so cettha abhijjhālakkhaṇo adhippeto. Gadhitaṃ etassa natthīti **agadhito...pe... lobhagiddho**’ti. **Mucchanti** taṇhāvasena muyhanaṃ, tassa vā samussayaṃ adhigataṃ. **Anāpanno** anupagato. **Anotthatoti** anajjhotthato. **Apariyonaddhoti** taṇhāchadanena acchādito. **Ādīnavam passamānoti** diṭṭhadhammikaṃ, samparāyikaṇca dosaṃ passanto. Gadhitaṃ paribhogato nissarati etenāti **nissaraṇam**, idamatthikatā, taṃ pajānātīti **nissaraṇapaṇṇo**. Tenāha “**yāvadeva...pe... pajānanto**”ti.

**Nevattānukkamsetīti** attānaṃ neva ukkamseti na ukkhipati na ukkaṭṭhato dahati. “**Aha**”ntiādi ukkamśanākāradassanaṃ. **Na vambhetīti** na hīlayati nihīnato na dahati. **Tasmiṃ cīvarasantoseti** tasmiṃ yathāvutte vīsatividhe cīvarasantose. Kāmañcettha vuttappakārasantosaggahaṇena cīvarahetu anesanāpajjanādīpi gahitameva tasmiṃ sati tassa bhāvato, asati ca abhāvato, vaṇṇavādītānattukkamśanā paravambhanāni pana gahitāni na hontīti “**vaṇṇavādītādīsu vā**”ti vikappo vutto. Ettha ca “**dakkho**”tiādi yesam dhammānaṃ vasenassa yathāvuttasantosādi ijjhati, taṃ dassanaṃ. Tattha “**dakkho**”ti iminā tesam samuṭṭhāpanapaṇṇam dasseti, “**anlaso**”ti iminā paggaṇhanavīriyaṃ, “**sampajāno**”ti iminā pāṭihāriyapaṇṇam “**paṭṭisato**”ti iminā tattha asammosavuttiṃ dasseti.

**Piṇḍapāto jānitabboti** pabhedato piṇḍapāto jānitabbo. **Piṇḍapātakkhettanti** piṇḍapātassa uppattiṭṭhānaṃ. **Piṇḍapātasantoso jānitabboti** piṇḍapāte santoso pabhedato jānitabbo. Idha bhesajjampi piṇḍapātagatikameva. Aharitabbato hi sappiādīnampi gahaṇam kataṃ.

**Piṇḍapātakkhettam** piṇḍapātassa uppattiṭṭhānaṃ. Khettam viya **khettam**. Uppajjati ettha, etenāti ca **uppattiṭṭhānaṃ**. Saṅghato vā hi bhikkhuno piṇḍapāto uppajjati uddesādivasena vā. Tattha sakalassa saṅghassa dātabbaṃ bhattaṃ **saṅghabhattaṃ**. Katipaye bhikkhū uddisitvā uddesena dātabbaṃ bhattaṃ **uddesabhattaṃ**. Nimantevā dātabbaṃ bhattaṃ **nimantaṇam**. Salākādānavasena dātabbaṃ bhattaṃ **salākabhattaṃ**. Ekasmiṃ pakkhe ekadivasam dātabbaṃ bhattaṃ **pakkhikaṃ**. Uposathe dātabbaṃ bhattaṃ **uposathikaṃ**. Pāṭipadadivase dātabbaṃ bhattaṃ **pāṭipadikaṃ**. Āgantukānaṃ dātabbaṃ bhattaṃ **āgantukabhattaṃ**. Dhuragehe eva ṭhapetvā dātabbaṃ bhattaṃ **dhurabhattaṃ**. Kuṭiṃ uddissa dātabbaṃ bhattaṃ **kuṭibhattaṃ**. Gāmaṃ vāsīdīhi vārena dātabbaṃ bhattaṃ **vārabhattaṃ**. Vihāraṃ uddissa dātabbaṃ bhattaṃ **vihārabhattaṃ**. Sesāni pākāṭāneva.

**Vitakketi** “kattha nu kho ahaṃ ajja piṇḍāya carissāmi”ti. “Kattha piṇḍāya carissāmā”ti therena vutte “asukagāme bhante”ti kāmametaṃ paṭivacanadānaṃ, yena pana cītena “cintevā”ti vuttaṃ, taṃ sandhāyāha “**ettakaṃ cintevā**”ti. **Tato paṭṭhāyāti** vitakkamālake ṭhatvā vitakkitaḷato paṭṭhāya. “**Tato paraṃ vitakkento ariyavaṃsā cuto hoti**”ti idaṃ tiṇṇampi ariyavaṃsikānaṃ vasena gahetabbam, na ekacārikasseva. Sabbopi hi ariyavaṃsiko ekavārameva vitakketuṃ labhati, na tato paraṃ. **Paribāhīroti** ariyavaṃsikabhāvato bahibhūto. Svāyaṃ vitakkasantoso kammatṭhānamanasikārena na kuppāti, visujjhati ca. Ito paresupi eseva nayo. Tenevāha “**kammatṭhānasīsenā gantabba**”nti.

**Gahetabbamevāti** aṭṭhānappayutto eva-saddo. Yāpanamattameva gahetabbanti yojetabbam.

**Etthāti** etasmiṃ piṇḍapātapāṭiggahaṇe. **Appanti** attano yāpanapamāṇatopi appam. **Gahetabbam** dāyakassa cittārādhanaṭṭham. **Pamāṇenevāti** attano yāpanappamāṇeneva appam **gahetabbam**. “Pamāṇena gahetabba”nti ettha kāraṇam dassetuṃ “**paṭiggahaṇasmiṇhī**”tiādi vuttaṃ. **Makkhetīti** viddhamseti apaneti. **Vinipātetīti** vināseti aṭṭhānaviniyogena. **Sāsananti** satthu sāsanaṃ anusīṭṭhiṃ. **Na karoti** nappaṭipajjati.

Sapadānacārino viya dvārapaṭipāṭiyā caraṇam loluppavivajjanasantosoti āha “**dvārapaṭipāṭiyā gantabba**”nti.



**Harāpetvāti** adhikaṃ apanetvā.

Āhāragedhato nissarati etenāti **nissaraṇaṃ**. Jighacchāya paṭivinodanattaṃ kathā, kāyassaṭṭhitiādiṭṭhayaṃ pana atthāpattito āgataṃ evāti āha “**jighacchāya...pe... santoso nāmā**”ti.

**Nidahitvā na paribhuñjitabbaṃ** tadahupīti adhippāyo. Itarattā pana sikkhāpadeneva vāritaṃ. **Sāraṇiyadhamme ṭhitenāti** sīlavantehi bhikkhūhi sādharmaṇabhogibhāve ṭhitena.

**Senāsana**ṇāti sayanena, āsanena ca. Yattha yattha hi mañcādike, vihārādike ca seti, taṃ **senāṃ**. Yattha yattha pīṭhādike āsati, taṃ **āsanāṃ**. Tadubhayaṃ ekato katvā “senāsana”nti vuttaṃ. Tenāha “**mañco**”tiādi. Tattha **mañco** masārakādi, tathā **pīṭhaṃ**. Mañcabhisi, pīṭhabhisiṭi duvidhā **bhisi**. **Vihāro** pākāraparicchinno sakalo āvāso. “Dīghamukhapāsādo”ti keci. **Aḍḍhayogoti** dīghapāsādo. “Ekapassacchadanakasenāsana”nti keci. **Pāsādoti** caturassapāsādo. “Āyatacaturassapāsādo”ti keci. **Hammiyaṃ** muṇḍacchadanapāsādo. **Guhāti** kevalā pabbataguhā. **Leṇaṃ** dvārabandhaṃ. **Aṭṭo** bahalabhittikaṃ gehaṃ, yassa gopānasiyo aggahetvā iṭṭhakāhi eva chadanaṃ hoti. “Aṭṭalakākārena kariyatī”tipi vadanti. **Mālo** ekakūṭasaṅgahito anekakoṇo patissayaviseso “vaṭṭākārena katasenāsana”nti keci.

**Piṇḍapāte vuttanayenevāti** “sādako bhikkhu ‘ajja kattha vasissāmī’ti vitakketī”tiādinā yathārahaṃ piṇḍapāte vuttanayena **veditabbā**, “tato paraṃ vitakkento ariyavaṃsā cuto hoti paribāhiro”ti, “senāsanaṃ gavesantenāpi’kuhiṃ labhissāmī”ti acintevā kammaṭṭhānasīseneva gantabba”nti ca evamādi sabbāṃ purimanayeneva.

Kasmā panettha paccayasantaṃ dassentena mahātherena gilānapaccayasantaṃ na gahitoti? Na kho panetaṃ evaṃ daṭṭhabbanti dassento “**gilānapaccayo pana piṇḍapāte eva pavitṭho**”ti āha, āharitabbatāsamaññenāti adhippāyo. Yadi evaṃ tattha piṇḍapāte viya vitakkasantaṃsādayopi pannarasa santosā icchitabbāti? Noti dassento āha “**tattā**”tiādi. Nanu cettha dvādaseva dhutaṅgāni viniyogaṃ gatāni, ekaṃ pana nesajjikaṅgaṃ na katthaci viniyuttanti āha “**nesajjikaṅgaṃ bhāvanārāmaariyavaṃsaṃ bhajatī**”ti. Ayañca attho aṭṭhakathāruḷho evāti dassento “**vuttampi ceta**”ntiādimāha.

“**Pathaviṃ pattharamāno viyā**”tiādi ariyavaṃsadesanāya sudukkarabhāvadassanaṃ mahāvisayatāya tassā desanāya. Yasmā nayasahassapaṭimaṇḍitā hoti ariyamaggādhigamāya vitthārato pavattiyamānā desanā yathā taṃ cittuppādakaṇḍe, ayañca bhāvanārāmaariyavaṃsakathā ariyamaggādhigamāya vitthārato pavattiyamānā evaṃ hotīti vuttaṃ “**sahassanayappaṭimaṇḍitaṃ... pe... desanaṃ ārabhi**”ti. Paṭipakkhavidhamanato abhimukhabhāvena ramaṇaṃ **āramaṇaṃ āramoti** āha “**abhiratīti attho**”ti. Byadhikaraṇānampi padānaṃ vasena bhavati bāhiratthasamāso yathā “urasilomo, kaṇṭhekāloti āha “**pahāne ārāmo assāti pahānārāmo**”ti. Āramitabbaṭṭhena vā **ārāmo**, pahānaṃ ārāmo assāti **pahānārāmoti** evamettha samāsayaṇā veditabbā. “**Pajahanto ramatī**”ti etena pahānārāmasaddānaṃ kattusādhanataṃ, kammadhārayasamāsañca dasseti. “Bhāvento ramatī”ti vuttattā **bhāvanārāmoti** etthāpi eseva nayo.

Kāmaṃ “nesajjikaṅgaṃ bhāvanārāmaariyavaṃsaṃ bhajatī”ti vuttaṃ bhāvanānuyogassa anucchavikattā, nesajjikaṅgavasena pana nesajjikassa bhikkhuno ekaccāhi āpattīhi anāpattibhāvoti tampi saṅgaṇhanto “terasannaṃ dhutaṅgāna”nti vatvā “vinayaṃ patvā garuke ṭhātabba”nti icchitattā sallekhasa apariccajanavasena paṭipatti nāma vinaye ṭhitassevāti āha “**terasannaṃ...pe... kathitaṃ hoti**”ti. Kāmaṃ suttabhidhammapīṭakesupi (dī. ni. 1.7.194; vibha. 508) tattha tattha sīlakathā āgatā eva, yehi pana guṇehi sīlassa vodānaṃ hoti, tesu kathitesu yathā sīlakathābhāhullaṃ vinayapīṭakaṃ kathitaṃ hoti, evaṃ bhāvanākathābhāhullaṃ suttantapīṭakaṃ, abhidhammapīṭakañca catutthena ariyavaṃsena kathitameva hotīti vuttaṃ “**bhāvanārāmena avasesaṃ piṭakadvayaṃ kathitaṃ hoti**”ti. “So nekkhammaṃ bhāvento ramatī”ti nekkhammapadaṃ ādiṃ katvā tattha desanāya pavattattā, sabbesampi

vā samathavipassanāmaggadhammānaṃ yathāsakaṃpaṭipakkhato nikkhamanena nekkhammasaññitānaṃ tattha āgatattā so pāṭho “**nekkhammapāḷi**”ti vuccatīti āha “**nekkhammapāḷiyā kathetabbo**”ti. Tenāha aṭṭhakathāyaṃ “sabbepi kusalā dhammā nekkhammanti pavuccare”ti (itivu. aṭṭha. 109). **Dasuttarasuttanta pariyāyenāti** dasuttarasuttantadhammena, dasuttarasuttante (dī. ni. 3.350) āgatanāyenāti vā attho. Sesadvayepi eseva nayo.

Soti jāgariyaṃ anuyutto bhikkhu. **Nekkhammanti** kāmehi nikkhantabhāvato nekkhammasaññitānaṃ paṭhamajjhānūpacāraṃ. “So abhijjhaṃ loke pahāyā”tiādīnā (vibha. 508, 538) āgatā paṭhamajjhānassa pubbhāgabhāvanāti idhādhippetā, tasmā “**abyāpāda**”ntiādīsūpi evameva attho veditabbo. Yaṃ panettha vattabbaṃ, taṃ **brahmajālaṭṭikāyaṃ** vuttanāyena veditabbaṃ. Saupāyāsānañhi aṭṭhannaṃ samāpattīnaṃ, aṭṭhārasannaṃ mahāvīpassanānaṃ, catunnaṃ ariyamaggānaṃca vasenettha desanā pavattāti.

“**Ekaṃ dhammaṃ bhāvento ramati, ekaṃ dhammaṃ pajahanto ramati**”ti ca na idaṃ dasuttarasutte āgatanīyāmena vuttaṃ, tattha pana “eko dhammo bhāvetabbo, eko dhammo pahātabbo”ti (dī. ni. 3.351) ca desanā āgatā. Evaṃ santepi yasmā atthato bhedo natthi, tasmā paṭisambhidāmagge nekkhammapāḷiyaṃ (paṭi. ma. 1.24, 3.41) āgatanīhāreneva “ekaṃ dhammaṃ bhāvento ramati, ekaṃ dhammaṃ pajahanto ramati”ti vuttaṃ. Esa nayo sesavāresupī. Yasmā cāyaṃ ariyavamsadesanā nāma satthu paññattāva sathhārā hi desitaṃ desanaṃ āyasmā dhammasenāpati sārīputtatthero saṅgāyanavasena idhānesi, tasmā mahāriyavamsasutte saththudesanānīhārena nigamaṇaṃ dassento “**evaṃ kho, bhikkhave, bhikkhu bhāvanārāmo hotī**”ti āha. Eseva nayo ito paresu **satipaṭṭhānapariyāyaabhidhammaniddesapariyāyesupī**. Kāmañcettha kāyānupassanāvaseneva saṅkhipitvā yojanā katā, ekavīsatiyā pana ṭhānānaṃ vasena vitthārato yojanā veditabbā. “**Aniccato**” (visuddhi. ṭī. 2.698) tiādīsū yaṃ vattabbaṃ, taṃ **visuddhimaggasaṃvaṇṇanāsu** vuttanāyena veditabbaṃ.

**310.** Saṃvarādīnaṃ sādhanavasena padahati ettha, etehīti ca **padhānāni. Uttamavīriyānīti** seṭṭhavīriyāni viṣiṭṭhassa atthassa sādhanato. **Saṃvarantassa uppannavīriyanti** yathā abhijjhādayo na uppajjanti, evaṃ satiyā upaṭṭhāpane cakkhādīnaṃ pidahane analasassa uppannavīriyaṃ. **Pajahantassāti** vinodentassa. **Uppannavīriyanti** tasseva pajahanassa sādhanavasena pavattavīriyaṃ. **Bhāventassa uppannavīriyanti** etthāpi eseva nayo. **Samādhinimittanti** samādhi eva. Purimuppannasamādhi hi parato uppajjanakasamādhivivekassa kāraṇaṃ hotīti “samādhinimitta”nti vuttaṃ.

**Upadhivivekattāti** khandhūpadhiādiupadhīhi vivittattā vinissaṭattā. **Taṃ āgammāti** taṃ nibbānaṃ maggena adhigamahetu. Rāgādayo virajjanti ettha, etenāti vā **virāgo**. Evaṃ **nirodhopi** daṭṭhabbo. Yasmā idha bojjhaṅgā missakavasena icchitā, tasmā “**ārammaṇavasena adhigantabbavasena vā**”ti vuttaṃ. Tattha **adhigantabbavasenāti** taṃninnatāvasena. **Vossaggapariṇāmiti** vossajjanavasena pariṇāmitaṃ pariccajanavasena ceva pakkhandanavasena ca pariṇamanasīlaṃ. Tenāha “**dve vossaggā**”tiādi. **Khandhānaṃ pariccajanaṃ** nāma tappaṭibaddhakilesappahānavasenāti yenākārena vipassanā kilese pajahati, tenevākārena taṃnimittake, khandhe ca “pajahatī”ti vattabbaṃ arahatīti āha “**vipassanā...pe... pariccajati**”ti. Yasmā vipassanā vuṭṭhānagāminibhāvaṃ pāpuṇantī ninnapoṇapabbhārabhāvena ekaṃsato nibbānaṃ “pakkhandatī”ti vattabbaṃ labhati, maggo ca samucchadavasena kilese, khandhe ca pariccajati, tasmā yathākkamaṃ vipassanāmaggānaṃ vasena pakkhandanapariccāgavossaggāpi veditabbā. **Vossaggaṭṭhāyāti** pariccāgavossaggaṭṭhāya ceva pakkhandanavossaggaṭṭhāya ca. **Pariṇamatīti** paripaccati. Taṃ **pariṇamaṇaṃ** vuṭṭhānagāminibhāvappattiyā ceva ariyamaggabhāvappattiyā ca icchitanti āha “**vipassanābhāvañceva maggabhāvañca pāpuṇatī**”ti. **Sesapadesūti** “dhammavicayasambojjhaṅgaṃ bhāvetī”tiādīsū sesasambojjhaṅgakoṭṭhāsesu.

**Bhaddakanti** abhaddakānaṃ nīvaraṇādīpāpadhammānaṃ vikkhambhanena rāgavidhamanena ekantahitattā, dullabhattā ca bhaddakaṃ sundaraṃ. Na hi aññaṃ samādhinimittaṃ evaṃdullabhaṃ,

rāgassa ca ujuvipaccanīkabhūtaṃ atthi. **Anurakkhatīti** ettha **anurakkhanā** nāma adhigatasamādhito yathā na parihāni hoti, evaṃ paṭipatti, sā pana tappaṭipakkhavidhamanenāti āha “**samādhī**”tiādi. **Aṭṭhikasaññādīkā**ti aṭṭhikajjhānādīkā. Saññāsīsena hi jhānaṃ vadati.

**Ekapaṭivedhasena catusaccadhamme ñāṇanti** catūsu ariyasaccesu ekābhisamayavasena pavattañāṇaṃ, maggañāṇanti attho. Catusaccantogadhattā **catusaccabbhantare nirodhadhamme** nibbāne **ñāṇaṃ**, tena phalañāṇaṃ vadati. Yasmā maggānantarassa phalassa maggānugunā pavatti, yato taṃsamudayaṃpakkiyeyu dhammesu paṭippassaddhippahanavasena pavattati, tasmā nirodhasaccepi yo maggassa sacchikiriyābhisamayo, tadanugunā pavattīti phalañāṇasseva dhamme ñāṇatā vuttā, na yassa kassaci nibbānārammaṇassa ñāṇassa. Tena vuttaṃ “**yathāhā**”tiādi. Ettha ca maggapaññā tāva catusaccadhammassa paṭivijjhanato dhammeñāṇaṃ nāma hotu, phalapaññā pana kathanti codanā sodhitā hoti nirodhadhammaṃ ārabba pavattanato. Duvidhāpi hi paññā aparappaccayatāya attapaccakkhato ariyasaccadhamme kiccatō ca ārammaṇato ca pavattattā “dhammeñāṇa”nti vedītabbā. Ariyasaccesu hi ayaṃ dhamma-saddo tesam aviparītasabhāvattā, saṅkhatappavaro vā ariyamaggo, tassa ca phaladhammo. Tattha paññā taṃsahagatā dhammeñāṇaṃ.

**Anvayeñāṇanti** anugamanañāṇaṃ. **Paccakkhato disvā**ti cattāri saccāni maggañāṇena paccakkhato paṭivijjhitvā. **Yathā idānīti** yathā etarahi pañcupādānakkhandhā dukkhasaccaṃ, **evaṃ atītepi anāgatepi pañcupādānakkhandhā dukkhasaccamevā**ti ca sarikkhaṭṭhena vuttaṃ. Esa nayo **samudayasacce, maggasacce ca. Ayamevā**ti avadhāraṇe. Nirodhasacce pana sarikkhaṭṭho natthi tassa niccattā, ekasabhāvattā ca. **Evaṃ tassa ñāṇassa anugatiyaṃ ñāṇanti** tassa dhammeñāṇassa “evaṃ atītepi”tiādinā anugatiyaṃ anugamane anvaye ñāṇaṃ. Idaṃ anvaye ñāṇanti yojanā. “**Tenāhā**”tiādinā yathāvuttamatthaṃ pālīyā vibhāveti. **Soti** dhammañāṇaṃ patvā ṭhito bhikkhu. **Iminā dhammenā**ti dhammagocarattā gocaravohārena “dhammo”ti vuttenamaggañāṇena, upayogathe vā karaṇavacanā, **iminā dhammena ñāṇenā**ti imaṃ catusaccadhammaṃ ñāṇena jānitvā ṭhiteṇa maggañāṇenāti attho. **Diṭṭhenā**ti dassanena saccadhammaṃ passitvā ṭhiteṇa. **Pattenā**ti saccānaṃ patvā ṭhiteṇa. **Viditenā**ti saccāni viditvā ṭhiteṇa. **Pariyogā**lhenāti catusaccadhammaṃ pariyogāhetvā ṭhiteṇāti evaṃ tāvettha abhidhammaṭṭhakathāyaṃ (vibha. aṭṭha. 796) attho vutto. Duvidhampi pana maggaphalañāṇaṃ dhammeñāṇaṃ. Paccavekkhaṇāya ca mūlaṃ, kāraṇaṇca nayanayanassāti duvidhenāpi tena dhammenāti na na yujjati. Tathā catusaccadhammassa ñātattā, maggaphalasaṅkhātassa vā dhammassa saccapaṭivedhasampayogaṃ gatattā nayanayanaṃ hotīti tena iminā dhammena ñāṇavisayabhāvena, ñāṇasampayogena vā ñāṇenāti ca attho na na yujjati. **Atītānāgate nayaṃ netī**ti atīte, anāgate ca nayaṃ neti harati peseti. Idaṃ pana na maggañāṇassa kiccaṃ, paccavekkhaṇañāṇakiccaṃ, satthārā pana maggañāṇaṃ atītānāgate nayanayanasadisaṃ kataṃ maggamūlakattā. Bhāvitamaggassa hi paccavekkhaṇā nāma hoti. Nayidaṃ aññaṃ ñāṇuppādanaṃ nayanayanaṃ, ñāṇasseva pana pavattivisesoti.

Pasesaṃ cetaso parito ayaṃ paricchindanaṃ pariyo, tasmim **pariye**. Tenāha “**pasesaṃ cittaparichede**”ti. **Avasesaṃ sammutimhiñāṇaṃ nāma** “ñāṇa”nti sammatattā. Vacanatthato pana sammutimhi ñāṇanti **sammutimhiñāṇaṃ**. Dhammeñāṇādīnaṃ viya hi sātisayassa paṭivedhakiccassa abhāvā visayobhāsanasaṅkhātājānanasāmaññena “ñāṇa”nti sammatesu antogadhanti attho. Sammutivasena vā pavattaṃ **sammutimhiñāṇaṃ** sammutidvārena atthassa gahaṇato. **Avasesaṃ** vā itarañāṇattayavisabhāgaṃ ñāṇaṃ tabbisabhāgasāmaññena sammutimhiñāṇamhi pavīṭṭhattā **sammutimhiñāṇaṃ nāma** hotīti.

Kāmaṃ sotāpattimaggañāṇādīni dukkhañāṇādīniyeva, ukkaṭṭhaniddesena panevamāha “**arahattaṃ pāpetvā**”ti. Vaṭṭato niggacchati etenāti **niggamaṇaṃ**, catusaccakammaṭṭhānaṃ. Purimāni **dve saccāni vaṭṭaṃ** pavattipavattihetubhāvato. Itarāni pana **dve vivaṭṭaṃ** nivattinivattihetubhāvato. **Abhinivesoti** vipassanābhiniveso **hoti** lokiyassa ñāṇassa visabhāgūpagamaṇato. **No vivaṭṭeti** vivaṭṭe abhiniveso no hoti avisayabhāvato. **Pariyattīti** kammaṭṭhānatanti. **Uggahetvā**ti vācuggataṃ katvā. **Uggahetvā**ti vā pālīto, atthato ca yathārahaṃ savanadhāraṇaparipucchanamanasānupekkhanādivasena

cittena uddham uddham gaṇhitvā. **Kammaṃ karotīti** nāmarūpapariggahādikkamena yogakammaṃ karoti.

Yadi purimesu dvīsu eva vipassanābhiniveso, tesu eva uggahādi, kathamidaṃ catusaccakammaṭṭhānaṃ jātanti āha “**dvīsu**”tiādi. Kāmaṃ pacchimānīpi dve saccāni abhiññeyyāni, pariññeyyatā pana tattha natthīti na vipassanābyāpāro. Kevalaṃ pana anussavamatte thatvā accantapaṇītabhāvato **iṭṭhaṃ**, ātappakanirāmisapītisañjananato **kantaṃ**, uparūpari abhirucijananena manassa vaḍḍhanato **manāpanti** manasikāraṃ pavatteti. Tenāha “**nirodhasaccaṃ nāma**”tiādi. **Dvīsu saccesūti** dvīsu saccesu visayabhūtesu, tāni ca uddissa asammoḥapaṭivedhavasena pavattamāno hi maggo te uddissa pavatto nāma hotīti. **Tīni** dukkhasamudayamaggasaccāni. **Kiccavasenāti** asammuyhanavasena. **Ekanti** nirodhasaccaṃ. **Ārammaṇavasenāti** ārammaṇakaraṇavasena api asammuyhanakiccavasena tattha paṭivedho labbhateva. **Dve saccānīti** dukkhasamudayasaccāni. **Duddasattāti** daṭṭhaṃ asakkuṇeyyattā. Oḷārikā hi dukkhasamudayā, tiracchānagatānampi dukkhaṃ, āhārādīsu ca abhilāso pākaṭo. Piḷanādiāyūhanādivasena pi “idaṃ dukkhaṃ, idaṃ assa kāraṇa”nti yāthāvato ñāṇena ogāhituṃ asakkuṇeyyattā tāni **gambhīrāni**. **Dveti** nirodhamaggasaccāni. Tāni saṅhasukhumabhāvato sabhāveneva gambhīratāya yāthāvato ñāṇena durogāhattā “**duddasāni**”ti.

### Sotāpattiyaṅgādicatukkavaṇṇanā

**311. Soto** nāma ariyasoto purimapaḍalopena, tassa ādito sabbapaṭhamam pajjanaṃ **sotāpatti**, paṭhamamaggapaṭilābho. Tassa aṅgāni adhigamūpāyabhūtāni kāraṇāni **sotāpattiyaṅgāni**. Tenāha “**sotā...pe... attho**”ti. Santakāyakammāditāya santadhammasamannāgamato, santadhammapavedanato ca santo purisāti **sappurisā**. Tattha yesaṃ vasena catusaccasampaṭivedhāvahaṃ saddhammassavanaṃ labbhati, te eva dassento “**buddhādīnaṃ sappurisāna**”nti āha. Santo satam vā dhammoti **saddhammo**. So hi yathānusiṭṭhaṃ paṭipajjamāne apāyadukkhe, saṃsāradukkhe ca apatante dhāretīti evamādi guṇātisayayogavasena **santo** saṃvijjāmāno, pasattho, sundaro vā dhammo, satam vā ariyānaṃ dhammo, tesam vā tabbhāvasādhako dhammoti **saddhammo**, “idha bhikkhu dhammaṃ pariyaṇuṇṇāti”tiādinā (a. ni. 5.73) vuttā pariyatti. Sā pana mahāvisayatāya na sabbā sabbassa visesāvahāti tassa tassa anuchavikameva dassento āha “**sappāyassa tepiṭakadhammassa savana**”nti. **Yonisomanasikāro** heṭṭhā vutto eva. **Pubbabhāgapaṭipattiyaṅgi** vipassanānuyogassa.

**Aveccappasādenāti** saccasampaṭivedhavasena buddhādīnaṃ guṇe ñatvā uppannappasādena, so pana pasādo devādīsu kenacipi akampiyatāya niccaloti āha “**acalappasādenā**”ti. **Ettāti** etasmiṃ catukkattaye āhāracatukke. **Lūkhapaṇītavatthuvasenāti** odanakummāsādikassa lūkhassa ceva paṇītassa ca vatthuno vasena. Sā paṇāyaṃ āhārassa oḷārikasukhumatā “kumbhilānaṃ āhāraṃ upādāya morānaṃ āhāro sukhumo”tiādinā (saṃ. ni. aṭṭha. 2.2.11) aṭṭhakathāyaṃ vitthārato āgatā eva.

**Ārammaṇaṭṭhitivasenāti** ārammaṇasaṅkhātassa pavattipaccayaṭṭhānassa vasena. Tiṭṭhati etthāti **ṭṭhiti**, ārammaṇameva ṭṭhiti **ārammaṇaṭṭhiti**. Tenevāha “rūpārammaṇa”ntiādi. **Ārammaṇattho** cettha upatthambhanattho veditabbo, na visayalakkhaṇova. Upatthambhanabhūtaṃ rūpaṃ upetīti rūpūpāyaṃ. Tenāha “**rūpaṃ upagataṃ hutvā**”tiādi. **Rūpakkhandhaṃ nissāya tiṭṭhati** tena vinā appavattanato. **Tanti** rūpakkhandhaṃ nissāya ṭṭhānappavattanaṃ. **Etanti** “rūpūpāya”nti etaṃ vacanaṃ. Rūpakkhandho gocaro pavattiṭṭhānaṃ paccayo etassāti **rūpakkhandhagocaraṃ** rūpaṃ saḥakārīkāraṇabhāvena paṭiṭṭhā etassāti **rūpappatiṭṭhaṃ**. Iti tīhi padehi abhisāṅkhāraviññānaṃ paṭi rūpakkhandhassa saḥakārīkāraṇabhāvoyevettha vutto. Upasittaṃ viya **upasittaṃ**, yathā byañjanehi upasittaṃ sinehitaṃ odanaṃ rucitaṃ, pariṇāmayogyāṅca, evaṃ nandiyā upasittaṃ sinehitaṃ kammaviññānaṃ abhirucitaṃ hutvā vipākayogyāṃ hotīti. **Itaranti** dosasahagatādiakusalaṃ, kusalaṅca **upanissayakoṭiyā** upasittaṃ hutvāti yojanā. **Evaṃ pavattamānanti** evaṃ rūpūpāyanti desanābhāvena pavattamānaṃ. Vipākadhammatāya **vuddhiṃ...pe... āpajjati**. Tatthāpi nipariyāyaphalanibbattanasena **vuddhiṃ**, pariyaṇuṇṇāyaphalanibbattanasena **viruḷhiṃ**, nissandaphalanibbattanasena **vepullaṃ**. Diṭṭhadhammavedanīyaphalanibbattanasena vā **vuddhiṃ**, upapajjavedanīyaphalanibbattanasena

**viruḷhim**, aparāpariyāyaphalanibbattanavasena **vepullaṃ āpajjati**ti yojanā. Ekantato vedanupāyādivasena patti nāma arūpabhava yevāti āha “**imehi panā**”tiādi. Evañca katvā pāliyaṃ kataṃ **vā-saddaggaṇaṇca samatthitaṃ** hoti. “Rūpūpāya”ntiādinā yathā abhisāṅkhāravīññāssa upanissayabhūtā rūpādayo gayhanti, evaṃ tena nibbattetabbāpi te gayhanti adhippāyena “**catukkavasena...pe... na vutta**”nti āha. Vipākopi hi dhammo vipākadhammaviññāṇaṃ upagataṃ nāma hoti tathā nandiyā upasittatā. Tenāha “nandūpasecana”nti. **Vitthāritāneva** siṅgālasutte.

Bhavati etena ārogyanti **bhavo**, gilānapaccayo. Parivuddho bhavo **abhavo**. Vuddhiattho hi ayaṃ akāro yathā “saṃvarāsaṃvaro, (pārā. paṭhamamahāsaṅgītikathā; dī. ni. aṭṭha. 1.paṭhamamahāsaṅgītikathāvaṇṇanā; dha. sa. aṭṭha. nidānakathā) phalāphalaṃ”ti ca. **Telamadhuphāṇitādīnīti ādi-saddena sappinavanītānaṃ gahaṇaṃ, telādīnaṃ gahaṇaṇcetta** nidassanamattaṃ. Sabbasāpi gilānapaccayassa saṅgaho daṭṭhabbo. Atha vā **bhavābhavoti** khuddako ceva mahanto ca upapattibhavo vedītabbo. Evañca satī “imesaṃ panā”tiādivacanāṃ samatthitaṃ hoti. Bhavūpapattipahānattho hi visesato catutthaariyavaṃso. **Taṇhuppādānanti taṇhuppattīnaṃ, cīvarādīhetu uppajjanakataṇhānanti attho. Padhānakaraṇakāleti bhāvanānuyogakkhaṇe. Sītādīni na khamatīti** bhāvanāya pubbhāgākālaṃ sandhāya vuttaṃ. **Khamatīti** sahati abhibhavati. **Vitakkasamananti** nidassanamattaṃ. Sabbesampi kilesānaṃ samanavasena pavattā paṭipadā.

Samādhihānādibhedo dhammo pajjati paṭipajjīyati etenāti **dhammapadaṃ**. Anabhihāva dhammapadaṃ **anabhihādhāmapadaṃ**. Ayaṃ tāva alobhappakkhe nayo, itarappakkhe pana anabhihāpadhāno dhammakotthāso **anabhihādhāmapadaṃ**. **Akopoti** adoso, mettāti attho. **Suppaṭṭhitasatīti** kāyādīsu sammadeva upaṭṭhitā satī. **Satisisenāti** satīpadhānamukhena. Samādhipadhānatā jhānānaṃ “**samāpatti vā**”ti vuttaṃ. Kāmaṃ saviññāṇakaasubhepi jhānabhāvanā alobhappadhānā hoti kāyassa jigucchana, paṭikkūlakāraggahaṇavasena ca pavattanato, sattavidhauggahakosallādivasena panassā pavatti satīpadhānāti tatiyadhammapadeneva naṃ saṅgaṇhitukāmo “**dasa asubhavasena vā**”ti āha. Hitūpasamhārādivasena pavattanato brahmavīhārabhāvanā byāpādavirodhinī abyāpādappadhānāti āha “**catubrahma...pe... dhammapada**”nti. Tattha adhigatāni jhānādīnīti yojanā. Gamanādito āhārassa paṭikkūlabhāvasallakkaṇaṃ saññāya thirabhāveneva hoti tassā thirasaññāpadaṭṭhānattāti āhāre paṭikkūlasaññāpi tatiyadhammapade eva saṅgahaṃ gatā. Āruppasamādhiabhiññānaṃ adhiṭṭhānabhāvato kaṣiṇabhāvanā, sattavidhabojjhaṅgavijjāvīmuttipāripūrihetuto ānāpānesu paṭhamaānāpānabhāvanā visesato samādhipadhānāti sā catutthadhammapadena saṅgahitā. Catudhātuvavatthānavasena adhigatāni pi ettheva saṅgahetabbāni siyumaṃ, paññāpadhānatāya pana na saṅgahitāni.

**Dhammasamādānesu paṭhamaṃ acelakapaṭipadā** etarahi ca dukkhabhāvato, anāgatepi apāyadukkhavaṭṭadukkhāvahato. **Acelakapaṭipadāti** ca nidassanamattaṃ daṭṭhabbaṃ channaparibbājānaṃ pi ubhayadukkhāvahapaṭipattidassanato. **Dutiyamaṃ...pe... brahmacariyacaraṇaṃ** etarahi satīpi dukkhe āyatīṃ sukhāvahattā. **Kāmesu pātabyatā** yathākāmaṃ kāmaparibhogo. **Alabhamānassāpīti pi-saddena** ko pana vādo labhamānassāti dasseti.

Dussīlyādīpāpadhammānaṃ khambhanaṃ paṭibandhanaṃ **khandhaṭṭho**, so pana sīlādī evāti āha “**guṇaṭṭho khandhaṭṭho**”ti. Guṇavisayatāya **khandha-saddassa** guṇatthatā vedītabbā. **Vimuttikkhandhoti** paṭipakkhato suṭṭhu vimuttā guṇadhammā adhippetā, na avimuttā, nāpi vimuccamānāti tehi saha desanaṃ āruḷhā sīlakkhandhādayopi tayoti āha “**phalasīlaṃ adhippetamaṃ, catūsūpi thānesu phalameva vutta**”nti ca. Eteneva cettha **vimuttikkhandhoti** phalapariyāpanā sammāsaṅkappavāyāmasatiyo adhippetāti vedītabbaṃ.

**Upatthambhanaṭṭhena** sampayuttadhammānaṃ tattha thirabhāvena pavattanato, eteneva ahirikaanottappānaṃ pi savisaye balaṭṭho siddho vedītabbo. Na hi tesamaṃ paṭipakkhehi akampiyatṭho ekantiko. Hirottappānañhi akampiyatṭho sātīsayo kusaladhammānaṃ mahābalabhāvato, akusalānañca dubbalabhāvato. Tenāha bhagavā “abalā naṃ balīyanti, maddante naṃ parissayā”ti (su. ni. 776;

mahāni. 5; netti. paṭiniddesavāre 5) bodhipakkhiyadhammavasenāyaṃ desanāti “**samathavipassanāmaggasenā**”ti vuttam.

**Adhīti** upasaggamattaṃ, na “adhicitta”ntiādīsu (dha. pa. 185) viya adhikārādiatthaṃ. Karaṇādhikaraṇabhāvasādhanavasena adhiṭṭhāna-saddassa atthaṃ dassento “**tena vā**”tiādimāha. **Tena** adhiṭṭhānena **tiṭṭhanti** attano sammāpaṭipattiyāṃ guṇādhikā purisā, te eva **tattha** adhiṭṭhāne **tiṭṭhanti** sammāpattiyā, **ṭhānameva** adhiṭṭhānameva sammāpaṭipattiyanti yojanā. **Paṭhamena** adhiṭṭhānena. **Aggaphalapaññāti** ukkaṭṭhaniddesoyāṃ. **Kilesūpasamoti** kilesānaṃ accantavūpasamo. Paṭhamena nayena adhiṭṭhānāni ekadesatova gahitāni, na nippadesatoti nippadesatova tāni dassetuṃ “**paṭhamena cā**”tiādi vuttam. “**Ādiṃ katvā**”ti etena jhānābhīṇṇāpaññañceva maggapaññañca saṅgaṇhāti. **Vacīsaccam ādiṃ katvāti ādi**-saddena viratisaccam saṅgaṇhāti. Tatiyena **ādi**-saddena kilesānaṃ vītikkamapariccāgaṃ, pariyaṭṭhānapariccāgaṃ, heṭṭhimamaggehi anusayapariccāgañca saṅgaṇhāti. “**Vikkhambhite kilese**”ti etena samāpattīhi kilesānaṃ vikkhambhanavasena vūpasamaṃ vatvā **ādi**-saddena heṭṭhimamaggehi kātabbaṃ tesam samucchadavasena vūpasamaṃ saṅgaṇhāti. **Arahattaphalapaññā kathitā** ukkaṭṭhaniddesatova, aññathā vacīsaccādīnampi gahaṇaṃ siyā. Nibbānañca asammosadhammatāya uttamaṭṭhena **saccam**, sabbasaṃkilesapariccāganimittatāya **cāgo**, sabbasaṅkhārūpasamabhāvato **upasamoti** ca visesato vattabbaṃ arahatīti therassa adhippāyo. Pakatṭhajānanaphalatāya **paññā**, anavesato kilesānañcajante ca vūpasante ca uppannattā **cāgo**, **upasamoti** ca visesato aggaphalaññaṃ vuccatīti thero āha “**sesehi arahattaphalapaññā kathitā**”ti.

### Pañhabyākaraṇādicatukkavaṇṇanā

**312. Kālakanti** malīnaṃ, cittassa apabhassarabhāvakaraṇanti attho. Taṃ panettha kammaphappattameva adhippetanti āha “**dasaakusalakammaphakamma**”nti. Kaṇhābhijātihetuto vā **kaṇham**. Tenāha “kaṇhavipāka”nti. Apāyūpatti, manussesu ca dobhaggiyaṃ **kaṇhavipāko**. Ayaṃ tassa tamabhāvo vutto. **Nibbattanatoti** nibbattāpanato. **Paṇḍaranti** odātaṃ, cittassa pabhassarabhāvakaraṇanti attho. Sukkābhijātihetuto vā **sukkam**. Tenāha “sukkavipāka”nti. Saggūpapatti, manussesu sobhaggiyañca **sukkavipāko**. Ayaṃ tassa jotibhāvo vutto. Ukkaṭṭhaniddesena pana “**sagge nibbattanato**”ti vuttam, nibbattāpanatoti attho. **Missakakammanti** kālena kaṇham, kālena sukkanti evaṃ missakavasena katakammaṃ. “**Sukhadukkhavipāka**”nti vatvā tattha sukhadukkhānaṃ pavattiākāraṃ dassetuṃ “**missakakammañhī**”tiādi vuttam. Kammassa kaṇhasukkasamaññā kaṇhasukkābhijātihetutāyāti apacayagāmitāya tadubhayaviddhamśakassa kammakkhayakarakammassa idha sukkapariyāyopi na icchitoti āha “**ubhaya...pe... ayamettha attho**”ti. Tattha **ubhayavipākassāti** yathādhigatassa ubhayavipākassa. Sampattibhavapariyāpanno hi vipāko idha “sukkavipāko”ti adhippeto, na accantaparissuddho ariyaphalavipāko.

Pubbenivāso sattānaṃ cutūpapāto ca **paccakkhakarāṇena sacchikātabbā**; itare **paṭilābhena** asammoḥapaṭivedhavasena **paccakkhakarāṇena** ca **sacchikātabbā**. Nanu ca paccavekkhaṇāpettha paccakkhato pavattatīti? Saccam paccakkhato pavattatī sarūpadassanato, na pana paccakkhakarāṇavasena pavattatī paccakkhakarīnaṃ piṭṭhivattanato. Tenāha “**kāyenā**”tiādi.

**Ohanantīti** heṭṭhā katvā hananti gamenti. Tathābhūtā ca adho sīdenti nāmāti āha “**osīdāpentī**”ti. Kāmanatṭhena kāmo ca so yathāvuttenatthena ogho cāti, kāmesu oghoti vā **kāmogho**. Bhavogho nāma bhavarāgoti dassetuṃ “**rūpārūpabhavesū**”tiādi vuttam. Tattha paṭhamo upapattibhavesu rāgo, dutiyo kammabhavesu, tatiyo bhavadiṭṭhisahagato. Yathā rañjanatṭhena rāgo, evaṃ ohanatṭhena “ogho”ti vutto.

**Yojentīti** kammaṃ vipākena, bhavādiṃ bhavantarādīhi dukkhe satte yojentī ghaṭṭentīti **yogā**. **Oghā viya veditabbā** atthato kāmāyogādibhāvato.

**Visamyojentīti** paṭipannaṃ puggalaṃ kāmāyogādito viyojentī. Saṃkilesakaraṇaṃ yojanaṃ **yogo**,

ganthikaraṇaṃ (ganthakaraṇaṃ dha. sa. mūlaṭī. 20-25), saṅkhalikacakkalikānaṃ viya paṭibaddhatākaraṇaṃ vā ganthanaṃ gantho, ayaṃ etesaṃ vireso. **Palibundhatī** nissarituṃ appadānavasena na muñceti vibandhati. **Idamevā**ti attano yathāupaṭṭhitāṃ sassatavādādikāṃ vadati. **Saccanti** bhūtaṃ.

Bhusaṃ, daḷhaṅca ārammaṇaṃ ādīyati etehīti **upādānāni**. Yaṃ pana tesāṃ tathāgahaṇaṃ, tampi atthato ādānamevāti āha “**upādānānīti ādānaggahaṇāni**”ti. **Gahaṇaṭṭhenā**ti kāmanavasena daḷhaṃ gahaṇaṭṭhena. Puna **gahaṇaṭṭhenā**ti micchābhiniṅṅānavasena daḷhaṃ gahaṇaṭṭhena. **Iminā**ti iminā sīlavatādīnā. **Suddhī**ti saṃsārasuddhi. **Etenā**ti etena diṭṭhigāhena. “**Attā**”ti paññāpento **vadati ceva** abhinivesanavasena **upādiyati ca**.

Yavanti tāhi sattā amissitāpi samānajātīyā missitā viya hontīti **yonīyo**, tā pana atthato aṇḍādiupattitṭhānavisiṭṭhā khandhānaṃ bhāgaso pavattivisesāti āha “**yoniyoti koṭṭhāsā**”ti. **Sayanasminti** pupphasantharādisayanasmim. Tattha vā te sayitā jāyantīti **sayanaggahaṇaṃ**. Tayidaṃ manussānaṃ, bhummadevānaṅca vasena gahetabbaṃ. Pūtimacchādīsū kimayo nibbattanti. **Upapatitā viyā**ti upapajjasena patitā viya. Bāhirapaccayanirapekkhatāyā vā upapatane sādhuḅkārino **opapātino**, te eva idha “**opapātikā**”ti vuttā. **Devamanussesū**ti ettha ye deve sandhāya devaggahaṇaṃ, te dassento “**bhummadevesū**”ti āha.

Attano satisammosena āhārapayogena maraṇato “**paṭhamo khiddāpadosikavasenā**”ti vuttaṃ. Attano parassa ca manopadosavasena maraṇato “**tatiyo manopadosikavasenā**”ti vuttaṃ. **Neva attasañcetanāya maranti, na parasañcetanāya** kevalaṃ puññakkhayeneva maraṇato, tasmā **catuttho...pe... veditabbo**.

### Dakkhiṇāvisuddhādicatukkavaṇṇanā

**313.** Dānasāṅkhātā **dakkhiṇā**, na deyyadhammasāṅkhātā. **Visujjhanā** mahājutikatā, sā pana mahāphalatāya veditabbāti āha “**mahapphalā hontī**”ti.

**Anariyānanti** asādhūnaṃ. Te pana nihīnācārā hontīti āha “**lāmakāna**”nti. **Vohārā**ti sabbohārā abhilāpā vā, atthato tathāpavattā cetanā. Tenāha “**ettha cā**”tiādi.

### Attantapādicatukkavaṇṇanā

**314.** Tesu **acelakoti** nidassanamattaṃ channaparibbājakānampi attakilamathaṃ anuyuttānaṃ labbhanato.

**Na silādisampannoti** silādīhi guṇehi aparipuṇṇo.

**Tamoti** appakāsabhāvena tamobhūto. Tenāha “**andhakārahūto**”ti, andhakāraṃ viya bhūto jāto appakāsabhāvena, andhakāratthaṃ vā pattoti attho. **Tamamevā**ti vuttalakkhaṇaṃ tamameva. **Paraṃ** parato **ayanaṃ gati** niṭṭhāti attho. “**Nīce...pe... nibbattitvā**”ti etena tassa tamabhāvaṃ dasseti, “**tīṇi duccharitāni paripūretī**”ti etena tamaparāyanabhāvaṃ appakāsabhāvāpattito. **Tathāvidho hutvā**ti nīce...pe... nibbattetvā. “**Tīṇi sucaritāni paripūretī**”ti etena tassa jotiparāyanabhāvaṃ dasseti pakāsabhāvāpattito. Itaradvaye vuttanayānusārena attho veditabbo.

**Ma-kāro padasandhimattaṃ** “**aññamañña**”ntiādīsū (su. ni. 605) viya. **Catūhi vātehī**ti catūhi disāhi utṭhitavātehi. **Parappavādehī**ti paresaṃ diṭṭhigatikānaṃ vādehi. “**Akampiyo**”ti vatvā tattha kāraṇamaṅha “**acalāsaddhāyā**”ti, maggenāgatasaddhāya. **Patanubhūtattā**ti ettha dvīhi kāraṇehi patanubhāvo veditabbo adhiccuppattiyā, pariyyuttānamandatāya ca. Sakadāgāmissa hi

vaṭṭānusārimahājanassa viya kilesā abhiñhaṃ na uppajjanti, kadāci karahaci uppajjanti. Uppajjamānā ca vaṭṭānusārimahājanassa viya maddantā abhibhavantā na uppajjanti, dvīhi pana maggehi pahīnattā mandā mandā tanukākārā uppajjanti. Iti kilesānaṃ patanubhāvena guṇasobhāya guṇasoraccena **sakadāgāmī samaṇapadumo nāma. Rāgadosānaṃ abhāvāti** guṇavikāsavibandhānaṃ sabbaso rāgadosānaṃ abhāvena. **Khippameva pupphissatīti** aggamaggavikasanena nacirasseva anavasesaguṇasobhāpāripūriyā pupphissati. Tasmā **anāgāmī samaṇapuṇḍarīko nāma. ‘Puṇḍarīka’**nti hi rattakamalaṃ vuccati. Taṃ kira lahuṃ pupphissati. **‘Paduma’**nti setakamalaṃ, taṃ cirena pupphissatīti vadanti. **Ganthakāra kilesānanti** cittassa baddhabhāvakarānaṃ uddhambhāgiyakilesānaṃ sabbaso **abhāvā samaṇasukhumālo nāma** samaṇabhāvena paramasukhumālabhāvappattito.

Catukkavaṇṇanā niṭṭhitā.

Niṭṭhitā ca paṭhamabhāṇavāraṇṇanā.

### Pañcakavaṇṇanā

**315.** Saccesu viya ariyasaccāni khandhesu upādānakkhandhā antogadhāti khandhesu lokiyalokuttaravasena vibhāgaṃ dassetvā itaresu tadabhāvato **“upādānakkhandhā lokiyā vā”**ti āha.

**Gantabbāti** upapajjitabbā. Yathā hi kammabhavo paramatthato asatipi kārake paccayasāmaggiyā siddho “taṃsamaṅginā santānalakkhaṇena sattena kato”ti voharīyati, evaṃ upapattibhavalakkhaṇā gatiyo paramatthato asatipi gamake taṃtaṃkammavasena ye hi tāni kammāni “katāni”ti vuccanti, tehi “gantabbā”ti voharīyanti. Yassa uppajjati, taṃ brūhanto eva uppajjatīti **ayo**, sukhaṃ. Natthi ettha ayoti **nirayo**. Tato eva assādetabbamettha natthīti **“nirassādo”**ti āha. Avīciādiokāsepi nirayasaddo nirulhoti āha **“sahokāseṇa khandhā kathitā”**ti. Sūriyavimānādi okāsavisesepi loke deva-saddo nirulhoti āha **“catutthe okāso”**ti.

**Āvāseti** visaye bhuttaṃ. **Peto vā ajagaro vā hutvā nibbattati** laggacittatāya, hīnājñāsayatāya ca. Tehi tehi kāraṇehi ādīnaṃ dassetvā **yathā aññe na labhanti, evaṃ karoti** attano visamanissitatāya, balavanissitatāya ca. Vaṇṇamacchariyena attano eva vaṇṇaṃ vaṇṇeti, paresaṃ vaṇṇo “kiṃ vaṇṇo eso”ti taṃ taṃ dosaṃ vadati. Paṭivedhadhammo ariyānaṃyeva hoti, te ca taṃ na maccharīyanti macchariyassa sabbaso pahīnattāti tassa asambhavo evāti āha **“pariyattidhamme”**tiādi. “Ayaṃ imaṃ dhammaṃ uggahetvā aññathā atthaṃ viparivattetvā nassessatīti **dhammānuggahena na deti.** “Ayaṃ imaṃ dhammaṃ uggahetvā uddhato unnaḷo avūpasantacitto apuññaṃ pasavissatīti **puggalānuggahena na deti. Na taṃ** adānaṃ **macchariyaṃ** macchariyalakkhaṇasseva abhāvato.

**Cittaṃ nivārentīti** jhānādivasena uppajjanakaṃ kusalacittaṃ nisedhenti tathāssa uppajjituṃ na denti. **Nīvaraṇappattoti** nīvaraṇāvatto. **“Arahattamaggavajjho”**ti etena bhavarāgānusayassapi nīvaraṇabhāvaṃ anujānāti, taṃ vicāretabbam. Kimettha vicāretabbam? “Āruppe kāmacchandānīvaraṇaṃ paṭicca thinamiddhanīvaraṇa”nti (paṭṭhā. 3.nīvaraṇagocchake 8) ādivacanato na yidaṃ “pariyāyena vutta”nti sakkā vattuṃ, sabbesampi tebhūmakadhammānaṃ kāmanīyaṭṭhena kāmabhāvato bhavarāgassapi kāmacchandabhāvassa icchitattā. Tasmā “kāmacchando nīvaraṇappatto”ti bhavarāgānusayamāha. So hi arahattamaggavajjho. “Yā tasmim samaye cittassa akalyatā”ti (dha. sa. 1162) ādivacanato **thinam cittagelaññaṃ.** Tathā “yā tasmim samaye vedanākkhandhassā”ti (dha. sa. 44) ādivacanato **middham khandhattayagelaññaṃ.** Ettha ca cittagelaññaṃ cittasseva akalyatā, khandhattayagelaññaṃ pana rūpakāyassapi thinamiddhassa niddāhetuttā. **Tathā uddhaccanti** uddhaccassa arahattamaggavajjhatam upasaṃharati tathā-saddena, na ubhayatam. Na hi tassa tādisī ubhayatā atthi. Yaṃ pana keci vadanti “puthujjanasantānavutti sekkhasantānavutti”ti, taṃ idha anupayogi sekkhasantānavuttino eva cettha adhippetattā.



**Tehīti** saṃyojanehi. “Orambhāgiyāni uddhambhāgiyānī”ti visesaṃ anāmasitvā “saṃyojanānī”ti sādharmaṇato paduddhāro idāni vuccamānācatukkānucchavikatāvasena, kassacipi kilesassa avikkhambhitattā kathañcipi avinipāteyyatāmutto kāmabhavo ajjhattaggahaṇassa visesapaccayattā imesaṃ sattānaṃ abhantarattāthena **anto** nāma. Rūpārūpabhavo tabbipariyāyato **bahi** nāma. Tathā hi yassa orambhāgiyāni saṃyojanāni appahīnāni, so ajjhattasaṃyojano vutto, yassa tāni pahīnāni, so bahiddhāsaṃyojano, tasmā anto asamucchinnabandhanatāya, bahi ca pavattamānabhavaṅgasantānatāya **antobaddhā bahisayitā nāma**. Nirantarappavattabhavaṅgasantānavasena hi sayitavohāro. Kāmaṃ nesaṃ bahibandhanampi asamucchinnaṃ, antobandhanassa pana thūlatāya evaṃ vuttaṃ. Tenāha “**tesaṃhi kāmabhava bandhana**”nti. Iminā nayena sesadvayepi attho vedittabbo. Asamucchinnesu ca orambhāgiyasāmyojaniyesu laddhappaccayesu uddhambhāgiyasāmyojanāni agaṇanūpagāni hontīti. Ariyānaṃyeva vasenettha catukkassa uddhaṭṭā labbhamānāpi puthujjanā na uddhaṭṭā.

**Sikkhakoṭṭhāsoti** sikkhitabbabhāgo. Pajjati sikkhā etenāti **sikkhāpadaṃ**, sikkhāya adhigamupāyoti. **Āgatāyeva**, tasmā tatha āgatanayeneva vedittabbāti adhippāyo.

### Abhabbaṭṭhānādipaṅcakavaṇṇanā

**316. Desanāsīsamevāti** desanāpadeso eva, tasmā **sotāpannādayopi abhabbā**. Yadi evaṃ kasmā tathā desanāti āha “**puthujjanakhīṇāsavāna**”ntiādi.

**Ñātibyasane** yesaṃ ñātīnaṃ vināso, tesāṃ hitasukhaṃ viddhamseti, tasmā **byasatīti byasanaṃ**. Bhogabyasanepi eseva nayo. Rogabyasanādīsu pana “yassa rogo”tiādīnā yojetabbaṃ. **Neva akusalāni** asaṃkiliṭṭhasabhāvattā. **Na tilakkhaṇāhatāni** abhāvadhammattā. Itaraṃ pana vuttavipariyāyato **akusalaṃ, tilakkhaṇāhataṅca**.

Guṇehi samiddhabhāvā **sampadā**.

**Vatthusandassanāti** yasmim vatthusmim tassa āpatti, tassa sarūpato dassanā. **Āpattisandassanāti** yaṃ āpattim so āpanno, tassā dassanā. **Samvāsapaṭikkhepoti** uposathapavāraṇādīsamvāsassa paṭikkhipanaṃ akaraṇaṃ. **Sāmīcipaṭikkhepo** abhivādanādīsāmīcikiriyāya akaraṇaṃ. **Codayamānenāti** codentena. **Cuditakassa kāloti** cuditakassa puggalassa codetabbakālo. **Puggalanti** codetabbam puggalaṃ. **Upaparikkhitvāti** “ayaṃ cuditakalakkhaṇe tiṭṭhati, na tiṭṭhati”ti vīmaṃsitvā. **Ayasaṃ āropeti** “ime maṃ abhūtena abbhācikkhantā anayabyasanaṃ āpādentī”ti bhikkhūnaṃ ayasaṃ uppādeti.

### Padhāniyaṅgapaṅcakavaṇṇanā

**317. Padahatīti padahano**; bhāvanaṃ anuyutto yogī, tassa bhāvo bhāvanānuyogo **padahanabhāvo**. Padhānaṃ assa atthīti padhāniko, ka-kārassa ya-kāraṃ katvā “**padhāniyo**”ti vuttaṃ. “Abhinīhārato paṭṭhāya āgatattā”ti vuttattā paccekabodhisattasāvaka bodhisattānampi paṇidhānato pabhuti āgatā saddhā āgamanasaddhā eva, ukkaṭṭhaniddesena pana “**sabbaññubodhisattāna**”nti vuttaṃ. Adhigamato samudāgatattā aggamaggaphalasampayuttāpi **adhigamanasaddhā nāma**, yā sotāpannassa aṅgabhāvena vuttā. **Acalabhāvenāti** paṭipakkhena anabhibhavanīyattā niccalabhāvena. **Okappananti** okkantitvā pakkhanditvā adhimuccanaṃ. **Pasāduppatti** pasādanīye vatthusmim pasādanameva. **Suppaṭividdhanti** sutṭhu paṭividdham, yathā tena paṭivedhena sabbaññutaññānaṃ hatthagataṃ ahosi, tathā paṭividdham. Yassa buddhasubuddhatāya saddhā acalā asampavedhī, tassa dhammasudhammatāya, saṅghasuppaṭipannatāya ca saddhā na tathāti aṭṭhānametaṃ anavakāso. Tenāha bhagavā “yo, bhikkhave, buddhe pasanno, dhamme so pasanno, saṅghe so pasanno”tiādi. **Padhānavīriyaṃ ijjhati** “addhā imāya paṭipadāya jarāmaṇato muccissāmī”ti sakkaccaṃ padahanato.

Appa-saddo abhāvatto “appa-saddassa...pe... kho panā”tiādīsu viyāti āha “**arogo**”ti. **Samavepākiniyāti** yathābhuttaṃ āhāraṃ samākāreneva paccanasīlāya. Dalhaṃ katvā paccantī hi gahaṇī

ghorabhāvena pittavikārādivasena rogaṃ janeti, sithilaṃ katvā paccantī mandabhāvena vātavikārādivasena. Tenāha “**nātisītāya nāccuṇhāyā**”ti. Gahaṇītejassa mandatikkhatāvasena sattānaṃ yathākkamaṃ sītuṇhasahagatāti āha “**atisitagahaṇiko**”tiādi. Yāthāvato accayadesanā attano āvikaraṇaṃ nāmāti āha “**yathābhūtaṃ attano agunaṃ pakāsetā**”ti. **Udayatthagāminiyāti** saṅkhārānaṃ udayaṃ, vayaṅca paṭivijjhantiyāti ayamettha atthoti āha “**udayañcā**”tiādi. **Parisuddhāyāti** nirupakkilesāya. **Nibbijjhitaṃ samatthāyāti** tadaṅgavasena avasesaṃ pajahitaṃ samatthāya. **Tassa tassa dukkhassa khayagāminiyāti** yaṃ dukkhaṃ imasmiṃ ñāṇe anadhigate pavattārahaṃ, adhigate na pavattati, taṃ sandhāya vadati. Tathā hesa yogāvaccaro “**cūlasotāpanno**”ti vuccati.

### Suddhāvāsādipaṅcakavaṇṇanā

**318.** “**Suddhā āvasiṃsū**”tiādinā addhattayepi tesam suddhāvāsapariyāyo abyabhicārīti dasseti. **Kilesamalarahitāti** nāmakāyaparisuddhiṃ vadanto eva rūpakāyaparisuddhimpī atthato dasseti. Tenāha “**anāgāmikhīṇāsavā**”ti.

**Āyuno majjhanti** avihādīsu yattha yattha uppanno, tattha tattha āyuno majjhaṃ **anatikkamitvā**. **Antarā vāti** tassa antarāva orameva. **Majjhaṃ upahaccāti** āyuno majjhaṃ aticca. Tenāha “**atikkamitvā**”ti. **Appayogenāti** anussahanena. **Akilamantoti** akilanto. **Sukhenāti** akicchena. Uddhaṃ vāhibhāvena uddhaṃ assa taṇhāsotaṃ, vaṭṭasotañcāti **uddhaṃsoto**; uddhaṃ vā gantvā paṭilabhitabbato uddhaṃ assa maggasotanti **uddhaṃsoto**. **Akaniṭṭhaṃ gacchatīti akaniṭṭhagāmī**. **Sodhetvāti** tattha tattha uppajjanto te te devaloke sodhento viya hotīti vuttaṃ “**cattāro devaloke sodhetvā**”ti. Tattha tattha vā uppajjitvā puna anuppajjanārahabhāveneva tatopi gacchanto devūpapattibhavasāññite attano khandhaloke bhavarāgamalaṃ visodhetvā vikkhambhetvā. Ayañhi avihesu kappasahassaṃ vasanto arahattaṃ pattuṃ asakkuṇitvā atappaṃ gacchati, tatthāpi dve kappasahassāni vasanto arahattaṃ pattuṃ asakkuṇitvā sudassaṃ gacchati, tatthāpi cattārikappasahassāni vasanto arahattaṃ pattuṃ asakkuṇitvā sudassiṃ gacchati, tatthāpi aṭṭhakappasahassāni vasanto arahattaṃ pattuṃ asakkuṇitvā akaniṭṭhaṃ gacchati, tattha vasanto aggamaṃ gacchati.

### Cetokhilapaṅcakavaṇṇanā

**319.** **Cetokhilā** nāma atthato vicikicchā kodho ca, te pana yasmiṃ santāne uppajjanti, tassa kharabhāvo kakkhaḷabhāvo hutvā upatiṭṭhanti, pageva attanā sampayuttacittassāti āha “**cittassa thaddhabhāvo**”ti. Yathā lakkhaṇapāripūriyā gahitāya sabbā satthurūpakāyasirī gahitāva nāma hoti, evaṃ sabbaññutāya sabbā dhammakāyasirī” gahitā eva nāma hotīti tadubhayavatthukameva kaṅkhaṃ dassento “**sarīre kaṅkhamāno**”tiādimāha. Ātapati kileseti **ātappaṃ**, sammāvāyāmoti āha “**ātappāyāti vīriyakaraṇatthāyā**”ti. **Punappunaṃ yogāyāti** bhāvanāṃ punappunaṃ yuñjanāya. **Satatakiriyaṃyāti** bhāvanāya nirantarappayogāya. “Paṭivedhadhamme kaṅkhamāno”ti ettha kathaṃ lokuttaradhamme kaṅkhā pavattatīti? Na ārammaṇakaraṇavasena, anussavākāraparivitakkaladdhe parikappitarūpe kaṅkhā pavattatīti dassento āha “**vipassanā...pe... vadanti, taṃ atthi nu kho natthīti kaṅkhatī**”ti. **Sikkhāti** cettha pubbhāgasikkhā veditabbā. “Kāmañcetta visesuppattiyā mahāsāvajjatāya ceva saṃvāsanimittaghaṭṭanāhetu abhiṇhuppattikatāya ca ‘sabrahmācārīsū’ti kopassa visayo visesetvā vutto, tato aññatthāpi pana kopo ‘na cetokhilo’ti na sakkā viññātu”nti keci. Yadi evaṃ vicikicchāyapi ayaṃ nayo āpajjati, tasmā yathārutavaseneva gahetabbāṃ.

### Cetasovinibandhādipaṅcakavaṇṇanā

**320.** Pavattitaṃ appadānavasena kusalacittaṃ vinibandhantīti **cetasovinibandhā**. Taṃ pana vinibandhantā muṭṭhigāhaṃ gaṇhantī viya hontīti āha “**cittaṃ bandhitvā**”tiādi. Kāmagiddho puggalo vatthukāme viya kilesakāmeṃ assādeti abhinandatīti vuttaṃ “**vatthukāmeṃ kilesakāmeṃ**”ti. **Attano kāyeti** attano karajakāye, attabhāve vā. **Bahiddhārūpeti** paresaṃ kāye, anindriyabaddharūpe ca.

Udaraṃ avadihati upacinoṭi paripūretīti **udarāvadehakaṃ**. **Seyyasukhanti** seyyāya sayanavasena uppajjanakasukhaṃ. **Samparivattakanti** samparivattetvā. **Paṇidhāyāti** taṇhāvasena paṇidahitvā. Iti pañcavidhopi lobhaviseso eva cetovinibandho vuttoti veditabbo.

**Lokiyāneva kathitāni** rūpindriyānaṃyeva kathitattā. **Paṭhamadutiyacatutthāni lokiyāni** parittabhūmakattā. **Tatīyapañcamāni** kāmarūpaggabhūmikattā, kāmarūpārūpaggabhūmikattā ca. **Lokiyalokuttarāni** kathitānīti ānetvā yojanā. “Samathavipassanāmaggaḥalavasenā”ti vattabbaṃ. “**Samathavipassanāmaggasenā**”ti vuttaṃ.

### Nissaraṇiyapañcakavaṇṇanā

**321.** Nissarantīti **nissaraṇiyāti** vattabbe rassaṃ katvā niddeso. Kattari hesa anīya-saddo yathā “niyyānikā”ti. Tenāha “**nissaṭṭā**”ti. Kuto pana nissaṭṭāti? Yathāsakaṃ paṭipakkhato. Nijjīvaṭṭhena **dhātuyoti** āha “**attasuññasabhāvā**”ti. Atthato pana dhammadhātumanoviññādhātuvisesā. Tādisassa bhikkhuno kilesavasena kāmesu manasikāro nāma natthīti āha “**vīmaṃsanattha**”nti. “Nekkhammanissitaṃ idāni me cittaṃ, kiṃ nu kho kāmavitakkopi uppajjati”ti vīmaṃsantassāti attho. **Pakkhandanaṃ** nāma anuppaveso, so pana tattha natthīti āha “**na pavasati**”ti. **Pasādaṃ** nāma abhirucisantiṭṭhānaṃ, vimuccanaṃ adhimuccananti taṃ sabbaṃ pakkhipanto vadati “**pasādaṃ nāpajjati**”tiādi. Evaṃbhūtaṃ panassa cittaṃ tattha kathaṃ tiṭṭhatīti āha “**yathā panā**”tiādi. **Tanti** paṭhamajjhānaṃ. **Assāti** bhikkhuno. **Cittaṃ pakkhandatīti** parikammacittena saddhiṃ jhānacittaṃ ekaṭṭhavasena ekajjhaṃ gahetvā vadati. **Gocare gatattāti** attano ārammaṇe eva pavattattā. **Ahānabhāgiyattāti** ṭhitibhāgiyattā, visesabhāgiyattā vā. **Suṭṭhu vimuttanti** vikkhambhanavimuttiyā sammadeva vimuttaṃ. Cittassa kāyassa ca hananato **vighāto**, dukkhaṃ. Paridahanato **parilāho**, kāmadaratho. **Na vedayati** anuppajjanato. Nissaranti tatoti **nissaraṇaṃ**. Ke nissaranti? Kāmā. Evañca katvā **kāmānanti** kattari sāmivacanaṃ suṭṭhu yujjati. Yadaggena kāmā tato “nissaṭṭā”ti vuccanti, tadaggena jhānampi kāmato “nissaṭṭā”nti vattabbaṃ labhatīti vuttaṃ “**kāmehi nissaṭṭattā**”ti. Evaṃ vikkhambhanavasena kāmanissaraṇaṃ vatvā idāni samucchadavasena accantatova nissaraṇaṃ dassetuṃ “**yo panā**”tiādi vuttaṃ.

**Sesapadesūti** sesakoṭṭhāsesu. Ayaṃ pana visesoti visesaṃ vadantena “taṃ jhānaṃ pādakaṃ katvā”tiādikō avisesoti vatvā dutiyatatiyavāresu sabbaso anāmaṭṭho, catutthavāre pana ayampi visesoti dassetuṃ “**accantanissaraṇe cettha arahattaphalaṃ yojetabba**”nti vuttaṃ.

Yasmā arūpajjhānaṃ pādakaṃ katvā aggamaggaṃ adhigantvā arahatte ṭhitassa cittaṃ sabbaso rūpehi nissaṭṭaṃ nāma hoti. Tassa hi phalasaṃpattito vuṭṭhāya vīmaṃsanatthaṃ rūpābhikhaṃ cittaṃ pesentassa idamakkhātanti samathayānikānaṃ vasena heṭṭhā cattāro vārā kathitā, idaṃ pana sukkhavipassakassa vasenāti āha “**suddhasaṅkhāre**”tiādi. **Puna sakkāyo natthīti uppananti** idāni me sakkāyappabandho natthīti vīmaṃsantassa uppannaṃ.

### Vimuttāyatanapañcakavaṇṇanā

**322.** Vimuttiyā vaṭṭadukkhatō vimuccanassa āyatanāni kāraṇāni **vimuttāyatanānīti** āha “**vimuccanakāraṇāni**”ti. **Pāliatthaṃ jānantassāti** “idha sīlaṃ āgataṃ, idha samādhi, idha paññā”tiādinā taṃ taṃ pāliatthaṃ yāthāvato jānantassa. **Pāliṃ jānantassāti** tadatthajotanaṃ pāliṃ yāthāvato upadhārentassa. **Taruṇapīṭīti** sañjātamattā mudukā pīṭi jāyati. Kathaṃ jāyati? Yathādesitadhammaṃ upadhārentassa tadanucchavikameva attano kāyavacīmanosamācāraṃ pariggaṇhantassa somanassappattassa pamodalakkhaṇaṃ pāmojjaṃ jāyati. **Tuṭṭhākārahūtā balavapīṭīti** purimuppannāya pīṭiyā vasena laddhāsevanattā ativiya tuṭṭhākārahūtā kāyacittadarathapassambhanasamatthāya passaddhiyā paccayo bhavituṃ samatthā balappattā pīṭi jāyati. Yasmā nāmakāye passaddhe rūpakāyopi passaddho eva hoti, tasmā “**nāmakāyo paṭipassambhati**” icceva vuttaṃ. **Sukhaṃ paṭilabhatīti** vakkhamānassa cittaṃsamādhānassa paccayo bhavituṃ samatthaṃ

cetasikaṃ nirāmiṣaṃ sukhaṃ paṭilabhati vindati. “Samādhiyatī”ti ettha na yo koci samādhi adhippeto, atha kho anuttarasamādhīti dassento “**arahatta phalasaṃmādhinā samādhiyatī**”ti āha. “**Ayañhi**”tiādi tassā desanāya tādisassa puggalassa yathāvuttasamādhipaṭilābhassa kāraṇabhāvavibhāvanāṃ. Tassa vimuttāyatanabhāvo. **Osakkītunti** nayitūṃ. **Samādhiyeva samādhinimittanti** kammaṭṭhānapāliāruḷho samādhiyeva parato uppajjanakabhāvanāsamādhissa kāraṇabhāvato samādhinimittāṃ. Tenāha “**ācariyasantike**”tiādi.

**Vimutti vuccati arahattaṃ** sabbaso kilesehi paṭippassaddhivimuttīti katvā. **Paripācentīti** sādheti nipphādentī. **Aniccānupassanāññāne** nissayapaccayabhūte **uppannasaññā**, tena ñāṇena sahaḡatāti attho. Sesesupi eseva nayo. Yaṃ panettha vattabbaṃ, taṃ **visuddhimaggasaṃvaṇṇanāyaṃ** (visuddhi. ṭī. 1.37, 306) vuttanayena veditabbaṃ.

Pañcakavaṇṇanā niṭṭhitā.

### Chakkavaṇṇanā

**323.** Attānaṃ adhi **ajjhata, adhi**-saddo samāsavisaḡe adhiḡaratthaṃ, pavattiatthañca gahetvā pavattatīti attānaṃ adhiḡicca uddissa pavattā **ajjhata; ajjhatesu** bhavāni **ajjhaticānīti** niyakajjhatesupi abhantarāni cakkhādīni vuccanti, tāni pana yena ajjhatabhāvena “ajjhaticānī”ti vuccanti, tamatthaṃ pākātaṃ katvā dassento “**ajjhaticānī**”ti āha. Saddatthato pana ajjhatajjhattāniyeva **ajjhatajjhaticāni** yathā “venayiko”ti (ma. ni. 1.246; a. ni. 8.11; pārā. 8) daṭṭhabbaṃ. **Tato ajjhataṭoti** tato ajjhatajjhattato, yāni ajjhaticāni vuttāni. Ajjhaticānañhi paṭiyogīni bāhirāni ajjhataḡammānaṃ viya bahiddhāḡammā. “Ajjhaticānī”ti hi saparasantānikāni cakkhādīni vuccanti, tathā rūpādīni “bāhirānī”ti. Ajjhaticāni pana sasantānikā eva cakkhurūpādayo, tato aññeva bahiddhāti. “Viññāṇasaṃmūhā”ti ettha yadipi tesāṃ viññāṇānaṃ samodhānaṃ natthi bhinnakālikattā, cittaṇa pana ekajjhaṃ abhisāmyūhanavasena saṃmūhatā vuttā yathā “vedanākkhandho”ti. **Cakkhupasādanissitanti** cakkhupasādaṃ nissāya paccayaṃ labhitvā uppannaṃ kusalākusalavipākaviññānaṃ cakkhuvīññānatāsāmaññena ekajjhaṃ katvā vuttaṃ. **Cakkhusannissito samphasso**, na cakkhudvāriko. **Ime dasa samphasseti** ime pasādavattuke dasa vipākasaṃphasse ṭhapetvā. **Eteneva nayanāti** etena phasse vutteneva nayena. Taṇhāchakke taṇhaṃ ārabba pavattāpi taṇhā **dhammataṇhāti** veditabbā.

**Appaṭissayoti** appaṭissavo, va-kāraṣsa ya-kāraṃ katvā niddeso. Garunā kismiñci vutte gāravavasena paṭissavanaṃ **paṭissavo**, paṭissavabhūtaṃ, taṃsabhāgañca yaṃ kiñci gāraḡaṃ, natthi etasmiṃ paṭissavoti **appaṭissavo**, gāraḡarahito. Tenāha “**anīcavuttī**”ti. Yathā cetiyaṃ uddissa kataṃ satthu katasadisāṃ, evaṃ cetiyassa purato kataṃ satthu purato katasadisāṃ evāti āha “**parinibbuta panā**”tiādi. **Sakkaccaṃ na gacchatīti** ādaraṃ gāraḡaṃ uppādetvā na upasaṃkamati. Yathā sikkhāya ekadese kopite, agārove ca kate sabbā sikkhā kuppāti, sabbattha ca agāraḡaṃ kataṃ nāma hoti samudāyato saṃvarasaṃmādanāṃ avayavato bhedoti. Evaṃ **ekabhikkhusimpi...pe... agāro katova hoti**. Anādariyamattenapi sikkhāya aparipūriyevāti āha “**apūrayamānova sikkhāya agāro nāmā**”ti. **Appamādalakkhaṇaṃ** sammāpaṭipatti. **Duvidhanti** dhammāmisavasena duvidhaṃ.

**Somanassūpavicārāti** somanassasahaḡatā vicārā adhippetā, upasaddo ca nipātamattanti āha “**somanassasampayuttā vicārā**”ti. Tathā hissa abhidhamme (dha. sa. 8) “cāro vicāro...pe... upavicāro”ti niddeso pavatto. **Somanassakāraṇabhūtanti** sabhāvato, saṅkappatopi somanassassa uppattiyā paccayabhūtaṃ. Kāmaṃ parittabhūmakā vitakkavicārā aññamaññamaviyogino, kiriyābhedato pana paṭhamābhiniḡatāyā vitakkassa byāpāro sātisaḡo. Tato paraṃ vicārassāti taṃ sandhāya “vitakketvā”ti pubbakālakiriyāvasena vatvā “**vicārena paricchindatī**”ti vuttaṃ. Laddhapubbāsevanassa vicārassa byāpāro paññā viya hoti. Tathā hi “vicāro vicikicchāya paṭipakkho”ti peṭake vuttaṃ. “**Diṭṭhisāmaññagato**”ti ettha yāya diṭṭhiyā puggalo diṭṭhisāmaññaṃ gato vutto, sā paṭhamamaggasammādiṭṭhi kosambakasutte adhippetoti āha “**kosambakasutte paṭhamamaggo**

**kathito**’ti. **Idhāti** imasmim̄ sutte. Catūsupi maggesu sammādiṭṭhi diṭṭhiggahaṇena gahitāti āha “**cattāropi maggā kathitā**”ti.

### Vivādamūlachakkavaṇṇanā

**325. Kodhanoti** kujjhanasīlo. Yasmā so appahīnakodhatāya vigatakodhano nāma na hoti, tasmā “**kodhena samannāgato**”ti āha. Upanāho etassa atthi, upanayhanasīloti vā **upanāhi**. **Vivādo** nāma uppajjamāno yebhuyyena paṭhamam̄ dvinnam̄ vasena uppajjatīti vuttam̄ “**dvinnam̄ bhikkhūnam̄ vivādo**”ti. So pana yathā bahūnam̄ anattāhāvaho hoti, tam̄ nidassanamukhena dassento “**katha**”ntiādīmāha. **Abbhantaraparisāyāti** parisabbhantare.

Paraguṇamakkhanāya pavattopi attano kārakam̄ gūthena paharantam̄ gūtho viya paṭhamataram̄ makkhetīti **makkho**, so etassa atthīti **makkhi**. Palāsātīti palāso, parassa guṇe ḍamsitvā viya apānetīti attho, so etassa atthīti **palāsī**. Palāsī puggalo hi dutiyassa dhuram̄ na deti, samam̄ pasāretvā tiṭṭhati. Tenāha “**yugaggāhalakkhaṇena palāsena samannāgato**”ti. “**Issuki**”tiādīnam̄ padānamattho heṭṭhā vuttanayattā suviññeyyova. Kammaṭṭhappattāya micchādiṭṭhiyā vasenettha micchādiṭṭhi veditabbāti āha “**natthikavādī ahetukavādī akiriyavādī**”ti.

### Nissaraṇiyachakkavaṇṇanā

**326. Hāpetvāti** kusalacittam̄ parihāpetvā pavattitumeva appadānavasena. **Abhūtam̄ byākaraṇam̄ byākaroti** “mettā hi kho me cetovimutti bhāvitā”tiādīnā (a. ni. 6.13) attani avijjamānam̄ guṇabyāhāram̄ byāharati. Cetovimutti-saddam̄ apekkhitvā “**nissaṭā**”ti vuttam̄. **Puna byāpādo natthīti** idāni mama byāpādo nāma natthi sabbaso natthīti ñatvā.

“Animittā”ti vatvā yesam̄ nimittānam̄ abhāvena arahattaphalasangamāpattiyā animittatā, tam̄ dassetum̄ “**sā hi**”tiādī vuttam̄. Tattha rāgassa nimittam̄, rāgo eva vā nimittanti **rāganimittam̄**. **Ādi-**saddena dosanimittādīnam̄ saṅgaho daṭṭhabbo. Rūpavedanādīsāṅkhāranimittam̄ **rūpanimittādi**. Tesaññeva niccādivasena upaṭṭhānam̄ **niccanimittādi**. Tayidam̄ nimittam̄ yasmā sabbena sabbam̄ arahattaphale natthi, tasmā vuttam̄ “**sā hi...pe... animittāti vuttā**”ti. **Nimittam̄ anusaratīti** tam̄ nimittam̄ anugacchati ārabha pavattati.

**Asmimānoti** “asmī”ti pavatto attavisayo māno. **Ayam̄ nāma aham̄ asmīti** rūpalakkhaṇo, vedanādīsu vā aññataralakkhaṇo ayam̄ nāma attā aham̄ asmī. “Asmī”ti māno samugghāṭṭiyati etenāti **asmimānasamugghāto**, arahattamaggo. **Puna asmimāno natthīti** tassa anuppattidhammatāpādanam̄ kittento samugghātattameva vibhāveti.

### Anuttariyādicchakkavaṇṇanā

**327. Natthi** etesam̄ uttarāni viṣiṭṭhānīti **anuttarāni**, anuttarāni eva **anuttariyāni** yathā anantameva ānantariyanti āha “**anuttariyānīti anuttarānī**”ti. **Dassanānuttariyam̄ nāma** anuttaraphalavisesāvahattā. Esa nayo sesesupi. **Sattavidhaariyadhanalābhōti** sattavidhasaddhādīlokuttaradhanalābhō. **Sikkhattayapūraṇanti** adhisīlasikkhādīnam̄ tissannam̄ sikkhānam̄ paripūraṇam̄. Tattha paripūraṇam̄ nippariyāyato asekkhānam̄ vasena veditabbam̄. Kalyāṇaputhujjanato paṭṭhāya hi satta sekkhā tisso sikkhā pūrenti nāma, arahā pana paripuṇṇasikkhoti. Iti imāni anuttariyāni lokiyalokuttarāni kathitāni.

**Anussatiyo eva** diṭṭhadhammikasangamāyikādihitasukhānam̄ kāraṇabhāvato ṭhānānīti **anussatiṭṭhānāni**. **Evam̄ anussaratoti** yathā buddhānussati visesādhigamassa ṭhānam̄ hoti, evam̄ “itipi so bhagavā”tiādīnā (dī. ni. 1.157, 255) buddhaguṇe anussarantassa. **Upacārakammaṭṭhānanti**

paccakkhato upacārajjhānāvahaṃ kammaṭṭhānaṃ, paramparāya pana yāva arahattā lokiyalokuttaravisesāvahaṃ.

### Satativihārachakkavaṇṇanā

**328. Niccavihārāti** sabbadā pavattanakavihārā. Ṭhapetvā hi samāpattivelāṃ, bhavaṅgavelāṅca khīṇāsavā imināva chaḷaṅgupekkhāvihārena sabbakālaṃ viharanti. **Cakkhunā rūpaṃ disvāti** nissayavohārena vuttaṃ. Sasambhārahakathā hesā yathā “dhanunā vijjhatī”ti. Tasmā nissayasīsenā nissitassa gahaṇaṃ daṭṭhabbanti āha “**cakkhuviññāṇena disvā**”ti. **Iṭṭhe arajantoti** iṭṭhe ārammaṇe rāgaṃ anuppādentō maggena samucchinnattā. **Neva sumano hoti** gehasitapemavasena. **Na dummano** pasādaññāthattavasena. **Asamapekkhaneti** iṭṭhepi anīṭṭhepi majjhattepi ārammaṇe na samaṃ na sammā ayoniso gahaṇe. Yo akhīṇāsavānaṃ mohō uppajjati, taṃ **anuppādentō** maggeneva tassa samugghāṭitattā. **Ñāṇupekkhāvaseneva upekkhako viharati majjhatto**. Ayañcassa paṭipattivepullappattiyā, paññāvepullappattiyā vāti āha “**satiyā**”tiādi. **Chaḷaṅgupekkhāti** chasu dvāresu pavattā satisampajaññassa vasena chāvayavā upekkhā. **Ñāṇasampayuttacittāni labbhanti** tehi vinā sampajānatāya asambhavato. **Mahācittānīti** aṭṭhapi mahākiriyaṅcittāni **labbhanti**. **Satativihārāti** ñāṇuppattipaccayarahitakālepi pavattibhedanato. **Dasa cittānīti** aṭṭha mahākiriyaṅcittāni hasituppādavoṭṭhabbanacittehi saddhiṃ dasa cittāni **labbhanti**. Arajjanādussanavasena pavatti tesampi sādharmaṇāti. “Upekkhako viharatī”ti vacanato chaḷaṅgupekkhāvasena āgatānaṃ imesaṃ satativihārānaṃ “somanassaṃ kathaṃ labbhatī”ti codetvā “**āsevanato labbhatī**”ti sayameva pariharatīti. Kiñcāpi khīṇāsavo iṭṭhāniṭṭhepi ārammaṇe majjhatte viya bahulaṃ upekkhako viharati attano parisuddhapakatibhāvāvijahanato, kadāci pana tathā cetobhisāṅkhārābhāve yaṃ taṃ sabhāvato iṭṭhaṃ ārammaṇaṃ, tattha yāthāvasabhāvaggahaṇavasena arahato cittaṃ somanassasahagataṃ hutvā pavattateva, tañca kho pubbāsevanavasena. Tenāha “āsevanato labbhatī”ti.

### Abhijāṭichakkavaṇṇanā

**329.** “Abhijāṭiyo”ti ettha **abhi**-saddo upasaggamattaṃ, na atthavisesajotakoti āha “**jāṭiyo**”ti. **Abhijāyati**ti etthāpi eseva nayo. **Jāyati**ti ca antogadhahetuattaṭṭhapaḍaṃ, uppādetīti attho. Jāṭiyā, taṃnibbattakakammānañca kaṇhasukkapariyāyatāya yaṃ vattaḅbaṃ, taṃ heṭṭhā vuttameva. Paṭippassambhanavasena kilesānaṃ nibbāpanato **nibbānaṃ sace kaṇhaṃ bhaveyya** yathā taṃ dasavidhaṃ dussīyakammaṃ. **Sace sukkaṃ** bhaveyya yathā taṃ dānasīlādikusalakammaṃ. **Dvinnampi** kaṇhasukkaṅvīpākānaṃ. **Arahattaṃ adhippettaṃ** “abhijāyati”ti vacanato. Taṃ kilesanibbānante jātattā **nibbānaṃ** yathā rāgādīnaṃ khayante jātattā rāgakkhayo dosakkhayo mohakkhayoti.

### Nibbedhabhāgiyachakkavaṇṇanā

**Nibbedho vuccati nibbānaṃ** maggañāṇena nibbijjhitabbaṭṭhena, paṭivijjhitabbaṭṭhenāti attho. **Nirodhānupassanāñāṇeti** nirodhānupassanāñāṇe nissayapaccayabhūte uppannā **saññā**, tena sahaḡatāti attho.

Chakkavaṇṇanā niṭṭhitā.

### Sattakavaṇṇanā

**330. Sampattipaṭilābhaṭṭhenāti** silasampattiādīnaṃ sammāsambodhipariyosānānaṃ sampattīnaṃ paṭilābhāpanaṭṭhena, sampattīnaṃ vā paṭilābho **sampattipaṭilābho**, tassa kāraṇaṃ sampattipaṭilābhaṭṭho, tena **sampattipaṭilābhaṭṭhena**. Tenevāha “sampattīnaṃ paṭilābhakāraṇato”ti. **Saddhāva** ubhayaḡhitatthikehi dhanāyitabbaṭṭhena dhanāṃ **saddhādhanāṃ**. **Etthāti** etesu dhanesu. **Sabbasetthaṃ** sabbesaṃ paṭilābhakāraṇabhāvato, tesañca saṃkilesavisodhanena

mahājutikamahāvippahārabhāvāpādanato. Tenāha “**paññāya hī**”tiādi. Tattha **paññāya thatvāti** kammassakatāpaññāya patitthāya **sucaritādīni pūretvā saggūpagā honti**. Tattha ceva pāramitā paññāya ca thatvā **sāvakaṭṭhāpāramiṇāṇādīni paṭivijjhanti**.

Samādhim parikkharonti abhisaṅkharontīti **samādhiparikkhārā**, samādhissa sambhārabhūtā sammāditthiādayo. Idha pana sahakārikāraṇabhūtā adhippetāti āha “**samādhiparivārā**”ti.

**Asatam** asādhūnaṃ **dhammā** tesam asādhubhāvasāadhanato. **Asantāti** asundarā gārayhā. Tenāha “**lāmakā**”ti. “Vipassakasēva kathitā”ti vatvā tassa vipassanānibbattim dassetuṃ “**tesupī**”tiādi vuttam. Catunnampi hi saccānaṃ vīsesena dassanato maggapaññā sātīsayam “vipassanā”ti vattabbā, taṃsamaṅgī ca ariyo vipassanakoti.

**Sappurisānaṃ dhammāti** sappurisānaṃyeva dhammā, na asappurisānaṃ. Dhammānudhammapaṭipattiyā eva hi dhammaññuādibhāvo, na pālīdhammapaṭhanādīmattena. **Bhāsītassāti** suttageyyādibhāsītassa ceva tadaññassa ca attatthaparathabodhakassa padassa. Atthakusalatāvasena **attham jānātīti atthaññū**. **Attānaṃ jānātīti** yāthāvato attano pamāṇajānanavasena attānaṃ jānāti. Paṭiggahaṇaparibhogamattaññutāhi eva pariyesanavissajjanamattaññutāpi bodhitā hontīti “**paṭiggahaṇaparibhogesu**” icceva vuttam. Evañhi tā anavajjā hontīti. **Yogassa adhigamāyāti** bhāvanāya anuyūñjanassa. **Atisambādhanti** atikhuddakaṃ atikkhapaññassa tāvatā kālena tīretuṃ asakkuṇeyyattā. **Aṭṭhavidham parisanti** khattiyaparīsādikaṃ aṭṭhavidham parisam. Bhikkhuparīsādikaṃ catubbidham khattiyaparīsādikaṃ manussaparīsamaṃyeva puna catubbidham gahetvā aṭṭhavidham vadanti apare. “Imam me sevantassa akusalā dhammā parihāyanti, kusalā dhammā abhivaḍḍhanti, tasmā sevītabbo, vipariyāyato tadañño asevitabbo”ti evam **sevītabbāsevītabbam puggalam jānātīti puggalaññū**. Evam tesam puggalānampi bodhanaṃ ukkaṭṭham, nihīnaṃ vā **jānāti** nāma.

**331. “Niddasavatthūnī”**ti. “Ādi-saddalopenāyaṃ niddeso”ti āha “**niddasādivatthūnī**”ti. Natthi dāni imassa dasāti niddaso. **Pañhoti** ñātuṃ icchito attho. **Puna dasavasso na hotīti** tesam matimattanti dassetuṃ “**so kirā**”ti kirasaddaggaṇaṃ. “Niddaso”ti cetam desanāmatam, tassa nibbīsādibhāvassa viya ninnavādibhāvassa ca icchitattāti dassetuṃ “**na kevalaṅcā**”tiādi vuttam. **Gāme vicarantoti** gāme piṇḍāya vicaranto.

**Na idaṃ titthiyānaṃ adhivacanaṃ** tesu tannimittassa abhāvā. Sāsanepi sekkhassāpi na idaṃ adhivacanaṃ, kimaṅgaṃ pana puthujjanassa. Yassa panetaṃ adhivacanaṃ, yena ca kāraṇena, tam dassetuṃ “**khīṇāsavasseta**”ntiādi vuttam. Appaṭisandhikabhāvo hissa paccakkhato kāraṇaṃ. Paramparāya itarāni, yāni pālīyaṃ āgatāni.

Sikkhāya sammadeva ādānaṃ **sikkhāsamādānaṃ**, tam panassā paripūriyā veditabbanti āha “**sikkhattayapūraṇe**”ti. Sikkhāya vā sammadeva ādito paṭṭhāya rakkhaṇaṃ **sikkhāsamādānaṃ**, tañca atthato pūraṇe paricchinnaṃ arakkhaṇe sabbena sabbam abhāvato, rakkhaṇe ca paripūraṇato. **Bahalacchandoti** dalhacchando. **Āyatinti** anantarānāgatadivasādīkālo adhippeto, na anāgatabhavoti āha “**anāgate punadivasādīsūpī**”ti. Sikkham paripūrentassa tattha nivīṭṭhaatthitā **avigatapematā**, tebhūmakadhammānaṃ aniccādivasena sammadeva nijjhānaṃ **dhammanisāmanāti** āha “**vipassanāyetaṃ adhivacana**”nti. **Tañhāvinayāneti** virāgānupassanādivipassanāññānubhāvasiddhe tañhāvikkhambhane. **Ekībhāveti** gaṇasaṅgaṇikākilesasaṅgaṇikāvīgamasiddhe vivekabhāve. **Vīriyārambheti** sammappadhānavīriyassa paggaṇhane, tam pana sabbaso vīriyassa paribrūhanaṃ hotīti āha “**kāyīkacetāsikassa vīriyassa pūraṇe**”ti. **Satiyañceva nepakkabhāve cāti** satokāritāya ceva sampajānakāritāya ca. Satisampajāññabaleneva vīriyārambho ijjhati. **Diṭṭhipaṭivedheti** sammāditthiyā paṭivijjhane. Tenāha “**maggadassane**”ti. Saccasampāṭivedhe hi ijjhamāne maggasammāditthi siddhā eva hoti.

**Asubhānupassanāññāṇeti** dasavidhassa, ekādasavidhassāpi vā asubhassa anupassanāvasena pavattaññāṇe. Idañhi dukkhānupassanāya paricayaññāṇaṃ. **Ādinavānupassanāññāṇeti** saṅkhārānaṃ aniccadukkhavipariṇāmatāsamsūcitassa ādinavassa anupassanāvasena pavattaññāṇe. **Appahīnaṭṭhenāti** maggena asamucchinnabhāvena. **Anusentīti** santāne anu anu sayanti. Kāraṇalābhe hi sati uppannārahā kilesā santāne anu anu sayitā viya honti, tasmā te tadavatthā “anusayā”ti vuccanti. **Thāmagatoti** thāmappatto. **Thāmagamanañca** aññehi asādhāraṇo kāmarāgādīnameva āveṇiko sabhāvo daṭṭhabbo. Tathā hi vuttaṃ abhidhamme “thāmagatānusayaṃ pajahatī”ti. Kāmarāgo eva anusayo **kāmarāgānusayo**. Ye pana “kāmarāgassa anusayo kāmarāgānusayo”ti vadanti, taṃ tesam matimattaṃ. Na hi kāmarāgavinimutto kāmarāgānusayo nāma koci atthi. Yadi “tassa bīja”nti vadeyyuṃ, tampi tabbinimuttaṃ paramatthato na upalabbhatevāti. Eseva nayo sesesupi.

### Adhikaraṇasamathasattakavaṇṇanā

Adhikarīyanti etthāti **adhikaraṇāni**. Ke adhikarīyanti? Samathā. Kathaṃ adhikarīyantīti? Samanavasena, tasmā te tesam samanavasena pavattantīti āha “**adhikaraṇāni samentī**”tiādi. **Uppannānaṃ uppannānanti** utṭhitānaṃ utṭhitānaṃ. **Samathatthanti** samanattaṃ.

“**Aṭṭhārasahi vatthūhī**”ti lakkhaṇavacanamaṃ yathā “yadi me byādhī dāheyyuṃ dātābbamidamosadha”nti, tasmā tesu aññātarāññātarena vivadantā “**aṭṭhārasahi vatthūhī vivadantī**”ti vuccanti. **Upavadanāti** akkoso. **Codanāti** anuyogo.

Adhikaraṇassa sammukhāva vinayanato **sammukhāvinayo**. Sannipatitaparīsāya dhammavādīnaṃ yebhuyyātāya yebhuyyasikakammassa karaṇaṃ **yebhuyyasikā**. **Ayanti** ayaṃ yathāvuttā catubbidhā sammukhatā **sammukhāvinayo nāma**.

**Saṅghasāmaggivasena sammukhībhāvo**, na yathā tathā kārapuggalānaṃ sammukhatā. **Bhūtatāti** tacchatā. Saccapariyāyo hi idha **dhamma**-saddo “dhammavādī”tiādīsu (dī. ni. 1.9, 194) viya. Vineti etenāti **vinayo**, tassa tassa adhikaraṇassa vūpasamanāya bhagavatā vuttavidhi, tassa vinayassa sammukhatā **vinayasammukhatā**. Tenāha “**yathā taṃ...pe... sammukhatā**”ti. **Yenāti** yena puggalena. Vivādavatthusāṅkhāte atthe paccatthikā **atthapaccatthikā**. **Saṅghasammukhatā parihāyati** sammatapuggaleheva vūpasamanato.

Nanti vivādādhikaraṇaṃ. “Na chandāgatiṃ gacchatī”tiādīnā vuttaṃ **pañcaṅgasamannāgataṃ**. **Gulhakādīsu** alajjussannāya parīsāya gulhako salākaggāho kātabbo lajjussannāya vivaṭako, bālussannāya sakaṇṇajappako. Yassā kiriyāya dhammavādīno bahutarā, sā **yebhuyyasikāti** āha “**dhammavādīnaṃ yebhuyyatāyā**”tiādi.

“**Catūhi samathehi sammatī**”ti idaṃ sabbasaṅgāhikavasena vuttaṃ. Tattha pana dvīhi dvīhi eva vūpasamanaṃ daṭṭhabbaṃ. **Evam vinicchitanti** sace āpatti natthi, ubho khamāpetvā, atha atthi, āpattiṃ dassetvā ropanavasena vinicchitaṃ. Paṭikammaṃ pana āpattādhikaraṇasamathe parato āgamissati.

Na samaṇasārappaṃ **assāmaṇakaṃ**, samaṇehi akattabbaṃ, tasmim. **Ajjhācāre** vītikkame sati.

**Paṭicaratoti** paṭicchādentaṃ. Pāpussannātāya **pāpiyo**, puggalo, tassa kattabbakammaṃ **tassa pāpiyasikam**. **Sammukhāvinayeneva vūpasamo natthi** paṭiññāya tathārūpāya, khantiyā vā vinā avūpasamanato.

**Etthāti** āpattidesanāya. Paṭiññāte āpannabhāvādike karaṇaṃ kiriyā “āyatim saṃvareyyāsī”ti, parivāsādānādivasena ca pavattaṃ vacīkammaṃ **paṭiññātakaraṇaṃ**.



**Yathānurūpanti** “dvīhi samathehi catūhi tīhi ekenā”ti evaṃ vuttanayena yathānurūpaṃ. **Etthāti** imasmiṃ sutte, imasmiṃ vā samathavicāre. **Vinicchayanayoti** vinicchaye nayamattaṃ. Tenāha “**vitthāro panā**”tiādi. **Samantapāsādikāyaṃ** vinayaṭṭhakathāya (cūḷava. aṭṭha. 184-187) **vutto**, tasmā vuttanayeneva vedītabboti adhippāyo.

Sattakavaṇṇanā niṭṭhitā.

Niṭṭhitā ca dutiyabhāṇavāraṇṇanā.

### Aṭṭhakavaṇṇanā

**333. Ayāthāvāti** na yāthāvā. Aniyānikatāya **micchāsabhāvā**. Viparītavuttikatāya **yāthāvā**. Niyyānikatāya **sammāsabhāvā** aviparītavuttikā.

**334.** Kucchitaṃ sīdatīti **kusīto** da-kārassa ta-kāraṃ katvā. Yassa dhammassa vasena puggalo “kusīto”ti vuccati, so kusītabhāvo idha **kusīta**-saddena vutto. Vināpi hi bhāvajotanaṃ saddaṃ bhāvattho viññāyati yathā “paṭassa sukka”nti, tasmā kusītabhāvavattthūnīti attho. Tenāha “**kosajjakāraṇānīti attho**”ti. **Kammaṃ** nāma samaṇasārappaṃ īdisanti āha “**cīvaravicāraṇādī**”ti. **Vīriyanti** padhānavīriyaṃ, taṃ pana caṅkamanavasena karaṇe “kāyika”ntipi vattabbaṃ labhatīti āha “**duvidhampi**”ti. **Pattiyāti** pāpuṇanattham. **Osīdananti** bhāvanānuyoge saṅkoco. Māsehi ācītaṃ nicītaṃ viyāti **māsācītaṃ**, taṃ **maññe**. Yasmā māsā tintāvisesena garukā honti, tasmā “**yathā tintamāso**”tiādi vuttaṃ. **Vuṭṭhito hoti** gilānabhāvāti adhippāyo.

**335. Tesanti** ārambhavatthūnaṃ. **Imināva nāyenti** iminā kusītavattthūsu vutteneva nāyena. “Duvidhampi vīriyaṃ ārabhatī”tiādinā, “**idaṃ paṭhamanti** idaṃ handāhaṃ vīriyaṃ ārabhāmīti evaṃ bhāvanāya abbhussahaṇaṃ paṭhamaṃ ārambhavatthū”tiādinā ca **attho vedītabbo**. Yathā tathā paṭhamaṃ pavattaṃ abbhussahaṇāhi upari vīriyārambhassa kāraṇaṃ hoti. Anurūpapaccavekkhaṇāsahitāni hi abbhussahaṇāni, tammūlakāni vā paccavekkhaṇāni aṭṭha ārambhavatthūni vedītabbāni.

**336. Āsajjāti** yassa deti, tassa āmodanahetu tena samāgamanimittaṃ. Tenāha “**ettha āsādanaṃ dānakāraṇaṃ nāmā**”ti. **Bhayāti** bhayaheṭṭhi. Nanu bhayaṃ nāma laddhukāmatā rāgādayo viya cetaṇāya avisuddhikaraṃ, taṃ kasmā idha gahitanti? Na idaṃ tādisaṃ corabhayādiṃ sandhāya vuttanti dassetuṃ “**tatthā**”tiādi vuttaṃ. **Adāsi meti** yaṃ pubbe kataṃ upakāraṃ cintevā dīyati, taṃ sandhāya vuttaṃ. **Dassati meti** paccupakārāsīsāya yaṃ dīyati, taṃ sandhāya vadati. **Sāhu dānanti** “dānaṃ nāmetam paṇḍitapaññatta”nti sādhusamācāre ṭhatvā deti. **Alānkāratthanti** upasobhanattham. **Parivāratthanti** parikkhārattham. Dānañhi datvā taṃ paccavekkhantassa pāmojjapītisomanassādayo uppajjanti, lobhadosaissāmaccherādayo vidūrī bhavanti. Idāni dānaṃ anukūladhammaparibrūhanena, paccanīkadhammavidūrībhāvakaṇaṇena ca bhāvanācīttassa upasobhanāya ca parikkhārāya ca hotīti “alānkārattham, parivāratthāñca detī”ti vuttaṃ. Tenāha “**dānañhi cittaṃ mudukaṃ karotī**”tiādi. **Muducitto hoti** laddhā dāyake “iminā mayhaṃ saṅgaho kato”ti, dātāpi laddhari. Tena vuttaṃ “**ubhinnaṃpi cittaṃ mudukaṃ karotī**”ti.

**Adantadamananti** adantā anassavāpissa dānena dantā assavā honti vase vattanti. **Adānaṃ dantadūsakanti** adānaṃ pana pubbe dantānaṃ assavānampi vighātuppādanena cittaṃ dūseti. **Unnamanti** dāyaka, piyaṃvadā ca paresaṃ garucittikāraṭṭhānatāya. **Namanti** paṭiggāhaka **dānena**, **piyavācāya** laddhasaṅgahā saṅgāhakaṇaṃ.

**Cittālaṅkāradānameva uttamaṃ** anupakkiliṭṭhatāya, suparisuddhatāya, guṇavisesapaccayatāya ca.

**337. Dānapaccayāti** dānakāraṇā, dānamayapuññassa katattā upacittatī attho. **Upapattiyoti** manussesu, devesu ca nibbattiyo. **Ṭhapetīti** ekavārameva anuppajjitvā yathā uparūpari tenevākārena pavattati, evaṃ ṭhapeti. Tadeva casa **adhīṭṭhānanti** āha “**tasseva vevacana**”nti. **Vaḍḍhetīti** brūheti, na hāpeti. **Vimuttanti** adhimuttaṃ, ninnaṃ poṇaṃ pabbhārenti attho. **Vimuttanti** vā viṣiṭṭhaṃ. Nīppariyāyato **uttari** nāma paṇītaṃ majjhēpi hīnamajjhimavibhāgassa labbhanatoti vuttaṃ “**uttari abhāvītanti tato upari maggaphalattāya abhāvita**”nti. **Samvattati** tathā paṇihitaṃ dānamayacittaṃ. Yaṃ pana pāḷiyāṃ “tañca kho”tiādi vuttaṃ, taṃ tatrūpapattiyā vibandhakāradussīlyābhāvadassanaparaṃ daṭṭhabbaṃ, na dānamayassa puññassa kevalassa taṃsaṃvattanatādassanaparanti daṭṭhabbaṃ.

**Samucchinnarāgassāti** samucchinnakāmarāgassa. Tassa hi siyā brahmaloke upapatti, na samucchinnabhavarāgassa. **Vītarāgaggahaṇena** cettha kāmesu vītarāgatā adhippetā, yāya brahmalokūpapatti siyā. Tenāha “**dānamattenevā**”tiādi. Yadi evaṃ dānaṃ tattha kiṃ atthiyanti āha “**dānaṃ panā**”tiādi. **Dānena muducittoti** baddhāghāte verīpuggalepi attano dānasampañcchanena mudubhūtacitto.

Parisīdati parito ito cito ca samāgacchatīti **parisā**, samūho.

**Lokassa dhammāti** sattalokassa avassambhāvī dhammā. Tenāha “**etehi mutto nāma natthi**”tiādi. Yasmā te lokadhammā aparāparaṃ kadāci lokaṃ anupatanti, kadāci te loko, tasmā tañcetha atthaṃ dassento “atṭhime”ti suttapadaṃ (a. ni. 8.6) āhari. Ghāsacchādanādīnaṃ laddhi **lābho**, tāni eva vā laddhabbato **lābho**. Tadabhāvo **alābho**. **Lābhaggahaṇena** cettha tabbisayo anurodho gahito, **alābhaggahaṇena** virodho. Yasmā lohite sati tadupaghātavasena pubbo viya anurodhe sati virodho laddhāvasaro eva hoti, tasmā vuttaṃ “**lābhe āgate alābho āgato evā**”ti. Esa nayo yasādīsupi.

Atṭhakavaṇṇanā niṭṭhitā.

### Navakavaṇṇanā

**340.** Vasati tattha phalaṃ tannimittakatāya pavattatīti **vatthu**, kāraṇanti vuttovāyamattho. Tenāha “**āghātavattūnīti āghātakāraṇāni**”ti. Kopo nāmāyaṃ yasmim vattusmim uppajjati, na tattha ekavārameva uppajjati, atha kho punapi uppajjatevāti vuttaṃ “**bandhati**”ti. Atha vā yo paccayavisesena uppajjamāno āghāto savisaye baddho viya na vigacchati, punapi uppajjeyyeva, taṃ sandhāyāha “**āghātaṃ bandhati**”ti. Taṃ panassa paccayavasena nibbattaṃ uppādanamevāti vuttaṃ “**karoti uppādeti**”ti.

**Taṃ kutettha labbhāti** ettha tanti kiriyāparāmasanaṃ, padajjhāhārena ca attho veditabboti dassento “**taṃ anattacaraṇaṃ mā ahoṣi**”tiādimāha. **Kena kāraṇena laddhabbaṃ** niratthakabhāvato. Kammassakā hi sattā, te kassa ruciyā dukkhitā, sukhitā vā bhavanti, tasmā kevalaṃ tasmim mayhaṃ kujjhanamattaṃ evāti adhippāyo. **Atha vā taṃ kopakaraṇamettha puggale kuto labbhā** paramatthato kujjhitabbassa, kujjhanakassa ca abhāvato. Saṅkhāramattañhettaṃ, yadidaṃ khandhapañcakaṃ. Yaṃ “satto”ti vuccati, te saṅkhārā ittarakālā khaṇikā, kassa ko kujjhatīti attho. **Lābhā nāma ke siyuma** aññatra anuppattito.

**341.** Sattā āvasanti etesūti **sattāvāsā**. Nānattakāyā nānattasaññī ādibhedā sattanikāyā. Yasmā te te sattanikāyā tappariyāpannānaṃ sattānaṃ tāya eva tappariyāpannatāya ādhāro viya vattabbataṃ arahanti samudāyādhāratāya avayavassa yathā “rukkhe sākha”ti, tasmā “**sattānaṃ āvāsā, vasanaṭṭhānānīti attho**”ti vuttaṃ. **Suddhāvāsāpi sattāvāsova** “na so, bhikkhave, sattāvāso sulabharūpo, yo mayā anāvutthapubbo iminā dīghena addhunā aññatra suddhāvāsehi devehi”ti vacanato. Yadi evaṃ kasmā idha na gahitāti tattha kāraṇamāha “**asabbakālikattā**”tiādi. Vehapphalo pana catutthaṃyeva sattāvāsaṃ bhajātīti daṭṭhabbaṃ.

**342. Opasamikoti** vaṭṭadukkassa upasamāvaho, taṃ pana vaṭṭadukkhaṃ kilesesu upasantesu upasamati, na aññathā, tasmā “**kilesūpasamakaro**”ti vuttaṃ. Takkaraṃ sambodhaṃ gametīti **sambodhagāmī**.

Yasmiṃ devanikāye dhammadesanā na viyujjati savanasseva abhāvato, so pāḷiyaṃ “**dīghāyuko devanikāyo**”ti adhippetoti āha “**asaññabhavaṃ vā arūpabhavaṃ vā**”ti.

**343.** Anupubbato viharitabbāti **anupubbavihārā. Anupaṭipāṭiyāti** anukkamena. **Samāpajjitabbavihārāti** samāpajjitvā samaṅgino hutvā viharitabbavihārā.

**344. Anupubbanirodhāti** anupubbena anukkamena pavattetabbanirodhā. Tenāha “**anupaṭipāṭiyā nirodhā**”ti.

Navakavaṇṇanā niṭṭhitā.

### Dasakavaṇṇanā

**345.** Yehi sīlādīhi samannāgato bhikkhu dhammasaraṇatāya dhammeneva nāthati īsati abhibhavatīti **nāthoti** vuccati, te tassa nāthabhāvakarā dhammā “**nāthakaraṇā**”ti vuttāti āha “**sanāthā...pe... patiṭṭhākarā dhammā**”ti. Tattha **attano patiṭṭhākarāti** yassa nāthabhāvakarā, tassa attano patiṭṭhāvīdhāyino. Appatiṭṭho anātho, sappatiṭṭho sanāthoti patiṭṭhattho nāthattho.

Kalyāṇaguṇayogato **kalyāṇāti** dassento “**sīlādiguṇasampannā**”ti āha. Mijjanalakkhaṇā mittā etassa atthīti **mitto**, so vuttanayena kalyāṇo assa atthīti tassa atthitāmatṭaṃ kalyāṇamittapadena vuttaṃ. Assa tena sabbakālaṃ avijahitavāsoti taṃ dassetuṃ “**kalyāṇasahāyo**”ti vuttanti āha “**tevassā**”tiādi. **Tevassāti** te eva kalyāṇamittā assa bhikkhuno. **Saha ayanatoti** saha vattanato. Asamodhāne **cittena**, samodhāne pana **cittena ceva kāyena ca sampavaṅko**.

Sukhaṃ vaco etasmiṃ anukūlagāhimhi ādaragāravavati puggaleti **suvaco**. Tenāha “**sukhena vattabbo**”tiādi. **Khamoti** khantā, tamevassa khamabhāvaṃ dassetuṃ “**gāḷhenā**”tiādi vuttaṃ. **Vāmatoti** micchā, ayoniso vā **gaṇhāti. Paṭippharatīti** paṭṇṇikabhāvena tiṭṭhati. **Padakkhiṇaṃ gaṇhātīti** sammā yoniso vā gaṇhāti.

**Uccāvacānīti** vipulakhuddakāni. **Tatrupagamānīyāti** tatra tatra mahante, khuddake ca kamme sādhanavasena upāyena upagacchantiyā, tassa tassa kammaṃsa nipphādanena samatthāyāti attho. **Tatrupāyāyāti** vā tatra tatra kamme sādhetabbe upāyabhūtāya.

**Dhamme assa kāmoti dhammakāmoti** byadhikaraṇānaṃpi bāhirattho samāso hotīti katvā vuttaṃ. Kāmetabbato vā piyāyitabbato **kāmo**, dhammo; dhammo kāmo assāti **dhammakāmo. Dhammoti** pariyattidhammo adhippetoti āha “**tepiṭakaṃ buddhavacanaṃ piyāyatīti attho**”ti. Samudāharaṇaṃ kathanāṃ **samudāhāro**, piyo samudāhāro etassāti **piyasamudāhāro. Sayañcāti** ettha **ca-saddena** “**sakkacca**”nti padaṃ anukaḍḍhati, tena sayañca sakkaccaṃ desetukāmo hotīti yojanā. **Abhidhammo sattappakaraṇāni** adhiko abhivisiṭṭho ca pariyattidhammoti katvā. **Vinayo ubhatovibhaṅgā** vinayanato kāyavācānaṃ. **Abhivinayo khandhakaparivārā** visesato ābhisamācārikadhammakittanato. Ābhisamācārikadhammapāripūrivāseneva hi ādibrahmacariyakadhammapāripūrī. **Dhammo eva** piṭakadvayassāpi pariyattidhammabhāvato. **Maggaphalāni abhidhammo** nibbānadhammassa abhimukhoti katvā. **Kilesavūpasamakāraṇaṃ** pubbhāgiyā tisso sikkhā saṅkhepato vivatṭanissito samatho vipassanā ca. **Bahulapāmojjoti** balavapāmojjo.

**Kāraṇattheti** nimittatthe. Kusaladhammanimittāṃ hissa vīriyārambho. Tenāha “**tesaṃ**

**adhigamatthāyā**”ti. **Kusalesu dhammesūti** vā nipphādetabbe bhummam yathā “cetaso avūpasame ayonisomanasikārapadaṭṭhāna”nti.

**346. Sakalaṭṭhenāti** nissesatṭhena, anavasesapharaṇavasena cettha sakalaṭṭho veditabbo, asubhanimittādīsu viya ekadese aṭṭhatvā anavasesato gahetabbaṭṭhenāti attho. **Tadārammaṇānaṃ dhammānanti** taṃ kasiṇam ārabba pavattanakadhammānaṃ. **Khettaṭṭhenāti** uppattiṭṭhānaṭṭhena. **Adhiṭṭhānaṭṭhenāti** pavattiṭṭhānabhāvena. Yathā khettaṃ sassānaṃ uppattiṭṭhānaṃ vaḍḍhiṭṭhānaṃ, evameva jhānaṃ taṃsāmpayuttānaṃ dhammānanti, yogino vā sukhavisesānaṃ kāraṇabhāvena. **“Paricchinditvā”** ti idaṃ **uddham adhoti** etthāpi yojetabbaṃ. Paricchinditvā eva hi sabbattha kasiṇam vaḍḍhetabbaṃ. **Tena tena vā kāraṇenāti** tena tena upariādīsu kasiṇavaḍḍhanakāraṇena. Yathā kinti āha **“ālokaṃ rūpadassanakāmo”**ti. Yathā dibbacakkhunā uddham ce rūpaṃ daṭṭhukāmo, uddham ālokaṃ pasāreti, adho ce adho, samantato ce rūpaṃ daṭṭhukāmo samantato ālokaṃ pasāreti; evameva kasiṇanti attho.

**Ekassāti** pathavīkasiṇādīsu ekekassa. **Aññabhāvānupagamanatthanti** aññakasiṇabhāvānupagamanadīpanattham, aññassa vā kasiṇabhāvānupagamanadīpanattham, na hi aññena pasāritakasiṇam tato aññena pasāritakasiṇabhāvaṃ upagacchati, evampi nesaṃ aññakasiṇasambhedābhāvo veditabbo. **Na aññaṃ** pathavīdī. Na hi uduke ṭhitatṭhāne sasambhārapathavī atthi. **Añña kasiṇasambhedoti** āpokasiṇādīnaṃ saṅkaro. **Sabbatthāti** sabbesu sesakasiṇesu. Ekadese aṭṭhatvā anavasesapharaṇam pamāṇassa aggahaṇato **appamāṇam**. Teneva hi nesaṃ kasiṇasamañña. Tathā cāha **“tañhi”**ti. **Cetasā pharantoti** bhāvanācittena ārammaṇam karonto. Bhāvanācittaṃhi kasiṇam parittaṃ vā vipulaṃ vā sakalameva manasi karoti, na ekadesam.

**Kasiṇugghāṭimākāse pavattaviññānaṃ** pharaṇaappamāṇavasena **“viññāṇakasiṇa”**nti vuttaṃ. Tathā hi taṃ “viññāṇaṃ”nti vuccati. **Kasiṇavasenaṭi** yathāugghāṭitakasiṇavasena. **Kasiṇugghāṭimākāse uddhamadhotiriyatā veditabbā**. Yattakañhi ṭhānaṃ kasiṇam pasāritaṃ, tattakaṃ ākāsaṃ bhāvanāvasena ākāso hotīti; evaṃ yattakaṃ ṭhānaṃ ākāsaṃ hutvā upaṭṭhitam, tattakaṃ sakalameva pharivā viññāṇassa pavattanato āgamanavasena viññāṇakasiṇepi uddhamadhotiriyatā vuttāti āha “kasiṇugghāṭim ākāsavasena tatha pavattaviññāṇe uddhamadhotiriyatā veditabbā”ti.

### Akusalakammapathadasakavaṇṇanā

**347. Pathabhūtattāti** tesam pavattanupāyattā maggabhūtattā. **Methunasamācāresūti** sadārasantosaparadāragamanavasena duvidhesu methunasamācāresu. Tepi hi kāmetabbato kāmaṃ nāma. **Methunavatthūsūti** methunassa vatthūsū tesu sattesu. **Micchācāroti** gārayhācāro. **Gārayhatā** cassa ekantanīnatāya evāti āha **“ekantanindito lāmakācāro”**ti. **Asaddhammādhippāyenāti** asaddhammasevanādhippāyena.

Sagottehi rakkhitā **gottarakkhitā**. Sahadhammikehi rakkhitā **dhammarakkhitā**. Sassāmikā **sārakkhā**. Yassā gamane raññaṃ daṇḍo ṭhapito, sā **saparidaṇḍā**. Bhariyābhāvattham dhanena kītā **dhanakkītā**. Chandena vasantī **chandavāsini**. Bhogattam vasantī **bhogavāsini**. Paṭattam vasantī **paṭavāsini**. Udukapattam āmasitvā gahitā **odapattakinī**. Cumbaṃ apanetvā gahitā **obhatacumbaṭā**. Karamarānītā **dhajāhaṭā**. Taṅkhaṇikā **muhuttikā**. Abhibhavitvā vītikkame micchācāro mahāsāvajjo, na tathā dvinnam samānacchandatāya. “Abhibhavitvā vītikkamane satipi maggenamaggapaṭipattiadhivāsane purimuppānasevanābhisandhippayogābhāvato micchācāro na hoti abhibhuyyamanassā”ti vadanti. Sevanacitte sati payogābhāvo appamāṇam yebhuyyena itthiyā sevanapayogassa bhāvato. Tasmim asati puretaram sevanacittassa upaṭṭhāpanepi tassā micchācāro na siyā, tathā purisassapi sevanapayogābhāveti. Tasmā attano ruciyā pavattitassa vasena tayo balakkārena pavattitassa vasena tayoti sabbepi aggahitaggahaṇena **“cattāro sambhārā”**ti vuttaṃ.

Upasaggavasena atthavisesavācino dhātusaddāti **“abhijjhāyati”**ti padassa

“**parabhaṇḍābhimukhī**”tiādinā attho vutto. Tattha **tanninnatāyāti** tasmiṃ parabhaṇḍe lubbhanavasena ninnatāyāti ayamettha adhippāyo veditabbo. **Abhipubbo** vā **jhā**-saddo lubbhane nirulho daṭṭhabbo. Upasaggavasena atthavisesavācino eva dhātusaddā. Adinnādānassa appasāvajjamahāsāvajjatā **brahmajālavaṇṇanāyaṃ** (dī. ni. aṭṭha. cūlasīlavaṇṇanā) vuttāti āha “**adinnādānaṃ viya appasāvajjā, mahāsāvajjā cā**”ti. Tasmā “yassa bhaṇḍaṃ abhijjhāyati, tassa appaṇṇatāya appasāvajjatā, mahāṇṇatāya mahāsāvajjatā”tiādinā appasāvajjamahāsāvajjavibhāgo veditabbo. **Attano pariṇāmanaṃ** cittenevāti veditabbaṃ.

**Hitasukhaṃ byāpādayatī**ti yo naṃ uppādeti, tassa yaṃ pati cittaṃ uppādeti, tassa tassa sati samavāye hitasukhaṃ vināseti. Pharusavācāya appasāvajjamahāsāvajjatā brahmajālavaṇṇanāyaṃ vibhāvītāti āha “**pharusavācā viyā**”tiādi. Tasmā “yaṃ pati cittaṃ byāpādeti, tassa appaṇṇatāya appasāvajjo, mahāṇṇatāya mahāsāvajjo”tiādinā tadubhayavibhāgo veditabbo. “**Aho vatā**”ti iminā parassa accantāya vināsacintanaṃ dipeti. Evañhi ssa dāruṇappavattiyā kammaṭṭhappavattī.

**Yathābhuccagahaṇābhāvenāti** yāthāvagahaṇassa abhāvena aniccādisabhāvassa niccādito gahaṇena. **Micchā passatī**ti vitathaṃ passati. “**Samphappalāpo viyā**”ti iminā āsevanassa mandatāya appasāvajjataṃ, mahantatāya mahāsāvajjataṃ dasseti. **Gahitākāraviparītātī** micchādīṭṭhiyā gahitākāraviparītābhāvo. **Vatthunoti** tassa ayathābhūtasabhāvamāha. **Tathābhāvenāti** gahitākāreneva viparītākāreneva. **Tassa** dīṭṭhigatikassa, **tassa** vā vatthuno **upaṭṭhānaṃ**, “evametthaṃ na ito aññāthā”ti.

**Dhammatoti** sabhāvato. **Koṭṭhāsototi** phassapañcamakādīsu cittaṅgakoṭṭhāsesu ye koṭṭhāsā honti, tatoti attho.

**Cetanādhammāti** cetanāsabhāvā.

“Paṭipāṭiyā sattā”ti ettha nanu cetanā abhidhamme kammaṭṭhesu na vuttāti paṭipāṭiyā sattannaṃ kammaṭṭhabhāvo na yuttoti? Na, avacanassa aññāhetukattā. Na hi tattha cetanāya akammaṭṭhappattattā (dha. sa. mūlaṭī. akusalakammaṭṭhakathāvaṇṇanā) kammaṭṭharāsīmhi avacanaṃ, kadāci pana kammaṭṭho hoti, na sabbadāti kammaṭṭhabhāvassa aniyatattā avacanaṃ. Yadā pana kammaṭṭho hoti, tadā kammaṭṭharāsisaṅgaho na nivārito.

Etthāha – yadi cetanāya sabbadā kammaṭṭhabhāvābhāvato aniyato kammaṭṭhabhāvoti kammaṭṭharāsīmhi avacanaṃ, nanu abhijjhādīnampi kammaṭṭhabhāvamaṃ appattānaṃ atthitāya aniyato kammaṭṭhabhāvoti tesampi kammaṭṭharāsīmhi avacanaṃ āpajjatīti? Nāpajjati kammaṭṭhatātamaṃsabhāgatā hi tesamaṃ tattha vuttattā. Yadi evamaṃ cetanāpi tattha vattabbā siyāti? Saccametthaṃ, sā pana pāṇātipātādikāvāti pākaṭo tassā kammaṭṭhabhāvoti na vuttaṃ siyā. Cetanāya hi “cetanāhaṃ, bhikkhave, kammaṃ vadāmi (a. ni. 6.63; kathā. 539), tividhā, bhikkhave, kāyasañcetanā akusalaṃ kāyakamma”nti (kathā. 539) vacanato kammabhāvo pākaṭo; kammaṃyeva ca sugatiduggatīnaṃ, taduppajjanasukhadukkhānañca pathabhāvena pavattaṃ “kammaṭṭho”ti vuccatīti pākaṭo tassā kammaṭṭhabhāvo. Abhijjhādīnaṃ pana cetanāsamīhanabhāvena sucaritaduccaritabhāvo, cetanājanitabhāvena [cetanājanitatambandhatibhāvena (dha. sa. anuṭī. akusalakammaṭṭhāvaṇṇanā)] sugatiduggatitaduppajjanasukhadukkhānaṃ pathabhāvo cāti na tathā pākaṭo kammaṭṭhabhāvoti te eva tena sabhāvena dassetuṃ abhidhamme cetanā kammaṭṭhabhāve na vuttā, atathājātiyattā vā cetanā tehi saddhiṃ na vuttāti daṭṭhabbaṃ. **Mūlaṃ patvāti** mūladesanaṃ patvā, mūlasabhāvesu dhammesu desiyamānesūti attho.

“**Adinnādānaṃ sattārammaṇa**”nti idaṃ “pañcasikkhāpadā parittārammaṇā evā”ti imāya pañhapucchakapāliyā (vibha. 715) virujjhati. Yañhi pāṇātipātādīdussīlyassa ārammaṇaṃ, tadeva taṃveramaṇiyā ārammaṇaṃ. Vītikkamitabbavatthuto eva hi viratīti. **Sattārammaṇanti** vā sattasaṅkhātasaṅkhārārammaṇaṃ, tameva upādāya vuttanti na koci virodho. Tathā hi vuttaṃ **sammohavinodaniyaṃ** “yāni sikkhāpadāni ettha ‘sattārammaṇāni’ti vuttāni, tāni yasmā sattoti

saṅkhaṃ gate saṅkhāreyeva ārammaṇaṃ karontī”ti. (Vibha. aṭṭha. 714) esa nayo ito paresupi. Visabhāgavatthuno “itthī puriso”ti gahetabbato “**sattārammaṇo**”ti eke. “Eko diṭṭho, dve sutā”tiādinaṃ samphappalāpena **diṭṭhasutamutaviññātavasena. Tathā abhijjhāti** ettha **tathā-saddo** “diṭṭhasutamutaviññātavasenā” tidampi upasaṃharati, na sattasaṅkhārārammaṇatameva dassanādivasena abhijjhāyanato. “Natthi sattā opapātikā”ti (dī. ni. 1.171) pavattamānāpi micchādiṭṭhi tebhūmakadhammavisayā evāti adhippāyenassā saṅkhārārammaṇatā vuttā. Kathaṃ pana micchādiṭṭhiyā sabbe tebhūmakadhammā ārammaṇaṃ hotīti? Sādhāraṇato. “Natthi sukata dukkaṭānaṃ kammānaṃ phalaṃ vipāko”ti (dī. ni. 1.171; ma. ni. 2.94) pavattamānāya atthato rūpārūpāvacaradhammāpi gahitā eva hontīti.

Sukhabahulatāya rājāno hasamānāpi “ghāthethā”ti vadanti, hāso pana nesam attavūpasamādiaññavisayoti āha “**sanniṭṭhāpaka...pe... hoti**”ti. **Majjhattedano na hoti**, sukhavedano va ettha sambhavatīti. Musāvādo lobhasamuṭṭhāno sukhavedano vā siyā majjhattedano vā, dosasamuṭṭhāno dukkhavedano vāti **musāvādo tivedano**. Iminā nayena sesesupi yathārahaṃ vedanābhedo veditabbo.

**Dosamohavasena dvimūlakoti** sampayuttamūlameva sandhāya vuttaṃ. Tassa hi mūlaṭṭhena upakārahāvo. Nidānamūle pana gayhamāne “lobhamohavasenaṃ”ti vattabbaṃ siyā. Āmisakiñjakkhahetupi pāṇaṃ hananti. Tenevāha – “lobho nidānaṃ kammānaṃ samudayāyā”tiādi (a. ni. 3.34). Sesesupi ese va nayo.

### Kusalakammapathadasakavaṇṇanā

**Pāṇātipātā ...pe... veditabbāni** lokiyalokuttaramissakavasenettha kusalakammapathānaṃ desitattā. Verahetutāya verasaññitaṃ pāṇātipātādipāpadhammaṃ maṇati “mayi idha ṭhitāya kathaṃ āgacchasi”ti tajjantī viya nīharatīti **veramaṇī**, viramati etāyāti vā “viramaṇī”ti vattabbe niruttinayena “**veramaṇī**”ti vuttaṃ. Samādānavasena uppānā virati **samādānavirati**. Asamādinnaṣīlassa sampattato yathāupaṭṭhitavītikkamitabbavatthuto virati **sampattavirati**. Kilesānaṃ samucchindanavasena pavattā maggasampayuttā virati **samucchedavirati**. Kāmañcetha pāliyaṃ viratiyeva āgatā, **sikkhāpadavibhaṅge** (vibha. 703) pana cetanāpi āharitvā dassitāti tadubhayampi gaṇhanto “**cetanāpi vattanti viratiyopi**”ti āha. **Anabhijjhā hi mūlaṃ patvāti** kammapathakoṭṭhāse “anabhijjhā”ti vuttadhammo mūlato **alobho kusalamūlaṃ hotīti** evamettha attho daṭṭhabbo. Sesapadadvayepi ese va nayo.

Dussīlyārammaṇā tadārammaṇajīvitindriyādiārammaṇā kathaṃ dussīlyāni pajahantīti taṃ dassetuṃ “**yathā panā**”tiādi vuttaṃ. **Pajahantīti veditabbā** pāṇātipātādīhi viramaṇavaseneva pavattanato. Atha tadārammaṇabhāve, na so tāni pajahati. Na hi tadeva ārabha taṃ pajahituṃ sakkā tato avinissaṭabhāvato.

**Anabhijjhā...pe... viramantassāti** abhijjhaṃ pajahantassāti attho. Na hi manoduccaritato virati atthi anabhijjhādīheva tappahānasiddhito.

### Ariyavāsadasakavaṇṇanā

**348.** Ariyānameva vāsāti **ariyavāsā** anariyānaṃ tādīsānaṃ asambhavato. **Ariyāti** cetha ukkaṭṭhaniddesena khīṇāsavā gahitā, te ca yasmā tehi sabbakālaṃ avirahitavāsā eva, tasmā vuttaṃ “**ariyā eva vasimsu vasanti vasissanti**”ti. Tattha **vasimsūti** nissāya vasimsu.

Pañcaṅgavippahīnattādayo hi ariyānaṃ apassayā. Tesu pañcaṅgavippahānapaccekasaccapanodanaesanaṣamavayavissajjanāni “saṅkhāyekaṃ paṭisevati, adhivāseti, parivajjeti, vinodeti”ti vuttetu apassenesu vinodanañca maggakiccāneva, itare maggeneva samijjhanti.

**Ñāṇādayoti** ñāṇaṅceva taṃsampayuttadhammā ca. Tenāha “**ñāṇanti vutte**”tiādi. Tattha vattabbaṃ heṭṭhā vuttameva.

**Ārakkhakkiccam sādheti** sativepullappattattā. “**Carato**”tiādinā niccāsamādānaṃ dasseti, taṃ vikkhepābhāvena daṭṭhabbaṃ.

**Pabbajjupagatāti** yaṃ kiñci pabbajjaṃ upagatā, na samitapāpā. **Bhovādinoti** jātimattabrāhmaṇe vadati. **Pāṭekkasaccānīti** tehi tehi diṭṭhigatikehi pāṭiyekkaṃ gahitāni “idameva sacca”nti (ma. ni. 2.187, 203, 427; 3.27; udā. 55; netti. 59) abhiniviṭṭhāni diṭṭhisaccādīni. Diṭṭhigatānīpi hi “idameva sacca”nti (ma. ni. 2.187, 202, 427; 3.27, 29; netti. 59) gahaṇaṃ upādāya “saccānī”ti voharīyanti. Tenāha “**idamevā**”tiādi. **Nīhaṭānīti** attano santānato nīharitāni apanītāni. **Gahitaggahaṇassāti** ariyamaggādhigamato pubbe gahitassa diṭṭhigāhassa. **Vissaṭṭhabhāvavevacanānīti** ariyamaggena sabbaso pariccāgabhāvassa adhivacanāni.

Natthi etāsaṃ vayo vekalyanti **avayāti** āha “**anūnā**”ti, anavasesāti attho. **Esanāti** heṭṭhā vuttakāmesanādayo.

**Maggassa kiccanipphatti kathitā** rāgādīnaṃ pahīnabhāvādīpanato.

**Paccavekkhaṇāya phalaṃ kathitanti** paccavekkhaṇamukhena ariyaphalaṃ kathitaṃ. Adhigate hi aggaphale sabbaso rāgādīnaṃ anuppādadharmataṃ pajānāti, tañca pajānaṃ paccavekkhaṇañāṇanti.

### **Asekkhadhammasakavaṇṇanā**

Phalañca te sampayuttadhammā cāti **phalasampayuttadhammā**, ariyaphalasabhāvā sampayuttā dhammāti attho. **Phalasampayuttadhammāti** phaladhammā ceva taṃsampayuttadhammā cāti evamettha attho veditabbo. **Dvīsupi ṭhānesu paññāva kathitā** sammā dassanaṭṭhena **sammādiṭṭhi**, sammā jānanaṭṭhena **sammāñāṇanti** ca. Atthi hi dassanañānaṃ savisaye pavattiākāraviseso, svāyaṃ heṭṭhā dassito eva. **Phalasamāpattidhammāti** phalasamāpattiyaṃ dhammā, phalasamāpattisahagatadhammāti attho. Ariyaphalasampayuttadhammāpi hi sabbaso paṭipakkhato vimuttataṃ upādāya “vimutti”ti vattabbaṃ labhanti. Kenaci pana yathā asekkhā phalapaññā dassanakiccaṃ upādāya “sammādiṭṭhi”ti vuttā, jānanakiccaṃ upādāya “sammāñāṇa”ntipi vuttā eva; evaṃ ariyaphalasamādhi samādānaṭṭhaṃ upādāya “sammāsamādhi”ti vutto, vimuccanaṭṭhaṃ upādāya “sammāvimutti”ti vutto. Evañca katvā “anāsavaṃ cetovimutti”nti dutiyavimuttiggahaṇaṅca samatthitaṃ hotīti.

Dasakavaṇṇanā niṭṭhitā.

### **Pañhasamodhānavāṇṇanā**

**Samodhānetabbāti** samāharitabbā.

**349. Okappanāti** balavasaddhā. Āyatīṃ bhikkhūnaṃ avivādahetubhūtaṃ tattha tattha bhagavatā desitānaṃ atthānaṃ saṅgāyanaṃ **saṅgīti**, tassa ca kāraṇaṃ ayaṃ suttadesanā tathā pavattattāti vuttaṃ “**saṅgītipariyāyanti sāmaggīyā kāraṇa**”nti. **Samanuñño satthā ahoṣi** “paṭibhātu taṃ sārīputta, bhikkhūnaṃ dhammiṃ kathā”ti ussāhetvā ādito paṭṭhāya yāva pariyoṣanā suṇanto, sā panettha bhagavato samanunñatā “sādhu, sādhu”ti anumodanena pākāṭā jātāti vuttaṃ “**anumodanena samanunñō ahoṣi**”ti. **Jinabhāsito nāma jāto**, na sāvakaḥāsito. Yathā hi rājayuttehi likhitapaṇṇaṃ yāva rājamuddikāya na lañjitaṃ hoti, na tāva “rājapaṇṇa”nti saṅkhyāṃ gacchati, lañjitamattaṃ pana rājapaṇṇaṃ nāma hoti. Evameva “sādhu, sādhu sārīputtā”tiādi anumodanavacanasamsūcitāya

samanuññāsankhātāya jinavacanamuddāya lañjitattā ayaṃ suttanto jinabhāsito nāma jāto āhaccavacano. Yaṃ panettha atthato na vibhattaṃ, taṃ suviññeyyamevāti.

Saṅgītisuttavaṇṇanāya līnatthappakāsana.

## 11. Dasuttarasuttavaṇṇanā

**350. Āvuso bhikkhavi sāvakanāṃ ālapananti sāvakanāṃ āmantanavasena ālapanasamudācāro,** na kevalaṃ “bhikkhave”ti, so pana buddhānaṃ ālapanāṃ. Tenāha “**buddhā hi**”tiādi. Sattusamudācāravasena asamudācāro evettha satthu uccaṭṭhāne ṭhapanāṃ. Sampati āgatattā katthaci na nibaddho vāso etesanti **anibaddhavāsā**, antevāsikā. Kammatṭhānaṃ gahetvā sappāyasevāsanaṃ gavesantā yaṃ kiñci disaṃ gacchantīti **disāgamanīyā**. Idāni tamatthaṃ vitthārato dassetuṃ “**buddhakāle**”tiādi vuttaṃ.

**Asubhakammaṭṭhānanti** ekādasavidhaṃ asubhakammaṭṭhānaṃ. Tatthāpi puggalavemattataṃ ṇatvā tadanurūpaṃ tadanurūpameva deti. Mohacaritassapi kāmaṃ ānāpānassatikammaṭṭhānaṃ sappāyaṃ, kammatṭhānabhāvanāya pana bhājanabhūtaṃ kātuṃ sammohavigamāya paṭhamāṃ uddesapariucchādhammassavanadhammasākacchāsu niyojetabboti vuttaṃ “**mohacaritassa...pe... ācikkhati**”ti. Saddhācaritassa visesato purimā cha anussatiyo sappāyā, tasmaṃ pana anuyūñjane ayaṃ pubbhāgapaṭipattīti dassetuṃ “**pasādanīyasuttante**”tiādi vuttaṃ. **Ñāṇacaritassāti** buddhacaritassa, tassa pana maraṇassati, upasamānussati, catudhātuvavattānaṃ, āhārepaṭikūlasaṅgā visesato sappāyā, tesamā pana upakāradhammadassanattaṃ “**aniccatādi...pe... katheti**”ti vuttaṃ. **Tatthevāti** satthu santike eva. **Temāsikaṃ paṭipadanti** tīhi māsehi sannitṭhāpetabbaṃ paṭipadaṃ.

**Ime bhikkhūti** imissā dhammadesanāya bhājanabhūtā bhikkhū. “**Evam āgantvā gacchante pana bhikkhū**”ti idaṃ “buddhakāle”tiādinā taduddesikavasena vuttabhikkhū sandhāya vuttaṃ, na “ime bhikkhū”ti anantaraṃ vuttabhikkhū. Tenāha “**peseti**”ti. **Apalokethāti** āpucchatha. “**Paṇḍitā**”tiādi sevābhājanesu kāraṇavacanaṃ. “**Sotāpattiphale vineti**”tiādi yebhuyyavasena vuttaṃ. Āyasmā hi dhammasenāpati bhikkhū yebhuyyena sotāpattiphalaṃ pāpetvā vissajjeti “evamete niyatā sambodhiparāyaṇā”ti. Āyasmā pana mahāmoggallāno “sabbāpi bhavūpapatti jigucchitabbāvā”ti bhikkhū yebhuyyena uttamattaṃyeva pāpeti.

Sāvakehi vinetuṃ sakkuṇeyyā sāvakaveneyyā nāma na sāvakeheva vinetabbāti dassento āha “**sāvakaveneyyā nāmā**”tiādi. **Dasadhā mātikaṃ ṭhāpetvāti** ekakato paṭṭhāya yāva dasakā dasadhā dasadhā mātikaṃ ṭhāpetvā **vibhattoti dasuttaro**. **Dasuttaro gatotipi dasuttaroti** ekakato paṭṭhāya yāva dasakā dasahi uttaro adhiko hutvā gato pavattotipi dasuttaro. **Ekekasmim pabbeti** ekakato paṭṭhāya yāva dasakā dasasu pabbesu ekekasmim pabbe. **Dasa dasa pañhāti** “katamo dhammo bahukāro appamādo kusalesu dhammesū”tiādinā dasa dasa pañhā. **Visesitāti** vissajjitā. **Dasuttaraṃ pavakkhāmīti** desiyamānaṃ desanaṃ nāmakittanamukhena paṭijānāti vaṇṇabhaṇanattaṃ. **Pavakkhāmīti** pakārehi vakkhāmi. Tathā hettha paññāsādhikānaṃ pañcannaṃ pañhasatānaṃ vasena desanā pavattā. **Dhammanti** idha **dhamma**-saddo pariyattipariyāyo “idha bhikkhu dhammaṃ pariyāpuṇāti”tiādīsu (a. ni. 5.73) viya. Suttalakkaṇo cāyaṃ **dhammoti** āha “**dhammanti sutta**”nti. Svāyaṃ dhammo yathānusiṭṭhaṃ paṭipajjamānassa nibbānavaho. Tato eva vaṭṭadukkasamucchedāya hoti, sa cāyamassa ānubhāvo sabbesaṃ khandhānaṃ pamocanupāyabhāvatoti dassento “nibbānappattiyā”tiādimāha. Tena vuttaṃ “**nibbānappattiyā**”tiādi.

**Uccaṃ karontoti** udaggaṃ ulāraṃ paṇītaṃ katvā dassento, paggaṇhantoti attho. **Pemaṃ janentoti** bhattim uppādentoti. Idañca desanāya paggaṇhanaṃ buddhānampi āciṇṇaṃ evāti dassento “**ekāyano**”tiādimāha.



## Ekadhammavaṇṇanā

351. (Ka) **kāra**-saddo upa-saddena vināpi upakāratthaṃ vadati, “bahukārā, bhikkhave, mātāpitaro puttāna”ntiādīsu (a. ni. 2.34) viyāti āha “**bahukāroti bahūpakāro**”ti.

(Kha) vaḍḍhane vutte nānantariyatāya uppādanam vuttameva hotīti “**bhāvetabboti vaḍḍhetabbo**”ti vutto. Uppādanapubbikā hi vaḍḍhanāti. Nanu ca “**eko dhammo uppādetabbo**”ti uppādanam pettha visum gahitam evāti? Aññavisayattā tassa nāyam virodho. Tathā hi “**eko dhammo pariññeyyo**”ti tīhipi pariññāhi pariññeyyataṃ vatvāpi “**eko dhammo pahātabbo**”ti pahātabbatā vuttā.

(Ga) **tīhi pariññāhīti** nātātīraṇapahānapariññāhi.

(Gha) **pahānānupassanāyāti** pajahanavasena pavattāya anupassanāya. Missakavasena cetam anupassanāgahaṇam daṭṭhabbam.

(Ŋa) sīlasampadādīnam parihānāvaho **parihānāya samvattanako**.

(Ca) jhānādivisesam gametīti **visesagāmī**.

(Cha) **duppacakkhakaroti** anupacitaññasambhārehi paccakkham kātuṃ asakkuṇeyyo.

(Jha) **abhijānitabboti** abhimukham ñāṇena jānitabbo.

**Sabbattha mātīkāsūti** dukādivasena vuttāsu sabbāsu mātīkāsu. Ettha ca āyasmā dhammasenāpati te bhikkhū bhāvanāya niyojetvā uttamatthe patiṭṭhāpetukāmo paṭhamam tāva bhāvanāya upakāradhammam uddesavasena dassento “eko dhammo bahukāro”ti vatvā tena upakarakena upakattabbam dassento “eko dhammo bhāvetabbo”ti āha. Ayañca bhāvanā vipassanāvasena icchitāti āha “eko dhammo pariññeyyo”ti. Pariññā ca nāma yāvadeva pahātabbapajahanatthāti āha “eko dhammo pahātabbo”ti. Pajahantena ca hānabhāgiyam nīharitvā visesabhāgiye avatṭhātabbanti āha “eko dhammo hānabhāgiyo, eko dhammo visesabhāgiyo”ti. Visesabhāgiye avatṭhānañca duppaṭivijjhanena, duppaṭivijjhapaṭivijjhanañce ijjhāti, nipphādetabbanipphādanam siddhameva hotīti āha “eko dhammo duppaṭivijjho, eko dhammo uppādetabbo”ti. Tayidaṃ dvayam abhiññeyyādi jānanena hotīti āha “eko dhammo abhiññeyyo”ti. Abhiññeyyañce abhiññātam, sacchikātabbam sacchikatameva hotīti. Ettāvata ca niṭṭhitakiccova hoti, nāssa uttari kiñci karaṇīyanti evam tāva mahāthero ekakavasena tesam bhikkhūnam paṭipattividhiṃ uddisanto imāni dasa padāni iminā anukkamena uddisi.

(Ka) evam aniyamato uddiṭṭhadhamme sarūpato niyametvā dassetum “katamo eko dhammo”tiādīnā desanam ārabhi. Tena vuttam “**iti āyasmā sārīputto**”tiādi. Esa nayo dukādīsu. **Veḷukāroti** veno. So hi veḷuvikārehi kilañjādikaraṇena “veḷukāro”ti vutto. Anto, bahi ca sabbagatagaṇṭhiṃ nīharaṇena **niggaṇṭhiṃ katvā. Ekekakoṭṭhāseti** ekakādīsu dasasu koṭṭhāsesu ekekasmim koṭṭhāse.

**Sabbatthakam upakarakanti** sabbatthakameva sammā paṭipattiyā upakāravantaṃ. Idāni tamattham vitthārato dassetum “**ayañhi**”tiādi vuttam. **Vipassanāgabbham gaṇhāpaneti** yathā upari vipassanā paripaccati tikkhā visadā hutvā maggena ghaṭeti, evam pubbhāgavipassanāvaḍḍhane. **Atthapaṭisambhidādisūti** atthapaṭisambhidādisu nipphādetabbesu, tesam sambhārasambharaṇanti attho. Esa nayo ito paresupi. **Ṭhānāṭṭhānesūti** ṭhāne, aṭṭhāne ca jānitabbe. **Mahāvihārasamāpattiyanti** mahatīyam jhānādivihārasamāpattiyam. **Vipassanāññādisūti** ādi-saddena manomayiddhi ādikāni saṅgaṇhāti. **Aṭṭhasu vijjāsūti ambaṭṭhasutte** (dī. ni. 1.279) āgatanayāsu aṭṭhasu vijjāsu.

Teneva bhagavā thometīti yojanā. **Nanti** appamādaṃ.

**Thāmasampannenā**ti ñāṇabalasamannāgatena. **Dīpetvā**ti “evampi appamādo kusalānaṃ dhammānaṃ sampādane bahupakāro”ti pakāsetvā. Yaṃ kiñci anavajjapakkhikamatthaṃ appamāde pakkhipitvā kathetuṃ yuttanti dassetuṃ “**yaṃ kiñci**”tiādi vuttaṃ.

(Kha) **kāyagātāsati**ti rassaṃ akatvā niddeso, niddesena vā etaṃ samāsapadaṃ daṭṭhabbaṃ. “Aṭṭhikāni puñjakitāni terovassikāni...pe... pūtīni cuṇṇikajātāni”ti (dī. ni. 2.379) evaṃ pavattamanasikāro “**cuṇṇikamanasikāro**”ti vadanti. Apare pana bhaṇanti “cuṇṇikairiyāpathesu pavattamanasikāro”ti. **Ettha uppannasatiyā**ti etasmim yathāvutte ekūnatimsavidhe ṭhāne uppannāya satiyā. **Sukhasampayuttā**ti nippariyāyato sukhasampayuttā, pariyāyato pana catutthajjhāne upekkhāpi “sukha”nti vattabbaṃ labhati santasabhāvattā.

(Ga) paccayabhūto ārammaṇādivisayopi ārammaṇabhāvena vaṇo viya āsave paggharati, so sampayogasambhavābhāvepi saha āsavehīti **sāsavo**. Tathā upādānaṃ hitoti **upādāniyo**. Itarathā pana paccayabhāvena vidhi paṭikkhepo.

(Gha) **asmīti mānoti** “asmī”ti pavatto māno.

(Ca) **vipariyāyenā**ti “anicce anicca”ntiādinā nayena pavatto pathamanasikāro.

(Cha) **idha pana vipassanānantaro maggo “ānantariko cetosamādhi”ti adhippeto**. Kasmā? **Vipassanāya anantarattā, attano vā** pavattiyā **anantaraṃ phaladāyakattā**. Saddatthato pana anantaraṃ phalaṃ **anantaraṃ**, tasmim anantare niyuttā, taṃ vā arahati, anantarapayojanoti vā **ānantariko**.

(Ja) **phalanti phalapaññā. Paccavekkhaṇapaññā adhippetā** akuppārammaṇatāya.

(Jha) attano phalaṃ āharatīti **āhāro**, paccayoti āha “**āhāraṭṭhitikāti paccayaṭṭhitikā**”ti. **Ayaṃ eko dhammoti** ayaṃ paccayasāṅkhāto eko dhammoti paccayatāsamaññaena ekaṃ katvā vadati. **Ñātapariññāya abhiññāyā**ti ñātapariññāsāṅkhātāya abhiññāya.

(Ña) **akuppā cetovimuttīti arahattaphalavimutti** akuppabhāvena ukkaṃsagattā. Aññathā sabbāpi phalasaṃpattiyā akuppā eva paṭipakkhehi akopaniyattā.

**Abhiññāyā**ti “abhiññeyyo”ti ettha laddhaabhiññāya. **Pariññāyā**ti etthāpi eseva nayo. **Pahātabbasacchikātabbhe**ti pahātabbasacchikātabbapadehi. **Pahānapariññāva** kathitā pahānasacchikiriyaṇaṃ ekāvāratāya pariññāya saheva ijjanato. **Sacchikātabboti** visesato **phalaṃ kathitaṃ. Ekasmimyeva** sattame eva **pade labbhati. Phalaṃ pana anekesupi padesu labbhati** paṭhamatṭhamanavamadasamesu labbhanato. Yasmā taṃ nippariyāyato dasame eva labbhati, itaresu pariyāyato tasmā “**labbhati evā**”ti sāsāṅkaṃ vadati.

**Sabhāvato vijjamānā**ti yena bahukārādisabhāvena desitā, tena sabhāvena paramatthato upalabbhamānā. **Yāthāvā**ti aviparītā. **Tathāsabhāvā**ti taṃsabhāvā. **Na tathā na hontī**ti avitathattā tathāva honti. Tato eva **vuttappakārato aññathā na** hontīti pañcahipi padehi tesam dhammānaṃ yathābhūtameva vadati. **Sammā**ti ñāyena. Yaṃ pana ñātaṃ, taṃ hetuyuttaṃ kāraṇayuttameva hotīti āha “**hetunā kāraṇenā**”ti. **Okappanaṃ janesī**ti jinavacanabhāvena abhippasādaṃ uppādesi.

Ekadhammavaṇṇanā niṭṭhitā.

## Dvedhammavaṇṇanā

**352.** (Ka) “sabbatthā” ti idaṃ “sīlapūraṇādīsū” ti etena saddhiṃ sambandhitabbaṃ. “**Sīlapūraṇādīsū sabbattha appamādo viya upakārakā**” ti etena satisampajaññānampi appamādassa viya sabbattha upakārakatā pakāsītā hoti atthato nātilakkhaṇattā tato tesam. Satiavippavāso hi appamādo, so ca atthato sabbattha avijahitā sati eva, sā ca kho ñāṇasampayuttā eva daṭṭhabbā, itarāya tathārūpasamatthatābhāvato.

(Kha) tesam pañcasatamattānaṃ bhikkhūnaṃ pubbabhāgaṭṭhavasena desitattā **pubbabhāgā kathitā**.

(Cha) **ayonisomanasikāro** saṃkilesassa mūlakāraṇabhāvena pavatto **hetu**, paribrūhanabhāvena pavatto **paccayo**. **Yonisomanasikārepi** eseva nayo. Yathā ca sattānaṃ saṃkilesāya, visuddhiyā ca paccayabhūtā ayonisomanasikāro, yonisomanasikāroti “ime dve dhammā duppaṭivijjhā” ti ettha nīharitvā vuttā, evaṃ imehi dhammā nīharitvā vattabbāti dassento “**tathā**” ti adimāha. Tattha asubhajjhānādayo cattāro **visaṃyogā** nāma kāmāyogāḍipāṭipakkhabhāvato. “**Evam pabhedā**” ti iminā “avijjābhāgino dhammā, vijjābhāgino dhammā, kaṇhā dhammā, sukkā dhammā” ti (dha. sa. 101, 104) evamādānaṃ saṅgaho daṭṭhabbo.

(Jha) paccayehi samecca sambhuyya katattā pañcakkhandhā **saṅkhatā dhātu**. Kenaci anabhisāṅkhatattā nibbānaṃ **asaṅkhatā dhātu**.

(Ña) tisso vijjā vijjanaṭṭhena, viditakaraṇaṭṭhena ca **vijjā**. **Vimuttīti arahattaphalaṃ** paṭipakkhato sabbaso vimuttattā.

**Abhiññādīnīti** abhiññāpaññādīni. **Ekakasadisāneva** purimavāre viya vibhajja kathetabbato. **Maggo kathitoti** ettha “maggo kathito” ti evamatthaṃ aggahetvā “maggo kathitovā” ti evamattho gahetabbo “anuppāde ñāṇa” nti iminā phalassa gahitattā. **Sacchikātabbapade phalaṃ kathitanti** etthāpi “phalameva kathita” nti aggahetvā “phalaṃ kathitamevā” ti attho gahetabbo vijjāggahaṇena tadaññassa saṅgahitattā. Esa nayo ito paresupi evarūpesu ṭhānesu.

Dvedhammavaṇṇanā niṭṭhitā.

## Tayodhammavaṇṇanā

**353.** (Cha) soti anāgāmi maggo. **Sabbaso kāmānaṃ nissaraṇaṃ** samucchēdavasena pajahanato. **Āruppe arahattamaggo** nāma arūpajjhānaṃ pādaṃ katvā uppanno aggamaggo. **Puna uppattinivāraṇatoti** rūpānaṃ uppattiyā sabbaso nivāraṇato. Nirujjhanti saṅkhārā etenāti **nirodho**, aggamaggo. Tena hi kilesavatte nirodhite itarampi vaṭṭadvayaṃ nirodhitameva hoti. Tassa pana nirodhassa pariyoṣanattā aggapalaṃ “nirodho” ti vattabbataṃ labbhatīti āha “**arahattaphalaṃ nirodhoti adhippeta**” nti. “**Arahattaphalena hi nibbāne diṭṭhe**” ti idaṃ arahattamaggena nibbānadassanassāyaṃ nibbattīti katvā vuttam. Evañca katvā “arahattasaṅkhātanirodhassa paccayattā” ti idampi vacanaṃ samatthitaṃ hoti.

(Ja) **atītaṃ sārammaṇanti** atītakotṭhāsārammaṇaṃ ñāṇaṃ, atīta khandhāyatanadhātuyo ārabha pavattanakaññānti attho. “Maggo kathitovā” ti avadhāraṇaṃ daṭṭhabbaṃ, tathā “sacchikātabbe phalaṃ kathitamevā” ti.

(Ña) **āsavānaṃ khaye ñāṇanti** ca āsavānaṃ khayante ñāṇanti adhippāyo, aññathā maggo kathito siyā.

Tayodhammavaṇṇanā niṭṭhitā.

### Catudhammavaṇṇanā

354. (Ka) dārumayaṃ cakkam **dārucakkam**, tathā **ratanacakkam**. Āṇaṭṭhena dhammo eva **dhammacakkam**. Iriyāpathānaṃ aparāparappavattito **iriyāpathacakkam**, tathā **sampatticakkam** veditabbaṃ.

**Anucchavike** deseti puññakiriyāya, sammāpaṭipattiyā anurūpadese. **Sevanam** kālena kālam upasaṅkamaṇaṃ. **Bhajanam** bhattivaseṇa payirupāsaṇaṃ. **Attano sammā ṭhapananti** attano cittasāntānaṃ yoniso ṭhapanam saddhādīsu nivesananti āha “**sace**”tiādi. **Idamevettha pamāṇanti** idameva pubbekatapuññatāsaṅkhātāṃ sampatticakkamettha etesu sampatticakkesu pamāṇabhūtaṃ itaresaṃ kāraṇabhāvato. Tenāha “**yena hī**”tiādi. **So eva ca** katapuñño **puggalo** attānaṃ **sammā ṭhabeti** akatapuññassa tadabhāvato. **Paṭhamo lokiyova**, tathāpi kāmāvacarova. **Idhāti** imasmiṃ dasuttarasutte. **Pubbabhāge lokiyāvāti** maggassa pubbabhāge pavattanakā lokiyā eva. Tatha kāraṇaṃ vuttameva.

(Ca) kāmāyogavisamāyogo anāgāmiṃ maggo, diṭṭhiyogavisamāyogo sotāpattimaggo, itare dve arahattamaggoti evaṃ **anāgāmiṃ maggādivasena veditabbā**.

(Cha) **paṭhamassa jhānassa lābhinti** yvāyaṃ appaṇaṇassa paṭhamassa jhānassa lābhī, taṃ. **Kāmasahagatā saññāmanasikārā samudācarantīti** tato vuṭṭhitaṃ ārammaṇavasena kāmasahagatā hutvā saññāmanasikārā samudācaranti codenti tudenti. Tassa kāmānupakkhandānaṃ saññāmanasikārānaṃ vasena so paṭhamajjhānasamādhi hāyati parihāyati, tasmā “**hānabhāgiyo samādhi**”ti vutto. **Tadanudhammatāti** tadanurūpasabhāvo. “**Sati santiṭṭhati**”ti idaṃ micchāsatiṃ sandhāya vuttaṃ. Yassa hi paṭhamajjhānānurūpasabhāvā paṭhamajjhānaṃ santato paṇītato disvā assādayamānā apekkhamānā abhinandamānā nikanti hoti, tassa nikantivasena so paṭhamajjhānasamādhi neva hāyati, na vaḍḍhati, ṭhitikoṭṭhāsiko hoti, tena vuttaṃ “**ṭhitibhāgiyo samādhi**”ti.

**Avitakkasahagatāti** avitakkaṃ dutiyajjhānaṃ santato paṇītato manasi karoto ārammaṇavasena avitakkasahagatā **saññāmanasikārā**. **Samudācarantīti** paṇaṇapaṭhamajjhānato vuṭṭhitaṃ dutiyajjhānādhiḡamatthāya codenti tudenti, tassa upari dutiyajjhānupakkhandānaṃ saññāmanasikārānaṃ vasena so paṭhamajjhānasamādhi visesabhūtaṃ dutiyajjhānassa uppattipadaṭṭhānatāya “**visesabhāgiyo samādhi**”ti vutto. **Nibbidāsahagatāti** tameva paṭhamajjhānalābhim jhānato vuṭṭhitaṃ nibbidāsaṅkhātānaṃ vipassanāñāṇaṃ sahagatā. Vipassanāñāṇāṃ jhānaṅgesu pabhedena upaṭṭhahantesu nibbindati ukkaṇṭhati, tasmā “**nibbidā**”ti vuccati. **Samudācarantīti** nibbānasacchikaraṇatthāya codenti tudenti. **Virāgūpasañhitoti** virāgasāṅkhātānaṃ nibbānaṃ upasañhito. Vipassanāñāṇāṃ “**sakkā iminā maggena virāgaṃ nibbānaṃ sacchikātu**”nti pavattito “**virāgūpasañhita**”nti vuccati, taṃsāmpayuttā saññāmanasikārāpi virāgūpasañhitā eva nāma. Tassa tesāṃ saññāmanasikārānaṃ vasena so paṭhamajjhānasamādhi ariyamaggapaṭivedhassa padaṭṭhānatāya “**nibbedhabhāgiyo samādhi**”ti vutto. **Sabbasamāpattiyoti** dutiyajjhānādikā sabbā samāpattiyō. **Attho veditabboti** hānabhāgiyādiattho tāva vitthāretvā veditabbo.

**Maggo kathito** catunnaṃ ariyasaccānaṃ uddhaṭattā. **Phalam** kathitaṃ sarūpeneva.

Catudhammavaṇṇanā niṭṭhitā.

### Pañcadhammavaṇṇanā

355. (Kha) “**pañcaṅgiko sammāsamādhi**”ti samādhiaṅgabhāvena paññā uddiṭṭhāti pītipharaṇatādivacanena hi tameva vibhajati. Tenāha “**pītiṃ pharamānā uppajjati**”tiādi. “So imameva

kāyaṃ vivekajena pītisukhena abhisandeti’’tiādinā (ma. ni. 1.427) nayena pītiyā, sukhasa ca pharaṇaṃ veditabbaṃ. Sarāgavirāgatādivibhāgadassanavasena **paesaṃ ceto pharamānā. Ālokapharaṇeti** kasiṇālokassa pharaṇe sati teneva ālokena pharitappadese. Tassa samādhissa rūpadassanapaccayattā **paccavekkhaṇāṇaṃ paccavekkhaṇanimittāṃ.**

**Pītipharaṇatā sukhapharaṇatā**ti ārammaṇe ṭhatvā catutthajjhānassa uppādanato tā “**pādā viyā**’’ti vuttā. **Cetopharaṇatā ālokapharaṇatā**ti taṃtaṃkiccasādhanaṇato tā “**hatthā viyā**’’ti vuttā. **Abhiññāpādakajjhānaṃ** samādhānassa sarīrabhāvato “**majjhimakāyo viyā**’’ti vuttā. **Paccavekkhaṇanimittāṃ** uttamaṅgabhāvato “**sīsaṃ viyā**’’ti vuttā.

(Ja) sabbaso kilesadukkhadarathapariḷāhānaṃ vigatattā lokiyasamādhissa sātisaṃmettha sukhaṇti vuttā “**appitappitakkhaṇe sukhattā paccuppannasukho**’’ti. Purimassa purimassa vasena pacchimaṃ pacchimaṃ laddhāsevanatāya santatarapaṇitatarabhāvappatti hotīti āha “**purimo purimo... pe... sukhavipāko**’’ti.

**Kilesapaṭippassaddhiyā**ti kilesānaṃ paṭippassambhanaṇa laddhattā. **Kilesapaṭippassaddhibhāvanti** kilesānaṃ paṭippassambhanaṇabhāvaṃ. **Laddhattā** pattattā tabbhāvaṃ upagatattā. Lokiyasamādhissa paccanīkāni nīvaraṇapaṭhamajjhānanikantiādinī niggahetabbāni, aññe kilesā vāretabbā, imassa pana arahattasamādhissa paṭippassaddhasabbakilesattā na niggahetabbā, vāretabbāṇca atthīti maggānantaraṃ samāpattikkhaṇe ca appayogena adhigatattā, ṭhapitattā ca aparihānavasena vā ṭhapitattā **nasaṅkhāraniggayhavārivāṇo**. “**Sativepullappattattā**’’ti etena appavattamānāyapi satiyā satibahulatāya **sato eva** nāmāti dasseti, “**yathāparicchinnakālavasenā**’’ti etena paricchindanasatiyā **satoti** dasseti. **Sesesu** ñāṇaṅgesu. **Pañcañāṇikoti** ettha vuttasamādhimukhena pañca ñāṇāneva uddiṭṭhāni, niddiṭṭhāni ca.

**Maggo kathito** indriyasīsenā sammāvāyāmādīnaṃ kathitattā. **Phalaṃ** kathitaṃ asekkhānaṃ sīlakkhandhādīnaṃ kathitattā.

Pañcadhammavaṇṇanā niṭṭhitā.

### Chadhammavaṇṇanā

**356. Maggo kathitoti** ettha vattabbaṃ heṭṭhā vuttameva.

### Sattadhammavaṇṇanā

**357.** (Ña) **hetunā**ti ādiantavantato, anaccantikato, tāvakālikato, nīcappaṭikkhepatoti evaṃ ādinā hetunā. **Nayenā**ti “yathā ime saṅkhārā etarahi, evaṃ atīte, anāgate ca aniccā saṅkhatā paṭiccasamuppannā khayadhammā vayadhammā virāgadhammā nirodhadhammā’’ti atītānāgatesu nayanāyena. Kāmaṃ khīṇāsavassa sabbesaṃ saṅkhārānaṃ aniccatādi sudiṭṭhā suppaṭividdhā, taṃ pana asamghanavasena kiccatō, vipassanāya pana ārammaṇakaraṇavasenāti dassento āha “**vipassanāñāṇena sudiṭṭhā hontī**’’ti. Kilesavasena uppajjamāno pariḷāho vatthukāmasannissayo, vatthukāmāvassayo cāti vuttā “**dvepi sapariḷāhaṭṭhena aṅgārakāsu viyā**’’ti. **Ninnassevā**ti [ninnassa (aṭṭhakathāyaṃ)] ninnabhāvassava. **Anto** vuccati lāmakatṭhena taṇhā. Byantaṃ vigatantaṃ bhūtanti **byantibhūtanti** āha “**niratibhūtaṃ**, [niyatibhūtaṃ (aṭṭhakathāyaṃ)] vigatantibhūtaṃ (?) **Nittaṇhanti attho**’’ti. **Idha** sattaṃ. **Bhāvetabbapade maggo kathito** bojjaṅgānaṃ vuttattā.

Paṭhamabhāṇavāraṇṇanā niṭṭhitā.

### Aṭṭhadhammavaṇṇanā

**358.** (Ka) **ādibrahmacariyikāyāti** ādibrahmacariyā eva ādibrahmacariyikā yathā “vinayo eva venayiko”ti, tassā ādibrahmacariyikāya. Kā pana sāti āha “**paññāyā**”ti. **Sikkhattayasāṅghassāti** adhisīlasikkhādisikkhattayasāṅghassa. Upacārajjhānasahagatā taruṇasamathapaññāva udayabbayānupassanāvasena pavattā **taruṇavipassanāpaññā** [taruṇasamathavipassanāpaññā (aṭṭhakathāyaṃ)]. **Ādibhūtāyāti** paṭhamāvayavabhūtāya, desanāvasena cetam vuttam. Uppattikāle pana natthi maggadhammānaṃ ādimajjhapariyosānatā ekacittuppādapariyāpannattā ekajjhamyeva uppajjanato. **Pemanti** dalhabhatti, taṃ pana vallabhavasena pavattamānaṃ gehasitasadisam hotīti “**gehasitapema**”nti vuttam. Garukaraṇavasena pavattiyā garu cittaṃ etassāti **garucitto**, tassa bhāvo **garucittabhāvo**, garumhi garukāro. “Kilesā na uppajjanti”ti vatvā tatha kāraṇamāha “**ovādānusāsaniṃ labhati**”ti. Garūnañhi santike ovādānusāsaniṃ labhitvā yathānusitṭham paṭipajjantassa kilesā na uppajjanti. Tenāha “**tasmā**”tiādi.

(Cha) **petāti** petamahiddhikā. **Asurānanti** devāsuraṇaṃ. Petāsuraṇa pana petā evāti tesam petehi saṅgaho avuttasiddhova. **Āvāhanaṃ gacchantīti** sambhogasaṃsaggamukhena peteheva asuraṇaṃ saṅgahaṇe kāraṇaṃ dasseti.

(Ja) **appicchassāti** niicchassa. Abhāvattho hettha appa-saddo “appaḍaṃsamakasavātātapā”tiādīsu (a. ni. 10.11) viya. Paccayesu appiccho **paccayaappiccho**, cīvarādipaccayesu icchārahito. **Adhigamaappiccho**ti jhānādiadhigamavibhāvane icchārahito. **Pariyattiappiccho**ti pariyattiyam bāhusaccavibhāvane icchārahito. **Dhutaṅgaappiccho**ti dhutaṅgesu appiccho dhutaṅgavibhāvane icchārahito. **Santaguṇanigūhanenāti** attani saṃvijjamānānaṃ jhānādiguṇānañceva bāhusaccaguṇassa ca dhutaṅgaguṇassa ca nigūhanena chādanena. **Sampajjati**ti nippajjati sījhati. **No mahicchassāti** mahatiyā icchāya samannāgatassa, iccham vā mahantassa no sampajjati anudhammassāpi anicchanato.

**Pavivittassāti** pakārehi vivittassa. Tenāha “**kāyacittaupadhivivekehi vivittassā**”ti. “**Aṭṭhaārambhavattuvasenā**”ti etena bhāvanābhiyogavasena ekībhāvova idha “kāyaviveko”ti adhippeto, na gaṇasaṅgaṇikābhāvamattanti dasseti. **Kammanti** yogakammaṃ.

Sattehi kilesehi ca saṅgaṇaṇaṃ samodhānaṃ **saṅgaṇikā**, sā āramitabbaṭṭhena ārāmo etassāti **saṅgaṇikārāmo**, tassa. Tenāha “**gaṇasaṅgaṇikāya cevā**”tiādi. **Āraddhavīriyassāti** paggaḥitavīriyassa, tañca kho upadhiviveke ninnatāvasena “ayaṃ dhammo”ti vacanato. Esa nayo ito paresupi. Vivattaṇassitāmyeva hi samādhānaṃ idhādhippetam, tathā paññāpi. Kammassakatāpaññāya hi paṭiṭṭhato kammavasena “bhavesu nānappakāro anatto”ti jānanto kammakkhayakaraññaṃ abhipattheti, tadatthañca ussāham karoti. Mānādayo sattasantānaṃ saṃsāre papañcenti vitthārentīti **papañcāti** āha “**nippapañcassāti vigatamānatanhādiṭṭhipapañcassā**”ti.

**Maggo kathito** sarūpeneva.

### Navadhammavaṇṇanā

**359.** (Kha) **visuddhinti** ñāṇadassanavisuddhiṃ, accantavisuddhimeva vā. **Catupārisuddhisīlanti** pātimokkhasaṃvarādinirupakkiliṭṭhatāya catubbidhāparisuddhivantaṃ sīlaṃ. **Pārisuddhipadhāniyaṅganti** puggalassa parisuddhiyā padhānabhūtaṃ aṅgaṃ. Tenāha “**parisuddhabhāvassa padhānaṅga**”nti. Samathassa visuddhibhāvo vodānaṃ paguṇabhāvane paricchinnanti āha “**aṭṭha paguṇasamāpattiyo**”ti. Vigatupakkilesaṃhi “paguṇa”nti vattabataṃ labbhati, na saupakkilesaṃ hānabhāgiyādhivāpattito. Sattadiṭṭhimalavisuddhito nāmarūpāparicchedo **diṭṭhivisuddhi**. Paccayapariggaho addhattayakaṅkhāmalavidhānato **kaṅkhāvitaraṇavisuddhi**. Yasmā **nāmarūpaṃ** nāma sappaccayameva, tasmā taṃ pariggaṇhantena atthato tassa sappaccayatāpi pariggahitā eva hotīti vuttam “**diṭṭhivisuddhīti sappaccayaṃ nāmarūpadassana**”nti. Yasmā pana nāmarūpassa paccayaṃ pariggaṇhantena tīsu addhāsu kaṅkhāmalavitarāṇapaccayākārāvabodhavaseneva hoti, tasmā “**paccayākārañña**”ntiādi vuttam yathā kaṅkhāvitaraṇavisuddhi “dhammaṭṭhitiñña”nti

vuccati. **Maggāmagge ñāṇanti** maggāmagge vavatthapetvā ṭhitañāṇaṃ. **Ñāṇanti** idha taruṇavipassanā kathitā tesam bhikkhūnaṃ ajjhāsavayasena “ñāṇadassanavisuddhī”ti vuṭṭhānagāminiyā vipassanāya vuccamānattā. Yadi “ñāṇadassanavisuddhī”ti vuṭṭhānagāminivipassanā adhippetā, “paññā”ti ca arahattaphalapaññā, maggo pana kathanti? Maggo bahukārapade virāgaggahaṇena gahito. Vakkhati hi “idha bahukārapade maggo kathito”ti (dī. ni. aṭṭha. 3.359).

(Cha) **cakkhādidhātunānattanti** cakkhādirūpādicakkhuviññāṇādidhātūnaṃ vemattataṃ nissāya. **Cakkhusamphassādinānattanti** cakkhusamphassasotasamphassaghānasamphassādisamphassavibhāgaṃ. **Saññānānattanti** ettha rūpasaññādisaññānānattampi labbhateva, taṃ pana kāmasaññādiggaṇeṇeva gayhati. **Kāmasaññādīti ādi-**saddena byāpādasaññādīnaṃ gahaṇaṃ. Saññānidānattā papañcasāṅkhānaṃ “saññānānattam paṭicca saṅkappanānatta”nti vuttaṃ, “yaṃ saṅkappeti, taṃ papañceti”ti vacanato “saṅkappanānattam paṭicca chandanānatta”nti vuttaṃ. **Chandanānattanti** ca taṇhāchandassa nānattam. **Rūpapariḷāhoti** rūpavisayo rūpābhipatthanāvasena pavatto kilesapariḷāho. **Saddapariḷāhoti** etthāpi eseva nayo. Kilesa hi uppajjamāno appattepi ārammaṇe patto viya pariḷāhova uppajjati. Tathābhūtaṃ pana kilesachandassa vasena rūpādi pariyesanā hotīti āha “**pariḷāhanānattatāya rūpāriyesanādinānattam uppajjati**”ti. Tathā pariyesantassa sace taṃ rūpādi labbheyya, taṃ sandhāyāha “**pariyesanādinānattatāya rūpāṭilābhādinānattam uppajjati**”ti.

(Ja) **maraṇānupassanāñāṇeti** maraṇassa anupassanāvasena pavattañāṇe, maraṇānussatisahagatapaññāyāti attho. **Āhāraṃ pariggaṇhantassāti** gamanādivasena āhāraṃ paṭikkūlato pariggaṇhantassa. **Ukkaṇṭhantassāti** nibbindantassa katthacipi asajjantassa.

### Dasadhammavaṇṇanā

**360.** (Jha) **nijjarakāraṇānīti** pajahanakāraṇāni. Imasmiṃ **abhiññāpade** maggo kathiyatīti katvā “**ayaṃ heṭṭhā..pe... puna gahitā**”ti vuttaṃ. Tathā hi vakkhati “idha abhiññāpade maggo kathito” (dī. ni. aṭṭha. 3.360) kiñcāpi nijjiṇṇā micchādīṭṭhīti ānetvā sambandhitabbaṃ. Yathā micchādīṭṭhi vipassanāya nijjiṇṇāpi na samucchinnāti samucchadappahānadassanattam puna gahitā, evaṃ micchāsāṅkappādayopi vipassanāya pahīnāpi asamucchinnatāya idha puna gahitāti ayamatto “micchāsāṅkappo”tiādīsu sabbapadesu vattabboti dasseti “**evaṃ sabbapadesu nayo netabbo**”ti iminā.

**Ettha cāti** “sammāvimuttipaccayā ca aneke kusalā dhammā bhāvanāpāripūriṃ gacchantī”ti etasmiṃ pāḷipade. Ettha ca samucchadavasena, paṭippassaddhivasena ca paṭipakkhadhammā sammadeva vimuccanaṃ **sammāvimutti**, tappaccayā ca maggaphalesu aṭṭha indriyāni bhāvanāpāripūriṃ upagacchantīti maggasampayuttānīpi saddhādīni indriyāni uddhaṭāni. Maggavasena hi phalesu bhāvanā pāripūrī nāmāti. **Abhinandanatṭhenāti** ativiya sinehanatṭhenidañhi. Somanassindriyaṃ ukkaṃsagatasātasabhāvaṃ sampayuttadhamme sinehantaṃ tementaṃ viya pavattati. **Pavattasantatiādhipateyyatṭhenāti** vipākasantānassa jīvane adhipatibhāvena. “**Eva**”ntiādi vuttasseva atthassa nigamaṇaṃ.

Addhena saha chaṭṭhāni pañhasatāni, paññāsādhikāni saha pañhasatānīti attho.

Ettha ca āyasmā dhammasenāpati “dasasu nāthakaraṇadhammesu patiṭṭhāya dasakasiṇāyatanāni bhāvento dasaāyatanamukhena pariññāṃ paṭṭhapetvā pariññeyyadhamme parijānanto dasamicchatte, dasaakusalakammāpathe ca pahāya dasakusalakammāpatthesu ca avatṭhito dasasu ariyāvāsesu āvasitukāmo dasasaññā uppādentō dasanijjaravatthūni abhiññāya dasaasekkhadhamme adhigacchatī”ti tesam bhikkhūnaṃ ovādaṃ matthakaṃ pāpento desanaṃ niṭṭhapesi. Pamodavasena paṭiggaṇhanaṃ **abhinandananti** āha “**sādhū sādhūti abhinandantā sirasā sampaṭicchimsū**”ti. **Tāya attamanatāyāti** tāya yathādesitadesanāgatāya pahaṭṭhacittatāya, tattha yathāladhaatthavedadhammavedehīti attho.

**Imameva suttaṃ āvajjamānāti** imasmiṃ sutte tattha tattha āgate abhiññeyyādibhede dhamme abhijānanādivasena samannāharantā. **Saha paṭisambhidāhi...pe... paṭiṭṭhahimsūti** attano upanissayasampannatāya, therassa ca desanānubhāvena yathāraddhaṃ vipassanaṃ ussukketvā paṭisambhidāparivārāya abhiññāya saṅṭhahimsūti.

Sumaṅgalavilāsiniyā dīghanikāyaṭṭhakathāya

Dasuttarasuttavaṇṇanāya līnatthappakāsānā.

Niṭṭhitā ca pāthikavaggaṭṭhakathāya līnatthappakāsānā.

Pāthikavaggaṭṭhikā niṭṭhitā.

### **Nigamanakathāvaṇṇanā**

Therānaṃ mahākassapādīnaṃ vaṃso pavenī anvayo etassāti **theravaṃsanvayo**, tena; catumahānikāyesu theriyenāti attho.

Dasabalassa sammāsambuddhassa guṇagaṇānaṃ paridīpanato **dasabalaguṇagaṇaparidīpanassa**. Ayañhi āgamo brahmajālādīsu, mahāpadānādīsu, sampasādanīyādīsu ca tattha tattha visesato buddhaguṇānaṃ pakāsana vasena pavattoti. Tathā hi vuttaṃ ādito “saddhāvahaguṇassā”ti (dī. ni. aṭṭha. 1.ganthārambhakathā).

**Mahāṭṭhakathāya sāranti** dīghanikāyamahāṭṭhakathāyaṃ atthasāraṃ.

**Ekūnasatṭhimattoti** thokaṃ ūnabhāvato **matta**-saddaggaṇaṃ.

**Mūlakaṭṭhakathāsāranti** pubbe vuttaṃ dīghanikāyamahāṭṭhakathāsārameva puna nigamanavasena vadati. Atha vā **mūlakaṭṭhakathāsāranti** porāṇaṭṭhakathāsu atthasāraṃ, tenetaṃ dasseti “dīghanikāyamahāṭṭhakathāyaṃ atthasāraṃ ādāya imaṃ sumaṅgalavilāsiniṃ karonto sesamahānikāyānaṃpi mūlakaṭṭhakathāsu idha viniyogakkhamaṃ atthasāraṃ ādāyayeva akāsi”nti.

“**Mahāvihāravāsīna**”nti [mahāvihāre nivāsinaṃ (aṭṭhakathāyaṃ)] ca idaṃ purimacchimapadehi saddhiṃ sambandhitabbaṃ “mahāvihāravāsīnaṃ samayaṃ pakāsayaṃti, mahāvihāravāsīnaṃ mūlakaṭṭhakathāsāraṃ ādāya”ti ca. **Tena** puññaena. **Hotu sabbo sukhī lokoti** kāmāvacarādivibhāgo sabbopi sattaloko yathārahaṃ bodhittayādhigamanavasena sampattena nibbānasukhena sukhito hotūti sadevakassa lokassa accantasukhādhigamāya attano puññaṃ pariṇāmeti.

Parimāṇato sādhiṃkaṭṭhavīsasahassanavutibhānavārā niṭṭhitāti. Parimāṇato sādhiṃkaṭṭhavīsasahassamattagathena dīghanikāyaṭṭhikā racitācariyadhammapālena.

Micchādīṭṭhādīcorehi, sīlādīdhanasañcayā;

Rakkhaṇatṭhāya sakkaccaṃ, mañjūsaṃ viya kārīnti. (ettantare pāṭho pacchā likhito)

Niṭṭhitā sumaṅgalavilāsiniyā dīghanikāyaṭṭhakathāya līnatthappakāsānā.

Dīghanikāyaṭṭhikā niṭṭhitā.